


Tuhun tsaa tsa nacoꝝ jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

Tuhun tsaá tsa nacoꝝ jutu mañi yo Jesucristo tsi yo New Testament in Mixtec, San Juan Colorado (MX:mjc:Mixtec, San Juan Colorado)

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
c270ec54-172a-541f-83e6-7760f619c744

Contents

San Mateo	1
Marcos	72
Lucas	118
Juan	194
Los Hechos	249
Romanos	318
I Corintios	346
II Corintios	372
Gálatas	391
Efesios	401
Filipenses	411
Colosenses	418
I Tesalonicenses	425
II Tesalonicenses	431
I Timoteo	435
II Timoteo	443
Tito	449
Filemón	453
Hebreos	455
Santiago	476
I San Pedro	483
II San Pedro	491
I San Juan	496
II San Juan	503
III San Juan	504
San Judas	506
El Apocalipsis	509

Tuhun Nyoo Tsa Tyaa Ra Mateo

*Nyivi ra Jesucristo tsa tsicoo tsa ndi cumañi ca cacu ra
(Lc. 3.23-38)*

¹ Ihya nyecú tandihí sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuví tsi ra.

² Sehe ra Abraham cuví tsi ra Isaac, tan sehe ra Isaac cuví tsi ra Jacob. Tan sehe ra Jacob cuví tsi ra Judá tsihin tandihí ra yañi ra.

³ Tan ra Fares tsihin ra Zara sehe ra Judá tsihin ña Tamar cuví tsi ra naha. Tan sehe ra Fares cuví tsi ra Esrom, ra cuví jutu ra Aram.

⁴ Tan sehe ra Aram cuví tsi ra Aminadab, jutu ra Naasón. Tan sehe ra Naasón cuví tsi ra Salmón.

⁵ Tan ra Booz, sehe ra Salmón tsihin ña Rahab cuví tsi ra. Tan sehe ra Booz tsihin ña Rut cuví tsi ra Obed, jutu ra Isaí.

⁶ Tan ra David, ra cuví rey, sehe ra Isaí cuví tsi ra. Tan sehe ra rey David tsihin ñaha tsa cuví ñasihi ra Urías cuví tsi ra Salomón.

⁷ Tan sehe ra Salomón cuví tsi ra Roboam, ra cuví jutu ra Abías. Tan sehe ra Abías cuví tsi ra Aza.

⁸ Tan sehe ra Aza cuví tsi ra Josafat, ra cuví jutu ra Joram. Tan sehe ra Joram cuví tsi ra Uzías.

⁹ Tan sehe ra Uzías cuví tsi ra Jotam, ra cuví jutu ra Acáz. Tan sehe ra Acáz cuví tsi ra Ezequías.

¹⁰ Tan sehe ra Ezequías cuví tsi ra Manasés, ra cuví jutu ra Amón. Tan sehe ra Amón cuví tsi ra Josías.

¹¹ Tan sehe ra Josías cuví tsi ra Jeconías tsihin tandihí ra yañi ra. Tsicoo ra naha quivi tñin ra ñuu Babilonia naha ra tsi nyivi Israel, tsa cua cahun ñi cuví ñi musu ra ñuu Babilonia can naha ra.

¹² Tsa yaha can, tan tsicoo sehe ra Jeconías, tan ra ican cuví ra Salatiel, jutu ra Zorobabel.

¹³ Tan sehe ra Zorobabel cuví tsi ra Abiud, ra cuví jutu ra Eliaquim. Tan sehe ra Eliaquim cuví tsi ra Azor.

¹⁴ Tan sehe ra Azor cuví tsi ra Sadoc, ra cuví jutu ra Aquim. Tan sehe ra Aquim cuví tsi ra Eliud.

¹⁵ Tan sehe ra Eliud cuví tsi ra Eleazar, ra cuví jutu ra Matán. Tan sehe ra Matán cuví tsi ra Jacob.

¹⁶ Tan ra Jacob cuví jutu ra José, y# ña María. Juvin ña cuví sihi ra Jesús ra cuví Cristo, o cuñi tsi catyí, ra tsa jaquitsi Nyoo tyin quihí ndaha tsi yo.

¹⁷ Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehen cuví tan cacu ra Jesucristo: tsa yaha cundaq tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihí sehe ña tsa cuenda Tatyí li Nyoo.

¹⁹ Tan ra José, ra cua cuví y# ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacoó xeehe ra tsi ña tan ña cua tindaha ca ra tsihin ña.

²⁰ Tan tsitsi tsa tsicá iñi ra yacan, quituvj iin ángel Jutu Mañi yo nuu ra nu quixi ra. Tan nyehe ra ñumaahna, tan catyí ángel can tsihin ra:

—José, tata ra David, ña çaça iñi un quihin un tsi ña María cuvi ña ñasihi un, tyin sehe ña tsa cua cacu, sehe Tatyí Ii Nyoo cuvi tsi.

²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

²² Tacan cuvi tyin tacan tan cundaa tsa cahan ra cuvi ndusu yuhu Jutu Mañi yo tahan tsanaha.

²³ Tan catyí ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñi tsi catyí: “Nyoo iyó ra tsihin yo.”

²⁴ Tan tsa ndoto ra José, javaha ra tumaa catyí ángel can tsihin ra. Quihin ra tsi ña María tyin cuvi ña ñasihi ra.

²⁵ Maa tyin ña quixi ra tsihin ña nda cuando tsa yaha cacu sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuvi rey, cua nyehe ra naha nu cacu ra Jesús

¹ Cacu ra Jesús ñuu Belén tsa canyí nu cuvi Judea. Tan quivi can ra cuvi rey Judea nañi ra Herodes. Tacan tan saaj juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuvi ra naha.

² Tsicá tuhun ra naha tsi nyivi tan catyí ra naha:

—¿Nu maa nyii ra cuvi rey cuando nyivi Israel? Tyin ityi nu caná ñicanyii nyehe ndi tiñuu tsa tsahá cuando tyin cacu ra ityi ihya. Tan vatsí ndi vatsí jacahnu ndi tsi ra —catyí ra naha.

³ Quivi tsa tsito ra rey Herodes tsa cahan ra can naha ra, tuñu xaan cuñi ra cuvi. Tacan tucu tandihi nyivi ñuu Jerusalén can.

⁴ Tacan tan cana ra Herodes tsi tandihi ra jutu tsa cuvi ityi nuu tsihin ra cuvi jutu tan tsihin tandihi ra cuvi maestro cuando ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo.

⁵ Tan nacahan ra can naha ra tan catyí ra naha:

—Ñuu Belén tsa canyí Judea, ndacan taahán tsi cacu ra tyin tyehen tyaa ra cuvi ndusu yuhu Nyoo nu tutu tahan tsanaha:

⁶ Tan yooho Belén ñavin iin ñuu luhlu ñi cuvi un tsa nuu tandihi maa ñuu tsa cayucu Judá tyin nuu yooho cua quita ra cua quihí ndaha tsi nyivi ñuu yu Israel. Maa ra cua jaha cuando ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

⁷ Tacan tan cana xeehe ra Herodes tsi ra tsitó xaan can naha ra, tan tsicá tuhun ra tsi ra naha náa quivi tan náa hora quituvj tiñuu can.

⁸ Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuando ra lee can. Tatun nañihí ndo tsi ra, quitsí catyí tuhun ndo tsihin yu, tyin cuhun ndihi yu cujacahnu yu tsi ra —catyí ra Herodes tsihin ra naha.

⁹ Tsa tsiñi ra tsa tsitó xaan can naha ra tsa cahan ra Herodes, tan quihin ra naha ityi cuahán ra naha. Tan tiñuu tsa nyehe ra naha ityi nu caná ñicanyii

can, cuahán tsi ityi nuu ra naha. Tan tsicuiñi tsi maa maa siqui nu canyií ra lee can.

¹⁰ Tan tsa nyehe ra tsitó xaan can naha ra tyin tsicuiñi tiñuu can, sii xaan cuñi ra naha.

¹¹ Tan quihvi ra naha tsitsi vehe nu canyií lee can. Tan nyehe ra naha tsi ra tsihin ña María, sihi ra. Tan tsicuiñi tsiti ra naha tyin jacahnu ra naha tsi lee can. Tacan tan nuña ra naha yuhu caja tsa ndahá ra naha. Tan tava ra naha regalo tsa cuví xuhun cuaan, tan cutu vixi, tan ndutya tami tsa nañi mirra. Tan tsañá ra naha tsi lee can.

¹² Tsa yaha tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyí tsi tyin ña taahán tsi cahun ra naha cucatyí tuhun ra naha tsihin ra Herodes. Yacan cuenda siin ityi cuanuhu ra naha.

Nu tsinu xeehe ra José tan ña María tsihin lee sehe ñi nda Egipto

¹³ Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituví nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cahun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahñi ra tsi ra —catyí ángel can tsihin ra José.

¹⁴ Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto.

¹⁵ Ndacan tsicoo ñi nda cuanda tsa tsihi ra Herodes. Tacan cuví tyin cundaa tsa cahan ra cuví ndusu yuhu Jutu Mañi yo tahañ tsanaha jahá Nyoo. Tyehen catyí ra: “Nda Egipto cana yu tsi Sehe yu”, catyí ra.

Nu tava tyiñu ra Herodes na cahñi ra naha tsi ra nyihi

¹⁶ [Tsa ndi cumañi ca cúu ra Herodes tan ndi ndatu ra tsa quitsi nyico ra tsitó xaan can naha ra] tan tsa tuví iñi ra Herodes tyin ra tsitó xaan can naha ra jandaví ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihí ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacú nda cuanda ra nyihi tsa uvi cuiya. Tacan javaha ra tyin tsicá iñi ra tyin tacan cuiya ra Jesús tumaa catyí ra tsitó xaan can naha ra tsihin ra.

¹⁷ Tacan cuví tyin cundaa tsa cahan Nyoo tan tyaá ra Jeremías, ra cuví ndusu yuhu ra tahañ tsanaha. Tyaá ra tyehen:

¹⁸ Tsiñi yo iin ndusu ñuu Ramá, tsacú tsa nyivi, tan iyo taahán ñi.

Juvin ñi nyivi cuví tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yaha tsihi sehe ñi, catyí tsi nu tutu Nyoo.

¹⁹ Maa tyin tsa yaha tsa tsihi ra Herodes, tacan tan quituví nyico iin ángel Jutu Mañi yo nuu ra José nu quixi ra nda Egipto. Tan catyí ra tsihin ra:

²⁰ —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahñi tsi ra lee ihya.

²¹ Tacan tan nduvita ra José, tan quihin ra tsi lee can tan tsihin sihi ra. Tan cuanuhu ñi nda Israel.

²² Maa tyin quivi tsitó ra José tyin ra Arquelao, sehe ra Herodes, cuví ra rey nda Judea, nayuhvi ra tan ña cuñi ra cahun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna.

²³ Tsa tsaá ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuví tyin cundaá tsa cahan ra cuví ndusu yuhu Nyoo tahañ tsanaha. Tyin catyí ra naha tyin ra Jesús ra ñuu Nazaret cua cuví ra.

3

Nu cahan ra Juan tuhun Nyoo tshin nyívi
(Mt. 1.1-8; Lc. 3.1-9, 15-17; Jn. 1.19-28)

¹ Quívi tsa ndi iyó ñi ñuu Nazaret, ra Juan, ra jacoondutyá tsi nyívi, cuahán ra nu tsiquí tsa iyó Judea. Tan quítsaha caahán ra tuhun Nyoo tshin nyívi tsa tsaá nu nyíi ra.

² Tan catyí ra:

—Ndu uvi íñi ndo cuatyí ndo tyin tsa cuñí tsa quívi cundaca ñaha Nyoo tsi yo.

³ Juvín ra Juan cuví ra tsa cahan ra Isaías ra cuví ndusu yuhu Nyoo tahañ tsanaha. Tan tyaa ra tsa tsaḥa Nyoo tsi ra tyehen:

Cua tyaa soho yo ndusu ra nu caná tsa ra nu tsiquí tan catyí ra:
“Ñuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

⁴ Tan ra Juan nditsí ra jahma tsinú tshin ixi camellu. Tan cinturón ra, ñi cuví tsi. Tan tica xama tsatsí ra tan tsihí ra ndutya ñuñu.

⁵ Quítsi nyívi ñuu Jerusalén tan tandihí ñuu tsa cayucú Judea, tan nyívi tsa iyó yatyin ñi ityi yutya cahnu Jordán can; quítsi tyaa soho ñi tuhun caahán ra.

⁶ Tan tsa yaha nahma ñi cuatyí ñi, ra Juan jacoondutyá ra tsi ñi yutya cahnu Jordán ican.

⁷ Maa tyin nyehe ra Juan tyin cuaha xaan ra fariseo, ra tsa tyaa yahvi xaan ley vehe ñuhu, tan cuaha xaan ra saduceo, quítsi ra naha tyin coondutya ra naha. Tan catyí ra tshin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tshin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

⁸ Nāsama ndo cuhva iyó ndo, na nyehe yo tyin tsa ndu uvi íñi ndo cuatyí ndo nuu Nyoo.

⁹ Maa tyin ña nduyaa ndo tan catyí ndo tyin nyívi tata ra Abraham cuví ndo. Tyin vasu tshin yuu ihya, Nyoo cuví jananduvi ra nyívi ra Abraham.

¹⁰ Tsa ndatú yatsa Nyoo tsi tandihí ndo tsa cuví ndo tumaa yutun tsa ña tsaḥá tsiti vaha. Cua tyahnya tun tan cua cayu tun, tacan cua javaha Nyoo tshin ndo —catyí ra Juan—.

¹¹ Tsa nditsa tyin yuhu jacoondutyá yu tsi nyívi tshin ndutya, tan cuví tsi iin seña tyin tsa ndu uvi íñi ñi cuatyí ñi. Maa tyin tsa yaha jacoondutya yu tsi ñi tshin ndutya, vatsi inga ra cua jacoondutya tsi ñi tshin Tatyí Ii Nyoo tan tshin ñuhú ihñi. Iyó ca tunyee íñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra.

¹² Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihí vaha ra itsi. Tan cua cahmi ra tsahan tsa quita tshin trigu can tshin ñuhú tsa ña cua ndahva maa —catyí ra Juan.

Nu tsicoondutya ra Jesús
(Mr. 1.9-11; Lc. 3.21-22)

¹³ Tacan tan quitã ra Jesús Galilea tan tsaã ra yutya cahnu Jordán nu nyí ra Juan, tyin cuñí ra tsa jacoondutya ra Juan tsi ra.

¹⁴ Tsa jihna ñi ña cuñí ra Juan jacoondutya ra tsi ra, tan quitsahã catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

¹⁵ Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa javaha yu tandihí tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yahã tsicoondutya ra Jesús tan quitã ra tsitsi ndutya. Tan nuña andiví, tan ra Jesús nyehẽ ra vatsí nuú Tatyí li Nyoo, tumaa iin paloma. Tan tsaã tsi siqui ra.

¹⁷ Tacan tan cahã iin ndusu ityí andiví, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan si xaan cuñí yu tsihin ra —catyí ndusu can.

4

Nu nducu cuhva nu ña vaha tsi ra Jesús

(Mr. 1.12-13; Lc. 4.1-13)

¹ Tacan tan tsindaçã Tatyí li Nyoo tsi ra Jesús iin nu tsiquí, tyin cua nducu cuhva nu ña vaha tsi ra.

² Tsicoo nyitya ra uvi xico nduvi tan uvi xico tsacuaa. Tsa yahã can tan quitsí socó tsi ra.

³ Tacan tan natuhvã nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahã tsihin yuu ihya, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahã ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyívi tan coonyito ñi, tyin coonyito ñi tsihin tandihí tuhun caahán Nyoo” —catyí ra Jesús tsihin nu ña vaha.

⁵ Tacan tan quihñ nu ña vaha tsi ra. Tan cuahán ra tsihin nu nda ñuu ii Jerusalén. Tan jandaã nu tsi ra jiñi vehe ñuhu cahnu.

⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

⁷ Tan nacahã ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihñ nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janahã nu tandihí tsa cahnu cuví nu ndacá ñaha rey tan ra cumí tyiñu naha ra tsi nyívi iyó nu ñuhu ñayivi.

⁹ Tan catyí nu tsihin ra:

—Yuhu cuhva yu tandihí maa tsa janahã yu tsi un, tatun yooho tan cuiñi tsiti un nuu yu tan jacahnu un tsi yu.

¹⁰ Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jachnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaá ángel tan jatyinyee ra naha tsi ra.

Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea

(Mr. 1.14-15; Lc. 4.14-15)

¹² Quiví tsa tsito ra Jesús tyin ra Juan nyí ra vehe caa, cuahán ra nda Galilea.

¹³ Maa tyin ña ndoo ra ñuu Nazaret, nu tsahnú ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón.

¹⁴ Tacan tan cundaá tsa cahan ra Isaías, ra cuví ndusu yuhu Nyoo, tahañ tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhu nditsin tsa jandunditsín nu yucú ñi, catyí ra Isaías.

¹⁷ Nda cuanda quivi can, tan quitsaha caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi ndo —catyí ra Jesús tsihin nyivi.

Nu cana ra Jesús tsi cumi taahan ra tsa tñ tyaca

(Mr. 1.16-20; Lc. 5.1-11)

¹⁸ Ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tñ tyaca cuví ra naha. Tan cañi ra naha traya ra naha nu ndutya.

¹⁹ Tacan tan catyí ra Jesús tsihin nduvi taahan ra naha:

—Ñaha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

²⁰ Juvín ñi cuhva can nacoo ra naha traya can, tan cuahán ra naha tsihin ra Jesús.

²¹ Luxu ñi tsica ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha.

²² Juvín ñi cuhva can tan nacoo ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahá ra Jesús

(Lc. 6.17-19)

²³ Cuahán ra Jesús tsicá ra tandihí ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandihí ñi nuu cuehe tsa yihí tsi ñi.

²⁴ Tacan tan tsito tandihí nyivi ñuu cuenda Siria tuhun ra Jesús. Tan tsindaca ñi tandihí nyivi cuuhví tsi ra: juhva ñi yihí tatyí ña vaha. Tan yihí

ñi tsihi naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihi ñi.

²⁵ Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañi Decápolis, nyivi iyó ñuu Jerusalén tan tandihi ca ñuu tsa cayucú Judea, tan nyivi iyó inga tsiyo yutya cahnu Jordán.

5

Nu cahan ra Jesús tsihin nyivi nu tsiqui (Lc. 6.20-23)

¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsiacunyaa ra ican. Tacan tan nyivi tsiacá tsihin ra, tsinunduví ñi tsi ra.

² Tacan tan quitsahá jacuahá ra tsi ñi tan catyí ra:

³ Nasocó Nyoo tsi tandihi nyivi tsa tsitó tyin tsiñi ñuhu ra tsi ñi, tan tsa cuenda ñi cuví nu ndacá ñaha ra.

⁴ Tan tandihi nyivi tsa cuiihya cuñi tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ Tan tandihi nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

⁶ Tan tandihi nyivi tsa cuñi xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñi maa ra.

⁷ Tan tandihi nyivi tsa cundaahví iñi tsi inga nyivi, nasocó Nyoo tsi ñi, tan cua cundaahví iñi ra tsi ñi.

⁸ Tan tandihi nyivi tsa janduvahá Nyoo aña, nasocó ra tsi ñi, tan cua nyehe ñi tsi ra.

⁹ Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

¹⁰ Tan tandihi nyivi tsa javahá cuhva cuñi Nyoo tan ndasi cuñi nyivi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra.

¹¹ Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu.

¹² Cusi iñi ndo tun tacan javahá nyivi tsihin ndo; sii cuñi ndo, tyin cahnu xaan tan sii xaan caá tsa cua ñihi ndo nda gloria. Tyin juvin ñi tacan javahá nyivi tsa ña vaha tsihin tandihi ra cuví ndusu yuhu Nyoo tahañ tsanaha.

Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva (Mr. 9.50; Lc. 14.34-35)

¹³ Nyooho tsa tsinú iñi tsi yu, tumaa ñi vaha cuví ndo. Maa tyin tatun ñi, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñi can. Tacan tan javita yo can, tan cuañi nyivi tsata can.

Tatun tyaá yahvi vaha yo tuhun caahán Nyoo, cuví yo tumaa ñuhu tsa jandunditsín nu tsiacá nyivi nu naa

¹⁴ Nyooho cuví ndo tumaa ñuhu tsa jandunditsín nu tsiacá nyivi. Iin ñuu tsa canyii jiñi iin yucu, ña cua cuví quihí xeehe tsi.

¹⁵ Ña tuhvá yo tyaá ñuhu tyuma, tan tyihí xeehe yo itsi tsitsi iin caja. Tyin tuhvá yo tyaá ñuhu tan tinyii yo itsi iin nu sucun tyin tacan tan jandunditsín tsi nu yucú yo tsitsi vehe yo.

16 Tan tacan taahán tsi jandunditsin tucu nyooho tsihin ñuhu Nyoo tsa iyó añima ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuahá ra Jesús tyin ñiñi xaan javaha yo tandihi tuhun tsa tsahá Nyoo tsi yo tan jacuaaha yo itsi tsi nyivi

17 Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaa ra. Tan ndi ña vatsí janaa yu tuhun tsa tyaa tandihi ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaa yahvi yu tsa caahán ley can, tan catyi tuhun yu tsihin ndo náa cuñi tsi catyi ley can.

18 Tsa nditsa catyi yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaa ra Moisés tyin tandihi maa tsa tyaa ra naha tan cua cundaa tsi.

19 Yacan cuenda, ra tsa ña tyaa yahvi cuhva catyi Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaa yahvi tandihi, tan janahá ra tsi inga nyivi, cahnu xaan cua cuvi ra nu ndacá ñaha Nyoo.

20 Catyi yu tsihin ndo tyin tun ña tyaa yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quihvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

21 'Nyooho tsa cuaha tsaha tsiñi ndo tsa catyi Nyoo tsihin nyivi tsicoo tahán tsanaha. Catyi ra: "Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo."

22 Maa tyin yuhu, catyi yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyi ndo tyin soho xaan caá ñi, taahán tsi cahun ndo anyaya tsa cuenda cuatyí can.

23 Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un,

24 ñacoo tsa cuahán tsihin un ityi nu altar vehe ñuhu. Tan cahun jihna un ndacan un tucahnu iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

25 "Tatun iin ra tsicán cuatyí tsaha un, tan cuahán un tsihin ra nda nu nyaá ra cumi tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumi tyiñu, tyin ra cumi tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihi ra naha tsi un vehe caa.

26 Tan tsa nditsa catyi yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihi xuhun tsa cua ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayi tsi yo, tan ña vaha

27 'Nyooho tsa tsiñi ndo tyin catyi Nyoo tahán tsanaha tyin nyooho tsa iyó ñasihi, ña cua coo inga ñaha tsi ndo, tan ndi ñaha tsa iyó yi tan ña taahán tsi coo inga rayi tsi ña.

28 Maa tyin yuhu catyi yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyí ndo.

29 "Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin

intuhun ñi tinuu un, tan ñavin ca tsa cuhun un anyaya tsihin nduvi taahan tsi.

³⁰ O tatun iin ndaha un janacavá tsi un tsitsi cuatyí, vaha taxin ca çahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nanii un tan cuhun un anyaya.

Nu caahán ra Jesús tyin ña vaha tsa nacoo ihñi rayii tsi ñasiihi ra
(Mt. 19.9; Mr. 10.11-12; Lc. 16.18)

³¹ Tan juvin ñi catyi Nyoo tsihin nyivi tsicoo tahan tsanaha tyin yoo ra nacoo ihñi ñasiihi ra, cuñi tsi tsa cani ra tutu tsa tindaça ra tsihin ña.

³² Maa tyin catyi yu tsihin ndo tyin nduve ndatu iyó tsi rayii tsa nacoo ra ñasiihi ra tatun ña quituvi ña tsihin inga rayii. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayii cua coo ndiihi cuatyí ña. Tan tacan ra tsa cua quihin tsi ña cua coo ndiihi cuatyí ra.

Ña cahan yo “naha Nyoo maa”

³³ Tan tsiñi ndiihi ndo, tyin catyi tucu Nyoo tsihin nyivi tsicoo tahan tsanaha: “Tatun catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.”

³⁴ Maa tyin yuhu catyi yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuvi nu nyaá Nyoo.

³⁵ Tan ndi tuhun ñuhu ñayivi ihya ña cahan ndo, tyin ihya cuvi nu tsañi Nyoo. Tan ndi ña cahan ndo tuhun ñuu Jerusalén, tyin ican cuvi ñuu maa Nyoo tsa cuvi ra Rey cahnu ca.

³⁶ Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jiñi ndo.

³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

³⁸ Tan tsiñi tucu ndo tsa catyi Nyoo tahan tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndiihi ra cumi tyiñu tacan tsihin ñi, tumaa tsa javahá ñi tsihin ndo.”

³⁹ Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi xaan cuñi nyehé tsi ndo. Tyin tun yoo cañi iin tsiyo nuu ndo, taahán tsi tsa cuhva ndiihi ndo inga tsiyo na cañi ndiihi ñi, tan ña cuxaan ndo tsi ñi.

⁴⁰ O tatun tsicán ñi cuatyí tsaha ndo, tan cuñi ñi quihin nyaa ñi iin camisa ndo. Taahán tsi cuhva ndiihi ndo chamarra ndo tsi ñi tan ña cua cuxaan ndo tsi ñi.

⁴¹ O tatun yoo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro.

⁴² Tatun yoo nyivi tsicán tumañi iñi tsi ndo, cuxha ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyivi xaan iñi tsi yo

(Lc. 6.27-28, 32-36)

⁴³ Tan tsiñi tucu ndo tyin catyi Nyoo tahan tsanaha: “cuñi ndo tsi ra vaha iñi tsi ndo. Tan xaan cuñi ndo nyehé ndo tsi ra xaan iñi tsi ndo.”

⁴⁴ Maa tyin yuhu catyí yu tsihin ndo, cuñi ndo tsi nyívi xaan iñi tsi ndo. Tan javaha ndo tsa vaha tsihin nyívi caahán tsi ndo, tan tsi nyívi ña cuñi nyehe tsi ndo. Tan ndacan tahvi ndo tsi Nyoo tsa cuenda nyívi tsa caahán nyaa tsi ndo tan tsa cuenda ñi tsa jacuví tsa uhvi tsi ndo.

⁴⁵ Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyívi vaha tan nyívi ña vaha.

⁴⁶ Tatun nyooho tan cuñi ndo tsi nyívi vaha iñi tsi ndo tan ndasi cuñi ndo nyehe ndo tsi nyívi xaan iñi tsi ndo, nduve tsa vaha cua ñihí ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra.

⁴⁷ Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyívi, nduve tsa vaha xaan javahá ndo. Tyin juvin ñi tacan javahá nyívi tsa ña tsitó tuhun Nyoo.

⁴⁸ Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyooho.

6

Nu caahán ra Jesús nácaa javaha yo tumañi iñi

¹ Jaha ndo cuenda tan ña nduyaa ndo náa tumañi iñi javaha ndo tsi nyívi. Tyin tatun javaha ndo tumañi iñi tyin nyehe nyívi, Jutu yo, ra nyaá gloria, nduve náa cua cuhva ra tsi ndo.

² Tun cua javaha ndo tumañi iñi, ña cua jacoto ndo tsi inga nyívi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyí nyívi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha.

³ Yacan cuenda quiñi javahá ndo tumañi iñi tsi nyívi ndaahvi, ña jacoto ndo ndi tsi ra tsa vaha xaan ca iñi tsi ndo.

⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11.2-4)

⁵ Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyívi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyívi tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha.

⁶ Maa tyin nyooho quiñi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyívi tsi ndo. Quiñi ndo tsitsi vehe ndo tan ñacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyívi. Tan cua cuhva ra tsa vaha tsi ndo.

⁷ Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyívi tsa ña tsitó tsi Nyoo. Cuñi maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi.

⁸ Ña javaha ndo tacan. Tyin Nyoo tsa tsitó ra náa tsiñi ñuhu tsi ndo tsa ndi cumañi ca ndacan ndo tsi ra.

⁹ Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayivi ihya,

tan na javaha tandihi nyivi tandihi cuhva cuñi maa un, tumaa cuvi nda gloria.

¹¹ Cuhva tsa catsi ndi tahan tahan quivi.

¹² Jaha tucahnu iñi tsi ndi náa tsa ña vaha javaha ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuvi ra jacacú tsi ndi ndaha nu ña vaha.

Tan maa un cuvi ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihí tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

¹⁴ Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo.

¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyí tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi.

¹⁷ Maa tyin nyooho quivi tsa iyó nyitya ndo tyin nanducú ndo tsi Nyoo, ñacatyá ndo nuu ndo. Tan tyihí ndo cuca jiñi ndo.

¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria
(Lc. 12.33-34)

¹⁹ Ña jacaya ndo tsa cuca tsa iyó nu ñuhu ñayivi ihya. Tyin coto tivi tsi jaha tiquixin o jaha cuxi. O cuvi quihvi ñasuhu, tan suhu nu tandihi tsa jacaya ndo.

²⁰ Vaha ca jacaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuvi tivi tsi ndacan, tan nduve quiti jativi itsi, ndi nduve ñasuhu.

²¹ Tyin nu natyihí vaha ndo tsa cuca, ican cua cunyata ndihí añima ndo.

Nu caahán ra Jesús tyin na jaha yo cuenda ñuhu nditsin tsa tyihí ra añima yo
(Lc. 11.34-36)

²² Tinuu ndo cuvi ñuhu nditsin tsi ndo. Tatun vaha tinuu ndo, taniñi cuñu ñuhu ndo tan iyó ñuhu nditsin. [Tan tuhun ihya cuñi tsi catyí tyin tatun iyó ñuhu nditsin Nyoo añima ndo cuvi ndo nyivi vaha.]

²³ Maa tyin tatun ña vaha tinuu ndo, tandihi cuñu ñuhu ndo tan nyii tsi nu naa. Tan tacan tucu tatun nduve ñuhu Nyoo iyó añima ndo, [cuví ndo tumaa

iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatun cuñí xaan ca yo xuhun

(Lc. 16.13)

²⁴ Iin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñí ndo tsi Nyoo, tan cuñí tucu ndo xuhun.

Nu caahán ra Jesús tyin ña caca xaan iñi yo náa ndihi tsa tsiñí ñuhu tsi yo

(Lc. 12.22-31)

²⁵ Yacan cuenda catyí yu tsihin ndo, tyin ña caca xaan iñi ndo nácaa ñihi ndo tsa catsi ndo tan tsa coho ndo. Ndi ña caca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yii cuhva ra inga tsa tsiñí ñuhu tsi yo].

²⁶ Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti.

²⁷ Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

²⁸ Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva.

²⁹ Maa tyin catyí yu tsihin ndo tyin ndi ra cuví rey Salomón tsihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsi Nyoo tsi yutun ita can.

³⁰ Tatun tacan ñi jacunditsi Nyoo tsi yutun ita tsa iyó tsitsi cuhu vityin, tan tyaan cua cuvi tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra.

³¹ Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?”

³² Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñí ñuhu tsi ndo.

³³ Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñí ñuhu tsi ndo.

³⁴ Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñí ñuhu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

7

Ña cahan yo tsa caá inga nyivi

(Lc. 6.37-38, 41-42)

¹ Ña cahan ndo tsa caá inga nyivi, tacan tan Nyoo ña cua cahan ra tsa caá ndo.

² Tyin tumaa caahán ndo tsa caá inga nyívi, tacan cua javaha Nyoo tsihin ndo. Tan tumaa tsa javahá ndo tsihin inga nyívi, juvin ñi tacan cua javaha Nyoo tsihin ndo.

³ ¿Nacaa tyin nyehé un tsahan luhlu tsa nyíi tinuu yañi un, tan ña jahá un cuenda yutun cahnu tsa nyíi tinuu maa un?

⁴ Tatum tinuu maa un nyíi iin yutun cahnu, ¿nacaa cuví catyi un tsihin ra yañi un: “Naha, na tava yu tsahan luhlu tsa nyíi tinuu un”?

⁵ ¡Yooho tsa jahá tyin vaha xaan un! Tava jihna yutun cahnu tsa nyíi tinuu un. Tyin tacan tan cuví nyehé vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyívi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo

(Lc. 11.9-13; 6.31)

⁷ Ndacan ndo tsa tsiñi ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña.

⁸ Tyin tandihi nyívi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tсахá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi?

¹⁰ O tatum tsicán tsi tyaca, ¿a cua cuhva ndo iin coo itsi?

¹¹ Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñi ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandihi libru tsa tyaa ra cuví ndusu yuhu Nyoo tahañ tsanaha.

Yuvehe tihin tan ityi cuiñi tsa cuahán nu nyaá Nyoo

(Lc. 13.24)

¹³ Nducu ndo cuhva quihvi ndo yuvehe tihin. Tyin quihin yuvehe, tan quihin ityi tsa cuahán nda nu cunaa nyívi anyaya. Tan cuaha xaan nyívi cuahán ityi can.

¹⁴ Maa tyin tihin yuvehe tan cuiñi ityi tsa cuahán nu cuahán nyívi tsa ñihí ñayivi nyito coo ñi. Maa tyin ña cuaha nyívi nañihí ityi can.

Tsihin tsa javahá nyívi, tan nacotó yo tatun nyívi vaha, a nyívi ña vaha cuví ñi

(Lc. 6.43-44)

¹⁵ Jaha ndo cuenda tsi ndo tsihin ra vatya naha ra. Tyin catyi ra naha tyin ndusu yuhu Nyoo cuví ra naha, maa tyin ña nditsa. Tyin vatsi ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiti xaan cuví ra naha.

¹⁶ Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iñu nduhva ña cuví cuhva tsi yucu vixí.

¹⁷ Tan tacan tucu tandihi yutun vaha. Tсахá tun tsiti vaha. Tan tandihi yutun ña vaha, tsahá tun tsiti ña vaha.

¹⁸ Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha.

¹⁹ Tan tandihi yutun tsa ña tsahá tsiti vaha, cahnya yo tsi tun. Tan cayu tun.

²⁰ Tan tacan tsihin tsa javahá nyívi, cuví nacoto ndo tsi ñi tatun nyívi vaha o nyívi ña vaha cuví ñi.

Nu catyí ra Jesús tyin ña tandihi nyívi tan cua quihvi ñi nu ndacá ñaha Nyoo (Lc. 13.25-27)

²¹ 'Ña tandihi nyívi tsa catyí tsihin yu: "Jutu Mañi yu, Jutu Mañi yu", cua quihvi ñi nu ndacá ñaha Nyoo nda gloria. Maa tyin nyívi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra.

²² Quiví tatsi tuñi Nyoo tsi nyívi, cuaha xaan ñi cua catyí ñi tsihin yu tyehen: "Jutu Mañi yu, nyuhu cahán ndi tuhun cun tsihin nyívi. Tan tsihin sívi un tavá ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sívi un", cua catyí ñi tsihin yu.

²³ Tacan tan yuhu cua catyí yu tsihin ñi: "Ña nacotó yu tsi nyooho. Çatsiyo nyaha ndo nu nyaá yu tandihi nyooho tsa javahá maa maa ñi tsa ña vaha", cua catyí yu tsihin ñi.

Nu caahán ra Jesús nácaa cua cacu nyívi tsa tyaá yahvi tuhun caahán ra, tan nyívi tsa ña tyaá yahvi tsa caahán ra, ña cua cacu ñi (Lc. 6.47-49; Mr. 1.22)

²⁴ Tacan catyí yu tsihin ndo, tyin nyívi tsa tsiñi tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

²⁵ Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava.

²⁶ Maa tyin nyívi tsa tsiñi tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyíti.

²⁷ Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduvá tsi tan cunaá tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahán ra Jesús tsihin ñi, iyo xaan cuñi ñi tsihin tsa caahán ra,

²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú (Mr. 1.40-45; Lc. 5.12-16)

¹ Cuhva tsa nuú ra Jesús yucu can, cuaha xaan nyívi nyicún tsi ra.

² Tan tsaá iin ra ndohó cuehe tyaahyú, tan tsicuiñi tsiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvahá ra.

⁴ Tacan tan catyí ra Jesús tsihin ra:

—Jihna, coto ñahñi catyi tuhun un tsihin nyivi. Maa tyin cyaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyi ley Nyoo tsa tyaa ra Moisés. Tan cua cuví tsi iin tsa ndaa tsi ra jutu can tan tsi nyivi tyin tsa nduvaha un.

Nu janduvahá ra Jesús tsi musu iin ra cuví capitán

(Lc. 7.1-10)

⁵ Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahán ndaahvi ra tsihin ra,

⁶ tan catyi ra:

—Jutu Mañi yu, musu yu ñihi xaan cuuhvi ra, canyii ra nu cama. Ña cuví nduvita ra tyin nduxii ra, tan yaha xaan cuhva cuñi ra.

⁷ Tan catyi ra Jesús tsihin ra:

—Cuhun maa yu tan cujanduvaha yu tsi ra —catyi ra tsihin ra.

⁸ Nacahan ra capitán can tan catyi ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahan ñi un tan musu yu cua nduvaha ra.

⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñj ra Jesús tsa cahan ra can, tan iyo xaan cuñi ra. Tan catyi ra tsihin nyivi tsa nyicún tsi ra:

—Tsa nditsa catyi yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya.

¹¹ Tan catyi yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo.

¹² Tan nyivi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsaá ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyi ra Jesús tsihin nyivi nyicún tsi ra.

¹³ Tacan tan catyi ra tsihin ra capitán can:

—Cyaahan, tan na nduvaha musu un tsa cuenda tyin tsinú iñi un tsi yu —catyi ra Jesús tsihin ra capitán.

Tan juvin ñi cuhva can nduvaha musu ra.

Nu janduvaha ra Jesús tsi tyiso ra Pedro

(Mr. 1.29-31; Lc. 4.38-39)

¹⁴ Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyii ña nu tsito tyin yihí cahñi tsi ña.

¹⁵ Tan tñj ra ndaha ña, tan iin yaha ñi quita cahñi tsi ña. Tan nduvita ña, tan quitsaha nanducú ña tsa catsi ra naha.

Nu cuaha xaan nyivi cuuhvi janduvaha ra Jesús

(Mr. 1.32-34; Lc. 4.40-41)

¹⁶ Tan tsa cunaaha, cuaha xaan nyivi yihí tatyí ña vaha tsindaca nyivi tsi ra Jesús. Tan tsihin intuhun ñi tuhun cahan ra Jesús tan quita tatyí ña vaha tsi ñi. Tan tandihi ñi cuuhvi iin yaha ñi nduvaha ñi.

¹⁷ Tacan cuví tyin tacan tan cundaá tsa cahan Jutu Mañi yo tsihin yuhu ra Isaías, ra cuví ndusu yuhu ra tahañ tsanaha. Tan catyi ra tyehen: “Maa ra quihñj ra cuehe tsa yihí tsi yo, tan quihñj nyaá ra tsa uhvi tsi yo.”

*Nyivi tsa cuñí quihvi cuenda ra Jesús
(Lc. 9.57-62)*

¹⁸ Tan tsa nyehe ra Jesús tyin cuaha xaan nyivi tsinu nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi.

¹⁹ Tacan tan tsaq iin ra maestro cuenda ley vehe ñuhu tan catyí ra tsihin ra:
—Maestro, cuñí yu cunyicun yu tsi un tandihi ñi ityi nu cuahán un —catyí ra.

²⁰ Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

²¹ Inga ra tsa tsicá tsihin ra nacahan ra tsihin ra:

—Taa, cuhva na cuhun jihna yu cucutsi yu tsi jutu yu, —catyí ra.

²² Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

*Nu jacutaxín ra Jesús tatyí xaan nu miñi
(Mr. 4.35-41; Lc. 8.22-25)*

²³ Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra.

²⁴ Tan ñihi xaan quitsahá yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra.

²⁵ Tan ra tsicá tsihin ra jandoto ra naha tsi ra, tan catyí ra naha:

—¡Jutu Mañi yu, jácacu tsi yo, tyin cuñí cunaa yo!

²⁶ Tan catyí ra Jesús tsihin ra naha:

—¿Nacuenda yuuhví xaan ndo? ¡Nyooho tsa luxu xaan tsinú iñi tsi yul —catyí ra Jesús.

Tacan tan nduvitá ra tan cahan ra tsihin tatyí tan tsihin ndutya, tan cutaxín tsi.

²⁷ Tan iyo xaan cuñí ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

*Nu nduvahá uvi ra ñuu Gadara ra yihí tatyí ña vaha naha ra
(Mr. 5.1-20; Lc. 8.26-39)*

²⁸ Tacan tan tsaq ra naha inga tsiyo miñi nda nu ñuhu Gadara. Tan tsaq uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can.

²⁹ Tan caná tsaa ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaa quivi? —catyí ra naha jahá tatyí ña vaha can.

³⁰ Tan yatyin ñi can yucú cuaha quini tsatsí ti naha ti.

³¹ Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihvi ndi tsitsi quini can naha ti —catyí nu tatyí ña vaha can nahnu.

³² —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

³³ Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra.

³⁴ Tacan tan tandihi nyivi ñuu can, tsañan ñi tsinyeñe ñi tsi ra Jesús, tan cañan ndaahvi ñi tsihin ra na quita ra ñuu can.

9

Nu janduvaha ra Jesús tsi iin ra xii (Mr. 2.1-12; Lc. 5.17-26)

¹ Tacan tan quihví ra Jesús tsitsi iin yutun ndoo tan yaha ra miñi, tan tsaa ra nda ñuu nu iyó ra.

² Nu nyií ra ican, tsindaca nyivi tsi iin ra cuuhví tsa ña cuví nacanda tyin nduxij ra, tan canyí ra nu tsito. Tan tsa nyeñe ra Jesús tyin tsinú xaan iñi ñi tsi ra, quitsaha caahán ra tsihin ra cuuhví can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesús tsihin ra.

³ Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñí ra naha tsicá iñi ra naha.

⁴ Maa tyin ra Jesús tsitó ra náa tsicá iñi ra naha, tan catyí ra tsihin ra naha: —¿Nacuenda tsicá iñi ndo tsa ña vaha?

⁵ Tyin ¿ndáa tsa yí ca catyí yo: a yí ca catyí yo: “Cuatyí un tsa yaha ndatsi”, o yí ca catyí yo: “Nduvita tan caça un”?

⁶ Vityin cua janaha yu tsi ndo tyin yuhu Rayí tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cuanuhu nda yuvehe un —catyí ra.

⁷ Tacan tan nduvita ra tan cuanuhu ra nda yuvehe ra.

⁸ Tan nyivi tsa nyeñe tsa cuví, nayuhví xaan ñi. Tan quitsaha jacahnú ñi tsi Nyoo tyin tsañan ra tunyee iñi tsi nyivi.

Nu cana ra Jesús tsi ra Mateo (Mr. 2.13-17; Lc. 5.27-32)

⁹ Yaha can tan quita ra Jesús ican. Tan nyeñe ra tsi iin ra tsa nañi Mateo, nyaá ra naquihín ra xuhun tsa tyahví nyivi Israel tsi ra ndaca ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

¹⁰ Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tava xuhun cuenda ra ndaca ñaha tsaa, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra.

¹¹ Tan tsa nyeñe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tava xuhun naha ra tan ra iyó cuatyí naha ra? —catyí ra naha.

¹² Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

13 Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñí yu tsa cundaahví iñi ndo tsi nyívi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyinyee yu tsi nyívi tsa tsicá iñi tyin vaha ñi, vatsí yu jatyinyee yu tsi nyívi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyívi tsi ra Jesús tatun taahán tsi tsa coo nyitya ñi
(Mr. 2.18-20; Lc. 5.33-35)

14 Tacan tan ra nyicún tsi ra Juan, ra jacoondutya tsi nyívi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

15 Tan nacahan ra Jesús tan catyí ra:

—¿A cuví cunyecu cuiihya nyívi yucú vico tindaha tun nyíi ra cua tindaha tsihin ñi? Maa tyin coo quívi cua quita ra tindaha ican nu yucú ñi. Tacan tan cua coo ñi tucuihya iñi ñan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyívi tsihin tuhun tsaa tsa jacuahá ra tsi ñi

(Mr. 2.21-22; Lc. 5.36-39)

16 Ña tuhvá nyívi naquicú iin jahma tuuhu tsihin iin jahma tsaa, tyin cua nandiyí nu naquicú ñi tsihin tsa tsaa can, tan cua tyahnya tsi inga tsaha.

17 Tan tacan tucu, ña cuví tyihí nyívi vinu tsaa tsitsi ñiñi tsaahnu tyin tatun tacan javaha ñi, cua tyahnya ñiñi can, tan cua tiví vinu can tan cua tiví ndihí tucu ñiñi can. Yacan cuenda taahán tsi tyihí yo vinu tsaa tsitsi ñiñi tsaa. Tyin tacan tan ña tyahnya ñiñi can tan ndi vinu can ña tiví tsi.

Nu nduvahá ñaha sehe ra Jairo tan ñaha tsa tñin jahma ra Jesús

(Mr. 5.21-43; Lc. 8.40-56)

18 Tsitsi tsa caahán ra Jesús tuhun ihya, tsaa iin ra cumí tyiñu cuenda vehe ñuhu nyívi Judea tan tsicuiñi tsiti ra nuu ra Jesús, tan catyí ra:

—Ndi tsihí cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

19 Nduvita ra Jesús tsihin ra tsicá tsihin ra tan cuahán ra naha tsihin ra.

20 Tacan tan iin ñaha cuuhví natuhvá ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún ñiñi ña. Tan tyanaa ña ndaha ña jahma ra,

21 tan cuñí ña tsicá iñi ña: “Tun nañi ndaha yu jahma ra cua nduvaha yu”, cuñí ña.

22 Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihí, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún ñiñi ña.

23 Yahá can tan tsaa ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyívi tsa yucú can iyo xaan tsacú ñi.

24 Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihí ña. Quixí ña —catyí ra.

Tan tsa cahan ra tacan quitsaha tsacú naaha ñi.

25 Tan ra Jesús tavá ra tsi ñi ityi tsata vehe. Tacan tan quihví ra tsitsi vehe nu canyí ñaha can, tan tñin ra ndaha ñaha luhlu can, tan nduvita ña.

26 Tan tandihí nyívi iyó ityi ñuu can tsito ñi tsa nandoto ñaha luhlu can.

Nu janduvahaḡ ra Jesús tsi uvi taahan ra cuaa

27 Tsa quitḡ ra Jesús ican, tan uvi taahan ra cuaa nyicún tsi ra, caná tsaa ra naha tan catyí ra naha:

—¡Cundahvi iñi tsi ndi, yooho ra cuví tata ra David! —catyí ra naha.

28 Tan tsa yahḡ quihvḡ ra Jesús tsitsi vehe, ra cuaa can, natuhvḡ ra naha nu nyaá ra, tan maa ra Jesús quitsahaḡ tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahḡn ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

29 Tacan tan tyanaḡ ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

30 Tan nduvahaḡ tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyivi.

31 Maa tyin cuahán ra naha tan quitsahaḡ catyí tuhun ra naha tsa javahaḡ ra Jesús tsihin ra naha tsihin tandihi nyivi iyó ityí ñuu can.

Nu janduvahaḡ ra Jesús tsi iin ra ñiñí

32 Tsa cuahán ra naha, juhva nyivi tsindacḡ ñi tsi iin ra ñiñí tsa yihí tatyí ña vaha nu nyií ra Jesús.

33 Tan tsa tavaḡ ra Jesús tatyí ña vaha can, tacan tan nacahḡn ra can. Tan iyo xaan cuñi nyivi, tan catyí ñi:

—Ñaha ca maa nyehḡ yo ñuu Israel ihya ndi intuhun ra tavaḡ tatyí ña vaha tsi nyivi —catyí ñi.

34 Maa tyin ra cuví fariseo naha ra, catyí ra naha:

—Ra ihya tavaḡ ra tatyí ña vaha tsihin tunyee iñi nu ña vaha tsa cuví ityí nuu tsihin nahnu —catyí ra naha.

Nu caahán ra Jesús tyin ña cuaha maa nyivi jahá tyiñu cuando Nyoo iyó

35 Ra Jesús tsahḡn ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi.

36 Tan tsa nyehé ra tsi nyivi, cundaahvḡ xaan iñi ra nyehḡ ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó.

37 Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha.

38 Yacan cuando, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyiñu ra

(Mr. 3.13-19; Lc. 6.12-16)

1 Tacan tan canḡ ra Jesús tsi tsa utsi uvi ra tsicá tsihin ra tan tsahaḡ ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhvḡ náa ndihi ca nu cuehe tan tsa uhvi.

2 Ihya nyaá sivi tsa utsi uvi ra tsicá tyiñu ra: jlhna ca, ra Simón, tsa nañí tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha;

³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo;

⁴ tan ra Simón ra nyií cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo

(Mr. 6.7-13; Lc. 9.1-6)

⁵ Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cuhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria.

⁶ Cuaahan ndo nu yucú mbee tsa tsinaq tsa cuví nyivi Israel.

⁷ Cuaahan ndo cua cahan ndo tyin tsa tsaq quivi tsa cua cundaca ñaha Nyoo tsi nyivi.

⁸ Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

⁹ Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha.

¹⁰ Tan ña cuiso ndo ndi yunu tsa cuenda tsa caca ityi ndo. Intuhun ñi camisa tsa nditsin ndo cuhun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsa ndo iin ñuu cahnú o iin ñuu luhlu, nducu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can.

¹² Tatun cua quihvi ndo iin vehe, cuhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”.

¹³ Tan tatun nyivi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can.

¹⁴ Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsa ndo tyin ndoo maa cuatyí ñi siqui ñi.

¹⁵ Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihí ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyí tuhun tsi náa ndihí tundoho cua nyehe nyivi tsicá tyiñu Nyoo

¹⁶ ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quiti xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti.

¹⁷ Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu.

¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví.

¹⁹ Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsa cuhva tsa cua cahan ndo, Nyoo cua cuhva ra tuhun cahan ndo.

²⁰ Tyin ñavin maa ndo cua cahan, tyin maa Tatyí li Jutu yo Nyoo tsa iyó añima ndo cua cuhva ra tsa cahan ndo.

²¹ Yihí rayíi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyívi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyívi na cahñi nyívi can tsi ñi.

²² Tandihí nyívi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

²³ Tatun nyaa ndaha ñi tsi ndo iin ñuu, cuhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cuhun ndo tandihí ñuu nu iyó nyívi Israel tan cua quitsi nyico yuhu, Rayíi tsa quee nda gloria.

²⁴ Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra.

²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyívi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyívi cuenda yu.

¿Yóo tsií taahán tsi nayuhvi yo, a tsií nyívi o tsií Nyoo?
(Lc. 12.2-7)

²⁶ Yacan cuenda ña nayuhvi ndo tsi nyívi, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyívi.

²⁷ Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe çana tsa ndo can, na coto tandihí nyívi.

²⁸ Ña nayuhvi ndo tsi nyívi tsañi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

²⁹ Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndí intuhun ti ña canacava ti nu ñuhu tatun ña cuhva maa Nyoo Jutu yo.

³⁰ Tyin nda cuanda ixí jiñi ndo tan tsitó Nyoo najava taahan tsi iyó, tyin tsa nacahví ra intuhun intuhun tsi.

³¹ Yacan cuenda ña nayuhvi ndo. Nyooho, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyívi
(Lc. 12.8-9)

³² Tandihí nyívi tsa caahán catsi tsihin nyívi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.

³³ Maa tyin nyívi cua tyihí xeehe tsi yu nuu inga nyívi, tacan tucu yuhu cua tyihí xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cañi tahan nyívi tsihin tahan ñi
(Lc. 12.51-53; 14.26-27)

³⁴ Ña cuñi ndo tyin yuhu vatsí cuhva yu tsa coo taxin nyívi nu ñuhu ñayívi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.

³⁵ Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña.

³⁶ Tan yacan cuenda juvin ñi maa nyívi vehe ndo cua cuxaan iñi tsi ndo.

³⁷ Nyívi tsa cuñí ca tsi jutu ñi a tsi síhi ñi tan ñavin ca tsi yuhu, ña cuví cuví ñi nyívi cuenda yu. Tan nyívi cuñí ca tsi sehe yíi ñi a sehe síhi ñi, tan ñavin ca tsi yuhu, ña cuví cuví ñi nyívi cuenda yu.

³⁸ Tan nyívi tsa ña cuñí nyehe tundoho tan ndi ña cuñí ñi cuhva ñi ñayívi iyó ñi tsa cuenda yu, ña taahán tsi cuví ñi nyívi cuenda yu.

³⁹ Tyin nyívi cuñi xaan ca ñayívi iyó ñi, cua cunaa ñi. Maa tyin nyívi cua cuhva ñayívi iyó ñi tsa cuenda yu, cua ñihi ñi ñayívi nyito coo ñi.

Nu caahán ra Jesús nácaa cua ñihi yo tsa vaha Nyoo
(Mr. 9:41)

⁴⁰ Nyívi tsa naquihín cuenda tsi nyoocho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsj tsi yu.

⁴¹ Nyívi naquihín cuenda tsi iin ra cuví ndusu yuhu Nyoo tyin Nyoo jaquitsj tsi ra, cua ñihi ndihi ñi tsa vaha tsa cua ñihi ra cuví ndusu yuhu Nyoo can. Tan nyívi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi.

⁴² Tan yóo nyívi tsa cuhva intuhun vasu ndutya vitsin coho nyívi tsa nyicún tsi yu, cua ñihi ndihi ñi tsa cua cuhva Nyoo tsi ñi tsa nyicún tsi yu —catyí ra Jesús.

11

Nu jacuhun ra Juan tsi ra tsicá tsihin ra nu nyíi ra Jesús
(Lc. 7:18-35)

¹ Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ican, tyin cua cahan ra tuhun Nyoo tsihin nyívi tsa iyó ñuu tsa cayucú ityi can.

² Tan ra Juan nyíi ra vehe caa quívi can, tan ñihi tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyíi ra.

³ Tan catyí ra naha tsihin ra:

—¿A juvin yoocho cuví ra Cristo tsa nyaa tsa cua quitsi jacacu tsi ndi? O taton ñavin un cuví, cuatu ndi tsi inga ra —catyí ra naha tsihin ra Jesús.

⁴ Nacahan ra Jesús tan catyí ra:

—Cuaahan ndo tan catyí tuhun ndo tsihin ra Juan tandihí tsa nyehé ndo, tan tsa tsiñí ndo.

⁵ Tan catyí ndo tsihin ra: nyívi cuaa nanyehé ñi, nyívi coxo nacacá ñi, nyívi ndohó cuehe tyaahyú nduvahá ñi, nyívi soho nacuñí ñi, tan nandotó nyívi tsa tsa tsihi, tan nyívi ndaahvi tsiñí ñi tuhun Nyoo nácaa cua cacu ñi.

⁶ Tan catyí ndo tsihin ra tyin síi xaan cua cuví tsi nyívi tsa nyicún tsi yu tun ña ndu uvi íñi ñi —catyí ra Jesús tsihin ra naha.

⁷ Tsa cuahán ra naha, tan quitsaha caahán ra Jesús tuhun ra Juan tsihin nyívi, tan catyí ra:

—Quívi tsa tsahan ndo tsinyehé ndo nu tsiqui, ¿náa cua nyehe ndo cuñí maa ndo? ¿A nyehe ndo iin ndoo tsa janduvá tatyí?

⁸ ¿O náa cuví tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey.

⁹ ¿A ña tsahan ndo tsinyehé ndo tsi iin ra cuví ndusu yuhu Nyoo? Juvín. Tyin ra ican cahan ca cuví ra tan ñavin ca tandihí ra cuví ndusu yuhu Nyoo.

¹⁰ Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen: Yuhu cua jacuhun yu iin ra cahan tuhun yu tsa ndi cumañi ca cahun yu.

Tyin natyiso vaha ra ityi nu cua cuhun un.

¹¹ Tsa nditsa catyí yu tsihin ndo, tyin tsitsi tsa tandihí nyívi tsa tsicoo tan nyívi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyívi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

¹² Nda cuanda quívi tsa tsaá ra Juan tan nda vityin, nyívi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi.

¹³ Ra Moisés cahán ra tuhun nácaa cua cundaca ñaha Nyoo tsi nyívi, tan tacan tucu tandihí ra cuví ndusu yuhu Nyoo. Tacan tan quítsi ra Juan jacoto ra tsi nyívi tyin tsa tsaá quívi tsa cua cundaca ñaha Nyoo.

¹⁴ Tan ra Juan cuví ra Elías ra tsa nyaá tsa cua quítsi, tun nyooho tan cuñí ndo tsinu iñi ndo tsa caahán yu.

¹⁵ Nyooho tsa iyó soho, tyáa soho ndo tsa caahán yu.

¹⁶ ¿Náa tsihin jandu inducu yu tsi nyooho, nyívi tsa iyó quívi ihya? Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha:

¹⁷ “Tívi ndi tiyoo tan ña tsañi ndo yaa. Tan tsitá ndi yaa cuihya, tan ña tsacu ndo”, catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.]

¹⁸ Tyin ra Juan, ra jacoondutyá, quítsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra.

¹⁹ Yahá can tan tsaá tucu yuhu Rayi tsa quee nda gloria. Tan tsatsí yu tan tsihí yu. Tan catyí ndo tyin tsatsí xaan yu tan tsihí xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyívi naquihín tuhun caahán yu tan tuhun cahán ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

Nyívi ña cuñi naquihin cuenda tuhun caahán ra Jesús cua nyehe ñi tundoho (Lc. 10.13-15)

²⁰ Tacan tan quítsahá caahán ra Jesús tsihin nyívi tandihí ñuu nu javahá ra cuaha tsa iyo, tyin ña nasamá ñi cuhva iyó ñi, tan catyí ra:

²¹ —¡Ndahvi nyooho, nyívi ñuu Corazin! ¡Ndahvi nyooho nyívi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tan tucatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cua coso ñi nyaa nuu ñi: tyin ndu uvi iñi ñi cuatyí ñi.

²² Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón.

²³ Tan nyooho nyívi ñuu Capernaum, cuñí maa ndo tyin cundaa ndo nda gloria, maa tyin cua nuu ndo nda cuanda nu yucú nyívi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaá tsi tan iyó tsi nda cuanda vityin.

²⁴ Maa tyin catyí yu tsihin ndo tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi nyooho tan ñavin ca nyívi ñuu Sodoma.

“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo (Lc. 10.21-22)

²⁵ Quívi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsító xaan tan ra nyityi xaan naha ra. Tan jandunditsí un tuhun ihya nuu ra nyihi.

²⁶ Tacan Tyaa, tyin tacan cuñí maa un —catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhvã cuenda ra tandihí tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsító yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi.

²⁸ Tandihí nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo.

²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo.

³⁰ Ña yii tsa cuhva ndo tsi ndo tsa cundaca ñaha yu. Tyin tsa tsahá yu cuisio ndo, yama tsi.

12

Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu

(Mr. 2.23-28; Lc. 6.1-5)

¹ Iin quivi quitatú nyivi, yaha ra Jesús mahñu nu iyó tsa tatsí nyivi. Tan tsaã soco tsi ra tsicá tsihin ra. Tan quitsaha tuhún ra naha yoco trigu can tan tsatsí ra naha.

² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quivi tsa tsaã soco tsi ra naha?

⁴ Quihví ra tsitsi vehe Nyoo, quihín ra paan ii, tan tsatsí ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can.

⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can.

⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu.

⁷ Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehe ndo tsi nyivi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí.

⁸ Yuhu, Rayii tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvaha ra Jesús tsi iin ra na ityi ndaha

(Mr. 3.1-6; Lc. 6.6-11)

⁹ Tacan tan quita ra Jesús ican, tan cuahán ra vehe ñuhu.

¹⁰ Tan ican nyii iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicã tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyiví cuuhví quiví quitatú yo?
—catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndaa nyooho, tatun canacava iin mbee jana ndo tsitsi iin yavi quiví quitatú yo, a ña cua cuhun ndo tan tava ndo tsi ti?

¹² Tan ¿a ña nyaá yahvi ca iin nyiví tan ñavin ca mbee? Yacan cuenda taahan tsi javaha yo tsa vaha quiví quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo.

¹⁴ Tacan tan quitá ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahañ tsanaha

¹⁵ Tsa tsitó ra Jesús tyin nducú ra naha tsi ra, quitá ra ican. Tan cuaha nyiví tsinyicun tsi ra. Tan maa ra janduvaha ra tsi tandihí ñi cuuhví.

¹⁶ Tan catyí ra tsihin ñi tyin na ña catyí tuhun ñi yóo ra cuví ra.

¹⁷ Tacan cuví tyin tacan cahan ra Isaías, ra cuví ndusu yuhu Nyoo tahañ tsanaha. Tan tyehen tyaa ra tuhun Nyoo:

¹⁸ Ra ihya cuví musu yu, ra tsa nacatsj vaha yu.

Cuñi xaan yu tsi ra, tan sii xaan cuñi yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyiví tsa ñavin nyiví Israel cuví, nácaa cua janduvaha yu tsi ñi nuu yu.

¹⁹ Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

²⁰ Tan ndi intuhun ndoo yacua, tan ña cua cahnu ndihí ra.

Tan ndi ña cua ndahva ndihí ra tiñuhu lihli nu caná luxu yuhma.

Nda cuanda coto tandihí nyiví tyin maa ra cuví ra ndacá ñaha tsi ñi.

²¹ Tan tandihí nyiví, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mr. 3.20-30; Lc. 11.14-23; 12.10)

²² Tacan tan tsindaca nyiví tsi iin ra yihí tatyí ña vaha nu nyii ra Jesús, cuaa ra tan ñihi ra. Tan ra Jesús janduvaha ra tsi ra. Tacan tan nacahan ra, tan nanyehé ra.

²³ Iyo xaan cuñi tandihí nyiví, tan catyí ñi:

—¿A ñavin ra ihya cuví tata ra rey David? —catyí ñi.

²⁴ Tan cuhva tsa tsiñi ra fariseo naha ra tsa caahan ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

²⁵ Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihí tyiñu tsa ndacá ñaha ra naha. Tan tatun iin ñuu o tandihí nyiví iin vehe tan cusñn ñi, tacan tan cua tiví nu yucú ñi.

²⁶ Tan tacan tucu tatun nu ña vaha tan tava nu juvin ñi tahan maa nu, cuñi tsi catyí tyin ña iin ñi cuví nahnu, tan cundihí tunyee iñi tsa iyó tsi nahnu.

27 Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo.

28 Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsaꝓ cuhva ndacá ñaha Nyoo nu yucú ndo.

29 'Tan ¿yóo cuví quihví tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihí tsa iyó tsi ra.

30 'Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyivi, cuñí tsi catyí tyin ña tsahá ñi tsa coto nyivi tuhun caahán yu.

31 'Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi.

32 Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a ña vaha ñi
(Lc. 6.43-45)

33 'Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun.

34 ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo.

35 Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi.

36 Tan yuhu catyí yu tsihin ndo tyin quivi cua tatsi tuñi Nyoo tsi tandihí nyivi, cua cuhva cuenda ñi tandihí tuhun tsa ña vaha cahan ñi.

37 Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

Nyivi ña vaha, tsa iyo ñi cuñí ñi nyehe ñi
(Mr. 8.12; Lc. 11.29-32)

38 Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

39 Tan nacahan ra Jesús tan catyí ra:

—Nyivi ña vaha tan nyivi tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahañ tsanaha.

40 Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayii tsa quee nda gloria tsitsi ñuhu uñi quivi tan uñi tsacuaa.

41 Tan quivi cua tatsi tuñi Nyoo tsi tandihí nyivi, cua nduvita nyivi tsicoꝓ ñuu Nínive tahañ tsanaha tan cua catyí ñi na tatsi tuñi Nyoo tsi nyooho nyivi

tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasama ñi cuhva iyó ñi quiví cahan ra Jonás tuhun Nyoo tshin ñi. Tan ihya nyii ra cahnu ca cuví tan ñavin ca ra Jonás. [Tan ña cuñí ndo tyaa soho ndo tsa caahán yu.]

⁴² Tan tacan tucu ñaha tsa tsindaca ñaha ityi Sur, cua nduvita ña quiví cua cutuñi nyiví tan cua catyi ña tyin cua cunaa nyooho nyiví iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahan ra Salomón. Tan vityin cahnu ca ra caahán tshin ndo tan ñavin ca ra Salomón.

Nu caahán ra Jesús tshin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo

(Lc. 11.24-26)

⁴³ Tatun iin nu tatyí ña vaha quita nu tsitsi añima iin nyiví, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

⁴⁴ “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndii xaan, tan yoñi iyó, tan sii xaan caá.

⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyiví quihvi iyó —catyi ra Jesús.

Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyiví tsa javahá cuhva cuñi Nyoo

(Mr. 3.31-35; Lc. 8.19-21)

⁴⁶ Ndi caahán ca ra Jesús tshin nyiví, tan tsaá sihi ra tan yañi ra, tan nyecú ñi ityi tsata vehe, tan cuñí ñi cahan ñi tshin ra.

⁴⁷ Tacan tan jacoto iin ra tsi ra Jesús, tan catyi ra:

—Sihi un tshin ra yañi un naha ra nyecú ñi tsata vehe. Tan cuñí ñi cahan ñi tshin un.

⁴⁸ Tan nacahan ra Jesús tan catyi ra tshin ra can:

—¿Yóo cuví sihi yu tan yóo cuví yañi yu? —catyi ra.

⁴⁹ Tacan tan janaha ndaha ra nu nyecú ra tsicá tshin ra, tan catyi ra:

—Ra ihya naha ra cuví sihi yu tan yañi yu.

⁵⁰ Tyin tandihi nyiví tsa javahá cuhva cuñi Jutu yu, ra nyaá gloria, juven ñi can cuví yañi yu, tan cuhva yu, tan sihi yu —catyi ra Jesús.

13

Nu caahán ra Jesús tyin tumaa iin ra tatsí, tacan cuví ra caahán tuhun Nyoo

(Mr. 4.1-9; Lc. 8.4-8)

¹ Quiví can quita ra Jesús vehe nu nyii ra tan cuahán ra, tsicunyaá ra yuhu miñi.

² Tan cuaha xaan nyiví ndu iin nu nyaá ra, yacan cuenda quihvi ra tsitsi iin yutun ndoo tan tsinyaá ra. Tan tandihi nyiví ndoo ñi yuhu ndutya.

³ Tacan tan quitsaha jacuahá ra tsi ñi tan caahán ra tshin ñi tshin iin cuhva, tan catyi ra:

—Quita iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

⁴ Tan cuhva tsa quití ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can.

⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can.

⁶ Maa tyin cuhva tsa cana ñicanyii, numi ñi na ityi tsi, tyin ña cunu yihí yoho tsaha tsi.

⁷ Juhva ca tsiti can cucoyo tyañu iñu. Tan quivi cana trigu can tsahnū tsi iin caa ñi tsihin iñu can, tan iñu can numi xaan ca tsahnū tsi tan tsahñi tsi trigu can.

⁸ Maa tyin juhva ca tsiti can cucoyo nu ñuhu vaha. Tan quivi tsahnū tsi, vaha xaan tsaha tsi tsiti. Tyin tsa iin tsiti can, cientu tsiti quita tsihin tsi. Tan inga tsiti can, uñi xico, tan inga tsi oco utsi tsiti tsaha tsi.

⁹ ¡Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenta jacuahá ra tsi nyivi tan ña catyí tuhun catsi ra tsihin ñi

(Mr. 4.10-12; Lc. 8.9-10)

¹⁰ Tacan tan natuhva ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenta tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

¹¹ Tan nacahan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsaha Nyoo tsi nyooho.

¹² Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nyaa ndihi yu tsa luxu ñi tsa tsitó ñi.

¹³ Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can.

¹⁴ Tyin tacan tan cundaa tsa cahán ra Isaías ra cuví ndusu yuhu Nyoo tahañ tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehé ndo tsa javahá yu, tan ña cua cutuñi iñi ndo.

¹⁵ Tyin tsa ndundava xaan añima nyivi ihya,

tan ña çatsi vaha tsiñi ñi.

tan ndasí tinuu ñi,

na ña cua nyehé ñi tsihin tinuu ñi,

tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

¹⁶ Maa tyin sii xaan cuví tsi nyooho, tyin nyehé ndo tsihin tinuu ndo, tan tsiñi ndo tsihin soho ndo.

¹⁷ Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñi ñi nyehé ñi tsa nyehé nyooho tsa javahá yu, maa tyin ña nyehé ñi. Tan cuñi ñi tyaa soho ñi tandihi tsa tsiñi nyooho vityin, maa tyin ña tsiñi ñi.

Nu catyí tuhun ra Jesús tsa cuñi tsi catyí cuhva tsa cahán ra tsihin nyivi tsa cuenda ra tatsi can

(Mr. 4.13-20; Lc. 8.11-15)

¹⁸ Tyaa soho ndo tsa cuñi tsi catyí cuhva tsa cahán yu tsa cuenda ra tsa tatsi tsiti trigu can:

¹⁹ Nyivi tsa tsiñi tuhun nácaa cuñi Nyoo cundaca ñaha ra añima ñi, tan ña cutuñi iñi ñi, cuví ñi tumaa nu cucoyo tsiti trigu yuhu ityi. Tan quitsi nu ña vaha tan quihin nyaa nu tuhun Nyoo tsa iyó añima ñi.

²⁰ Tan tumaa nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Tan sii xaan naquihin vaha ñi itsi juhva ñi quivi.

²¹ Tyin nduve ñuhu cunu ican, yacan cuenda cana tsiti can, maa tyin ña cuví huhun yoho tsi. Tan tacan cuví nyivi can. Juhva ñi quivi tsinú iñi ñi. Maa tyin quivi tsa quitsahá nyehe ñi tundoho, tan caahán ndasi nyivi tsata ñi tsa cuenda tuhun Nyoo, tacan tan jandihí ñi tsa tsinú iñi ñi.

²² Tan tumaa nu cucoyo tsiti can tsitsi iñu, juvin ñi nyivi tsa tsiñi tuhun Nyoo cuví can. Tsiñi ñi, maa tyin ña cuñi ñi javaha ñi tumaa tsiñi ñi. Tyin tyaá xaan ca iñi ñi tundoho ñayivi tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti.

²³ Tan ñuhu vaha nu cucoyo tsiti can, yacan cuví inga nyivi tsa tsiñi tuhun Nyoo, tan cutuñi iñi ñi, tan javahá ñi tandihí tuhun caahán ra. Yihí ñi cuví ñi tumaa tsiti tsa cana tan tsahá tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

Nu caahán ra Jesús nácaa cuahán tuhun trigu tan cuhu ña vaha

²⁴ Tan cahán tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyivi cuví tsi tumaa iin ra tsa tatsi tsiti trigu nu ñuhu ra.

²⁵ Tan cuhva tsa quixí tandihí ra jahá tyiñu naha ra, quihvi iin ra xaan iñi tsi ra jatsii can, tan quiti ra tsiti cuhu ña vaha, tan cuahán ra.

²⁶ Tan quivi cana tsiti trigu can, tan cana yoco tsi, cana ndihi tucu cuhu ña vaha can.

²⁷ Tacan tan ra cuví musu can naha ra, tsahán ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenda tyin cana cuhu ña vaha can?” catyí ra naha.

²⁸ Tan nacahán ra can tan catyí ra: “Iyó iin ra xaan iñi tsi yu javahá tsehe, tun cuví.” Tacan tan musu can, catyí ra naha tsihin tsitoho ra: “¿A cuñi un tyin huhun ndi tan tuhun ndi cuhu ña vaha can?”

²⁹ Tan tsitoho ra naha catyí ra: “Ña tuhun ndo, tyin coto tuhun ndihi ndo trigu can.

³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihí vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo (Mr. 4.30-32; Lc. 13.18-19)

³¹ Tacan tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa iin tsiti mostaza tsa tatsi iin ra nu ñuhu ra.

³² Tyin tsiti can lihli ñi tsi tan ñavin ca tandihí ca tsiti. Maa tyin quivi tsahnu tsi cuví tsi iin yutun. Tan quitsi saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo

(Lc. 13.20-21)

³³ Tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihí yutsan paan can

jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

Nu catyí tuhun ra Jesús nacuenda jacuahá ra tsi nyívi tsihin cuhva
(Mr. 4.33-34)

³⁴ Tandihí tuhun can cahān ra Jesús tsihin nyívi tsihin cuhva. Tan tandihí tsa cahān ra tsihin ñi ña cahān catsi maa ra, maa ñi maa tsihin cuhva cahān ra.

³⁵ Tacan cuví tyin tacan tan cundaa tsa cahān Jutu Mañi yo tsihin yuhu ra cuví ndusu yuhu ra tahān tsanaha tan tyaā ra tyehen: Tsihin cuhva cua cahān yu tsihin nyívi.

Cua cahān yu tsihin ñi tuhun tsa yihí xeehe nda cuanda tsa javahā Nyoo ñuhu ñayívi.

Nu caahán ra Jesús náa cuñí tsi catyí cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyívi, tan quihví ra tsitsi vehe nu nyíi ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñí tsi catyí tsa cahān un tsihin nyívi tsa cuenda cuhu ña vaha tan trigu can.

³⁷ Tacan tan quitsahā catyí ra Jesús tsihin ra naha:

—Ra tsa tatsí tsiti trigu can cuví yuhu Rayíi tsa quee nda gloria.

³⁸ Tan ñuhu can cuví nyívi iyó nu ñuhu ñayívi. Tan tsiti trigu can cuví nyívi tsa ndacá ñaha Nyoo. Tan cuhu ña vaha can cuví nyívi tsa nyicún tsi nu ña vaha.

³⁹ Tan nu tsa tatsí cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñí tsi catyí quivi cua cundihí ñuhu ñayívi. Tan ra tsa cua naquihin tsiti can, cuví ra ángel naha ra.

⁴⁰ Tumaa jatacā ra naha cuhu ña vaha can tyin cayu tsi, tacan cua cuví quivi cua cundihí ñayívi.

⁴¹ Yuhu Rayíi tsa quee nda gloria cua jaquitsi yu ángel tan jataca ra naha tsi nyívi natyuhu tsi inga nyívi na javaha ñi tsa ña vaha tan inga nyívi tsa iyó cuatyí.

⁴² Tan cua tyihí ra naha tsi ñi tsitsi ono nu cayú ñuhu. Tan ican cua vacu tsa ñi tan cahyū ña cua cuví nuhu ñi.

⁴³ Nyooho tan nyivi javahá cuhva cuñí Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaā soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyívi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jatā ra ñuhu nu yihí xeehe xuhun cuaan can.

Iin cuhva tsa cahān ra Jesús cuenda iin yuu xiñu tsa yahvi xaan nyaá

⁴⁵ Tan tsa ndacá ñaha Nyoo tsi nyívi, cuví tucu tsi tumaa iin ra najatá yuu xiñu tan naxicó nyico ra,

⁴⁶ tan tsa ñihí ra iin tsa yahví xaan nyaá, xico ra tandihí maa tsa cumí ra, tan jatā ra yuu xiñu vaha can.

Nu caahán ra Jesús iin cuhva cuenda traya

47 *Tan juvin ñi cuví tucu tsa ndacá ñaha Nyoo tsi nyívi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca.

48 Tan tsa tsitu traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quití vaha tsitsi iin tyica, tan javitá ra naha quití ña vaha can.

49 Tan tacan cua cuví quívi naa ñayívi, cua quítsi ángel, quítsi tava siin ra naha tsi nyívi vaha tan nyívi ña vaha.

50 Tan cua tyihí ra naha tsi nyívi ña vaha can anyaya nu cayú ñuhu, nu cua vacu tsa ñi tan cahyu ña cua cuví nuhu ñi.

Nu caahán ra Jesús tyin vaha tuhun tsahnu Nyoo tan tuhun tsa Nyoo

51 Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñí iñi ndo tandihí tsa cahan yu?

Tan nacahan ra naha tan catyí ra naha:

—Cutuñí iñi ndi, Jutu Mañi yu.

52 Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsa tsa caahán yu, cua cuví ra tumaa iin ra jatsii vehe tan cua jacuahá ra nduvi taahan tuhun vaha can tsi nyívi —catyí ra Jesús.

Nu tsinuhu ra Jesús ñuu Nazaret nu tsahnu ra

(Mr. 6.1-6; Lc. 4.16-30)

53 Tsa ndihí cahan ra Jesús cuhva ihya tan quita ra cuahán ra.

54 Tan tsaá nyico ra ñuu ra. Tan quitsaha jacuahá ra tsitsi vehe ñuhu ñuu can. Tan iyo cuñí nyívi tan catyí ñi:

—¿Nu maa tahan cutuhvá ra ihya tsa tsitó xaan ra? ¿Tan nácaa cuví javaha ra tsa iyo?

55 Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas.

56 Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvá ra tandihí tsa tsitó ra? —catyí ñi.

57 Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyívi tandihí ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaá yahvi ñi tsi ra tan ndi nyívi vehe ra —catyí ra Jesús.

58 Tan ña cuaha tsa iyo javahá ra ñuu ra tsa cuenda tyin ña tsinú iñi ñi tsi ra.

14

Nu catyí tsi nácaa tsihi ra Juan, ra jacoondutyá tsi nyívi

(Mr. 6.14-29; Lc. 9.7-9)

1 Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús.

2 Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandoto nyico ra. Yacan cuenda iyó tunyee iñi tsi ra tsa javahá ra tsa iyo.

3 Tacaan catyí ra tyin juvin ñi maa ra tava tyiñu tyin tiin ra naha tsi ra Juan. Tan cuñi ra naha tsi ra tsihin cadena, tan tyihí ra naha tsi ra vehe caa. Tacan javahá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

⁵ Yacan cuenda ra Herodes cuñi ra cahñi ra tsi ra Juan, maa tyin yuuhvi ra tsi nyivi, tyin tandihi ñi tsinú iñi ñi tyin ra Juan, ndusu yuhu Nyoo cuví ra.

⁶ Tan iin quivi iyó vico ra Herodes, tan sehe ña Herodías quitsaha tsañi ña yaa nu yucú ñi vico can. Tan tahañ xaan iñi ra Herodes.

⁷ Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

⁸ Tacan tan natyuhu sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyivi, tsi yu nu iin coho —catyí ña.

⁹ Tsa tsiñi ra rey Herodes tsa cahan ña, nducuihya cuñi ra. Maa tyin tsa cuenda tsa cahan ra tyin tandihi tsa cua ndacan ña tan cua cuhva ra, yacan cuenda ña cuví jandavi ñaha ra tyin tandihi nyivi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho.

¹⁰ Tan tava tyiñu ra na cucahnya ra naha jucun ra Juan nu nyii ra vehe caa.

¹¹ Tacan tan tsindaca ra naha jiñi ra Juan tsi ña, nyii tsi nu iin coho. Tan tsaha ra naha tsi ñaha tyuvaa can. Tan maa ña nacuhva cuenda ña tsi sihi ña.

¹² Tacan tan tsaá ra nyicun tsi ra Juan naha ra tan naquihin ra naha cuñu ñuhu ra, tan tyihj ra naha tsitsi ñuhu. Yaha can tan tsahañ ra naha tsjacotó ra naha tsi ra Jesús.

Nu jacatsj ra Jesús tsi uhun mil rayii

(Mr. 6.30-44; Lc. 9.10-17; Jn. 6.1-14)

¹³ Tsa tsitó ra Jesús tsa tahañ ra Juan, quihin ra iin yutun ndoo, tan cuahán intuhun ñi maa ra nu taxin caa. Tan tsa tsitó nyivi, quitá ñi ñuu ñi, tan cuahán tsihin tsaha ñi nu nyii ra.

¹⁴ Tsa quitá ra Jesús tsitsi yutun ndoo can, tan nyehe ra tyin cuaha xaan nyivi nyicun tsi ra. Tan cundaahvi iñi ra nyehe ra tsi ñi. Tan janduvaha ra tsi nyivi cuuhvi tsa tsaá tsihin ñi.

¹⁵ Tan tsa cuñi cuaq, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca cahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cahun ñi. Cuhva nyooho tsa catsi ñi.

¹⁷ Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndaca ndo can tsi yu.

¹⁹ Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnú cuatyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can.

²⁰ Tan tandihi nyivi tsatsj ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ícan.

²¹ Tan tsa tandihi ñi tsa tsatsj can, quitá maa tumaa uhun mil tsa maa ñi maa rayii. Tan siin maa ñiñaha tan tsa nyihi.

Nu tsicá ra Jesús nu ndutya
(Mr. 6.45-52; Jn. 6.16-21)

²² Tsa yaha can tan catyí ra Jesús tshin ra tsicá tshin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tshin nyivi tyin na cuhun ñi.

²³ Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa.

²⁴ Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha.

²⁵ Tan tsa cua tuvi cuahán ndihi ra Jesús nu cuahán ra naha tshin yutun ndoo can, tan tsicá tshin tsaha ra cuahán ra nu ndutya.

²⁶ Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsaa ra naha, tan catyí ra naha:

—jihna ndo xin. Tatyí vatsí can!

²⁷ Maa tyin nacahan ra Jesús tshin ra naha, tan catyí ra:

—ñi nayuhvi ndo tyin maa yu cuví! —catyí ra.

²⁸ Tacan tan nacahan ra Pedro tan catyí ra:

—Jutu Mañi yu, tatun maa un vatsí juvin, cuhva tsa quitsi ndihi yu nu vatsí un.

²⁹ Tan ra Jesús catyí ra tshin ra:

—Naha jiin.

Tacan tan quitá ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsí ra Jesús.

³⁰ Maa tyin cuhva tsa tuvi iñi ra tyin ñihi xaan quitsaha yihí tatyí, nayuhvi xaan ra, tacan tan quitsaha cuñi nyee ra, tan quitsaha caná tsaa ra tan catyí ra:

—jácacu tsi yu, Jutu Mañi yu!

³¹ Tan iin yaha ñi tiin ra Jesús ndaha ra, tan catyí ra tshin ra:

—¿Nacuenda tsa nayuhvi un, yooho tsa luxu xaan tsinú iñi tsi yu? —catyí ra Jesús tshin ra.

³² Tan cuhva tsa quihvi ra naha tsitsi yutun ndoo can, cutaxin tatyí can.

³³ Tacan tan ra yucú tsitsi yutun ndoo can tsicuiñi tsi ra naha nuu ra Jesús, tan catyí ra naha tshin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvaha ra Jesús tsi nyivi cuuhvi tsa iyó Genesaret
(Mr. 6.53-56)

³⁴ Tsa yaha sava ra naha miñi can, tsaa ra naha ñuhu Genesaret.

³⁵ Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihi nyivi iyó tani cahnú can. Tan tsindaca ñi tandihi nyivi cuuhvi nu nyii ra.

³⁶ Tan caahán ndaahvi ñi tshin ra, na cuhva ra tsa tiin ñi vasu luxu jahma ra. Tan tandihi ñi tsa tiin jahma ra, nduvaha ñi.

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyí ra Jesús tan tsicā tuhun ra naha tsi ra, tan catyí ra naha:

² —¿Nacuenda ña javahá ra tsicá tsihin un naha ra cuhva nacoo tsi tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahun can —catyí ra naha.

³ Tan tsicā tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaá yahvi ndo tsa caahán Nyoo?

⁴ Tyin Nyoo catyí ra: “Tyaá yahvi ndo tsi jutu ndo tan tsi sihi ndo, tyin tandihi nyívi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo.

⁵ Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsahā yu tandihi tsa iyó tsi yu tsi Nyoo.”

⁶ Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo.

⁷ ¡Nyooho cuñí ndo tyin vaha xaan ndo, maa tyin ña nditsa ndo! Nditsa tsa cahān ra Isaías, ra cuví ndusu yuhu Nyoo, siqui ndo jahā Nyoo. Tan catyí ra tyehen:

⁸ Nyívi ihya, jacahnú ñi tsi yu tsihin yuhu ñi. Maa tyin ñavin tsihin tsa ñi iñi ñi.

⁹ Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi. Catyí ra Isaías tuhun ndo jahā Nyoo, catyí ra Jesús tsihin ra ican naha ra.

¹⁰ Tacan tan canā ra Jesús tsi nyívi tan catyí ra tsihin ñi:

—Tyaá soho ndo tsa caahán yu, tan ndūcu ndo cuhva cutuñi iñi ndo.

¹¹ Tyin nyívi tsa tiví nuu Nyoo, ñavin tsa quihví yuhu ñi jatíví tsi ñi. Tyin tiví ñi jahá tsa quitá yuhu ñi.

¹² Tacan tan natuhvā ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñi ra naha tsa cahān un.

¹³ Tan maa ra Jesús nacahān ra tan catyí ra:

—Tandihi yutun tsa ña tatsi Jutu yu, ra nyaá gloria, cua tuhun ra nda cuanda yoho tun.

¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsahā catyí ra Pedro tsihin ra Jesús:

—Catyí tuhun tsihin ndi náa cuñí tsi catyí tsa cahān un nañi.

¹⁶ Tacan tan ra Jesús catyí ra tsihin ra naha:

—Ndi nyooho tan ña cutuñi ndihi iñi ndo.

¹⁷ ¿A ña cutuñi iñi ndo tyin tsa tsatsí yo, tsitsi yo cuahán tsi? Yahā can tan cua quita nyico tsi.

¹⁸ Maa tyin tuhun tsa quitá yuhu yo, tsitsi añima yo quee can tan nyívi tiví ñi nuu Nyoo jahá tsa caahán ñi.

¹⁹ Tyin tsa caquiñi tsicá iñi ñi tsitsi añima ñi quitá can, tan cuñi ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñi nyaa ñi tsi inga ca nyivi. Yihí ra cuñi ra coo inga ñaha ra, o ñiñaha iyó yii tsicá nuu ñi tsihin inga rayii. Yihí ra tsicoó ra tsihin ñaha tan ña tindaha ra tsihin ña. Tan yihí rayii quixí ra tsihin juvin ñi maa rayii. Tan ñiñaha yihí ñi quixí ñi tsihin juvin ñi maa ñaha. Tan tandihi ca maa tsa caquiñi tsa javahá ñi tsihin cuñu ñuhu ñi.

²⁰ Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

Nu tsinu iñi iin ñaha inga ñuu tsi ra Jesús

(Mr. 7.24-30)

²¹ Quitá ra Jesús ñuu can tan cuahán ra ityi ñuu Tiro tan Sidón.

²² Tan ityi can iyó iin ñaha Canaán. Tan tsa nyehé ña tsi ra Jesús natuhvã ña nu nyaá ra tan caná tsaã ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiñj ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhvã ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsaã ña tsata yo.

²⁴ Tacan tan catyí ra Jesús tsihin ra naha:

—Vatsí yu jahã Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

²⁵ Tan ñaha can natuhvã ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, ¡jatyinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

²⁷ Maa tyin ña ndasi cuñi ña tsa cahan ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xu mesa tsitoho ti —catyí ña.

²⁸ Tacan tan catyí ra Jesús tsihin ña:

—Yooho ñaha, tsinu xaan iñi un tsi yu. Na cuví maa cuhva tsicá iñi un.

Tan juvin ñi cuhva can tan nduvahã sehe ña.

Nu cuaha xaan nyivi cuuhví janduvahã ra Jesús

²⁹ Tsa yahã yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaã ra.

³⁰ Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquin nyecu ñi tsi tandihi ñi cuuhví can nu nyaá ra Jesús. Tan janduvahã ra tsi ñi.

³¹ Tan iyo xaan cuñi nyivi can nyehé ñi tyin nacahan ñi ñiñi tan nduvahã ñi lundu, tan nacacá ñi coxo, tan nanyehé ñi cuaa. Tan quitsahã jacahnu xaan ñi tsi Nyoo ñi, tsa cuví ñi nyivi Israel.

Nu tsahá ra Jesús tsa catsi cumi mil rayii

(Mr. 8.1-10)

³² Tacan tan canã ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyívi ihya, tyin tsa uñi quívi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyívi cuaaha ihya, tyin ihya nduve nyívi iyó?

³⁴ Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyívi na cunyecu ñi nu ñuhu.

³⁶ Tacan tan quihñ ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsahá tsahnú catyí ra paan tsihin tyaca, tan tsahá ra tsi ra tsicá tsihin ra tyin na tsatsa ra naha tsi nyívi.

³⁷ Tandihí ñi tsatsí ñi, tan ndahá vaha iñi ñi. Tan tsa ndihí tsatsí ñi tan naquihñ ra naha tsa ñahñu tsa ndoo can tan quitá utsa tyica cuví tsi.

³⁸ Tan ra tsa tsatsí can naha ra quitá maa cumí mil ra naha tan sñn maa ñiñaha tan tsa nyihi.

³⁹ Yahá can tan jacunuhu ra tsi ñi, tan quihví ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyii ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo.

² Maa tyin nacahñ ra Jesús tan catyí ra tsihin ra naha:

—Tsa cueñi, tuhvá ndo catyí: “Sñ xaan caa ityaan cua cuví tyin cuaaha xaan nu vico”.

³ Tan tsa tuvi catyí tucu ndo tyin ña sñ maa caa cua cuví, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha?

⁴ Nyívi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehé ñi. Maa tyin yuhu ña cua javaha yu tsa iyo nyehé ñi, tyin tumaa tsa cuví tsi ra Jonás, yacan ña cua nyehé ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8.14-21)

⁵ Cuhva tsa yahá ra tsicá tsihin ra Jesús inga tsiyo miñi can, nducuhñ iñi ra naha tyin nduve paan tsa catsi ra naha ndahá ra naha.

⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸ Tan tsa tuvji iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

⁹ ¿A ñaha ca cutuñi iñi ndo? ¿A ña nducuhún iñi ndo quivi tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can?

¹⁰ ¿A tsa naá ndihi tucu iñi ndo quivi tsa jacatsi yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan?

¹¹ ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

*Nu catyí ra Pedro tyin ra Jesús cuví ra Cristo, ra jacacú tsi yo
(Mr. 8.27-30; Lc. 9.18-21)*

¹³ Cuhva tsa tsaá ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—Náa catyí nyivi? ¿Yóo ra cuví yu, Rayii tsa quee nda gloria? —catyí ra.

¹⁴ Tan nacañan ra naha tan catyí ra naha:

—Yihí nyivi catyí ñi tyin ra Juan ra jacoondutyá tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahañ tsanaha cuví un.

¹⁵ Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

¹⁶ Tacan tan nacañan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

¹⁷ Tan nacañan ra Jesús tan catyí ra:

—Sií xaan cuví tsi yooho, Simón, sehe ra Jonás, tyin ñavin nyivi janaha tuhun ihya tsi un, tyin maa Jutu yu, ra nyaá gloria janaha tsi un.

¹⁸ Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi.

¹⁹ Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jaha Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

²⁰ Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tan juven ra cuví ra Cristo ra tsa quee nu nyaá Nyoo.

*Nu caahán ra Jesús tyin cua cahñi nyivi tsi ra
(Mr. 8.31—9.1; Lc. 9.22-27)*

²¹ Nda quivi can quitsaha catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoño tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha.

²² Tacan tan quihñan ra Pedro tsi ra tan quita siin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyico coo ra Jesús, tan quitsaha caahán ra tsihin ra Pedro:

—jɔtsiyo nyaha tsi un, cuihna! Tyin cuñi un casi un tsi yu. Tyin yooho ña tsicá iñi un cuhva cuñi Nyoo, tyin cuhva cuñi nyivi tsicá iñi un —catyí ra.

²⁴ Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuvi javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuvi cruu tsa taahán tsi cuiso ndo tatun cua cunyicun ndo tsi yu.

²⁵ Tan nyooho tsa ña cuñi nyehe tundoho, tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo.

²⁶ Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo.

²⁷ Tyin yuhu, Rayii tsa quee nda gloria, cua quitsi nyico yu inga tsaha, maa tyin tsihin tsa cahnu cuvi Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javahá ndo.

²⁸ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

17

Nu nyehe uñi taahán ra tsicá tsihin ra Jesús nácaa tsa sñi caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yahá iñu quivi, tan quihñ ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

² Tan ícan nasamá cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu.

³ Tacan tan nyehe ra naha tsi ra Moisés tan ra Elías, natuhún ra naha tsihin ra Jesús.

⁴ Tan quitsahá caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sñi xaan cuñi yu tsihin ra. Tyaa yahvi ndo tsa caahán ra —catyí ndusu can.

⁶ Tsa tsiñi ra tsicá tsihin ra Jesús tuhun ihya, tsicavá tsihin nuu ra naha nda nu ñuhu, tyin nayuhvi xaan ra naha.

⁷ Tacan tan natuhvá ra Jesús nu cayucú ra naha, tan tñn ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ñā caḥan ndo tsa nyeḥe ndo ihya tsihin nyivi. Tsa yaha tsa cúu Rayii tsa quee nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsicā tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahañ ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi.

¹² Maa tyin yuhu catyí yu tsihin ndo tyin tsa yaha quitsi ra Elías, tan ñā nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayii tsa quee nda gloria, cua janyehe ñi tundoho tsi yu —catyí ra tsihin ra naha.

¹³ Tacan tan cutuñi ñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iin ra luhlu tsa tsiihi naaha jahá tatyí ñā vaha (Mr. 9.14-29; Lc. 9.37-43)

¹⁴ Cuhva tsa tsaā ra naha nu yucú nyivi, natuhvā iin ra tan tsicuiñi tsiti ra nuu ra Jesús, tan catyí ra tsihin ra:

¹⁵ —Tata, cūndaahvi ñi tsi sehe yu, tyin yihí cuehe tsiihi naaha tsi ra, tan tuhvā ra nduva ndasava, tan cuaha xaan tundoho nyehé ra jahá cuehe can. Tan yihí tsaaha nduvá ra nu ñuhu tan cayú ra, tan nduvá tucu ra nu yihí ndutya.

¹⁶ Tan tsindaca yu tsi ra tsi ra tsicá tsihin un, maa tyin ñā cuvī janduvaha ra naha tsi ra —catyí ra.

¹⁷ Tan nacahañ ra Jesús tan catyí ra:

—¡Nyooho, nyivi tsa ñā tsinú ñi cuvī ndo! ¡Tan caquiñi ndo! ¿Ndáa nda quivi cua cunyi yu tsihin ndo? ¿Tan ndáa nda quivi cua cunyeē ñi yu tsihin ndo, tyin nyooho ñā tsinú vaha maa ñi ndo tsi yu? Tīndaca ndo tsi ra luhlu tsi yu —catyí ra.

¹⁸ Tacan tan tava ra Jesús tsi nu tatyí ñā vaha can, tan quita nu tsi ra luhlu can. Tan juvin ñi cuhva can nduvaha ra.

¹⁹ Tsa yaha can tan tsicā tuhun sīn ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ñā cuvī tava ndi tatyí ñā vaha can?

²⁰ Tan ra Jesús nacahañ ra tan catyí ra:

—Tyin luxu cuiñi ñi tsinú ñi ndo tsi yu. Tsa nditsa catyí yu tsihin ndo tyin tun tsinú ñi ndo tsi yu, tumaa iin tsiti mostaza, cuvī catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ñā cua cuvī javaha ndo tatun nditsa tsa tsinú ñi ndo tsi yu.

²¹ Maa tyin tahan tatyí ñā vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaaha cahañ ra Jesús tsa cua cahñi nyivi tsi ra (Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayii tsa quee nda gloria, iin ra cua nacuhva cuenda ra tsi yu tsi ra xaan ñi tsi yu naha ra.

²³ Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuiihya xaan cuñi ra naha cuvī.

Nu yahví ra naha cuenda tsa nduvaha vehe ñuhu cahnu

²⁴ Cuhva tsa tsaꞗ ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahaꞗ ra naha tsinyeꞗ ra naha nu nyí ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahaꞗ ra Pedro tan catyí ra:

—Tuhvá ra.

Tan tsa quihví ra Pedro tsitsi vehe nu iyó ra naha, jihna ca ra Jesús nacahaꞗ tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayívi ihya yahvi? ¿A tsi nyívi ñuu maa ra o tsi inga nyívi?

²⁶ Nacahaꞗ ra Pedro tan catyí ra:

—Tsi inga nyívi.

Tan catyí ra Jesús tsihin ra:

—Tun tacan, nyívi ñuu maa ra ña taahán tsi tyahvi ñi.

²⁷ Maa tyin ña cuñi yo tsa cahan ra naha siqui yo, yacan cuenda vaha ca tsa cahun un yuhu miñi can, tan jacuhun un yíqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janahaꞗ ra Jesús yóo ra cahnu ca cuví nuu tandihí nyívi tsa ndacá ñaha Nyoo

(Mr. 9.33-37; Lc. 9.46-48)

¹ Quívi can natuhvá ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

² Tacan tan ra Jesús cana ra tsi iin ra luhlu, tan tyaa ra tsi ra mahñu ra naha.

³ Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuví quihví ndo nu ndacá ñaha Nyoo.

⁴ Tyin ra tsa cahnu ca cuví nuu Nyoo, juvin ra cuví ra tsa janduluhlú tsi, tumaa ra luhlu ihya.

⁵ Nyívi tsa naquihín tsi iin nyívi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha

(Mt. 5.29-30; Mr. 9.42-48; Lc. 17.1-2)

⁶ Tatun yóo nyívi natyuhú tsi iin nyívi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyívi tsi ñi nu cunu ndutya ñuhu.

⁷ ¡Ndahvi nyívi ñuu ñayívi, tyin tacan iyó tsa jatívi tsi ñi! ¡Tan ndahvi tucu ra ndaahvi tsa jatívi tsi ñi!

⁸ Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihví un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanñi un tan jacuhun Nyoo tsi un nu cayú ñuhu tsa ña cua ndahva maa.

⁹Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahan ra Jesús tyin tumaa mbee tsa cunaa, tacan cuví yo
(Lc. 15.3-7)*

¹⁰Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan ñiñu, nyecú ra naha nuu Jutu yu, ra nyaá gloria.

¹¹Tyin yuhu, Rayi tsa quee nda gloria, vatsí jacacu yu tsi nyivi tsa cuanaa.

¹²¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quití tsa cuanaa can?

¹³Tan tatun nañihi ra tsi ti, tsa nditsa tyin si ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa.

¹⁴Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

*Nacaa taahán tsi jahá tahan yo tucahnu iñi tsi yo
(Lc. 17.3)*

¹⁵Tatun ra yañi un tan javahá ra tsa ña vaha tsi un, cahan tsihin intuhun ñi maa ra tan catyí un tsihin ra tyin ña vaha cuhva javahá ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can.

¹⁶Maa tyin tatun ña tyaa yahvi ra tsi un, tacan tan caña un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can.

¹⁷Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandihi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

¹⁸Tsa nditsa catyí yu tsihin ndo, tyin tandihi tsa cuhñi ndo ihya nu ñuhu ñayivi, tsa nuuhñi tsi jahá maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

¹⁹Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsiacán ndo tsi Jutu yu, ra nyaá gloria, cua cuhva ra yacan tsi ndo.

²⁰Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

²¹Tacan tan tsahan ra Pedro tsindaca tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

²²Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

Nu cahan ra Jesús iin cuhva cuenda iin ra tsa ña cuñi jaha tucahnu iñi

²³Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nácaa nyaá cuenda ra naha tsi ra.

²⁴ Tan cuhva tsa quitsahā natavá ra cuenda, tan tsindacā ra tsi iin musu tsa cuaha millón pesu nyaá cuenda tsi ra.

²⁵ Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasiihi ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

²⁶ Tacan tan musu can tsicuiñi tsiti ra nuu tsitoho ra, tan cahān ndaahvi ra tsihin ra, tan catyí ra: “Tata, jahā tumañi iñi, cuatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra.

²⁷ Tan cundahvi iñi tsitoho ra tsi ra, tan jahā ra tucahnu iñi tsi ra, tan janaā ra tandihi tsa nyaá cuenda ra, tan jandoo nuña ra tsi ra.

²⁸ Maa tyin cuhva tsa quitā musu can, nañihi ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tñn ra tsi ra can, tan quitsahā tñn ra jucun ra, tan catyí ra tsihin ra: “Tyahvi tsa nyaá cuenda un tsi yu.”

²⁹ Tacan tan tsicuiñi tsiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

³⁰ Maa tyin maa ra ña cuñi ra cuatu ra, tan tsahān ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra.

³¹ Tsa nyehe inga ca musu tsa javahā ra, cuiihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javahā ra can.

³² Tacan tan tsitoho ra can tavā tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu.

³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

³⁴ Tan cuxaān xaan tsitoho ra, tan tavā tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

³⁵ Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

19

Nu caahán ra Jesús tyin ña vaha tsa nacoo ihñi rayi tsi ñasiihi ra (Mr. 10.1-12; Lc. 16.18)

¹ Tsa yahā tsa cahān ra Jesús tuhun ihya, tan quitā ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicananyi.

² Cuaha xaan nyivi tsinyicun tsi ra, tan janduvahā ra tsi nyivi cuuhvi.

³ Tacan tan juhva ra fariseo naha ra natuhvā ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuví tyaa ra naha cuatyí siqui ra. Tan tsicā tuhun ra naha tsi ra tan catyí ra naha:

—¿A vaha tsa nacoo rayi tsi ñasiihi ra tsa cuenda náa ñi tsihi tsahā ña tsi ra?

⁴ Tan nacahān ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha?

⁵ Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuvi ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsica tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuvi cani iin rayi tutu cuenda ley ra tan nacoo ra ñasihi ra?

⁸ Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaha ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoo nyivi.

⁹ Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituvj ña tsihin inga rayi, tan tindaha ra tsihin inga ñaha, tsicoo cuatyí ra nuu Nyoo. Tan ra tsa tindaha tsihin ñaha tsa nacoo rayi can, juvin ñi tsicoo tucu cuatyí ra can —catyí ra.

¹⁰ Tacan tan ra tsica tsihin ra, catyí ra naha tsihin ra:

—Tatun tacan taahán tsi coo rayi tsihin ñasihi ra, vaha ca ña tindaha yo.

¹¹ Tan ra Jesús catyí ra tsihin ra naha:

—Ña tandihi nyivi cuvi naquihin cuenda tuhun ihya. Maa tyin nyivi tsa tsaha Nyoo cuvi naquihin cuenda ñi can.

¹² Tsa ña tindaha nyivi, cuaha ñi cuenda cuvi tsi. Yihí ñi ña cuñí ñi tindaha ñi tyin iin cuhva caa maa ñi nda cacu ñi. Tan inga ñi ña cuñí ñi tindaha ñi tyin tsa nducapun ñi jahá nyivi. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndaca ñaha Nyoo. Tandihí nyivi tsa cuvi javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

¹³ Tacan tan quitsj ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsica tsihin ra quitsaha caahán ra naha tsi nyivi tsa cuahán tsihin tsa nyihi can.

¹⁴ Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndaca ñaha Nyoo cuvi ñi tumaa tsa nyihi ihya —catyí ra.

¹⁵ Tacan tan tyiso ndaha ra jiñi tsi naha tsi. Yahá can tan cuahán ra.

Nu tsaha ra Jesús cuhva tyin yá xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

¹⁶ Iin ra tyuvaa tsahan ra tsindaca tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa?

¹⁷ Tan ra Jesús catyí ra tsihin ra:

—¿Nacuenda catyí un tyin ra vaha cuvi yu? Intuhun ñi maa Nyoo cuvi ra vaha. [Tan tsa catyí un tyin vaha yu, nacotó un tyin Nyoo cuvi yu.] Maa tyin tatun cuñí un coo un ñayivi tsa ña cua naa maa, javaha tandihí tuhun tsa tsaha Nyoo tyin javaha yo —catyí ra tsihin ra.

¹⁸ Tan ra tyuvaa can catyí ra:

—¿Ndáa tsa cuvi can?

Tan ra Jesús catyí ra tsihin ra:

—Ñã cahñi un nyivi. Ñã ço inga ñaha tsi un. Ñã sũhu un tsa tsii nyivi. Ñã çahan un cuendu siqui nyivi.

¹⁹ Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

²⁰ Tan ra tyuvaa can, catyí ra tsihin ra:

—Tandihí maa yacan tan tyaá yahvi yu nda tahan luhlu yu tan nda cuando vityin. ¿Náa ca cumañi tsi yu?

²¹ Tan ra Jesús catyí ra tsihin ra:

—Tatun cuñi un tsa iin ndaha ñi cuví un iin ra cuiti nuu Nyoo, çaaahan tan xico un tsa iyó tsi un, tan çuhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin çuhva tsa tsiñi ra tyuvaa can tsa çahan ra Jesús tsihin ra, cuihya xaan cuñi ra cuví tan cuanuhu ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yii xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

²⁴ Catyí yu tsihin ndo inga tsaha, tyin vasu yii xaan yaha iin camellu xuu iin yiqui tucu, maa tyin yii xaan ca tsa quihvi iin nyivi cuca nu ndacá ñaha Nyoo —catyí ra Jesús.

²⁵ Tsa tsiñi ra tsicá tsihin ra Jesús tsa çahan ra, iyo xaan cuñi ra naha, tan quitsahá tsicá tuhun tahan ra naha, tan catyí ra naha:

—Tun tacan, yoñi cua cuví cacu

²⁶ Tacan tan nanyehé ra Jesús nu nyecú ra naha tan catyí ra:

—Nyivi ña cuví javaha ñi yacan, maa tyin Nyoo cuví javaha ra tandihí.

²⁷ Tacan tan quitsahá caahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoö ndi tan nyicún ndi tsi un. ¿Náa cua ñihi ndi? —catyí ra tsihin ra.

²⁸ Tan nacahan ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihí tsa iyó, yacan cuví quivi cua cunyaa yuhu Rayii tsa quee nda gloria nu tyayu sii xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihí ndo nu utsi uvi taahan tyayu sii caá. Tan cua cundaca ñaha ndo tsi tandihí nyivi cuví tata tsa utsi uvi taahan sehe ra Israel.

²⁹ Tan tandihí nyooho tan tandihí inga nyivi tsa nacoö vehe, o yañi ñi, o çuhva ñi, o jutu ñi, o sihi ñi, o ñasihí ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayivi nyito tsa ña cua naa maa coo ñi.

³⁰ Cuaha xaan nyivi cuahán ityi nuu vityin, ñi ican cua çuhun nu ndihí ña. Tan cuaha xaan nyivi cuahán nu ndihí vityin, ñi ican cua çuhun ityi nuu.

20

Nu jacuahá ra Jesús iin çuhva cuenda ra jahá tyiñu

¹ Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jaha tyiñu nu tyiñu jahá ra.

² Tan ndooç ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra.

³ Yahá can tan cuahán ra inga tsaha çuhva caa iin tsa tuvi. Tan nyehé ra tsi juhva ca ra yucú taxin nuyahvi can.

4 Tan catyí ra tsihin ra naha: “Cuaahan ndihí tucu nyooho jáha tyiñu ndo nu tyiñu jáhá yu, tan cua tyahví maa yu tsi ndo nácaa taahán tsi tsi ndo.” Tacan tan cuahán ndihí tucu ra can naha ra.

5 Tan tsitoho cora can quitá ra inga tsaha tsa ora. Tan juvin ñi musu nducú ra. Tan caa uñi tsa tseñi, quitá ra inga tsaha nducú ra musu.

6 Yahá can tan quitá nyico ra caa uhun tsa tseñi tan nyehe ra yucú taxin juhva ca ra naha nuyahví can. Tan catyí ra tsihin ra naha: “¿A nduve tyiñu jáhá ndo? tyin nduvi nduvi yucú taxin ndo nuyahví ihya.”

7 Tan nacahan ra can naha ra tan catyí ra naha: “Yucú taxin maa ndi tyin nduve tyiñu jáhá ndi tan yofñi tavá tyiñu tsi ndi.” Tacan tan catyí ra tsihin ra naha: “Cuaahan ndihí ndo jáha tyiñu ndo nu tyiñu jáhá yu. Tan tyahví maa yu tsi ndo nácaa taahán tsi tsi ndo”, catyí ra.

8 Tan cuhva tsa cua caaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahví un tsi ra naha. Quitsaha tyahví un tsi ra tsa quihví nu ndihí naha ra, tan nu cua ndihí tan tyahví un tsi ra tsa quihví tsa jihna ñi naha ra”, catyí ra.

9 Tacan tan tsaá ra tsa quihví caa uhun tsa tseñi can naha ra. Tan intuhun intuhun ra naha quihín ra naha yahví nani iin quivi.

10 Yahá can, tan cuhva tsa tahañ tsi tsi ra tsa quihví tsa jihna ñi can naha ra, cuñi maa ra naha tyin cuaha ca cua tyahví ra tsi ra naha. Maa tyin inducu ñi yahví iin quivi quihín ra naha.

11 Tan cuhva tsa quihín ra naha, quitsahá caahán ra naha tsi tsitoho tyiñu can.

12 Tan catyí ra naha: “Ra tsa tsaá nu ndihí ihya naha ra, intuhun ñi hora jáhá tyiñu ra naha. Tan iin ñi yahví tyahví un tsi ra naha tsihin tucu nyuhu tan nduvi nduvi jáhá tyiñu ndi nu ihñi”, catyí ra naha.

13 Maa tyin nacahan tsitoho tyiñu can, tan catyí ra tsihin iin ra can: “¡Tsaal, nduve tsa ña vaha javaha yu tsihin un. ¿A ñavin yahví tsa iin quivi ndoo yo tuhun tyin cua tyahví yu tsi un?”

14 Quihin yahví un, tan cuanuhu. ¿A nduve ndatu iyó tsi yu tsa tyahví yu tsi ra tsa quihví nu ndihí iin ñi cuhva tsa tyahví yu tsi yooho?

15 ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra.

16 Tacan nyivi quihví nu ndihí, cuhun ñi ityi nuu. Tan nyivi cuahán ityi nuu, nda nu ndihí ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

*Inga tsaha jacotó ra Jesús cuhva cua cahñi nyivi tsi ra
(Mr. 10.32-34; Lc. 18.31-34)*

17 Cuhva tsa cuñi cuhun ra Jesús nda ñuu Jerusalén, caná sñn ra tsi tsa utsi uvi ra tsicá tsihin ra tan catyí ra tsihin ra naha:

18 —Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cúu yu.

19 Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

*Nu tsicán sñi ra Jacobo tan ra Juan iin tumañi iñi tsi ra Jesús
(Mr. 10.35-45)*

²⁰ Tacan tan ñasihi ra Zebedeo natuhva ña nu nyií ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

²¹ Tan tsicā tuhun ra Jesús tsi ña tan catyí ra:

—¿Náa cuñi un?

Tan catyí ña:

—Quiví tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

²² Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

²³ Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

²⁴ Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra.

²⁵ Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha.

²⁶ Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho.

²⁷ Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha.

²⁸ Tumaa yuhu, Rayi tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihi ñi.

Nu janduvaha ra Jesús tsi uvi taahan ra cuaa

(Mr. 10.46-52; Lc. 18.35-43)

²⁹ Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha.

³⁰ Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyí ra naha:

—Jutu Mañi yu, tata ra David, cundaahvi iñi tsi ndi! —catyí ra naha.

³¹ Tan nyivi quitsaha caahán ñi tsihin ra naha na casi ra naha yuhu ra naha. Maa tyin ñihi ca cana tsaa ra naha:

—Jutu Mañi yu, tata ra David, cundaahvi iñi tsi ndi!

³² Tacan tan tsicuiñi ra Jesús tan cana ra tsi nduvi taahan ra cuaa can, tan tsicā tuhun ra tsi ra naha tan catyí ra:

—¿Náa cuñi ndo javaha yu tsi ndo?

³³ Tan nacahan ra naha tan catyí ra naha:

—Jutu Mañi yu, jananyehe tsi ndi.

³⁴ Tacan tan cundaahvi iñi ra Jesús tsi ra naha, tan tin ra tinuu ra naha. Tan iin yaha ñi nanyehé ra naha, tan cuiñi cuanyicún ndihi ra naha tsi ra Jesús.

21

*Nu cuahán ra Jesús ñuu Jerusalén
(Mr. 11.1-11; Lc. 19.28-40; Jn. 12.12-19)*

¹ Tsa cua tsaa ra naha ñuu Jerusalén, tan tsaa ra naha ñuu Betfagé, yatyin ñi yucú Olivo nu iyó yutun olivo. Tacan tan tavá tyiñu ra Jesús tsi uvi ra tsicá tsihin ra.

² Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsj ndaca ndo tsi ti naha ti tsi yu.

³ Tan tatun yóo tsicá tuhun tsi ndo: “¿Náa cuú ndo tsi ti naha ti?” tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyí ndo tsihin ñi —catyí ra.

⁴ Tacan cuví tyin cundaa tsa cahán ra cuví ndusu yuhu Jutu Mañi yo tahañ tsanaha nu catyí ra tyehen:

⁵ Cahán ndo tsihin nyivi ñuu Sión:

“Nyehe ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quití tsa tuhvá nyisó carga”, catyí ra cuví ndusu yuhu Nyoo can.

⁶ Tacan tan cuahán ra tsicá tsihin ra Jesús, tan javahá ra naha tumaa tsa cahán ra tsihin ra naha.

⁷ Quitsj ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti.

⁸ Tan cuaha xaan nyivi tsaquin ñi jahma ñi nu ñuhu ityi nu cuahán ra, tan inga ñi tsahnyá ñi ndaha yutun tsaquin ñi tsitsi ityi.

⁹ Tan nyivi tsa cuahán ityi nuu tan ityi tsata, quitsaha caná tsaa ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsj Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

¹⁰ Cuhva tsa tsaa ra Jesús ñuu Jerusalén can, tandihi maa nyivi ñuu quitsaha cuvaá jahá ñi, tan cuaha xaan ñi tsicá tuhun tahañ ñi tsi ñi, tan catyí ñi:

—¿Yóo ra cuví ra ihya?

¹¹ Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

*Nu tavá ra Jesús tsi nyivi xicó tsitsi vehe ñuhu cahnu
(Mr. 11.15-19; Lc. 19.45-48; Jn. 2.13-22)*

¹² Yahá can tan quihví ra Jesús tsitsi vehe ñuhu cahnu Nyoo. Tan tavá ra tsi tandihi nyivi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayá nu xicó ñi paloma.

¹³ Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

¹⁴ Tan tsa tsitó juhva ra cuaa tan ra coxo naha ra tyin nyii ra Jesús tsitsi vehe ñuhu cahnu, quihví ra naha tan janduvahá ra Jesús tsi ra naha.

¹⁵ Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsaa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaḡan ra naha tsa tsiñi ra naha tsa caahán tsa nyihi can.

¹⁶ Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahān ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sñi xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoḡ ra tsi ra naha, tan quitā ra ñuu can cuahán ra ñuu Betania. Tan ican ndoḡ ra tsacuaa can.

Nu cahān ra Jesús tsi yutun higo tsa ña tshá tsi

(Mr. 11.12-14, 20-26)

¹⁸ Tan tsa tuvi cuñi ñi inga quivi can, vatsí nyico ra Jesús nda ñuu Jerusalén, tan tsaḡ soco tsi ra.

¹⁹ Tan nyeḡe ra nyaá iin yutun higo yatyin ñi yuhu ityi can. Tan natuhva ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaḡa ña cua cuhva ca un tsi!

Tan juvin ñi cuhva can na ityi tun.

²⁰ Tan tsa nyeḡe ra tsicá tsihin ra tsa javahā ra tsi tun, iyo xaan cuñi ra naha, tan tsicā tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

²¹ Tan nacahān ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahā yu tsihin yutun higo ihya ñi cuví javaha tucu nyooho, tyin cuví ndihi tucu catyí ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi.

²² Tan tandihí tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

Nu tsicā tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

²³ Yahā can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhva ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicā tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁴⁻²⁵ Tan nacahān ra Jesús tan catyí ra:

—Yuhu tucu cuñi yu ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, o nyivi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsahā caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyí ra tsihin yo: “Tun tacan, ¿nacuenda ña tsinú iñi ndo tsi ra?”

²⁶ Tan tatun catyí yo tyin nyivi jaquitsi tsi ra, yuuhvi yo coto cuxaan nyivi tsi yo, tyin tandihí ñi tsinú iñi ñi tyin ra Juan, cuenda Nyoo cahān ra —catyí ra naha.

²⁷ Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tava tyiñu tsi yu.

Nu caahán ra Jesús iin cuhva cuenda uvi taahan sehe iin rayii

²⁸ Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayii, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.”

²⁹ Tan nacahan sehe ra tan catyí ra: “¡Ña cuhun yu!” Maa tyin yaha can tan nasama cuhva tsicá iñi ra tan tsahan ra tsijaha tyiñu ra.

³⁰ Yaha can tan jutu ra cahan ra tsihin inga sehe ra. Tan catyí tucu ra tsihin ra na cuhun ra kujaha tyiñu ra. Tan ra ican numi ñi quihin ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra.

³¹ Tsitsi tsa nduvi taahan ra can naha ra, ¿ndáa ra javaha tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tava xuhun cuenda ra ndacá ñaha tan ñi sii iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho.

³² Tyin ra Juan, ra jacoondutya tsi nyivi, quitsi ra jacuaha ra tsi ndo nacaa taahan tsi coo cuiti ndo, tan nyooho ña tsinu iñi ndo tsi ra. Maa tyin ra tava xuhun naha ra tan ñi sii iñi caca nuu tsinu iñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu iñi ndo tsi ra.

Nu caahán ra Jesús tyin tumaa cuvi juhva nu caquiñi nahnu, tacan cuvi ra tsa cua cahñi tsi ra

(Mr. 12.1-12; Lc. 20.9-19)

³³ Tyaa soho ndo inga cuhva ihya: Tsicoo iin rayii, tan iyó ñuhu ra. Tan tatsi ra yoho yucu vixi tsa nañi uvas, tan tyihí ra cora. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin cuvi jaha cuenda ra tandihi.

Yaha can tan saha nuu ra ñuhu can tsi juhva ra cua jaha tyiñu naha ra, tan cuahan ra inga ñuu.

³⁴ Tan tsa tsaa quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahan tsi tsi ra.

³⁵ Maa tyin ra jahá tyiñu can tjin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra.

³⁶ Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

³⁷ Nu ndihi jacuhun ra tsi maa maa sehe ra, tyin cuñi maa ra tyin cua tyaa javhi ra naha tsi sehe ra.

³⁸ Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha.

³⁹ Tacan tan tjin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

⁴⁰ Tacan tan tsicā tuhun ra Jesús tsi ra naha tan catyí ra:

—Quiví cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹ Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jahá tyiñu naha ra, tan quiví coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

⁴² Tacan tan catyí ra Jesús tsihin ra naha:

—¿A ñaha ca cahví nyooho nu tutu Nyoo nu catyí tsi tyehen?

Yuu tsa javitā ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javahá tandihí can.

Tan iyo xaan cuñí yo nyehé yo, catyí tsi.

⁴³ Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyiví tsa javahá cuhva cuñí ra tyin nditsa tsahá ñi tsi ñi cundaca ñaha ra.

⁴⁴ Tan tsa cuenda yuu can, yóo nyiví tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yóo nyiví, cua taxin nyihi ñi —catyí ra Jesús.

⁴⁵ Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya,

⁴⁶ cuñi ra naha tiin ra naha tsi ra, maa tyin yuuhví ra naha tsi nyiví tyin tsinú iñi ñi tyin ra Jesús caahán ra cuenda Nyoo.

22

Nu cahan ra Jesús iin cuhva cuenda vico tindaha

(Lc. 14.15-24)

¹ Quitsahá caahán ra Jesús tsihin nyiví inga tsaha tsihin cuhva, tan catyí ra:

² —Tsa ndacá ñaha Nyoo tsi nyiví cuví tsi tumaa iin rey tsa javahá iin vico tsa cuenda tsa cua tindaha sehe ra.

³ Tan jacuhun ra tsi musu ra na cucana ra naha tsi nyiví tsa jacoto ra tyin cuhun ñi, maa tyin ñi ican, ña cuñi ñi cuhun ñi.

⁴ Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihí. Yacan na quitsi ñi”, catyí ra.

⁵ Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra.

⁶ Tan inga ra naha tiin ra naha tsi musu rey can naha ra tan cañi xaan ra naha tsi ra naha nda cuanda tsahñi ra naha tsi ra naha.

⁷ Tacan tan ra rey can cuxaḡn xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha.

⁸ Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi canḡ yu, ña taahán tsi tsa quitsi ñi.

⁹ Cuaahan ndo ityi cahnu tan cḡna ndo tsi tandihí nyiví tsa nañihi ndo na quitsi ñi vico tindaha”, catyí ra rey can.

¹⁰ Musu can cuahán ra naha tandihí ñi ityi, tan jandu iin ra naha tsi tandihí nyiví nañihí ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyiví.

11 "Tacan tan quihvi ra rey can cua nyehe ra tsi tandihi nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsi.

12 Tan catyí ra rey tsihin ra: "Tsa, ¿nacuenda nyii un ihya tan nduve jahma vico tindaha nditsi un?" Tan ña nacahan maa ra can.

13 Tacan tan catyí ra rey can tsihin ra tyihí mesa can naha ra: "Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra", catyí ra.

14 Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahan ra Jesús tsa cuenda tsa tyahvi nyivi xuhun tsi ra ndaca ñaha nda ñuu Roma

(Mr. 12.13-17; Lc. 20.20-26)

15 Tacan tan cuahan ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra.

16 Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahan un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi.

17 ¿Nacaa tsicá tucu iñi yooho: A vaha tyahvi yo tsa tsicán ra ndacá ñaha nda ñuu Roma, o ña vaha?

18 Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu?

19 Janaha jihna ndo iin xuhun tsa tuhvá yo tyahvi tsi ra ndacá ñaha tsi yu —catyí ra.

Tan tsindaca ra naha iin xuhun tsa nañi denario tsi ra.

20 Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

21 Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

22 Tsa tsiñi ra naha tsa cahan ra Jesús, iyo xaan cuñi ra naha. Tan cuahan ra naha.

Nu cuñi ra cuvi saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

23 Juvín ñi quivi can juhva ra cuvi saduceo naha ra tsahan ra naha nu nyii ra Jesús. Tan ra cuvi saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsicá tuhun ra naha tsi ra Jesús, tan catyí ra naha:

24 —Maestro, ra Moisés catyí ra tyin tatun iin ra tindaha tan tsihi ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi.

25 Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi.

²⁶ Tan juvin ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvin ñi tacan taħan ndihi ra. Tan inducu ñi taħan tandihi tsa utsa ra naha.

²⁷ Tan nu ndihi ña tsihi ndihi maa ñaha can.

²⁸ Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi yí ña? Tyin tandihi maa ra naha tindaha tsihin ña —catyí ra naha.

²⁹ Tan nacahañ ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo.

³⁰ Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria.

³¹ Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

³² “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

³³ Tan tsa tsiñi nyivi tsa caahán ra Jesús, iyo xaan cuñi ñi.

Ley tsa ñiñi ca tsa tsaha Nyoo

(Mr. 12.28-34)

³⁴ Tsa tsító ra fariseo naha ra tyin ra Jesús tyasi ra yuhu ra saduceo naha ra, ndu iñ ra naha.

³⁵ Tan iin ra tsa nyí tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsicá tuhun ra tsi ra, tan catyí ra:

³⁶ —Maestro, ¿ndáa ley cuví tsa ñiñi ca?

³⁷ Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa nñi iñi un tan tsihin tsa nñi iñi añima un, tan tsihin tandihi tsa tsiñi tuñi jiñi un.”

³⁸ Ley ihya cuví tsa ñiñi ca, tan tsa jihna ñi taahán tsi javaha yo.

³⁹ Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi nyivi tahan un tumaa cuñi un tsi maa un.”

⁴⁰ Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahá Nyoo, tan tandihi tuhun tsa jacuahá ra cuví ndusu yuhu Nyoo taħan tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

⁴¹ Tsitsi tsa ndi yucú ra fariseo naha ra nu ndu iñ ra naha,

⁴² ra Jesús tsicá tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahañ ra naha tan catyí ra naha:

—Tata ra David cuví ra.

⁴³ Tacan tan ra Jesús catyí ra tsihin ra naha:

—Tun tacan, ¿nacuenta jacaħan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

⁴⁴ Nyoo caħan tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

⁴⁵ ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

⁴⁶ Tan yoñi maa cuví nacahan nu cahan ra ndi intuhun maa tuhun. Tan nda quivi can, yoñi ca maa cuñi nducu tuhun tsi ra.

23

Nu caahan ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹ Tacan tan ra Jesús catyí ra tsihin tandihi nyivi, tan tsihin ra tsicá tsihin ra:

² —Ra cuví maestro cuenda ley naha ra tan ra cuví fariseo naha ra taahan tsi tsa jacuahá ra naha cuhva catyí ley tsa tyaá ra Moisés.

³ Yacan cuenda tyaá yahvi ndo tsa caahan ra naha tan javaha ndo tandihi cuhva caahan ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha.

⁴ Janducuahá ca ra naha ley tsa tsahá Nyoo tahañ tsanaha. Tan cuñi ra naha tsa javaha nyivi tandihi can. Maa tyin ña cunyeé ñi javahá ñi tandihi can, tan ndi maa ra naha tan ña cuñi ra naha javaha ra naha can.

⁵ Tyin maa ra naha tyaá ra naha caja ñi yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi can tyin na nyehe nyivi tyin vaha xaan ca ra naha.

⁶ Tan nu vaha ca, cuñi ra naha cunyeecu ra naha nu iyó vico tan catsi ra naha. Tan nu vaha ca cuñi ra naha cunyeecu ra naha tsitsi vehe ñuhu.

⁷ Tan nu tsicá nuu ra naha cuñi ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñi tucu ra naha tsa catyí ñi “maestro” tsihin ra naha.

⁸ Maa tyin nyooho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyii tsihin ndo, tan tandihi ca maa ra naha yañi ndo cuví tsi ra naha.

⁹ Tan ña cahan ndo Jutu ndo tsihin ndi intuhun rayi ñuu ñayivi ihya, tyin intuhun ñi ra nyaá gloria cuví Jutu ndo.

¹⁰ Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo.

¹¹ Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo.

¹² Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

¹³ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñi quihvi.

¹⁴ ¡Ndahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahan tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyí tyin quihín nyaá ndo vehe ñi ndaahvi tsa tsihi yii

tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

15 ¡Ndahvi nyoooho ra maestro cuenda ley vehe ñuhu tan nyoooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñi ndo nañihi ndo vasu intuhun nyivi cunycun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhan ñi anyaya tsihin ndo.

16 ¡Ndahvi nyoooho ra ndaahvi! Tyin cuñi ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo.

17 ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu í tsi xuhun cuaan can?

18 Tan juvin ñi catyí tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyí ndo.

19 ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu í tsa jamañi ndo?

20 Tyin nyivi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can.

21 Tan nyivi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

22 Tan tacan tucu nyivi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

23 ¡Ndahvi nyoooho ra cuví maestro cuenda ley vehe ñuhu tan nyoooho ra cuví fariseo! Jahá ndo tyin vaha xaan ndo tyin cahvi ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaa yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihi nyivi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñi tsi javaha ndo tandihi can, tan ña cua jandihí ndo tsa cuhva ndo diezmo can.

24 Nyoooho ra cuaa, cuñi ndo jaquihin ityi ndo tsi nyivi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

25 ¡Ndahvi nyoooho ra cuví maestro cuenda ley vehe ñuhu tan nyoooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo.

26 ¡Nyoooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihi ityi tsata.

27 ¡Ndahvi nyoooho ra cuví maestro cuenda ley vehe ñuhu tan nyoooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña

ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihi nuu tsa caquiñi.

²⁸ Tacan cuví nyooho, tyin cuñi nyivi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihi tsa caquiñi ndo.

²⁹ ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyaquí ndo ñaña ra cuví ndusu yuhu Nyoo, tan nacahyi ndo ñaña nyivi vaha tsicoo tahan tsanaha.

³⁰ Tacan tan catyí ndo: “Tun tsatyin tsicoo yo quivi tsicoo tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo.

³¹ ¡Tshin yacan ñi tan nacotó ndo tyin cuví ndo tata nyivi tsahñi tsi ra cuví ndusu yuhu Nyoo!

³² ¡Yacan vityin nyehe maa ndo na jaha ndo, javaha ndihi ndo tsa javaha tsii tsaahnu ndo, tun cuñi ndo!

³³ ¡Nyooho nyivi caquiñi cuví ndo, tan nyivi cuví tata cool! ¿Naca cua cacu ndo tan ña cua cahun ndo anyaya? Ña cua cuví.

³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu.

³⁵ Yacan cuenda, tsata nyooho cua cunyaa cuatyí tsa cuenda tandihi ra vaha tsa tsahñi tsii tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo.

³⁶ Tsa nditsa catyí yu tshin ndo, tyin tandihi cuatyí can cua coso siqui nyooho, nyivi tsa iyó vityin —catyí ra Jesús tshin ra naha.

*Nu nducuihya cuñi ra Jesús nyehe ra tsi nyivi ñuu Jerusalén
(Lc. 13.34-35)*

³⁷ ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi siihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo.

³⁸ Nyehe ndo vityin, tyin tsa nacoó ihñi Nyoo tsi ndo.

³⁹ Tan catyí yu tshin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuví ra vatsí tshin sivi Nyoo Jutu yo —catyí ra Jesús.

24

*Nu caahán ra Jesús tyin cua tani vehe ñuhu cahnu
(Mr. 13.1-2; Lc. 21.5-6)*

¹ Quitá ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tshin ra nu nyaá ra, tan quitsaha caahán ra naha cuhva caá vehe ñuhu can tshin ra.

² Maa tyin nacahan ra Jesús tan catyí ra:

—¿A nyehe ndo tandihi tsa iyó ihya? Tsa nditsa catyí yu tshin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyí ra.

*Nu caahán ra Jesús náa cua cuvi tsa ndi cumañi ca naa ñuhu ñayivi
(Mr. 13.3-23; Lc. 21.7-24; 17.22-24)*

³ Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahán ra naha nu nyaá ra tan nducú tuhun xeehe ra naha tsi ra tan catyi ra naha:

—Cuñi ndi tsa catyi tuhun un tsihin ndi, ama cua cuvi tandihi tsa cahan un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

⁴ Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo.

⁵ Tyin cuaha xaan ra cua quitsi, tan cua cutyiñu ra naha sivi yu, tan cua catyi ra naha: “Yuhu cuví ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha.

⁶ Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi.

⁷ Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi.

⁸ Tandihí yacan cua cuvi nu ndi cua quitsaha nyehe nyivi tundoho.

⁹ Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

¹⁰ Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi.

¹¹ Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha.

¹² Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi.

¹³ Maa tyin nyivi tsa tsinú iñi tsi yu nda cuanda nu ndihí, tan ña cua ndu uvi iñi ñi, cua cacu ñi.

¹⁴ Tan taniñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

¹⁵ Ra Daniel, ra cuvi ndusu yuhu Nyoo, tyaq ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Í, (nyooho tsa cahvi, na cutuñi iñi ndo).

¹⁶ Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu.

¹⁷ Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi.

¹⁸ Tan nyivi yucú tsitsi cuhu ña cua cunuhi jihna ñi cunaquihin ñi jahma ñi.

¹⁹ ¡Ndahvi ñiñaha tsa ñuhú sehe quivi can! O tatun iyó sehe ñi tsa tyaxín, ¡ndahvi ñi can!

²⁰ Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo.

²¹ Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha.

²² Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

²³ "Tatun yoo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsjnu iñi ndo.

²⁴ Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuví jaha ra naha.

²⁵ Vaha tyin tsa tsitó ndo vityin ihya, jaha ndo cuenda tsi ndo quivi can.

²⁶ Yacan cuenda tatun catyi nyivi tsihin ndo: "Nyehe ndo, va ra Cristo nyii nu tsiqui can", Ña cuhun ndo. O tatun catyi ñi tsihin ndo: "Nyehe ndo, nyii ra tsitsi cuartu ihya", ña tsjnu iñi ndo.

²⁷ Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayi tsa quee nda gloria.

²⁸ Tumaa nataká nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

*Nacaa cua quitsi Rayi tsa quee nda gloria inga tsaha
(Mr. 13.24-37; Lc. 21.25-33; 17.26-30, 34-36)*

²⁹ Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda.

³⁰ Tacan tan cua quituvi seña ityi andivi tyin vatsi yuhu Rayi tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsa xaan ñi tsa cua nyehe ñi tsi yu.

³¹ Tan cuaha ángel cuenda yu cua jaquitsi yu tyin ñihi cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanii cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

³² Cutuñi iñi ndo iin cuhva yutun tsa nañi higo: Tatun tsa yutya soco tun, tan tsa caná ndaha yutya tun, nyooho tsitó ndo tyin tsa cua coo tsiti tun.

³³ Tan juven ñi tacan, tatun tsa cuví tandihi yacan nyehé ndo, cua coto ndo tyin tsa cuyatyn quitsi yu; tan tsa nyanaá yu yuvehe cuví tsi.

³⁴ Tsa nditsa catyi yu tsihin ndo tyin tandihi yacan cua cuvi jihna, tsa ndi cumañi ca cúu nyivi iyó nu ñuhu ñayivi.

³⁵ Tan coo quivi cua cunaa andivi tan tsihin ñuhu ñayivi, maa tyin tuhun caahán yuhu, ña cua cundihí tsi tyin cua cundaa tandihí tsi.

³⁶ Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuví quivi tsa tsicoo ra Noé, tacan cua cuvi quivi tsa cua quitsi nyico yuhu Rayi tsa quee nda gloria.

³⁸ Quivi tsa ndi cumañi ca cuun savi xaan, nyivi can, tsatsi ñi, tsihí ñi, tindahá ñi, tan tsahá ñi tsi sehe sihi ñi tindaha nda cuanda quivi quihvi ra Noé tsitsi yutun ndoo.

³⁹ Tan sana iñi ñi tan tsa savi tan tañi tandihí ñi. Tan tacan sana iñi ñi tan cua tahan tsi quivi quitsi nyico yuhu Rayi tsa quee nda gloria.

⁴⁰ Tan tatun yucú uvi taahan rayi tsitsi cuhu quivi can, intuhun ñi ra cua quihin yu, tan cua nacoo yu tsi inga ra.

⁴¹ Tan quiví can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña.

⁴² Cuatu vaha ndo tyin ña tsitó ndo náa hora cua quitsi ra ndacá ñaha tsi ndo.

⁴³ Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can.

⁴⁴ Yacan cuenda nyooho, cuatu vaha ndo. Tyin sana iñi ndo, tan cua quitsi nyico yuhu Rayi tsa quee nda gloria.

Musu vaha tan musu ña vaha
(Lc. 12.41-48)

⁴⁵ Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu.

⁴⁶ Tan sii xaan cuñí ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra.

⁴⁷ Tan tsa nditsa catyí yu tsihin ndo, tyin tsitoho ra cua nacuhva ra tandihí cuii tsa cumí ra, cua quihí ndaha ra, tyin vaha tyaá yahvi ra tsihin tyiñu jahá ra.

⁴⁸ Maa tyin iin musu ña vaha tsicá iñi ra tyin cua cucuee tsitoho ra.

⁴⁹ Tacan tan quitsaha cañí ra tsi inga musu, tan tsatsí ra tan tsihí ra nyixi tsihin ra tsiñi naha ra.

⁵⁰ Tacan tan sana iñi ra tan cua tsa tsitoho ra quiví tsa ña ndatú ra tsi ra, tan hora tsa ña tsitó ra.

⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyiví tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

25

Nu cahñ ra Jesús iin cuhva cuenda utsi taahan ñaha yoco

¹ Tsa ndacá ñaha Nyoo tsi nyiví cuví tsi tumaa utsi taahan ñaha yoco tsa quihñ lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha.

² Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi.

³ Ñi tsa soho ñuhú iñi can, nyisó ñi lámpara ñi maa tyin ña quihñ ñi juhva ca acetye tsa natyihí ñi tsitsi lámpara ñi tatun ndihí tsi.

⁴ Tan ñi tsa catsi tsicá iñi can, nyisó siñ ñi inga yutyí acetye tsa cua natyihí ñi tsitsi lámpara can tatun ndihí acetye tsa yihí tsitsi lámpara can.

⁵ Tan ra tsa cua tindaha can cucueé xaan ra, tacan tan tññ ñumaahna tsi tandihí ñi, tan quixí ñi.

⁶ Tacan tan maa ñuu tsiñí ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!”

⁷ Tandihí ñi can nduvitá ñi tan quitsaha janduvahá ñi lámpara ñi.

⁸ Tacan tan quitsaha caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñí ndahva lámpara ndi”, catyí ñi.

⁹ Maa tyin ñi yoco tsa catsi tsicá iñi can nacahñ ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo cuyata ndo nu cuyahví tsi.”

10 Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaḡ ra tsa cua tindaha can. Tan ñi yoco tsa ndatú vaha can, quihvi ñi tsihin ra tsitsi vehe nu cua coo vico tindaha. Tan tsicundasj yuvehe can.

11 Yahḡ can tan tsaḡ nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihvi ndi!”, catyí ñi.

12 Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

13 Tacan tan quitsahḡ caahán ra Jesús:

—Cuatu vaha ndo, tyin ña tsitó ndo ndáa quivi tan náa hora cua quitsi nyico yuhu Rayii tsa queḡ nda gloria.

Nu caahán ra Jesús tsihin yo na jaha tyiñu yo tsihin tsa tsahḡ Nyoo tsi yo (Lc. 19.11-27)

14 Tsa ndacá ñaha Nyoo tsi nyivi cuví tsi tumaa iin rayii tsa nyaá cua quita cuhun inga ñuu nu cañi. Tan canḡ ra tsi musu ra, tan tsahḡ cuenda ra xuhun ra tsi ra naha tyin jaha cuenda ra naha.

15 Iin ra tsahḡ ra uhun mil xuhun, tan inga ra tsahḡ ra uvi mil xuhun, tan inga ra tsahḡ ra iin mil. Tsahḡ ra tsi intuhun intuhun ra nácaa cuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra.

16 Musu tsa quihñ uhun mil xuhun can, ñihi jahḡ tyiñu ra tsihin xuhun can, tan jahḡ canaa ra inga uhun mil ca siqui tsi.

17 Tan juvin ñi tacan tucu ra tsa quihñ uvi mil can, jahḡ canaa ra uvi mil ca tsihin xuhun can.

18 Maa tyin ra tsa quihñ intuhun ñi mil can, tsahan ra tan tsatyḡ ra iin yavi tsitsi ñuhu tan tyihj xeehe ra xuhun tsitoho ra.

19 Cuaha quivi yahḡ tan tsaḡ nyico tsitoho musu can. Tan quitsahḡ natavá cuenda ra tsihin intuhun intuhun ra naha.

20 Jihna ca ra tsa quihñ uhun mil xuhun can tsaḡ, tan nacuhvḡ cuenda ra uhun mil ca siqui can, tan catyí ra: “Taa, uhun mil tsahḡ un tsi yu, juhun inga uhun mil ihya tsa jahḡ canaa yu siqui tsi.”

21 Tan tsitoho ra catyí ra tsihin ra: “Vaha. Iin musu vaha xaan cuví un. Tan javahḡ un tandihj tsa cahan yu tsihin un. Luxu ñi xuhun tsahḡ yu tsi un tan vaha xaan tsatyñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan siñ cuñi un tsihin yu.”

22 Yahḡ can tan tsaḡ musu tsa quihñ uvi mil xuhun can, tan catyí ra: “Taa, uvi mil ñi tsahḡ un tsi yu, juhun uvi mil ca ihya tsa jahḡ canaa yu siqui tsi.”

23 Tan catyí tsitoho ra tsihin ra: “Vaha. Iin musu vaha xaan cuví un, tan javahḡ un tandihj tsa cahan yu tsihin un. Luxu ñi xuhun tsahḡ yu tsi un tan vaha xaan tsatyñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan siñ cuñi un tsihin yu”, catyí ra.

24 Tan cuhva tsa tsaḡ musu tsa quihñ intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihñ un xuhun nu ña jahḡ tyiñu un, tan cuñi un naquihin un cosecha nu ña tatsj un.

25 Yacan cuenda nayuhvi yu tan tsahan yu tan tyihj xeehe yu xuhun un tsitsi ñuhu. Juhun xuhun ihya tsa tsahḡ un tsi yu”, catyí ra.

26 Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihñ yu nu ña jahḡ tyiñu yu, tan quihñ yu cosecha nu ña tatsj yu,

27 ¿nácaa tyin ña tsityihñ un xuhun yu nu banco? Tun tsatyin tacan javaha un, tsa cua quitsi nyico yu cuví naquihin yu xuhun can tsihin xuhun siqui tsa jahḡ canaa tsi”, catyí ra.

28 Tacan tan quitsahā caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cūhva ndo tsi ra tsa ndahá utsi mil.

29 Tyin nyívi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyívi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihi yu.

30 Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuvi nuhu ra tsihin tsa nyehé ra tundoho.”

Nu cahan ra Jesús tyin cua cutuñi tandihi nyívi

31 Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu si caá tan cua cundaca ñaha yu.

32 Tandihí cuii nyívi iyó nani cahnu nu ñuhu ñayívi cua nataca ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo.

33 Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyín yu.

34 Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Ñaha nyooho nyívi tsa nasoco Jutu yu. Na quihin cuenda ndo nu cua cunyeco ndo nu ndacá ñaha Nyoo, tyin tsa cuenda maa ndo javahá ra ihya quiví javahá ra ñuhu ñayívi.

35 Tyin quiví tsisoco yu, nyooho tsahá ndo tsa tsatsj yu. Quiví na ityi iñi yu, tsahá ndo ndutya tsihi yu. Tan quiví tsicá nuu yu cuví yu ra inga ñuu, tsahá ndo nu quixi yu.

36 Quiví cumañi jahma yu, tsahá ndo jahma tsinditsj yu. Quiví cuhvi yu, tsinyehé ndo nu canyí yu. Tan quiví tsinyi yu vehe caa, tsinyehé ndo nu nyí yu”. Tacan cua cahan yu tsihin ñi.

37 Tan ñi tsa vaha iñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehe ndi tsisoco un, tan tsahá ndi tsa tsatsj un? ¿Ama nyehe ndi na ityi iñi un tan tsahá ndi tsa tsihi un?

38 ¿Ama nyehe ndi tsi un tsicá nuu un cuví un ra inga ñuu tan tsahá ndi vehe nu quixi un? ¿Ama cumañi jahma un, tan tsahá ndi jahma tsinditsj un?

39 ¿Ama nyehe ndi cuhvi un, o tsinyi un vehe caa, tan tsahan ndi tsinyehé ndi tsi un?” cua catyí ñi.

40 Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihí tumañi iñi tsa javahá ndo tsi ra ndaahvi, ra yañi yu, tsi yuhu javahá ndo tumañi iñi”, cua catyí yu tsihin ñi.

41 Tacan tan yuhu tsa cuví Rey cua cahan yu tsihin nyívi tsa yucú tsiyo satyín yu tyehen: “Catsiyo ndo nuu yu, nyooho, nyívi taahán tsi cuhun anyaya, ¿aahan ndo nu ñuhu tsa ña cua ndahva maa. Tsinu anyaya can tyin ícan cua coo nu ña vaha tan tatyí ña vaha cuenda nu.

42 Tyin tsisoco yu tan nyooho ña tsahá ndo tsa catsi yu. Na ityi iñi yu tan ña tsahá ndo ndutya coho yu.

43 Tsicá nuu yu cuví yu iin ra inga ñuu, tan ña tsahá ndo nu cusu yu. Cumañi jahma yu tan ña tsahá ndo jahma cunditsi yu. Nacuhvi yu tan tsinyi yu vehe caa, maa tyin ña tsahan ndo tsinyehé ndo tsi yu nu tsinyi yu”, cua catyí yu tsihin ñi.

⁴⁴ Tacan tan cua catyi ñi tsihin yu: “Jutu Mañi yu, ¿ama nyehe ndi tsisoco un, o na ityi iñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatyinyee ndi tsi un?” cua catyi ñi.

⁴⁵ Tan yuhu tsa cuví yu Rey cua catyi yu tsihin ñi: “Tsa nditsa caahán yu tsihin ndo tyin tandihi maa tsa ña javahá ndo tsihin nyivi ndaahvi ihya, ña javahá ndihi ndo tsihin yu, cuví can”, cua catyi yu tsihin ñi.

⁴⁶ Tacan tan ñi can cua cuhun ñi nu cayú ñuhú tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

26

Nu nducú ra mandoñi naha ra cuhva nácaa tan tñn ra naha tsi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva tsa ndihí cahán ra Jesús tandihi tuhun can, tan quitsahá catyí ra tsihin ra tsicá tsihin ra:

² —Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayi tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyí ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iñn ra naha nuquehe vehe tyiñu ra Caifás, ra jutu tsaahnu tsa cuví ityi nuu.

⁴ Tan jandaa ra naha tyiñu nácaa cua jandavi ñaha ra naha tsi ra Jesús tan tñn ra naha tsi ra tan cahñi ra naha tsi ra.

⁵ Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

Nu tyosó iin ñaha ndutyta tami jiñi ra Jesús

(Mr. 14.3-9; Jn. 12.1-8)

⁶ Ra Jesús nyií ra ñuu Betania, vehe ra Simón, ra tsa yihí cuehe tyaahyu.

⁷ Tan natuhvá iin ñaha nu nyaá ra Jesús, ndahá ña iin yutyi yuu vaha tsitú can yihí ndutyta tami. Tan yahvi xaan nyaá ndutyta tami can. Tan ra Jesús nyaá ra yuhu mesa, tan ñaha can tyosó ña ndutyta can jiñi ra.

⁸ Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativi ña ndutyta tami can?

⁹ Vaha ca tun tsatyin xicó ña can, tan ñihi cuaha ña xuhun tsihin can. Tan cuví jatyinyee ña tsi nyivi ndaahvi tsihin xuhun can —catyí ra naha.

¹⁰ Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

¹¹ Tyin nyivi ndaahvi tandihi ñi quivi cua coo ñi tsihin ndo, maa tyin yuhu, ña naha ca cua cunyii yu tsihin ndo.

¹² Tyosó ña ndutyta tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu.

¹³ Tsa nditsa catyí yu tsihin ndo, tyin tandihi ñi nu cua cahan nyivi tuhun Nyoo tanií cahnú ñuhu ñayivi, cua nacatyí tuhun tucu ñi tsa javahá ñaha ihya, na nducuhun iñi nyivi tsi ña —catyí ra Jesús.

Nu xicó ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsañan ra tsicahán ra tsihin ra jutu tsa cuví ityi nuu naha ra.

15 Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo? Tacan tan ra jutu can naha ra tsahá ra naha oco utsi xuhun cuitsin tsi ra.

16 Tan nda quivi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

*Nu cuxiñi ra Jesús tsihin ra tsicá tsihin ra
(Mr. 14.12-25; Lc. 22.7-23; Jn. 13.21-30; 1 Co. 11.23-26)*

17 Quivi jihna ñi tsa quitsahá vico nu tsatsí nyivi paan tsa nduve yutsan iya yihí, ra tsicá tsihin ra Jesús natuhvá ra naha nu nyaá ra tan quitsahá tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

18 Tan catyí ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan çatyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, çatyí ndo tsihin ra —catyí ra Jesús.

19 Tacan tan javahá ra naha cuhva cahán ra Jesús tsihin ra naha. Tan janduvahá ra naha tsa cuxiñi ra naha vico pascua can.

20 Tsa cunaaha tan tsicunyaá ra Jesús nu mesa tsihin tandihí utsi uvi ra tsicá tsihin ra.

21 Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

22 Tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

23 Tan nacahán ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu.

24 Yuhu, Rayi tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacú ra —catyí ra Jesús.

25 Tacan tan nacahán ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahán ra Jesús, tan catyí ra:

—Juvín un.

26 Tsitsi tsa tsatsí ra naha, ra Jesús quihín ra paan tan nacuhvá ra tyahvi nyoo tsi Nyoo, tan tsahnú sava ra, tan tsahá ra tsi ra tsicá tsihin ra, tan catyí ra tsihin ra naha:

—Çatsi ndo. Paan ihya cuví tumaa cuñu ñuhu yu.

27 Yahá can tan quihín tucu ra vasu vinu, tan nacuhvá ra tyahvi nyoo tsi Nyoo, tan jayahá ra tsi tandihí ra naha tan catyí ra:

—Coho tandihí ndo vinu ihya.

28 Tyin cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnu iñi cuatyí ñi.

29 Tan catyí yu tsihin ndo, tyin ña cua coho ca yu tahan vinu tsa cuví ndutya uvás ihya, nda cuanda tsa coho yu vinu tsaa tsihin ndo nda nu ndacá ñaha Jutu yu gloria —catyí ra.

*Nu cahan ra Jesús tyin cua cahan ra Pedro tyin ña nacotó ra tsi ra
(Mr. 14.26-31; Lc. 22.31-34; Jn. 13.36-38)*

³⁰ Tsa yaha tsa tsita ra naha iin yaa Nyoo, tan cuahán ra naha yucu Olivo.

³¹ Tacan tan quitsaha caahán ra Jesús tsihin ra naha:

—Tandihi nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

³² Maa tyin tsa yaha nandoto yu, jihna ca yu cua cuhun Galilea, tsa ndi cumañi ca cuhun nyooho.

³³ Tacan tan nacahan ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

³⁴ Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

³⁵ Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvin ñi tacan catyí tandihi ca ra tsicá tsihin ra.

*Nu tsican tahvi ra Jesús tsi Nyoo nda Getsemaní
(Mr. 14.32-42; Lc. 22.39-46)*

³⁶ Tacan tan tsaá ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

³⁷ Tan quihñin ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tsa tuñu cuñi ra.

³⁸ Tacan tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndo ndo ihya tan ço nyito ndo tsihin yu —catyí ra.

³⁹ Tacan tan cuahán ra Jesús luxu ca ityi nuu tan tsicuiñi tsi ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

⁴⁰ Tacan tan tsaá ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora?

⁴¹ Çoo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

⁴² Tan tsa tsahan ra tsa tsinu uvi tsaha, tsican tahvi ra tyehen:

—Tyaa, tatun ña cuvi tsa jatsiyo nyaha un tundoho ihya siqui yu, na cuvi cuhva cuñi maa un —catyí ra.

⁴³ Tacan tan tsaá ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha.

⁴⁴ Tacan tan nacoo ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsicán tahvi ra tsi Nyoo juvin ñi maa tsihin tuhun tsa tsa yaha cahan ra.

45 Tacan tan tsaꞗ nyico ra nu yucú ra tsicá tsihin ra, tan catyí ra tsihin ra naha:

—Vityin cꞗsu ndo tan quitatu ndo. Tyin tsa tsaꞗ cuhva tsa cua nacuhva cuenda ra can tsi Rayi tsa quee nda gloria tsi ra iyó cuatyí naha ra.

46 Nduvita ndo, cõhon ndo. Tyin tsa vatsí ra tsa xicó tsi yu —catyí ra Jesús.

Nu tsaꞗ cuenda ra Judas tsi ra Jesús tsi nu xaan iñi tsi ra nahnu
(Mr. 14.43-50; Lc. 22.47-53; Jn. 18.2-11)

47 Ndi caahán ca ra Jesús yacan, tan tsaꞗ ra Judas, ra tsa cuví iin ra tsicá tsihin ra Jesús. Tan tsihin ra Judas tsaꞗ tucu cuaha xaan nyiví ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyiví Israel naha ra.

48 Tan ra Judas, ra tsa tsahá cuenda tsi ra Jesús, tsa yaha tsahá ra iin seña tsi ra can naha ra, tyin coto ra naha yóo cua tiin ra naha. Tyin tsa yaha cahan ra tsihin ra naha:

—Ra tsa cua tyayuhu yu, ra ican cuví ra tsa cua tiin ndo.

49 Tacan tan natuhva ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

50 Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhva ra can naha ra tan tiin ra naha tsi ra Jesús.

51 Tacan tan iin ra cutahán tsihin ra Jesús, tava ra mityi tan tsahnya ra soho musu jutu tsaahnu tsa cuví ityi nuu.

52 Tan catyí ra Jesús tsihin ra:

—Natyihí mityi un tsitsi vena un. Tyin tandihí nyiví tsa cañi tahan tsihin mityi, juvin ñi tsihin mityi cua cúu ñi.

53 ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

54 Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

55 Tacan tan catyí ra Jesús tsihin tandihí nyiví:

—¿A vatsí tiin ndo tsi yu tumaa cua tiin ndo iin ñasuhu? tyin ndahá ndo mityi tan yutun. Tandihí quiví tsinyi yu jacuahá yu tsi ndo tsitsi vehe ñuhu cahnú, tan ña tiin ndo tsi yu.

56 Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo tahan tsanaha.

Tacan tan tandihí ra tsicá tsihin ra, tsinú ra naha. Tan ndoo intuhun ña maa ra.

Nu tsicá tuhun ra mandoñi naha ra tsi ra Jesús tatun Sehe Nyoo cuví tsi ra
(Mr. 14.53-65; Lc. 22.54-55, 63-71; Jn. 18.12-14, 19-24)

57 Tan ra tsa tiin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnú ñi yucú ra maestro cuenda ley vehe ñuhu naha ra ican tan ra mandoñi naha ra.

58 Tan ra Pedro cuahán ra tsata ra naha, tan tsaꞗ ra nda nuquehe vehe ra Caifás can. Tan quihví ra tan ndoo ra nyii ra tsihin vitya can naha ra, tyin cua nyeha ra nácaa cua quita tuhun can.

59 Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducu ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra.

⁶⁰ Maa tyin ña ñihí maa ra naha cuatyí tyaa ra naha síqui ra, vasu ndi maa cuaha nyívi tsahan ñi tsicahan ñi cuendu síqui ra. Tan nu ndihí tuhun, tsaá uvi ca tsa ndaa tsa caahán cuendu.

⁶¹ Tan catyí ra naha:

—Ra ihya, catyí ra tyin cuví caní ra vehe ñuhu cahnu Nyoo, tan tsitsi tsa uñi quívi cua janduvita ra tsi inga tsaha —catyí ra naha.

⁶² Tacan tan ra jutu tsa cuví ityí nuu can, nduvitá ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

⁶³ Maa tyin ra Jesús ña nacahan ra. Tacan tan catyí ra jutu tsaahnu tsa cuví ityí nuu tsihin ra:

—Tsihin sívi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayí tsa quee nda gloria, cunyaa yu xiin cuaha Nyoo ra iyó tandihí tunyee íñi, tan cua nyehe ndo nu cua quítsi yu nu vico ityí andívi inga tsaha —catyí ra.

⁶⁵ Tacan tan ra jutu tsaahnu tsa cuví ityí nuu can tsahnyá ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoó cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra.

⁶⁶ ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiví síi ra naha nuu ra tan cañi ra naha tsi ra. Inga ra cañi ra naha nuu ra tsihin tsíqui.

⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nácoto yóo cañi tsi un!

*Nu cahan ra Pedro tyin ña nacotó ra tsi ra Jesús
(Mr. 14.66-72; Lc. 22.56-62; Jn. 18.15-18, 25-27)*

⁶⁹ Tsitsi tsa ndi nyí ra Pedro nuquehe ityí tsata vehe can, tan iin ñaha tsa cuví musu jutu can, natuhvá ña nu nyaá ra tan catyí ña tsihin ra:

—Yooho tucu tsicá un tsihin ra Jesús, ra Galilea can.

⁷⁰ Tan ra Pedro catyí ra nuu tandihí nyívi yucú can:

—Ña tsicá yu tsihin ra can. Ña tsitó yu náa caahán un.

⁷¹ Tacan tan cuahán ra Pedro ityí yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicá ndihí tucu ra ihya tsihin ra Jesús, ra ñuu Nazaret —catyí ña.

⁷² Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cuií ca, tan ra yucú can natuhvá ra naha nu nyaá ra Pedro tan catyí ra naha tsihin ra:

—Nditsa tyin ra vaha íñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacu tsitooho.

⁷⁵ Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yaha cahan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra ícan, tan tsacu xaan ra tsa cuiihya cuñi ra tsa javahá ra tacan.

27

Nu nacuhva cuenda ra naha tsi ra Jesús tsi ra Pilato (Mr. 15.1; Lc. 23.1-2; Jn. 18.28-32)

¹ Tan tsa tuvj inga quivi, tandihi ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús.

² Tan nuuhñi ra jahá ra naha. Tan tsahan ra naha tsinacuhva cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uvj iñi ra tsa javahá ra, tan nacuhva ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra.

⁴ Tan catyí ra:

—Tsicoo cuatyí yu, tyin tsaha cuenda yu tsi iin ra nduve cuatyí na cúu ra.

Tan nacahan ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityihí ra yoho jucun ra tan ticaa ra tsi ra iin nu yutun, tan tsihi ra.

⁶ Ra cuví ityi nuu tsihin jutu can naha ra naquihin ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyivi tsi Nyoo tyin xuhun tsa cuyahvi ra tsa cua cati ñiñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsihi ñi ñuu can.

⁸ Yacan cuenda nañi ñuhu can nda cuanda vityin “Ñuhu Cuenda Tsa Tsati Niñi Nyivi”.

⁹ Tacan cuví tyin cundaá tsa tyaa ra Jeremías, ra cuví ndusu yuhu Nyoo tahan tsanaha nu catyí tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jata ra naha tsi ra Cristo.

¹⁰ Tan tsihin can, jata ra naha ñuhu tsa nañi ‘Ñuhu Ra Javahá Quisi’, tacan catyí Jutu Mañi yo tsihin yu”, catyí tsi.

Nu nyehe ra Pilato tyin nduve cuatyí ra Jesús (Mr. 15.2-5; Lc. 23.3-5; Jn. 18.33-38)

¹¹ Tsindaca ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

12 Tan cuhva tsa tyaa ra jutu can naha ra tan ra mandoñi naha ra cuatyí ra, ña nacahañ maa ra.

13 Tacan tan catyí ra Pilato tsihin ra:

—¿A ña tsiñi un tandihi tsa caahan ra naha siqui un?

14 Maa tyin ra Jesús ña nacahañ maa ra. Tan iyo xaan cuñi ra ndacá ñaha can tyin ña nacahañ ra.

*Nu cahañ ra cumí tyiñu tyin taahan tsi cúu ra Jesús
(Mr. 15.6-20; Lc. 23.13-25; Jn. 18.38—19.16)*

15 Tan vico pascua tuhvá ra ndacá ñaha jaña intuhun ra yucú vehe caa. Ndáa ra tsa nacatsi maa nyivi, juvin ra cua quita nuña.

16 Tan quivi can nyii iin ra tsa nañi Barrabás vehe caa. Tan tandihi nyivi tsitó tuhun ra.

17 Tan cuhva tsa ndu iin nyivi, ra Pilato tsicá tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

18 Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihí ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús.

21 Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahañ ñi, tan catyí ñi:

—Jaña tsi ra Barrabás.

22 Tan ra Pilato tsicá tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihi ñi nacahañ ñi tan catyí ñi:

—¡Tyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javaha ra?

Maa tyin maa ñi caná tsaa ñi inga tsaha tan catyí ñi:

—¡Tyaa tsi ra nu cruu na cúu ra!

24 Tsa nyehe ra Pilato tyin ña cuví jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya, tan nacatya ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

25 Tan tandihi nyivi nacahañ ñi, tan catyí ñi:

—Na ndoo maa tsi siqui ndi tan siqui sehe ndi.

26 Tacan tan ra Pilato jaña ra tsi ra Barrabás, tan tava tyiñu ra na ndoho ra Jesús, tan nacuhva cuenda ra tsi ra tsi ra andarú naha ra na cúu ra nu cruu.

27 Tacan tan ra andarú cuenda ra Pilato, ra ndacá ñaha can tsindaca ra naha tsi ra Jesús nda vehe tyiñu ra Pilato, tan jandu iin ra naha tsi tandihi ca andarú nu nyaá ra.

28 Tacan tan tava ra naha jahma ra tan jacunditsi ra naha iin jahma cuaaha tsi ra.

²⁹ Tan tyihj ra naha iin corona tsa tsinu tsihin iñu jiñi ra. Tan tsaḥa ra naha iin yutun tatun na cundaha ra tsihin ndaha cuaha ra. Tacan tan tsicuiñj tsiiti ra naha nuu ra, tan tsacu nducu ra naha tsi ra tan catyí ra naha:

—jNacumi tsi un, yooḥo Rey cuenda nyivi Israel!

³⁰ Tan tivj sñ ra naha tsi ra. Tan quihjñ ra naha yutun tatun can tan cañj ra naha jiñi ra.

³¹ Tsa yaha tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaa ra naha tsi ra Jesús nu cruu

(Mr. 15.21-32; Lc. 23.26-43; Jn. 19.17-27)

³² Tsa quitá ra naha ican, taḥan ra naha tsi iin ra ñuu Cirene, tsa nañi Simón. Tan jañiñj ra naha tsi ra na cuiso ra cruu ra Jesús.

³³ Tan tsaḥa ra naha iin nu nañi Gólgota, tan cuñi tsi catyí “Yiqui Jiñi Ndiyí”.

³⁴ Tan ican tsaḥa ra naha vinu nasacá tsihin ndutya uva xaan coho ra Jesús. Tan tsa yaha tsa tsihj ra luxu can, ña cuñi ca ra coho ra.

³⁵ Tan tsa yaha tsa tyaa ra naha tsi ra nu cruu, tacan tan ra andaru can quihjñ ra naha jahma ra tan tava cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuvj tyin cundaḡ tuhun tsa tyaa iin ra cuvj ndusu yuhu Nyoo taḥan tsanaha nu catyí tsi tyehen: “Tava cuenda ra naha tan tsatsá ra naha jahma yu”, catyí tsi.

³⁶ Tacan tan tsinyecu ra naha ican tyin jaha cuenda ra naha tsi ra.

³⁷ Tan ityi jiñi ra tyaa ra naha letra tsa catyí nacuenta cua cúu ra. Tan catyí tsi tyehen: “Ra ihya cuví ra Jesús, rey cuenda nyivi ñuu Israel.”

³⁸ Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaha ra, tan inga ra xiin satyin ra.

³⁹ Tan nyivi tsa yaha ican, caahán ñi tsi ra, tan javicó ñi jiñi ñi tsa tsacú nducu ñi tsi ra.

⁴⁰ Tan catyí ñi tsihin ra:

—jYooḥo tsa caḥan un tyin cua caní un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuví tsi un! —catyí ñi tsihin ra.

⁴¹ Tan juvin ñi tacan tsacú nducu ra jutu tsa cuví ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún taḥan ra naha tan catyí ra naha:

⁴² —Jacacu ra tsi inga nyivi, maa tyin ña cuví jacacu ra tsi maa ra. Tun nditsa tyin Rey cuenda nyivi Israel cuví ra, na nuu ra nu cruu can, tan cua tsinu iñi yo tsi ra.

⁴³ Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyí ra tsihin yo tyin Sehe Nyoo cuví tsi ra.

⁴⁴ Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihi nahnu tsi ra.

Nu tsihi ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaḡ tanñi cahnu ñuhu ñayivi tsa ora tan nda cuanda caa uñi tsa tseñi.

⁴⁶ Tan juvin ñi cuhva can, ñihi xaan canḡ tsa ra Jesús. Tan catyí ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenta nacoḡ ihñi un tsi yu?

⁴⁷ Juhva ra yucú can naha ra, tsiñj ra naha tsa caḥan ra, tan catyí ra naha:

—Ra Elías, ra cuvĭ ndusu yuhu Nyoo tsanaha, caná tsaa ra.

⁴⁸ Tan juvin ñi cuhva can, cuahán iin ra cua quihĭn ra iin yahma cuhva caá catyi, tan jatyiĭ ra tshĭn vĭnu iya, tan tyaā ra nu yutun, tan jatuhvā ra yuhu ra Jesús tyin na coho ra.

⁴⁹ Maa tyin inga ra naha catyi ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

⁵⁰ Inga tsaha canā tsaa ñihi ra Jesús, tacan tan tsihĭ ra.

⁵¹ Tan juvin ñi cuhva can ndatā sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siquĭ tan nda cuanda ityi tsaha. Tan ñihi xaan taān. Tan tahvĭ cuatyĭ cava nahnu.

⁵² Tan nuñā yuhu ñaña. Tan cuaha nyivi tsa tsinú iñi tsi Nyoo tan tsihĭ ñi, nandotoĭ ñi.

⁵³ Tan tsa yahā nandotoĭ ra Jesús quitā ñi nu ñaña tan quihvĭ ñi tsitsi ñuu Jerusalén, tan cuaha nyivi nyehe tsi ñi.

⁵⁴ Tacan tan ra capitán tan ra andaru tsa jahá cuenda tsi ra Jesús, nayuhvĭ xaan ra naha tsa taān, tan tsa nyehe ra naha inga ca tsa cuvĭ. Tan catyi ra naha:

—Nditsa nditsa cuii, tyin Sehe Nyoo cuvĭ tsi ra ihya.

⁵⁵ Cuaha ñiñaha tsa tsinyicun tsi ra Jesús nda Galilea tan jatyinyeeĭ ñi tsi ra, yucú ñi nyehé ñi ndasava.

⁵⁶ Tan juhva ñi ican cuvĭ ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

Nu tsicutsĭ ra naha tsi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva tsa cuñĭ cuaa, quitsĭ iin ra cuca tsa nañĭ José, ra ñuu Arimatea. Tan tsinú iñi ra tsi ra Jesús.

⁵⁸ Tan tsahān ra tsicahān ra tshĭn ra Pilato, tan tsicān ra cuñu ñuhu ra Jesús. Tacan tan tavā tyiñu ra Pilato na cuhva ra andaru naha ra cuñu ñuhu ra Jesús tsi ra.

⁵⁹ Tacan tan quihĭn ra José cuñu ñuhu ra, tan cavā nuu ra iin jahma cuitsin vaha tsi ra.

⁶⁰ Tan tyihĭ ra cuñu ñuhu ra Jesús tsitsi iin ñaña tsaa tsa cuvĭ iin yavi yuu tsa tavā tyiñu ra tsatyā ra naha. Tan tsa yahā tsa nacasi ra yuhu ñaña can tshĭn iin yuu cahnu, tan cuahán ra.

⁶¹ Tan ña María tsa quee Magdala, tan inga ña María, ndoo ñi yucú ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quivi, quivi quitatú nyivi cuvĭ can, tan ra jutu tsa cuvĭ ityi nuu naha ra, tan ra fariseo naha ra tsahān ra naha tsicahān ra naha tshĭn ra Pilato.

⁶³ Tan catyi ra naha tshĭn ra:

—Yooho taa, nducuhun iñi ndi tyin ra vatya can, catyi ra tahān nyito ra tyin tsa yahā tsa uñi quivi tsa cua cúu ra tan cua nandoto ra.

⁶⁴ Yacan cuenda tavā tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsicā tshĭn ra tsa tsacuaa, tan suhu ra naha cuñu ñuhu ra. Yaha can tan cua catyi ra naha tshĭn nyivi tyin tsa nandotoĭ ra. Tatun tacan cua cuvĭ, yaha ca cuhva cua cuvi tan ñavin ca tsa jihna ñi —catyi ra naha.

⁶⁵ Tan ra Pilato catyi ra:

—Quihin ndo andaru ihya. Cuaahan ndo, tan jahā cuenda vaha ndo ñaña can, nácaa cunyee maa ndo jaha cuenda ndo —catyí ra.

⁶⁶ Tacan tan cuahán ra naha, tan jahā cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoō ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Tsa yaha quivi tsa quitatú nyivi, cuhva tsa cuñí cunditsin, nu quitsahā tsaha vitya, tan ña María tsa quee Magdala can, tan inga ña María tsahan ñi nu ñaña.

² Tan ñihi xaan taan tyin quitsí iin ángel Jutu Mañi yo quee ra andivi, tan tsaā ra nu ñaña can. Tan jatsiyō ra yuu tsa ndasí yuhu can, tan tscunyaā ra tsata can.

³ Tan xiñu xaan ra, tumaa tsa cañí tatsa. Tan cuitsin xaan jahma ra.

⁴ Cuhva tsa nyehe ra andaru can naha ra tsi ra, nayuhvi xaan ra naha tan quitsahā nihí ra naha, tan nda cuanda tsihi naaha ra naha tsihin tsa yuuhvi ra naha.

⁵ Tacan tan catyí ángel can tsihin ññaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo.

⁶ Yoñi ca ra nyii ihya, tyin tsa nandoto ra, tumaa catyí ra. Naha ndo tan nyehe ndo nu tinyi ra naha tsi ra.

⁷ Janumi xaan ndo cuhun ndo cucatyí tuhun ndo tsihin ra tsicā tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quitā ñi nu ñaña can. Yuuhvi ñi, tan si xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsicā tsihin ra Jesús.

⁹ Tan cuhva can quituvi ra Jesús nuu ñi tan tsahā ra nacumi tsi ñi. Tacan tan natuhva ñi nu nyaá ra tan tscuiñi tsiti ñi nuu ra tan jacahnū ñi tsi ra, tan tscinumj nyaa ñi tsaha ra.

¹⁰ Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahā cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra.

¹² Tacan tan ra jutu can naha ra tsahan ra naha tscahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsahā ra naha tsi ra andaru can naha ra.

¹³ Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsicā tsihin ra Jesús tan quihin ra naha cuñu ñuhu ra.

¹⁴ Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyoooho ña caca iñi ndo. Nduve náa cua tahan ndo.

¹⁵ Tacan tan quih̄in ra andaru can xuhun can, tan cuahán ra naha cuajavahá ra naha cuhva catȳi ra naha tsihin ra naha. Tan nda quiv̄i vityin tan tacan caahán nyiv̄i ñuu Israel.

*Nu tav̄a tyiñu ra Jesús tsi ra tsicá tyiñu ra
(Mr. 16.14-18; Lc. 24.36-49; Jn. 20.19-23)*

¹⁶ Tan tacan, tandih̄i tsa utsi iin ra tsicá tsihin ra, cuahán ra naha nda Galilea nda yucu nu catȳi maa ra Jesús tsihin ra naha tyin cuhun ra naha.

¹⁷ Tan cuhva tsa nyehe ra naha tsi ra Jesús, jacahn̄u ra naha tsi ra, maa tyin juhva ra naha uvi ñi tsicá iñi ra naha.

¹⁸ Tacan tan natuhv̄a ra Jesús nu nyecú ra naha tan catȳi ra tsihin ra naha: —Nyoo tsah̄a ra tsa cundaca ñaha yuhu tandih̄i andiv̄i tan nu ñuhu ñayiv̄i ihya.

¹⁹ Yacan cuenda, cuaahan ndo tandih̄i nu iyó nyiv̄i, tandih̄i ñi ñuu, tan catȳi ndo tsihin ñi na cunycun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatȳi Ii ra.

²⁰ Tan jacuaha ndo tsi ñi na tyaa yahvi ñi tandih̄i tsa catȳi yu tyin javaha ndo. Tan coto ndo tyin yuhu cunyaa yu tsihin ndo tandih̄i quiv̄i nda cuanda naa ñayiv̄i —catȳi ra Jesucristo tsihin ra tav̄a tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

*Nu caahán ra Juan, ra jacoondutyá tsi nyívi, tuhun Nyoo
(Mt. 3.1-12; Lc. 3.1-9, 15-17; Jn. 1.19-28)*

¹ Tyehen quitsaha tuhun ra Jesucristo, Sehe Nyoo.

² Tسانaha ra Isaías, ra cuví ndusu yuhu Nyoo, tyaa ra nácaa cua quítsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi

na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsa ra nu tsiqui, tan catyí ra:

“Nuña ndo iin ityi cuiti

tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

⁴ Tacan cuví; quítsi ra Juan nu tsiqui, tan javaha ra cuhva tyaa ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan çoondutyá ndo tyin tacan tan jaha Nyoo tucahnu iñi tsi ndo tsa cuenda cuatyí ndo.”

⁵ Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi cuhva iyó ñi tan nahma ñi cuatyí ñi nu Nyoo. Tacan tan tsicoondutyá ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuví ñi. Tan maa ñi tica xama tsatsi ra, tan tsihí ra ndutyá ñuñu tsa iyó tsitsi cuhu.

⁷ Caahán ra tuhun Nyoo tsihin nyívi tan catyí ra:

—Tsa yatyin cuii quítsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuví maa ra tan ñavin ca yuhu.

⁸ Yuhu jacoondutyá yu tsi ndo tsihin ndutyá ñi. Maa tyin maa ra cua jacoondutyá ra tsi ndo tsihin Tatyí Ii Nyoo —catyí ra Juan.

*Nu tsicoondutyá ra Jesús
(Mt. 3.13-17; Lc. 3.21-22)*

⁹ Quívi can quita ra Jesús ñuu Nazaret, tsa canyí Galilea, tan cuahán ra nu nyíi ra Juan yutya Jordán tyin jacoondutyá ra tsi ra.

¹⁰ Tsa quita ra Jesús tsitsi ndutyá tsa yaha tsicoondutyá ra, nuña andívi tan nyehe ra vatsi nuú Tatyí Ii Nyoo siqui ra tan caá tsi tumaa caá iin paloma.

¹¹ Tan nacahan iin ndusu ityi andívi tan catyí tsi tsihin ra tyehen:

—Yooho cuví Sehe yu tan cuñi xaan yu tsi un. Tan sñi xaan cuñi yu nyehé yu tsi un —catyí ndusu can.

*Nu nducú cuhva nu ña vaha tsi ra Jesús
(Mt. 4.1-11; Lc. 4.1-13)*

¹² Tsa yaha tsa tsicoondutyá ra Jesús tan tsindaca Tatyí Ii Nyoo tsi ra nu tsiqui.

¹³ Tan tsinyí ra ican uvi xico quívi nu nduve nyívi iyó, maa ñi quiti xaan iyó. Tan nducú cuhva nu ña vaha tsi ra. Yaha can tan tsaá ángel Nyoo tan jatyinye ra naha tsi ra.

*Nu quitsaha caahán ra Jesús tuhun Nyoo tsihin nyívi iyó Galilea
(Mt. 4.12-17; Lc. 4.14-15)*

14 Tsa yaha tsa tyihí nyívi tsi ra Juan vehe caa, tan tsinuhu ra Jesús Galilea tan caahán ra tsihin nyívi nácaa ndacá ñaha Nyoo.

15 Tan catyí ra:

—Tsa tsaá quívi tsa cua cundaca ñaha Nyoo tsi nyívi iyó nu ñuhu ñayívi ihya. Yacan cuenda ndu uvi ñi ndo cuatyí ndo, tan tsínu ñi ndo tuhun tsa jacacú Nyoo tsi nyívi —catyí ra Jesús.

*Nu cana ra Jesús cumi taahan ra tñin tyaca
(Mt. 4.18-22; Lc. 5.1-11)*

16 Iin quívi cuahán ra Jesús tsicá ra yuhu miñi tsa nañí Nduya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñin tyaca cuví ra naha.

17 Tan catyí ra Jesús tsihin ra naha:

—Ñaha ndo, quítsi nyicun ndo tsi yu, tan yuhu cua jatyinyee yu tsi ndo tyin tumaa tsa tñin ndo tyaca ihya, tacan cua ñihi ndo nyívi cua cuví nyívi Nyoo —catyí ra Jesús tsihin ra Simón tan tsihin ra Andrés.

18 Juvín ñi cuhva can tan nacoꝝ ra naha traya can, tan cuahán ra naha cuanyicún ra naha tsi ra.

19 Ña cuaha ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya.

20 Cana ra tsi nduvi taahan ra naha. Tan nacoꝝ ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

*Nu quitá tatyí ña vaha tsi iin rayi#
(Lc. 4.31-37)*

21 Tsa tsaá ra Jesús ñuu Capernaum tsihin ra tsicá tsihin ra, quíhví ra Jesús tsitsi vehe ñuhu quívi quitatú nyívi. Tacan tan quítsaha jacuahá ra tuhun Nyoo tsi nyívi.

22 Tan iyo xaan cuñí ñi tsa tsiñí ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra.

23 Tan tsitsi vehe ñuhu can nyíi iin ra yihí tatyí ña vaha. Tan cana tsa ra tan catyí ra:

24 —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuví un —catyí ra can tsihin ra Jesús jaha nu tatyí ña vaha can.

25 Tacan tan nduxaan ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya! —catyí ra tsihin nu.

26 Tacan tan quítsaha ñihi rayi# can jaha nu. Tan ñihi xaan cana tsa ra jaha nu, tan quitá nu tsi ra.

27 Tandihí nyívi iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Naa cuví tsa nyehé yo ihya? ¿Naa tuhun tsa jacuahá ra ihya? ¡Tyin iyó vaha tunyee ñi tsi ra, nda cuanda tatyí ña vaha tan tyaá yahvi tsi ra! —catyí ñi.

28 Tan numi ñi tsitó nyívi iyó tandihí ñuu tsa cayucú Galilea tuhun ra Jesús.

*Nu nduvaha tyiso ra Simón Pedro
(Mt. 8.14-15; Lc. 4.38-39)*

29 Tsa ndihí jacuahá ra Jesús tsi nyívi tsitsi vehe ñuhu, quitá ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra.

30 Tan ña tyiso ra Simón cuuhví ña tsihin cahñi canyíi ña nu tsito. Tan catyí tuhun nyívi ña tsihin ra Jesús tyin cuuhví ña.

31 Tacan tan natuhvá ra Jesús yuhu tsito nu canyíi ña, tñin ra ndaha ña, tan cañihí ra tsi ña. Juvín ñi cuhva can, quitá cahñi tsi ña, tan quitsahá nanducú ña tsa catsi ra naha.

*Nu cuaha xaan nyívi cuuhví janduvahá ra Jesús
(Mt. 8.16-17; Lc. 4.40-41)*

32 Tsa tsa cuñí cuaa tsa tsa yahá tyiso ñicanyíi, tandihí nyívi cuuhví tan nyívi yihí tatyí ña vaha tsindacá nyívi tsi ñi nu nyíi ra Jesús.

33 Tan ndu ijin tandihí nyívi ñuu can nu yucú ra naha.

34 Tan janduvahá ra tsi tandihí ñi tsa yihí siin siin cuehe, tan cuaha tatyí ña vaha tavá ra. Maa tyin ña tsahá ra tsa cahan tatyí ña vaha can, tyin tsitó nahnu yóo ra cuví ra.

*Nu tsicá ra Jesús caahán ra tuhun Nyoo tandihí ñuu tsa cayucú Galilea
(Lc. 4.42-44)*

35 Ra Jesús nduvitá ra tsa ndi naa ca inga quívi, quitá ra ñuu can tan cuahán ra iin nu taxín caá cuandacán tahví ra tsi Nyoo.

36 Tsa nyehe ra Simón tyin nduve ra, tacan tan cuahán ra tsihin tandihí ca ra naha cuananducú ra naha tsi ra.

37 Tan tsa nañihí ra naha tsi ra, catyí ra naha tsihin ra:

—Tandihí nyívi tan nanducú ñi tsi un —catyí ra naha.

38 Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyíñu vatsí yu —catyí ra Jesús tsihin ra naha.

39 Tan tacan tsicá ra Jesús caahán ra tuhun Nyoo tsihin nyívi tsitsi vehe ñuhu tan iin tan iin ñuu tsa cayucú Galilea. Tan tavá ra tatyí ña vaha tsi nyívi.

*Nu janduvahá ra Jesús tsi ra ndohó cuehe tyaahyú
(Mt. 8.1-4; Lc. 5.12-16)*

40 Tsa ndi cuahán ra Jesús tsicá ra tan quitá iin ra ndohó cuehe tyaahyú tsicuiñí tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

41 Tan cundaahví iñi ra Jesús nyehe ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvahá un —catyí ra tsihin ra.

42 Tsa cahan ra Jesús tacan tsihin ra, juvín ñi cuhva can tan nduvahá ra.

43 Tacan tan catyí ra Jesús tyin tsa cuví cunuhu ra, maa tyin cahan vaha xaan ra tsihin ra na javaha ra tyehen:

44 —Coto catyí tuhun un tsihin nyívi yóo janduvahá tsi un. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva tsa catyí ra Moisés tyin cuhva ndo tsa cuenda tsa nduvahá ndo tun cuhví ndo. Yacan cua cuví tsa ndaa tsi ra jutu tan tsi nyívi tyin tsa nduvahá un —catyí ra Jesús tsihin ra.

45 Maa tyin ra ican cuahán ra, tan quitsahá catyí tuhun ra tsihin tandihí nyívi nácaa nduvahá ra. Yacan cuenda ña cuví ca quihví nditsin ra Jesús tsitsi

ndi intuhun maa ñuu. Tan tsicá ra ityi tsata ñuu ñi nu nduve nyivi iyó, maa tyin tandihi ñi ityi tan quita nyivi, tan tsinyehe ñi tsi ra.

2

Nu janduvaha ra Jesús tsi iin ra xii

(Mt. 9.1-8; Lc. 5.17-26)

¹ Tsa yaha juhva quivi tan cuahán ra Jesús ñuu Capernaum inga tsaha. Tan tsa tsito nyivi tyin tsaá nuhu ra yuvehe ra,

² iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi.

³ Tacan tan tsaá cumi taahan rayi nyisó ra naha iin ra xii. Cuñí ra naha cuhun ra naha tsihin ra nda nu nyaá ra Jesús.

⁴ Maa tyin ña cuví yaha ra naha yuvehe tan cuhun ra naha nu nyaá ra Jesús tyin cuaha xaan nyivi nyecú yuvehe can. Yacan cuenda ndaa ra naha jiñi vehe, tan jatsiyó ra naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iin tsito.

⁵ Tsa nyehe ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jaha yu tucahnu iñi tsi un tsa cuenda tandihi cuatyí un —catyí ra Jesús tsihin ra.

⁶ Tan nyecú juhva ra cuví maestro cuenda ley vehe ñuhu naha ra ican, tacan tan quitsaha tsicá iñi ra naha tuhun ihya:

⁷ “¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahá tucahnu iñi tsi yo. Tsicoo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha.

⁸ Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

⁹ ¿Náa yí ca cahan yo; “Cuatyí un tsa yaha ndatsi”, o catyí yo: “Nduvita, naquihin tsito un tan çaça?”

¹⁰ Vaha. Cua janaha yu tsi ndo tyin yuhu, tsa cuví yu Rayi quee nda gloria, iyó ndatu tsi yu nu ñuhu ñayivi ihya tsa jaha yu tucahnu iñi tsi nyivi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

¹¹ —Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

¹² Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñí tandihi maa nyivi tsa nyehe can, tan quitsaha jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu cana ra Jesús tsi ra Leví

(Mt. 9.9-13; Lc. 5.27-32)

¹³ Tsa yaha yacan tan cuahán ra Jesús yuhu miñi inga tsaha. Tacan tan tsaá cuaha nyivi nu nyí ra, tan quitsaha jacuahá ra tsi ñi.

¹⁴ Tsa ndihí jacuahá ra tsi ñi, tan cuanuhú ra. Tan tsa cuahán ra yaha ra nu nyaá vehe nu tyahví nyivi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvita ra Leví, tan cuahán ra tsihin ra.

¹⁵ Yahā can tan cuahán ra Jesús cuacatsí ra yuvehe ra Leví tsihin ra tsicá tsihin ra. Tsinyaa ra nu mesa tan tsinyecu ndihi tucu ra tavá xuhun cuenda ra ndacá ñaha tan inga ca nyívi iyó cuatyí. Tyin cuaha xaan nyívi nyicún tsi ra.

¹⁶ Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

¹⁷ Tsa tsiñi ra Jesús tsa cahān ra naha tan catyí ra:

—Yuhu ña vatsí yu vatsí jatinyee yu tsi nyívi cuñí tyin vaha iyó ñi; vatsí yu vatsí jatinyee yu tsi nyívi tsitó tyin iyó cuatyí ñi tumaa nyívi cuuhví, tyin nyívi cuuhví tsiñí ñuhu doctor tsi ñi. Maa tyin nyívi vaha cuñí, ña tsiñí ñuhu doctor tsi ñi —catyí ra Jesús tsihin ra naha.

Nu tsicā tuhun nyívi tsi ra Jesús tun taahán tsi coo nyitya ñi
(Mt. 9.14-15; Lc. 5.33-35)

¹⁸ Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahān juhva nyívi nu nyíi ra Jesús, tan tsicā tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

¹⁹ Nacahān ra Jesús tan catyí ra:

—¿A cuví coo nyitya nyívi yucú nu iyó vico tindaha tun ndi nyíi ra cua tindaha tsihin ñi? Ña cuví coo nyitya ñi tun ndi nyíi ra tsihin ñi.

²⁰ Maa tyin coo quívi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnu tsa iyó nyívi tsihin tuhun tsa tsa jacuahá ra tsi ñi

(Mt. 9.16-17; Lc. 5.36-39)

²¹ Tan catyí ra Jesús:

—Ña tuhvá nyívi natyaa jahma tsaa iin jahma tuuhu, tyin jahma tsaa can cua nandiyi can tan cua nducahnu ca nu ndatā jahma tuuhu can jaha can.

²² Tacan tucu ñi ñi yihí vinu tun tyihí yo vinu tsaa tsitsi ñi tsahnu cua ndata ñi can, tan cua cati vinu can tan cua tivi can. Yacan cuenda cuñí tsi tsa tyihi yo vinu tsaa tsitsi ñi tsaa —catyí ra Jesús.

Nu jocón ra tsicá tsihin ra Jesús yoco trigu quívi quitatú nyívi
(Mt. 12.1-8; Lc. 6.1-5)

²³ Iin tsaha yahā ra Jesús tsitsi tsa tatsj nyívi tan cuví tsi quívi quitatú ñi. Tan tsa yahā ra tsicá tsihin ra quitsahā tuhún ra naha yoco trigu.

²⁴ Tacan tan tsa nyehe ra fariseo naha ra can quitsahā caahán ra naha tsihin ra Jesús:

—¿Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quívi ihya —catyí ra naha.

²⁵ Tan nacahān ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahā ra David tan ra cutahán tsihin ra quívi tsi soco ra naha?

²⁶ Ra David quihvi ra tsitsi vehe Nyoo quívi cuví ra Abiatar jutu tsahnu cuví ityi nuu. Tan quihñin ra paan ii, tsa taahán tsí catsi maa ñi maa ra jutu

naha ra. Maa ra tan tandihí ra cutahán tsihin ra tsatsj ra naha paan can —catyí ra Jesús.

²⁷ Tacan tan catyí ra Jesús tsihin ra naha:

—Nyoo javahá ra quiví quitatú yo tyin tacan tan cuví quitatu cuñu ñuhu yo; tan ñavin maa yo tsinü tsa cuenda quiví quitatú yo.

²⁸ Yacan cuenda yuhu tsa cuví yu Rayi quee nda gloria, iyó ndatu tsi yu tsa cahán yu tsihin intuhun ndo náa taahán tsi javaha ndo quiví quitatú yo —catyí ra Jesús.

3

Nu nduvahá ra na ityi iin ndaha

(Mt. 12.9-14; Lc. 6.6-11)

¹ Tsa quihví ra Jesús inga tsaha tsitsi vehe ñuhu, nyíi iin ra na ityi iin ndaha ican.

² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quiví quitatú nyivi. Tyin tun cua janduvaha ra tsi ra can, tacan tan cua cuví tyaa ra naha cuatyí siqui ra.

³ Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quiví quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha.

⁵ Tacan tan nanyehé xaan ra Jesús nuu ra naha, tan nducuihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvahá ndaha ra.

⁶ Tacan tan quitá ra fariseo naha ra, tan quítsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyii ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

⁸ Tsa tsitö nyivi tyin nahnu xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatyin nu cayucú nduvi ñuu can.

⁹ Tsa nyehé ra Jesús tsaá nyivi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyivi, cuví quihví ra tsitsi yutun ndoo can tyin tacan tan ña cua tindahñi ñi tsi ra.

¹⁰ Tsa cuaha xaan nyivi janduvahá ra, yacan cuenda tsahan cuaha ca nyivi cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi.

¹¹ Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi caná tsaa nu tan catyí nu tsihin ra:

—¡Yooho cuví Sehe Nyoo!

¹² Tan tandihí ñi cuhva tsa caahán tatyí ña vaha yóo ra cuví ra, tyasí ra nu cahan nu.

*Nu nacatsi ra Jesús tsi utsi uvi ra caca tyiñu ra
(Mt. 10.1-4; Lc. 6.12-16)*

¹³ Tsa yahá yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyíi ra.

¹⁴ Tan tsitsi tsa tandihí ra tsa cana ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo.

¹⁵ Tan tsaḥa ra ndatu tsi ra naha tsa janduvaha ra naha tsi nyivi cuuhví, tan tava ra naha tatyí ña vaha yihi tsi nyivi.

¹⁶ Ihya nyecú sivi ra naha: ra Simón, tsa jacunañi tucu ra Jesús Pedro;

¹⁷ tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyi: “ra caahán tumaa ñihi caahán savi”.

¹⁸ Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siqui ñuu Roma tsa ndacá ñaha tsi ñi;

¹⁹ tan ra Judas Iscariote, tsa xico tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyi nahnu tyin tsihin tunyee iñi nu ña vaha javahá ra tsa iyo

(Mt. 12.22-32; Lc. 11.14-23; 12.10)

²⁰ Tan nducuahá nyivi nu yucú ra naha inga tsaḥa, tan nda cuanda ña cuyatyí ca ra naha catsi ra naha.

²¹ Tsa tsito nyivi ra Jesús tyin nyii ra ican, tsaḥan ñi tsiquihin ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

²² Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaá ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyí ra naha.

²³ Tsa tuví iñi ra Jesús tyin tacan caahán ra naha, cana ra tsi ra naha tan tsaḥa ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvín ñi maa tahan nu? Ña cuví.

²⁴ Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihi tsa ndacá ñaha ra naha.

²⁵ Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuví coo vaha ñi.

²⁶ Tan tun nu ña vaha tan ndusin nu tan nduvita iin nu siqui inga nu, ¿náa cua tahan nahnu? Cua ndusin nahnu tan cua cundihi nahnu.

²⁷ Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuñi jihna ra tsi ra. Maa ñi cuñi tsi cuñi jihna ra tsi ra jatsii vehe can tan cuví quihvi ra suhu ra tsa tsii ra.

²⁸ Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihí nuu cuatyí javahá ñi, tan tsa cuenda tucu tsa caahán ñi tsa ña vaha.

²⁹ Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

³⁰ Tacan cahān ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyivi tyaá yahvi tuhun Nyoo, juven ñi cuví yañi ra, tan sihi ra
(Mt. 12.46-50; Lc. 8.19-21)

³¹ Tacan tan tsaá sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyí ñi tsihin ra nyecú ícan naha ra tyin cana ra naha tsi ra Jesús.

³² Tan catyí nyivi nyecú nani canduvi xiin ra Jesús tsihin ra:
—Sihí un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³ Maa tyin catyí ra:

—¿Yóo cuví sihi yu tan yañi yu?

³⁴ Tacan tan nanyehē ra nani canduvi nu nyaá ra, tan catyí ra:

—Nyivi nyecú ihya cuví sihi yu, yañi yu tan cuhva yu.

³⁵ Tyin tandihí nyivi javahá cuhva cuñí Nyoo, juven ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsi
(Mt. 13.1-9; Lc. 8.4-8)

¹ Quitsahā jacuahá ra Jesús inga tsaha yuhu miñi. Tan cuaha xaan nyivi ndu iin nu nyii ra. Tan tsa cuenda tsa cuaha xaan ñi cuví, quihvi ra tsitsi yutun ndoo tsa canyíi nu ndutya yuhu miñi can, tan tsinyaa ra tsitsi can. Tan ndoo tandihí maa nyivi nu nyiti.

² Tacan tan cuaha xaan tsa jacuahā ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

³ —Tyāa soho ndo tsa cua cahan yu. Iin ra quitā ra yuvehe ra. Tan cuahán ra cua tatsi ra trigu nu ñuhu ra.

⁴ Tan cuhva tsa quití ra tsiti trigu can, cucoyo juhva tsi yuhu ityi. Maa tyin quitsi saa tan tsatsi ti naha ti itsi.

⁵ Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi canā tsiti can tyin ña cuaha nyahyu yihí tyañu yuu can.

⁶ Maa tyin tsa canā ñicanyii, iin yaha ñi na ityi tsi tyin ña cunu cuahán yoho tsi.

⁷ Tan juhva ca tsiti can cucoyo tsi tyañu iñu. Quivi canā tsiti can, tsahnū tsi iin caa ñi tsihin iñu can. Maa tyin iñu can numi ca tsahnū can tan tsahñi can trigu can. Yacan cuenda ña tsahā trigu can tsiti.

⁸ Maa tyin juhva ca tsiti can cucoyo tsi nu ñuhu vaha. Canā tsi tan tsahnū tsi, tan cuaha tsiti tsahā tsi. Tyin tsa intuhun tsiti can, tsahā tsi oco utsi tsiti tsitsi yoco tsi. Tan inga tsiti can tsahā tsi uñi xico, tan inga tsi tsahā tsi iin cientu —catyí ra Jesús tsihin ñi.

⁹ Tan catyí nyico ra tsihin ñi:

—Nyooho tsa iyó soho, tyāa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva
(Mt. 13.10-17; Lc. 8.9-10)

¹⁰ Tsa yahā yacan tan ndoo maa ña ra Jesús tsihin ra tsicá tsihin ra tan nyivi nyicún tsi ra. Tan tsicā tuhun ñi:

—¿Náa cuñí tsi catyí tsa cahān un nañi?

¹¹ Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñí ñi cunyicun vaha ñi tsi yu.

¹² Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

*Nu tsahá cuenda ra Jesús tsa cuñí tsi catyí tuhun ra tatsí
(Mt. 13.18-23; Lc. 8.11-15)*

¹³ Tan catyí ndihi ra tsihin ñi:

—Tun ña cutuñí iñi ndo tuhun cahan yu nañi, ndi ña cua cutuñí iñi ndo tandihí ca tsa cua jacuaha yu tsi ndo tsihin cuhva ñi.

¹⁴ Ra tatsí trigu can cuví ra caahán tuhun Nyoo.

¹⁵ Yihí nyivi cuví ñi tumaa nu cucoyo tsi trigu yuhu ityi tyin tsiñí ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi.

¹⁶ Tan juhva nyivi cuví ñi tumaa nu cucoyo tsi trigu tsata yuu tyin si xaan cuñí ñi tsiñí ñi tuhun Nyoo juhva ñi quivi.

¹⁷ Maa tyin ña ndoó tsi añima ñi tan ña cuví cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsi tsata yuu tyin tsata yuu can luxu cuii ñi nyahyu yihí. Yacan cuenda ña tsahnú tsi tyin ña ñihí tsi nu cuhuh yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo.

¹⁸ Tan juhva nyivi cuví ñi tumaa nu cucoyo tsi tyañu iñu tyin tsiñí ñi tuhun Nyoo,

¹⁹ maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandihí tsa iyó nu ñuhu ñayivi ihya tsi ñi. Tan tandihí yacan jatyañú can tsi ñi, tan cuví ñi tumaa cuví yutun tsa ña tsaha tsi.

²⁰ Maa tyin nyivi tsa tsiñí tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo tsi can tyin tsi tsa cucoyo can cana vaha tsi, tsahnú tsi, tan yihí tsi tsaha tsi oco utsi tsi. Inga tsi tsaha tsi uñi xico tsi, tan inga tsi tsaha tsi cientu tsi.

*Nu cahan ra Jesús tyin ña taahán tsi tyihí xeehe yo ñuhu Nyoo tsa jandun-
ditsín añima yo coto quihin nyaa ra itsi
(Lc. 8.16-18)*

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naní tsitsi vehe.

²² Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandihí maa tan cua quita nu nditsin tan coto yo can.

²³ Nyooho tsa iyó soho, tya soho ndo tsa caahán yu —catyí ra Jesús tsihin ñi.

²⁴ Tan catyí tucu ra:

—Tya soho vaha ndo tsa caahán yu tyin tun tyaá yahvi ndo tuhun tsiñí ndo, cuaha ca tsa cua cuhva Nyoo tsi ndo.

²⁵ Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yahá ñihí ñi.

Nu tsahá ra Jesús iin cuhva nácaa tsahnú iin tsiti

²⁶ Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi.

²⁷ Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi,

²⁸ tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti.

²⁹ Tan tatun tsa tsitsa tsiti tsi, tacan tan jocón ñi itsi tyin tsa tahán maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13.31-32; Lc. 13.18-19)

³⁰ Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví.

³¹ Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihi ca tan ñavin ca tandihí ca tsiti tsa iyó nu ñuhu ñayivi.

³² Maa tyin tsa yaha tatsí tsi, caná tsi tan ndunahnú tsi, tan cuví tsi yutun tumaa nducuaaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13.34-35)

³³ Tacan jacuahá ra Jesús tsi nyivi, tsihin cuaha cuhva, ndihi cuhva cuví cutuñí iñi ñi.

³⁴ Tan tandihí tsaha tsa cahan ra tsihin ñi maa ñi maa tsihin cuhva cahan ra. Maa tyin cahan catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8.23-27; Lc. 8.22-25)

³⁵ Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶ Tacan tan ra Jesús tan ra tsicá tsihin ra nacoó ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha.

³⁷ Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñí cutu yutun ndoo can.

³⁸ Tan ra Jesús canyii ra quixí ra tsa yatyin xuu yutun ndoo can, tan nyanaá iin jahma jiñi ra. Jandoto ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñí nyee yo?

³⁹ Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuii ñi cuví.

⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu ifi ndo? —catyí ra tsihin ra naha.

⁴¹ Maa tyin iyo xaan cuñí ra naha tsa nyehe ru naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsí Nu nduvaha iin ra Gadara tsa yihí tatyí ña vaha (Mt. 8.28-34; Lc. 8.26-39)

¹ Tsaá ra naha inga tsiyo miñi nda nu ñuhu cuenda Gadara.

² Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaá ra nu nyaá ra.

³ Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra.

⁴ Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunyeet tsi ra.

⁵ Tan tsicá nuu maa ra caná tsaá ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu.

⁶ Maa tyin ndi cañi ca quitá ra Jesús, tan nyehe ra can tsi ra, tan tsinú xaan ra tsahan ra, tsicuiñi tsiti ra nuu ra.

⁷ Tan caná tsaá ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

⁸ Tacan catyí nu tatyí ña vaha can tsihin ra Jesús tyin tsa yahá cahán ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

⁹ Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

¹⁰ Tan caahán ndaahvi nu tsihin ra Jesús na ña jacuhun cañi ra tsi nahnu.

¹¹ Yatyin ñi yucu can yucú cuaha quini tsatsi ti naha ti.

¹² Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

¹³ Tacan tan tsahá ra Jesús ndatu tsi nahnu, tan quihvi nahnu tsitsi quini can. Quitá nahnu tsi ra can tan quitá tumaa uvi mil quini yucú can. Tsa quihvi nahnu tsitsi ti naha ti, quitsahá tsinú ti naha ti, tan yahá ti naha ti yuhu xahva tan cocoyo ti naha ti tsitsi miñi, tan tsihi ti naha ti tsitsi ndutya.

¹⁴ Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihí nyivi tsa cahán ra naha tsihin, tsahan ñi tsinyehe ñi tsa cuví can.

¹⁵ Cuhva tsa tsaá ñi nu nyii ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsi ra jahma, tan vaha cuñi ra.

¹⁶ Tan tandihí maa nyivi tsa nyehe tsa tahan ra can tan tsa tahan quini can, catyí tuhun ñi can tsihin inga ca nyivi.

17 Tacan tan quitsahā caahán ndaahvi ñi tsihin ra Jesús, na ña ndoo ra nu ñuhu ñi.

18 Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra.

19 Maa tyin ña tsahā ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyí tuhun tsihin ñi tandihi tsa javahā Jutu Mañi yo Nyoo tsihin un, tan nácaa cundaahvi iñi ra tsi un.

20 Tacan tan cuanuhú ra tan quitsahā catyí tuhun ra tsihin nyivi iyó tandihi ñuu tsa cayucú Decápolis tandihi tsa javahā ra Jesús tsihin ra. Tan iyo xaan cuñí ñi.

Nu nduvahā sehe ra Jairo tan ñaha tsa tñin jahma ra Jesús

(Mt. 9.18-26; Lc. 8.40-56)

21 Tsa tsaā ra Jesús tsihin yutun ndoo nda inga tsiyo miñi can, tsaā cuaha nyivi nu tsaā ra. Tan ndoo ra yuhu miñi ican.

22 Tacan tan tsaā iin ra nyisó tyiñu vehe ñuhu, nañi ra Jairo. Cuhva tsa nyehē ra tsi ra Jesús, tsi cuñiñi tsiti ra nuu ra.

23 Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

24 Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi.

25 Tsihin nyivi can cuahán ndihi iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña.

26 Tan cuaha xaan tundoho nyehē ña tsihin tsa cuaha doctor. Tandihi xuhun ña janaā ña tsihin ra naha, maa tyin nduve maa náa catyí janaā ña xuhun ña tyin vihi ca nduñihí cuuhvi ña.

27 Tsa tsiñi ña caahán nyivi tyin tsaā ra Jesús, natuhvā ña ityi tsata ra tan tñin ña jahma ra.

28 Tyin tsi cá iñi maa ña: “Tatun tñin yu vasu tan jahma ra, cua nduvaha yu”.

29 Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvahā ra tsi ña.

30 Tsa tuví iñi ra Jesús tyin nduvahā iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsi cá tuhun ra tan catyí ra:

—¿Yóo tñin jahma yu?

31 Tacan tan catyí ra tsi cá tsihin ra:

—¿Nacuenda tsi cá tuhun ca un: yóo tñin jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

32 Maa tyin ra Jesús nanyehē ra naniñi ñi tyin cuñí ra coto ra yóo tñin jahma ra.

33 Tacan tan ñaha can tsahān ña tsi cuñiñi tsiti ña nuu ra Jesús tyin tsitó vaha ña tyin tsa nduvahā ña. Yuuhví ña tan niñi ña tsahān ña tsi catyí tuhun ña tandihi tsa nditsa tsihin ra.

34 Tan catyí ra Jesús tsihin ña:

—Nduvahā un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

35 Ndi caahán ca ra Jesús tan tsaā nyivi queē yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihí ñaha luhlu sehe un. Ña çahan yuhu ca un tan ña jatyañu ca un tsi ra Maestro ihya —catyí ñi tsihin ra.

³⁶ Maa tyin ra Jesús ña tyaq yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsaha ra cuhun cuaha nyivi tsihin ra. Tan quihñ ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra.

³⁸ Tsa tsaq ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaq ñi.

³⁹ Quihví ra tsitsi vehe tan tsicá tuhun ra tsi ñi:

—¿Nacuví tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihí ña —catyí ra tsihin ñi.

⁴⁰ Maa tyin ña tsinu iñi ñi tan tsacu naaha ñi nyehé ñi tsi ra. Tacan tan tava ra tsi tandihí ñi nuquehe, tan quihñ ra tsi jutu ñaha luhlu tsa tsihí can tan sihi ña tan ra tsa tsaq tsihin ra, tan quihví tandihí ñi nu canyí ña.

⁴¹ Tan tññ ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, induvita!

⁴² Juvin ñi cuhva can tan nduvita ña, tan nacacá ña. Utsi uvi cuiya ña. Tan tsa nyehe nyivi tsa iyo tsa javaha ra Jesús, iyo xaan cuñí ñi cuví.

⁴³ Maa tyin ra Jesús ñihi tsaha cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

6

Nu tsinuhu ra Jesús ñuu Nazaret nu tsahnú ra (Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihí ra naha tsihin ra.

² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsaha jacuhá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhva ra ihya tandihí tsa tsitó ra? ¿Yóo tsaha tsa tsiñi tuñi iñi ra? ¿Tan nácaa cutuhva ra javahá ra tsa iyo?

³ Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñí ñi tyaq yahvi ñi tsi ra.

⁴ Maa tyin catyí ra tsihin ñi:

—Tandihí ñi ityi tan jahá tandihí nyivi tsa ñayivi tsi ra cuví ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaq yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhví, tan janduvaha ra tsi ñi, maa tyin ña cuví javahá ra inga ca tsa iyo.

⁶ Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuhá ra tsi nyivi iyó tandihí ñi ñuu nyihi tsa cayucú yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo (Mt. 10.5-15; Lc. 9.1-6)

⁷ Tsa yaha yacan tan caná ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhun ra uvi uvi ra naha. Tan tsaha ra ndatu tsi ra naha tsa tava ra naha tatyí ña vaha tsi nyivi.

⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi.

⁹ Tan cunyaa nditsan tsaha ra naha. Tan ña cundaha ra naha inga nditsi jahma, na cuhan ra naha tsihin cuhva nditsi ñi maa ra naha.

¹⁰ Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndo ndo ican nda cuanda quita ndo ñuu can.

¹¹ Tan tatun tsaa ndo iin ñuu tan ña naquihin cuenda nyivi iyó ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo.

¹³ Tan cuaha ñi nyivi tava ra naha tatyí ña vaha. Tan tyihí ra naha acetye tsi nyivi cuuhví tan nduvaha ñi.

*Nu tsahá cuenda tsi nácaa tsihí ra Juan, ra jacoondutyá tsi nyivi
(Mt. 14.1-12; Lc. 9.7-9)*

¹⁴ Ra rey Herodes tsitó ra tsa javahá ra Jesús tyin tandihí nyivi tan caahán ñi tsa javahá ra, tan tsicá iñi ra tyehen:

—Ra ihya cuví ra Juan, ra jacoondutyá tsi nyivi, ra tsa tsihí. Vityin nandoto ra. Juvín ra cuví can, yacan cuenda iyó tunyee iñi tsi ra —cuñi ra Herodes, tsicá iñi ra.

¹⁵ Yihí nyivi catyí ñi:

—Ra Elías, ra cuví ndusu yuhu Nyoo tahán tsanaha, cuví ra.

Tan catyí tucu inga ñi:

—Nduusu yuhu Nyoo cuví ra, tumaa ra tsicoo tahán tsanaha naha ra —catyí ñi.

¹⁶ Tsa tsiñi ra Herodes tandihí tsa caahán nyivi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

¹⁷ Tacan catyí ra tyin juvín ñi maa ra tava tyiñu na tyihí ra naha tsi ra Juan vehe caa tan cuhñi ra naha tsi ra tsihin carena. Tacan javahá ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihín ra tsi ña Herodías tyin cuví ña ñasihi ra

¹⁸ Tan tsa tacan javahá ra, catyí ra Juan tsihin ra tyin ña vaha tsa quihín ra tsi ña Herodías tyin ñasihi yañi ra cuví ña.

¹⁹ Yacan cuenda ndasi cuñi ña Herodías nyehé ña tsi ra Juan. Cuñi ña cahñi ña tsi ra, maa tyin ña cuví,

²⁰ tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi iñi ra Herodes tandihí tsa caahán ra Juan, maa tyin vaha cuñi ra tyaa soho ra tsa caahán ra.

²¹ Maa tyin tsa tahán tsi quivi cacu ra Herodes javahá ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñi ña tsi ra Herodes.

²² Tyin ñaha sehe ña tsahan ña tsicuañi ña yaa nu iyó vico ra Herodes. Tan tahañ xaan iñi ra Herodes tan ra nyecú cuxiñi tsihin ra cuhva tsañi ña. Tacan tan catyi ra Herodes tsihin ña:

—Ndacan tsi yu náa cuñi maa un. Náa tahan ñi maa tsi cua ndacan un tsi yu cua cuhva maa yu can tsi un.

²³ Tsiótó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyi ra tsihin ña.

²⁴ Tacan tan quitá ña, cuahán ña cuandacá tuhun ña tsi sihi ña tan catyi ña: —¿Náa ndacan yu tsi ra?

Tan catyi sihi ña:

—Ndacan jiñi ra Juan, ra jacoondutyá tsi nyivi tsi ra —catyi ña.

²⁵ Tacan tan numi ñi quihvi nyico ñaha tyuvaa can nu nyii ra rey Herodes, tan catyi ña tsihin ra:

—Cuñi yu jiñi ra Juan, ra jacoondutyá tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyi ña tsihin ra.

²⁶ Tacan tan cuihya xaan cuñi ra rey can cuvi. Maa tyin tsa cuenda tsa cahan ra tyin cua cuhva maa ra tsa cua ndacan ña, ña cuñi ra jandaví ñaha ra tsi ña tyin tandihi maa nyivi yucú vico can tan tsiñi ñi tsa cahan ra, yacan cuenda tsaḥa ra tsa tsican ña.

²⁷ Numi ñi tavá tyiñu ra rey can tsi iin andaru na cuquihin ra jiñi ra Juan.

²⁸ Tsaḥan andaru can tsitsi vehe caa, tan tsahnya ra jucun ra Juan. Tan tsindacá ra jiñi ra Juan tsi ñaha tyuvaa can, nyii tsi nu iin coho. Tan nacuhvá cuenda ña can tsi sihi ña.

²⁹ Tsa tsiótó ra nyicún tsi ra Juan tsa cuvi, tsaḥan ra naha tsiquihin ra naha cuñu ñuhu ra, tan tsicutsi ra naha can.

*Nu jacatsi ra Jesús uhun mil rayii
(Mt. 14.13-21; Lc. 9.10-17; Jn. 6.1-14)*

³⁰ Tsa yahá yacan tan ndu iin ra tsicá tyiñu ra Jesús tsihin ra, tan catyi tuhun ra naha tsihin ra tandihi tsa javahá ra naha, tan tsa jacuahá ra naha nu tsaḥan ra naha tsicahan ra naha tuhun Nyoo tsihin nyivi.

³¹ Tan catyi ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyi ra tsihin ra naha tyin cuaha xaan nyivi cuahán tan vatsi, tan ndi ña cuyatyi ra naha catsi ra naha jahá ñi.

³² Tacan tan quihvi ra Jesús tsihin ra naha tsitsi iin yutun ndoo tan cuahán ra naha iin nu taxin caa.

³³ Maa tyin cuaha xaan nyivi nyehé ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaha ñi, quitá ñi tandihi ñi ñuu tan jihna ca ñi tsaá nu cua tsaá ra Jesús.

³⁴ Cuhva tsa tsaá ra naha, quitá ra Jesús tsitsi yutun ndoo tan nyehé ra tyin cuaha xaan nyivi yucú ican. Tan cundaahvi iñi ra nyehé ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahá jacuahá ra cuaha xaan tuhun vaha tsi ñi.

³⁵ Tsa tsa cua cuiso ñicanyii, tan natuhvá ra tsicá tsihin ra Jesús xiin ra tan catyi ra naha tsihin ra:

—Tsa cueñi xaan, tan nduve nyivi iyó yatyin ñi ihya.

³⁶ Vaha ca jacunuhu un tsi nyivi tyin ihya nduve tsa catsi ñi. Tan na cujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyi ra naha tsihin ra.

³⁷ Maa tyin nacahan ra Jesús, tan catyi ra:

—Cuhva nyoooho tsa catsi ñi.

Tacan tan nacahan ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

³⁸ Tan catyí ra Jesús tsihin ra naha:

—Nyehe jihna ndo najava paan ndahá ndo —catyí ra.

Cuhva tsa tsito ra naha najava paan ndahá ra naha, tacan tan tsicahan ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyivi na cunyecu ñi nu cuhu can.

⁴⁰ Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi.

⁴¹ Tacan tan quihñ ra Jesús tsa uhun paan can tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo, tsa yaha tan tsahnú cuatyí ra paan can, tan tsaha ra can tsi ra tsicá tsihin ra tyin tsatsa ra naha can tsi nyivi. Tsa ndihi tsatsa ra naha paan can, tan tsatsa ndihi ra naha tyaca.

⁴² Tsatsi tandihi ñi tan ndaha iñi ñi.

⁴³ Tan jacutu ra naha utsi uvi tyica tsihin paan tan tyaca tsa ndoo.

⁴⁴ Tan uhun mil rayi tsatsi paan can.

Nu tsicá ra Jesús nu ndutya

(Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi.

⁴⁶ Tsa yaha cuanuhu nyivi, tacan tan cuahán ra Jesús cuandacán tahvi ra tsi Nyoo iin jiñi yucu.

⁴⁷ Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can.

⁴⁸ Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tui, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha.

⁴⁹ Maa tyin tsa nyehe ra naha tsicá ra nu ndutya, tsicá iñi ra naha tyin tatyí cuví ra, tacan tan quitsaha caná tsa ra naha

⁵⁰ tyin tandihi ra naha nyehe ra naha tsi ra tan nayuhvi ra naha. Maa tyin nacahan ra tan catyí ra tsihin ra naha:

—iÑa nayuhvi ndo tyin maa yu cuví!

⁵¹ Tacan tan quihvi ra tsitsi yutun ndoo nu yucú ra naha, tan tsa yaha quihvi ra, iin yaha ñi cutaxin tatyí can. Tan iyo xaan cuñi ra naha cuví

⁵² tyin ñaha ca cutuñi iñi ra naha tsa iyo tsa javaha ra tsihin paan, tyin ndi ndava añima ra naha.

Nu janduvaha ra Jesús nyivi cuuhvi tsa iyó nduhva tsa nañi Genesaret

(Mt. 14.34-36)

⁵³ Yaha sava ra naha nu miñi can tan tsaá ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya.

⁵⁴ Cuhva tsa quitá ñi ra naha tsitsi yutun ndoo can, tan nacoto nyivi tsi ra Jesús.

⁵⁵ Tacan tan tsinú xaan ñi cuahán ñi cuajacotó ñi tsi nyivi iyó nani# cahnu ityi can tyin tsaá ra Jesús. Tan tsaá cuaha nyivi quee tandihi ñi ñuu nu nyii ra, tan yucú nyivi cuuhvi nu tsitó tsaá tsihin ñi.

⁵⁶ Tan tandihi ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhvi yuhu ityi. Tan caahán ndaahvi ñi tsihin ra na cuhva ra tñin ñi cuuhvi can vasu tan yuhu jahma ra tan nduvaha ñi. Tan tandihi maa nyivi tsa tñin jahma ra nduvaha ñi.

7

Tsa jativi tsi nyivi nu Nyoo (Mt. 15.1-20)

¹ Tacan tan tsaá juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús.

² Ra ihya naha ra nyehe ra naha tyin juhva ra tsicá tsihin ra Jesús ña nacatyá ra naha ndaha ra naha tan tsatsi ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra.

³ Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihi ca nyivi Israel ña cuví catsi ñi tun ña nacatyá ñi ndaha ñi cuaha tsaha tumaa iyó maa ñi.

⁴ Tan tatun ña nacatyá ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandihi ndaha tyiñu tsa tsinú tsihin caa tsa iyó tsi ñi tan nda cuanda cama ñi.

⁵ Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoq tsii tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsi ra naha —catyí ra naha tsihin ra.

⁶ Tan nacahan ra Jesús, tan catyí ra:

—Nditsa tsa cahan ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi ñi ñi ñi.

⁷ Yacan cuenda nduve yahvi nyaá jacahnú ñi tsi yu, tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahá Nyoo, catyí ra Jesús tsihin ra naha.

⁸ Tyin nyooho nacoq ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatyá ndaha tyiñu ndo, tan inga ca tsa tuhvá ndo javahá.

⁹ Nyooho tyaá tsiyo ndo tuhun caahán Nyoo, tacan tan javahá ndo tuhun tsaahnu tsa nacoq tsii tsaahnu ndo.

¹⁰ Tyin catyí ley Nyoo tsa tyaá ra Moisés: “Tyaá yahvi ndo tsi jutu ndo tan tsi sihi ndo, tyin tandihi nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaá ra Moisés.

¹¹ Maa tyin nyooho catyí ndo tyin cuví catyí iin nyivi tsihin jutu ñi o sihi ñi tyehen: “Ña cuví jatyinyee yu tsi un tyin tandihi tsa iyó tsi yu cuví tsi Corbán.” (Tuhun ihya cuñi tsi catyí: “Tsa ndihi can tsaahá cuenda yu tsi Nyoo.”)

¹² Tan tatun catyí nyivi tacan, ña cuñi ca tsi jatyinyee ñi tsi jutu ñi o tsi sihi ñi, catyí ndo.

¹³ Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴ Tacan tan cana nyico ra Jesús tsi nyívi tan catyí ra tsihin ñi:

—Tyaá soho vaha tandíhi ndo tsa cua cahan yu, tan ndücu ndo cuhva cutuñi ñni ndo,

¹⁵ Tsa quihví yuhu nyívi, ña cuví jatívi tsi tsi ñi. Tsa jatívi tsi ñi cuví tsa quitá añima ñi.

¹⁶ Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

¹⁷ Tsa yaha nacoq ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra.

¹⁸ Tan catyí ra tsihin ra naha:

—¿A ndi nyooho tan ña cutuñi ñni ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo?

¹⁹ Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janaha ra tyin tandíhi nyayu tan vaha catsi yo itsi.

²⁰ Tan catyí tucu ra:

—Tsa quitá añima nyívi, yacan jatívi tsi ñi.

²¹ Tyin tsa caquiñi tsa tsicá ñni ñi tsitsi añima ñi quitá can, tacan tan rayii cuñí ra coo inga ñaha tsi ra, o ñiñaha cuñí ñi coo inga rayii tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayii tsicoó ra tsihin ra ndusíhi. Tan yihí ñiñaha tsicoó ñi tsihin ñi nduyii. Tan yihí ñi cuñí ñi cahñi ñi nyívi,

²² o cuñí ñi suhu ñi. Yihí ñi cuñí ñi coo tsa tsii inga nyívi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo ñni ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi.

²³ Tandíhi tsa ña vaha ihya, quitá can tsitsi añima nyívi, tan jatívi can tsi ñi —catyí ra Jesús tsihin ra naha.

Nu tsinu ñni iin ñaha inga ñuu tsi ra Jesús

(Mt. 15.21-28)

²⁴ Tsa yaha yacan tan quitá ra Jesús ñuu can, tan cuahán ra ñuhu nu canyíi ñuu Tiro tan ñuu Sidón. Tsa tsaq ra ican, quihví xeehe ra tsitsi iin vehe tyin ña cuñí ra coto nyívi numaa nyii ra. Maa tyin ña cuví cunyii xeehe ra

²⁵ tyin yatyi xaan tsitó sihi iin ñaha tyuvaa tsa yihí tatyí ña vaha nu nyii ra. Tacan tan cuahán ña nu nyii ra. Tsa tsaq ña tan tsicuiñi tsiti ña nuu ra.

²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaq ña nu nyii ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña.

²⁷ Maa tyin catyí ra Jesús tsihin ña:

—Ña cahan yuhu ca un; na catsi jihna nyívi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yaha quita tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaá ña yuvehe ña, canyíí taxin sehe ña nu cama, tyin tsa yaha quita tatyí ña vaha tsi ña.

Nu janduvaha ra Jesús tsi ra soho tan ñihi

³¹ Quita nyico ra Jesús ñuhu nu canyíí ñuu Tiro, tan yaha ra ñuu Sidón, tan cuahán ra inga ca ñuu tsa cayucú Decápolis. Yaha ra ican tan tsaá ra miñi Galilea.

³² Tsa tsaá ra Jesús ican, tsahan nyivi tsindaca ñi iin ra soho tsa ña cuví cahan nu nyíí ra. Cahán ndaahvi ñi tsihin ra na tyiso ra ndaha ra jiñi ra can.

³³ Tacan tan quihín ra tsi ra can cuahán tsiyo tsihin ra nu nduve nyivi. Tan tyaxín ra nundaha ra tsitsi soho ra can, tan tiví sñi ra, tan tiñ ra nu yaa ra can.

³⁴ Tacan tan nanyehé ndaa ra ityi andivi. Tan ixtá tatyí ra, tan catyí ra:

—¡Efata! —tan tuhun ihya cuñí tsi catyí: ¡Nuña!

³⁵ Tan tsihin can nuña soho ra can, tan nduvaha yaa ra, tan cuví nacahan ra.

³⁶ Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javaha ra.

³⁷ Iyo cuñí ñi tan catyí ñi:

—Tandihí tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñihi nacahan ñi.

8

Nu tsaḥa ra Jesús tsa catsi cumi mil nyivi

(Mt. 15.32-39)

¹ Quivi can nataca cuaha nyico nyivi nu nyíí ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñi yu nyehé yu nyivi ihya, tyin tsa uñi quivi yucú ñi tsihin yo, tan nduve ca tsa catsi ñi.

³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cahun ñi, tyin yihi ñi cañi xaan quee ñi —catyí ra Jesús tsihin ra naha.

⁴ Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

⁵ Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶ Tacan tan catyí ra tsihin nyivi na cunyecu ñi nu ñuhu. Tsa yaha cahan ra yacan, tacan tan quihín ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnū cuatyí ra can tan tsaḥa ra can tsi ra tsicá tsihin ra, tyin tsatsa ra naha can tsi nyivi.

⁷ Tan ndahá tucu ra naha juhva tyaca nyihi. Tsaḥa ndihí ra Jesús tyahvi nyoo tsi Nyoo tsa cuenda can, tacan tan tsaḥa ra can tsi ra naha tyin tsatsa ra naha tsi nyivi.

⁸ Tandihí ñi tsatsi ñi, tan ndahá vaha iñi ñi. Tsa ndihí tsatsi ñi tan jacutú ra naha utsa tyica tsihin tsa ndoo.

⁹ Tan quitā maa cumi mil nyivī jacatsī ra. Yahā can tan jacunuhū ra tsi ñi.

¹⁰ Tsa yahā cuanuhu ñi, tacan tan quihvī ra tshin ra tsicá tshin ra tsitsi iin yutun ndoo. Tan cuahán ra naha ityí Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo
(Mt. 16.1-4; Lc. 12.54-56)

¹¹ Tsaā ra fariseo naha ra nu nyíi ra Jesús, tan quitsahā caahán yuhu tahan ra naha tshin ra. Nducú cuhva ra naha tsi ra tun nditsa tyin Nyoo jaquitsī tsi ra, yacan cuenda catyí ra naha tshin ra tyin javaha ra iin tsa iyo nyehe ra naha.

¹² Tacan tan ra Jesús ñihi xaan ixtā tatyí ra, tan catyí ra:

—¿Nacuenda tyin tsicán nyivī iyó vityin tsa iyo? Tsa nditsa catyí yu tshin ndo tyin ña cua nyehe ndo ndi intuhun tsa iyo —catyí ra tshin ra naha.

¹³ Tacan tan nacoō ra tsi ra naha, tan quihvī nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuvī can tumaa yutsan iya
(Mt. 16.5-12)

¹⁴ Ra tsicá tshin ra Jesús naā iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can.

¹⁵ Tacan tan catyí ra Jesús tshin ra naha:

—Jaha ndo cuenda tsi ndo tshin yutsan iya ra fariseo naha ra tan ra Herodes —catyí ra tshin ra naha.

¹⁶ Tan ra tsicá tshin ra quitsahā natuhún tahan ra naha tan catyí ra naha:

—Caahán ra tyehen tshin yo tyin nduve paan ndahá yo catsi yo —catyí ra naha.

¹⁷ Tsa tuvī iñi ra Jesús tsa tsicá iñi ra naha, tan catyí ra tshin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo?

¹⁸ Nyecú tinuu ndo, tan ña nyehé ndo. Nyecú soho ndo, tan ña tsiñí ndo. ¿A ña nducuhún iñi ndo tsa javahā yu

¹⁹ quivī tsa jacatsī yu uhun mil rayñi tshin uhun taahan ñi paan? ¿A ña ñuhú iñi ndo najava tyica jacutū ndo tshin tsa ndoo? —catyí ra Jesús, tsicā tuhun ra tsi ra tsicá tshin ra.

Nacahān ra naha tan catyí ra naha:

—Utsi uvi tyica.

²⁰ Tan catyí nyico ra Jesús tshin ra naha:

—Tan quivī jacatsī yu cumi mil nyivī tshin utsa taahan ñi paan, ¿najava tyica jacutū ndo tshin tsa ndoo?

Nacahān ra naha tan catyí ra naha:

—Utsa taahan tyica.

²¹ Tacan tan catyí ra Jesús tshin ra naha:

—¿A ñaha ca cutuñi iñi ndo? —catyí ra tshin ra naha.

Nu janduvahā ra Jesús iin ra cuaa nda ñuu Betsaida

²² Tsa yahā yacan tan cuahán ra Jesús tshin ra tsicá tshin ra nda ñuu Betsaida. Tsa tsaā ra naha ican, tsindacā nyivī ñuu can iin ra cuaa nu yucú ra naha. Tan cahān ndaahvi ñi tshin ra Jesús tyin tñn ra tsi ra cuaa can tan janduvaha ra tsi ra.

23 Tacan tan t̄ijn ra ndaha ra cuaa can, tan quih̄jn ra tsi ra cuahán tsihin ra ityi tsata ñuu. Tyaá s̄ii ra nu ndaha ra tan t̄ijn ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu.

24 Ra cuaa can nanyehé ra tan catyí ra:

—Nyehé yu juhva nyivi, tan caá ñi tumaa caá yutun, maa tyin tsicá ñi —catyí ra.

25 Tacan tan t̄ijn nyico ra Jesús tinuu ra inga tsaha, tan nanyehé vaha ra tan nduvahá ra. Nanyehé catsi vaha ra tandih̄i tsa iyó.

26 Tacan tan jacunuhú ra Jesús tsi ra yuvehe ra, tan catyí ra tsihin ra:

—Ña quih̄vi un tsitsi ñuu ihya tan ña nacatyí tuhun tsehe tsihin nyivi —catyí ra Jesús tsihin ra.

*Nu cah̄an ra Pedro tyin ra Jesús cuví Cristo, ra jacacú tsi yo
(Mt. 16.13-20; Lc. 9.18-21)*

27 Yahá can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahá ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyivi tuhun yu? ¿Yóo ra cuví yu catyí ñi? —catyí ra tsihin ra naha.

28 Nacah̄an ra naha tan catyí ra naha:

—Yihí nyivi catyí ñi tyin ra Juan, ra jacoondutyá tsi nyivi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

29 Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñí ndo?

Tan nacah̄an ra Pedro tsihin ra:

—Yooho cuví ra Cristo, ra jacacú tsi nyivi.

30 Maa tyin cah̄an ra Jesús tsihin tandih̄i ra naha tyin ña cah̄an ra naha can tsihin ndi intuhun maa nyivi.

*Nu cah̄an ra Jesús tyin cua cúu ra
(Mt. 16.21-28; Lc. 9.22-27)*

31 Tacan tan quitsahá jacuahá ra tyin Rayii tsa queé nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cah̄ni nyivi tsi ra maa tyin cua nandoto ra tsa tsinu uñi quivi.

32 Tacan cah̄an catsi ra tsihin ra naha. Tacan tan quih̄jn ra Pedro tsi ra cuahán tsihin ra tsata vehe tan quitsahá caahán ra tsihin ra Jesús tyin ña vaha tsa cah̄an ra.

33 Maa tyin ra Jesús nanyico coo ra, tan nanyehé ra nu nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

34 Tacan tan caná ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñi cunyicun tsi yu, cah̄nya iñi ndo nacoo ndo tsa cuñi maa ndo javaha ndo, tyin tacan tan cuví javaha ndo cuhva cuñi Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandih̄i quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu.

³⁵ Tyin nyooho tsa ña cuñi nyehe tundoho tan cuhva ndo ñayivi ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo.

³⁶ Tyin nduve yahvi nyaá cua ñihi ndo tandihi tsa iyó nu ñuhu ñayivi ihya tun ña cua cacu aña ndo.

³⁷ Tyin nduve maa náa tsihin tyahvi ndo tan cuvi cacu aña ndo tan ña cunaa tsi.

³⁸ Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayi tsa quee nda gloria cua nducahan nuu yu nyehe yu tsi ñi quivi quitsi yu tsihin ángel cuenda Nyoo Jutu yu tan tsihin tsa sá caá ra.

9

¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee ñi ra tsa ndi cumañi ca cúu ndo.

*Nu nyehe uñi ra tsicá tsihin ra Jesús nu nasama cuhva caá ra
(Mt. 17.1-13; Lc. 9.28-36)*

² Tsa yaha ñu quivi, tacan tan quiñin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehe ra yucú tsihin ra can.

³ Xiñu xaan tan cuitsin xaan jahma ra cuví tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuví janducuitsin ñi jahma tumaa cuitsin jahma ra.

⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra.

⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro.

⁶ Cahán ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

⁷ Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahan iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

⁸ Tan cuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra naha. Cuví cahan maa ra naha can nda yaha nandoto Rayi quee nda gloria, tan rayi can cuví maa ra.

¹⁰ Yacan cuenda ña cahán maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra.

¹¹ Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

¹² Tan nacahan ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihi. ¿Tan náa catyí tuhun Nyoo cuenda yuhu Rayi quee

nda gloria? Catyí tsi tyin cua nyehe yu tundohe, tan ña cua cuñi nyivi nyehe ñi tsi yu.

¹³ Maa tyin yuhu catyí yu tsihin ndo tyin tsa yahá quítsi ra Elías. Tan nyivi javahá ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvahá ra Jesús iin ra tyuvaa tsa yihí tatyí ña vaha
(Mt. 17.14-21; Lc. 9.37-43)

¹⁴ Tsa yahá yacan tan cuahán ra naha nu yucú tandihí ca ra tsicá tsihin ra naha. Tsa tsaá ra naha ican, nyehe ra naha tyin yucú cuaha nyivi naní canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús.

¹⁵ Tsa nyehe nyivi can tsi ra Jesús, iyo xaan cuñi tandihí ñi cuví. Tacan tan tsahán ñi nu nyaá ra tsicuhvá ñi nacumi tsi ra.

¹⁶ Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahán iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu.

¹⁸ Tyin tandihí ñi nu tñn tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahá cahán yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹ Nacahán ra Jesús tan catyí ra:

—¡Nyoohe nyivi ña tsinú iñi tan caquiñi! ¿Ndáa nda quivi cua cunyi yu tsihin ndo? ¿Tan najava ca quivi cua cunyeet iñi yu nyehe yu tsi ndo tyin ña tsinú vaha iñi ndo tsi yu? Ndáca ndo tsi ra luhlu can tsi yu ihya —catyí ra.

²⁰ Tacan tan tsindacá jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quítsahá tsicó tui ra nu ñuhu jahá nu. Tan quitá tiñuu yuhu ra.

²¹ Tacan tan tsicá tuhun ra Jesús tsi jutu ra luhlu can tan catyí ra:

—¿Ama quítsahá taahán ra tyehen?

Tan nacahán jutu ra luhlu can, tan catyí ra:

—Nda ndi luhlu xaan ra.

²² Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuví javaha un nãa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihí tan cua cuvi tyin tsa cuenda ra tsa tsinú iñi tandihí tan cuví —catyí ra Jesús.

²⁴ Tacan tan caná tsaá jutu ra tan catyí ra tsihin ra Jesús:

—¿Tsinú iñi yu! ¡Jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iin nu nyaá ra, tacan tan tavá ra tatyí ña vaha can, tan catyí ra tsihin nu:

—Yoohe tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quiñi xaan cana tsa nu tatyí can tan janduvā nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñi maa nyivi tyin tsa tsihi ra.

²⁷ Maa tyin ra Jesús tñin ra ndaha ra luhlu can, tan cañihí ra tsi ra, tan tsinyaa nyityi ra.

²⁸ Tacan tan quihvi ra Jesús tsitsi iin vehe, tan tsicā tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cañi nyivi tsi ra
(Mt. 17.22-23; Lc. 9.43-45)

³⁰ Quivi tsa quita ra Jesús ican, tan ra tsicá tsihin ra yaha ra naha ñuhú Galilea. Tan ña cuñi ra Jesús tsa coto nyivi iyó ican tyin nyii ra nu iyó ñi.

³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayi tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cañi ra naha tsi yu. Maa tyin cua nandoto yu tsa tsinu uñi quivi.

³² Maa tyin ra ican naha ra ña cutuñi iñi ra naha tsa caahán ra tsihin ra naha. Tan ña cuñi ra naha ndaca tuhun ra naha tsi ra tyin yuuhvi ra naha.

Nu janahá ra Jesús yoo ra cahnu ca cuví tsitsi tsa tandihí nyivi tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicā tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicā tuhun ra.

³⁴ Tsa cahan ra Jesús tacan, taxin ña cuví ra naha, tyin ityi vatsí ra naha natuhun ra naha yoo ra cahnu ca cuví tsa nuu tandihí ra naha.

³⁵ Tacan tan tsinyaa ra Jesús tan cana ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñi cuví ityi nuu, cuñi tsi cuví ndo nda nu ndihí ña tsa nuu tandihí ndo, tan jatyinyee ndo tsi tandihí nyivi —catyí ra Jesús tsihin ra naha.

³⁶ Tacan tan quihin ra iin ra luhlu tyaa ra mahñu ra naha. Tan tyihí jucun ndaha ra tsi ra luhlu can, tan catyí ra:

³⁷ —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñi ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsí tsi yu tan ñavin maa ñi maa yu naquihin cuenda ñi.

Nyivi tsa ña cuxaán tsi yo, juvin ñi ican jatyinyeé tsi yo
(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús:

—Maestro, nyehé ndi iin ra tava tatyí ña vaha tsi nyivi tsihin sivi un. Maa tyin tyasí ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

³⁹ Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahan ñi ndavaha ñi tsi yu.

⁴⁰ Tyin nyivi tsa ña xaan iñi tsi yo, tsihin yo cutahán ñi.

⁴¹ Tan nyiví tsa cua cuhva vasu tan iin yatsin ndutya coho ndo tyin tsinú ñi ndo tsi yu, cua cuhva Nyoo tsa cua cuhva ra tsi ñi.

Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha

(Mt. 18.6-9; Lc. 17.1-2)

⁴² Nyiví cua natyuhu tsi iin nyiví tsa ñaha ca tsinú vaha ñi tsi yu tyin javaha ñi tsa caquiñi, vaha ca cuhñi nyiví yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu.

⁴³ Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihví un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un.

⁴⁴ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁵ Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu.

⁴⁶ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁷ Tun tinuu un javahá tsa ña vaha, çasi nu javahá can tacan. Tatun ña cuví, çava can tan javita un tyin vaha ca quihví un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un.

⁴⁸ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁹ Maa tyin tandihí nyiví nyicún tsi yuhu, ñi tsa nyehé tundocho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi.

⁵⁰ Vaha xaan ñi. Maa tyin tun ndihí tsa uhva tsi, ña jandu uhva ca tsi tan ña cuví ca cuatyíñu nyiví itsi. Yacan cuenda nyoocho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

10

Nu caahán ra Jesús tyin ña vaha nacao rayí ñasihi ra

(Mt. 19.1-12; Lc. 16.18)

¹ Quitá ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyiví nu nyí ra, tacan tan quitsaha jacuahá ra tsi ñi tumaa tuhvá maa ra javahá.

² Tacan tan natuhvá juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacao rayí ñasihi ra.

³ Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴ Tan nacahan ra naha tan catyí ra naha:

—Ra Moisés catyí ra tyin cuví caní ndi tutu cuenda ley ndi, tacan tan cuví nacao ndi ñasihi ndi —catyí ra naha tsihin ra.

⁵ Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo.

⁶ Maa tyin quivi jihna ñi, quivi javaha Nyoo tandihi maa tsa iyó, catyí nu tutu ra tyin javaha ra rayíi tan ñaha.

⁷ “Yacan cuenda taahán tsi nacoo rayíi jutu ra tan sihi ra tan ndu iin ra tsihin ñasihi ra.

⁸ Tan nduvi ñi cua cuvi ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuvi ñi.

⁹ Yacan cuenda, ña cuvi jasiin nyivi tsa jandu iin Nyoo —catyí ra Jesús tsihin ra naha.

¹⁰ Yaha can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can.

¹¹ Tan catyí ra Jesús tsihin ra naha:

—Ra tsa cua nacoo ñasihi tan quihin ra inga ñaha, cua coo cuatyí ra nu Nyoo.

¹² Tacan tucu ñi ñaha: Tun nacoo ña tsi yíi ña tan tindaha ña tsihin inga rayíi, juvin ñi cua coo tucu cuatyí ña —catyí ra Jesús.

Nu nasoco ra Jesús tsi tsa nyihi

(Mt. 19.13-15; Lc. 18.15-17)

¹³ Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandacá tsa nyihi.

¹⁴ Maa tyin tsa nyehe ra Jesús tsa javahá ra naha tacan, cuxaán ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo.

¹⁵ Tan tsa nditsa catyí yu tsihin ndo tun ña cuita iñi nyivi tsi Nyoo tumaa nyitá iñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

¹⁶ Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsaha cuenda ra Jesús tyin yíi xaan nacuhva cuenda iin ra cuca tsi ra tsi Nyoo

(Mt. 19.16-30; Lc. 18.18-30)

¹⁷ Yaha yacan tan cuahán ra Jesús. Tan tsinú xaan iin rayíi cuahán ra cuanyicún ra tsi ra. Tsa taħan ra tsi ra, tsicuiñi tsi ti ra nuu ra, tan tsica tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu.

¹⁹ Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi sihi un” —catyí ra Jesús tsihin ra.

²⁰ Nacahañ ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan si cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihí tsa iyó tsi un, tan cuhva un xuhun can tsi nyívi ndaahvi. Tacan tan coo tsa cuca tsi un nda gloria. Yaha can tan quítsi un quítsi nyícun un tsi yu vasu ndi maa nyehe un tundoho tan cahñi nyívi tsi un —catyí ra Jesús tshin ra.

²² Tsa tsiñi ra tyuvaa can tsa cahan ra Jesús tacan, cuiihya xaan cuñi ra cuví, tan tshin tucuiihya ñni cuanuhu ra yuvehe ra tyin cuca xaan ra.

²³ Tacan tan nanyehé ra Jesús nanñi canduvi nu nyaá ra, tan catyí ra tshin ra tsicá tshin ra:

—jYñi xaan tan cuví nacuhva cuenda nyívi cuca tsi ñi tsi Nyoo na cundaca ñaha ra tsi ñi! —catyí ra tshin ra naha.

²⁴ Tsa tsiñi ra tsicá tshin ra tsa caahan ra, iyo xaan cuñi ra naha cuví. Maa tyin catyí tucu ra tshin ra naha inga tsaha:

—jSehe yu, nyívi tyaá xaan jiñi tandihí tsa cuca, yñi xaan tan quihvi ñi nu ndacá ñaha Nyoo!

²⁵ Yatyí ca cuví yaha iin camellu xuu iin yiquí tucu, tan ñavin ca tsa quihvi iin nyívi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuví, tan quítsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehé ra Jesús tsi ra naha tan catyí ra tshin ra naha:

—Nyívi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yñi.

²⁸ Tacan tan catyí ra Pedro tshin ra:

—Jutu Mañi yu, tandihí maa tsa iyó tsi ndi nacoq ndi can tan nyicún ndi tsi un.

²⁹ Nacahan ra Jesús tan catyí ra:

—Tsa nditsa catyí yu tshin ndo tyin tandihí nyooho tan tandihí inga ca nyívi tsa cua nacoq vehe, o yañi, o cuhva, o jutu, o sihi, o ñasiñi, o sehe, o ñuhu, tsa cuenda yuhu tan tsa cuenda tsa jacoto ñi tsi nyívi tyin cuñi Nyoo jacacu ra tsi ñi,

³⁰ cua ñihí ñi cientu ca tsaha siqui tsa nacoq ñi nu ñuhu ñayivi ihya. Cua ñihí ñi vehe, cua ñihí ñi nyívi cua cuví yañi ñi, cuhva ñi, sihi ñi, sehe ñi, tan cua ñihí tucu ñi ñuhu ñi, vasu ndi maa cua janyehe nyívi tundoho tsi ñi. Tan nu inga ñuhu ñayivi tsa tsa vatsí, cua ñihí ñi ñayivi nyito tsa ña cua naa maa coo ñi.

³¹ Cuaha ñi nyívi cuahán ityi nuu vityin, cua cuhun ñi nda nu ndihí ña. Tan nyívi cuahán nu ndihí ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyívi tsi ra

(Mt. 20.17-19; Lc. 18.31-34)

³² Tsa tsa cuñi cuhun ra Jesús tan ra tsicá tshin ra ñuu Jerusalén, cuahán ra Jesús ityi nuu tandihí nyívi tsa cuahán cuanyicún tsi ra. Iyo xaan cuñi ñi tan tshin tsa yuuhví ñi cuahán ñi. Tacan tan tava sñn ra tsi tsa utsi uvi ra tsicá maa tshin ra. Tan quítsaha catyí tuhun ra tshin ra naha tsa cua tahan ra.

³³ Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyívi tsi yuhu, Rayñi quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra.

³⁴ Cua vacu nducu ra naha tsi yu, cua cañi ra naha tsi yu, cua tivi sii ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

*Nu tsicán ra Jacobo tan ra Juan iin tumañi iñi tsi ra Jesús
(Mt. 20.20-28)*

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsica tuhun ra Jesús tsi ra naha tan catyí ra:

—¿Náa cuñi ndo javaha yu?

³⁷ Tan nacahan ra naha tan catyí ra naha:

—Cuñi ndi tsa cuhva un cunyecun ndi tsihin un nu ndaca ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu.

⁴⁰ Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tsihin ra naha.

⁴¹ Tsa tsiñi tsa utsi ca ra tsicá tsihin ra Jesús yacan, cuxaan ra naha tsi ra Jacobo tan ra Juan.

⁴² Maa tyin cana ra Jesús tsi ra naha tan catyí ra tsihin ra naha:

—Tsa tsitó ndo tyin ra ndaca ñaha tsi nyivi iyó nu ñuhu ñayivi ihya, ñihi xaan ndaca ñaha ra naha tsi ñi.

⁴³ Maa tyin ñavin tacan taahán tsi javaha nyooho tyin ra tsa cuñi cuví ra cahnu ityi nuu Nyoo, cuñi tsi cuví ra musu tandihi ndo.

⁴⁴ Tan nyooho tsa cuñi cuví ityi nuu, cuñi tsi cuví ndo musu tandihi ca ndo.

⁴⁵ Tyin yuhu, Rayi tsa quee nda gloria, ña vatsí yu tyin cuñi yu jatyinyee nyivi tsi yu. Yuhu vatsí yu vatsi jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

*Nu jananyehe ra Jesús tsi ra Bartimeo
(Mt. 20.29-34; Lc. 18.35-43)*

⁴⁶ Tacan tan tsaq ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yahq ra naha nyaá iin ra cuaa nañi Bartimeo, sehe ra Timeo, tsicán ra caridaa.

⁴⁷ Tan cuhva tsa tsito ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsaha cana tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra cana tsa ra.

⁴⁸ Tacan tan quitsaha cuxaan nyivi tsi ra tan catyí ñi tsihin ra na cutaxin ra, maa tyin cuñihí ca ra cana tsa ra tan catyí ra:

—¡Tata ra David, cundaahvi iñi tsi yu! —catyí ra.

⁴⁹ Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, çohon tyin caná ra tsi un —catyí ra naha tsihin ra.

⁵⁰ Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús.

⁵¹ Tacan tan tsicá tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehe nyico yu —catyí ra.

⁵² Tan catyí ra Jesús tsihin ra:

—Cuanuhu. Tsa nduvaha un tyin tsinú iñi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsaá ra Jesús tan nyivi nyicún tsi ra nda ñuu Jerusalén, yatyin nu canyí ñuu Betfagé tan ñuu Betania, tan yatin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

² —Cuaahan ndo ñuu tsa canyí ityi nuu ihya. Tsa tsaá ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

³ Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyí ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyí ndo tsihin ñi —catyí ra Jesús tsihin ra naha.

⁴ Tacan tan cuahán ra naha, tan tsa tsaá ra naha, nañihí ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti.

⁵ Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsí ndo urru can? —catyí ra naha tsihin ra naha.

⁶ Tacan tan nacahan ra naha tumaa cahan ra Jesús tsihin ra naha. Tan tsaá ra can naha ra quihin ra naha urru can.

⁷ Tacan tan tsindacá ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti.

⁸ Tan tsaquin cuaha nyivi jahma ñi tsitsi ityi nu yaha ra, tan inga ñi tsahnya ñi ndaha yutun tan tsaquin ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsaha caná tsaá ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo!

¹⁰ ¡Na jacahnu yo tsi ra vatsí cundaca ñaha tumaa tsindacá ñaha ra David, tsii tsaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehe ra tandihí tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahan ra Jesús tsi yutun higo tsa ña tsaá tsiti

(Mt. 21.18-19)

¹² Tsa tuvi inga quivi tsa quitã ra Jesús tan ra tsicã tshin ra ñuu Betania, tsaã soco tsi ra Jesús.

¹³ Tsa quitã ra naha ndasava nyehe ra Jesús nu nyaá iin yutun higo tsa iyó numa. Tshãhã ra tsinyehe ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti.

¹⁴ Tacan tan cahan ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tshin tun.

Tan tsiñi ra tsicã tshin ra tsa caahãn ra.

Nu jacunu ra Jesús nyivi xicó nuquehe vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Tsa tsaã ra naha ñuu Jerusalén, cuahãn nyico ra Jesús vehe ñuhu cahnu tan quitsahã jacunú ra nyivi xicó tan jatã tsa yucú nuquehe yuvehe ñuhu can. Janduvã ra mesa nu nyecú nyivi samá xuhun nyivi. Tan janduvã tucu ra tyayu nu nyecú nyivi xicó paloma.

¹⁶ Tan ña tshã ca ra yaha sava ñi nuquehe vehe ñuhu can tshin ndaha tyiñu.

¹⁷ Tan quitsahã jacuahã ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nanã nu ñuhu ñayivi tsi Nyoo”? Tan nyooho jananduví ndo itsi vehe ñasuhu —catyí ra tshin ñi.

¹⁸ Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahãn ra, tan quitsahã nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahã ra tsi nyivi tan yuuhví tucu ra naha tyin tsa cuaha xaan nyivi nyicún tsi ra.

¹⁹ Maa tyin tsa tsa cuñi cuaa, quitã ra Jesús ñuu can tshin ra tsicã tshin ra.

Nu na ityi yutun higo

(Mt. 21.20-22)

²⁰ Tsa tuvi inga quivi, yahã nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi.

²¹ Tacan tan tsa nyehe ra Pedro yutun higo can, nducuhun iñi ra tsa javahã ra Jesús tan catyí ra tshin ra Jesús:

—¡Maestro, jhna! Tsa na ityi yutun tsa cahan un —catyí ra.

²² Nacahan ra Jesús, tan catyí ra:

—Tsinu iñi ndo tsi Nyoo.

²³ Tyin tsa nditsa catyí yu tshin ndo tyin nyivi cua cahan tshin yucu ihya tyehen: “Cuatsiyo ihya tan cãaahan tsitsi ndutya ñuhu”, tan tatun tsinú iñi ñi tyin cua cundaa tsa cahan ñi tan ña uvi tsicã iñi ñi, cua cundaa tsi.

²⁴ Yacan cuenda catyí yu tshin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can.

²⁵ Tan tsa cua ndacan tahvi ndo tsi Nyoo, tun nducuhun iñi ndo tyin xaan cuñi ndo tshin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo.

²⁶ Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

Nu tsicã tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tshin nyivi

(Mt. 21.23-27; Lc. 20.1-8)

²⁷ Tacan tan tsaꞗ nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhvꞗ ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra.

²⁸ Tan tsicꞗ tuhun ra naha tsi ra tan catyi ra naha:

—¿Yóo tava tyiñu tsi un tsa javahá un tyehen? —catyi ra naha.

²⁹⁻³⁰ Tan cacahan ra Jesús, tan catyi ra:

—Cuñi tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatun catyi tuhun ndo tsihin yu yóo jaquitsi tsi ra, cua catyi tuhun tucu yuhu tsihin nyooho yóo tava tyiñu tsi yu javahá yu tyehen —catyi ra Jesús tsihin ra naha.

³¹ Tacan tan quitsahꞗ caahán yuhu tahan ra naha, tan catyi ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo tyehen: “Tun Nyoo jaquitsi tsi ra, ¿nacuenta ña tsinuñi ñi ndo tsa cahán ra?”

³² ¿A vaha tun catyi yo tyin nyivi jaquitsi tsi ra? Ña cuví —catyi ra naha, tyin yuuhvi ra naha tsi nyivi, tyin tandiñi ñi tan tsinú ñi ñi tyin ndusu yuhu Nyoo cuví ra.

³³ Tacan tan catyi ra naha tsihin ra Jesús:

—Ña tsitó ndi.

Tacan tan catyi ra Jesús tsihin ra naha:

—Tun ña tsitó ndo, ndi yuhu tucu, tan ña cua catyi tuhun yu tsihin ndo yóo tava tyiñu tsi yu tsa javahá yu tyehen —catyi ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsahꞗ caahán ra Jesús tsihin ra naha tsihin cuhva ihya, tan catyi ra:

—Tsicoo iin rayi tsa tatsi yoho yucu vixi tsa nañi uva, ra ican tyasi ra iin cora nanii canduvi nu tatsi ra yucu vixi can. Tan javahꞗ ra iin nu cua tava ra ndutya uvas can. Tan javahꞗ tucu ra iin vehe sucun tyin tacan tan cuví jaha cuenda ra nanii cahnu nu ndaha tyiñu ra.

Tsa yahꞗ yacan tan tsahꞗ nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu.

² Tsa tahan tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.

³ Maa tyin ra ican naha ra tiiñ ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndii ra.

⁴ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahán nyaa ra naha tsi ra.

⁵ Tsitoho ñuhu can jacuhun nyico ra inga musu. Tan tsahñi ra naha tsi ra. Yahꞗ yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

⁶ Tan cumañi intuhun ña ra tsa cuví jacuhun ra. Tan ra ican cuví sehe ra tsa cuñi xaan ra. Nu ndiñi tuhun jacuhun ra sehe ra tyin cuñi maa ra tsicá ñiñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñi ra.

⁷ Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha.

⁸ Tacan tan tiin ra naha tsi ra tan tsahñi ra naha tsi ra. Tan tavá ra naha cuñu ñuhu ra ityi tsata cora can —catyí ra Jesús.

⁹ Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can.

¹⁰ ¿A ñaha ca cahví ndo nu tutu Nyoo nu catyí tsi tyehen?

Yuu tsa javita ra javahá vehe naha ra,

yacan cuví yuu tsa tsiñi ñuhu ca.

¹¹ Maa Nyoo Jutu yo jahá tsa cahnu ca cuví yuu ihya. Tan iyo xaan cuñi yo nyehe yo can, catyí tsi —catyí ra Jesús tsihin ra naha.

¹² Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tiin ra naha tsi ra tyin yuuhví ra naha nyehe ra naha tsi nyivi. Nacoó ra naha tsi ra, tan cuahán ra naha.

Nu caahán ra Jesús siqui tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹³ Tacan tan jacuhun ra naha juhva ra yihí cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahán ra Jesús iin tsa ña vaha tyin tacan tan cuví tyaa ra naha cuatyí tsi ra.

¹⁴ Tsa tsaá ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

¹⁵ Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndáca ndo iin xuhun tsi yu ihya, na nyehe yu —catyí ra.

¹⁶ Tsindacá ra naha xuhun can tsi ra. Tsa nyehe ra can tan tsicá tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

¹⁷ Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nacahan ra.

Nu cuñi ra saduceo naha ra jandavi ñaha ra naha tsi ra Jesús
(Mt. 22.23-33; Lc. 20.27-40)

18 Tacan tan cuahán juhva ra saduceo naha ra nu nyíí ra Jesús. Tan ra saduceo can naha ra catyí ra naha tyin ña cua nandoto nyívi. Yacan cuenda cahán ra naha tyeheh tan catyí ra naha tsihin ra Jesús:

19 —Maestro, ra Moisés tyaa ra nácaa taahán tsi javaha yo tatun iin rayíi tsihí tan ndoo ñasihí ra tan nduve sehe ña tsicoo tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihí.

20 Iin tsaha iin rayíi tsicoo utsa sehe yíi ra. Ra tsa jihna ñi tindaha ra tsihin iin ñaha, maa tyin nduve sehe ra tsicoo tsihin ña, tan tsihí ra.

21 Tacan tan tindaha ra yañi ra tsa tsinu uvi tsihin ñaha tsa ndoo can. Maa tyin juvin ñi ña tsicoo sehe ra tsihin ña tan tsihí ra. Juvin ñi tacan tahán tucu ra tsa tsinu uñi.

22 Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoo sehe ra naha tsihin ña. Tan nu ndihí tuhun, tsihí ndihí maa ña.

23 Tan vityin, tun nditsa tsa cua nandoto nyívi, ¿ndáa tsa utsa taahan ra can naha ra cua cuví yíi ña quívi cua nandoto ñi? Tyin tandihí maa ra naha tan tindaha ra naha tsihin ña —catyí ra naha tsihin ra Jesús.

24 Tacan tan nacahán ra Jesús tan catyí ra tsihin ra naha:

—Caahán soho ñi maa nyooho, tyin ña tsító ndo tsa catyí tuhun Nyoo, tan ndi ña tsító ndo nácaa tsa cahnu cuví tunyee iñi tsa iyó tsi Nyoo.

25 Quívi cua nandoto nyívi, ndi ña cua tindaha ñi tan ndi ña cua tindaha sehe ñi, tyin cua cuví ñi tumaa ángel iyó gloria.

26 Tan tuhun tsa cua nandoto nyívi, ¿a ñaha ca cahví ndo nu libro tsa tyaa ra Moisés nu catyí tsi nácaa cahán Nyoo tsihin ra nu cayú yutun iñu? Tyin catyí ra tsihin ra tyeheh: “Yuhu cuví Nyoo ra Abraham, ra Isaac, tan ra Jacob”, catyí Nyoo tsihin ra Moisés.

27 Ihya nyehé yo tyin nyito añima ra can naha ra vasu ndi maa tsanaha tsihí ra naha tyin Nyoo ñavin Nyoo nyívi tsihí cuví ra, tyin Nyoo cuví ra Nyoo nyívi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

Ley tsa ñiñi ca tsa tsaha Nyoo (Mt. 22.34-40)

28 Ña naha ñi tan tsaá iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsító ra tyin ra Jesús vaha nacahán ra tsihin ra naha, tsicá tuhun ra tsi ra tan catyí ra:

—Tsitsi tsa tandihí ley, ¿ndáa tsa ñiñi ca cuñí tsi javaha yo? —catyí ra.

29 Tan nacahán ra Jesús tan catyí ra:

—Ley tsa jihna ñi tan ñiñi ca cuñí tsi javaha yo tsa nuu tandihí ley, cuví ley ihya: “Nyooho nyívi Israel, tyaa soho ndo: intuhun ñi maa Nyoo Jutu yo iyó.

30 Cuñí ndo tsi Jutu Mañi yo Nyoo tsihin tsa ñiñi ndo, tan tsihin tsa ñiñi añima ndo, tan tsihin tandihí tsa tsiñi tuñi jiñi ndo, tan tsihin tandihí tunyee iñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo.

31 Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyeheh: “Cuñi tahan ndo tsi ndo tumaa cuñí ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

32 Tacan tan ra maestro cuenda ley can catyí ra tsihin ra:

—Vaha xaan nacahán un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó.

³³ Tan tsa cuñí yo tsi Nyoo tsihin tsa nñi iñi yo, tan tsihin tandihí tsa tsiñi tuñi jiñi yo, tan tsihin tsa nñi iñi añima yo, tan tsihin tandihí tunyee iñi iyó tsi yo, tan tsa cuñí tahan yo tsi yo tumaa cuñí yo tsi maa yo, tandihí yacan tan cahnu ca cuví can tan ñavin ca tsa jamañi yo tsi Nyoo, tsa tsahñi yo quití tan tsahmí yo can nu altar —catyí ra maestro cuenda ley can tsihin ra Jesús.

³⁴ Tsa nyehé ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña cana ca iñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juven ñi cuví tucu ra tata ra David
(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo?

³⁶ Tan juven ñi maa ra David catyí tuhun ra Cristo tyehen:

Nyoo cahan ra tsihin Jutu Mañi yu, tan catyí ra:

“Cunyaan xiin cuaha yu ihya nda cuanda caquin yu tsi ra xaan iñi tsi un naha ra tsaha un”, catyí ra David tahan tsanaha jahá Tatyí Ii Nyoo.

³⁷ ¿Nacaa cuví cuú tucu ra Cristo tata ra David, tan juven ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaá soho tsa caahan ra tan sii xaan cuñí ñi.

Nu caahan ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyí ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahan xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha.

³⁹ Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha.

⁴⁰ Tan quihín nyaá ra naha vehe ñi ndaahvi tsa tsihi yí tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

Tsa tsaha ñaha ndaahvi tsihi yí
(Lc. 21.1-4)

⁴¹ Iin tsaha nyí ra Jesús tsitsi vehe ñuhu cahnu tan nyaá ra yatyin ñi nu nyí tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun.

⁴² Tsitsi tsa nyaá ra ican tsahá iin ñaha ndaahvi tsihi yí, tan tyihí ña uvi taahan ñi xuhun nyihi tsa caaha xaan nyaá.

⁴³ Tacan tan cana ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsahá ñaha ndaahvi ihya tan ñavin ca inga nyivi.

⁴⁴ Tyin tсахá ñi tsa ndoo siqui xuhun ñi. Maa tyin ñaha ihya tyihí ña tandihí tsa iyó tsi ña —catyí ra Jesús.

13

Nu caahán ra Jesús tyin cua tani vehe ñuhu cahnu
(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra:

—¡Maestro, nyehe jihna tsa si# caá yuu yihí vehe ihya! ¡Nyehe tsa nahnu vehe ihya! —catyí ra tsihin ra Jesús.

² Maa tyin nacahán ra Jesús, tan catyí ra tsihin ra:

—Nditsa nahnu vehe ihya tan si# caá tsi nyehé yo vityin. Maa tyin catyí yu tsihin un tyin coo quivi nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyin tandihí maa tsi tan cua tani tsi —catyí ra Jesús.

Nu tсахá cuenda ra Jesús náa cua cuvi tsa ndi cumañi ca naa ñuhu ñayivi
(Mt. 24.3-28; Lc. 21.7-24; 17.22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga tsiyo nu nditsin nyehé tsi vehe ñuhu cahnu. Tsa tsinyaá ra Jesús itan, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

⁴ —Cuñí ndi tsa catyí tuhun un tsihin ndi ama cua cuvi tandihí tsa cahán un. ¿Nacaa tan coto ndi tatun tsa cuyatyin cundaa tandihí can? —catyí ra naha.

⁵ Nacahán ra Jesús tan catyí ra:

—Jaha ndo cuenda tsi ndo coto jandavi ñaha nyivi tsi ndo.

⁶ Tyin cuaha xaan nyivi cua quitsi, tan cua cuatyíñu ñi sivi yu, tan cua catyí ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyivi cua jandavi ñaha ñi.

⁷ Maa tyin tun ñihi tuhun ndo tyin iyó cuatyí tan cañi tahan nyivi ityi can tan ityi ihya, ña nahuhvi ndo tyin tacan taahán maa tsi cuvi tsa ndi cumañi ca naa ñuhu ñayivi.

⁸ Tyin nyivi iin ñuu cua cañi tahan ñi tsihin nyivi inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyivi. Vasu ndi maa nyehe nyivi tundoho ihya, ña cua naa naha ñuhu ñayivi tyin ndi nyaa ca cua nyehe ñi tundoho.

⁹ Maa tyin jaha ndo cuenda tsi ndo tyin cua kuhva cuenda nyivi tsi ndo tsi ra cumi tyiñu naha ra. Tan cua cañi ñi tsi ndo tsitsi vehe ñuhu. Cua kuhva cuenda ñi tsi ndo tsi ra cumi tyiñu tan tsi ra cuví rey tsacatyí yuhu. Tyin tacan tan cuvi cahan ndo tuhun yu nuu ra naha.

¹⁰ Tyin tsa ndi cumañi ca naa ñuhu ñayivi, cuñí tsi coto tandihí nyivi inga ñuu tyin Nyoo jacacú ra tsi nyivi.

¹¹ Tan kuhva tsa cua cundaca ñi tsi ndo nuu ra cumi tyiñu naha ra, ña caca iñi ndo náa cua cahan ndo. Tyin juvin ñi maa hora can tan cua kuhva Nyoo tsa cahan ndo. Tyin ñavin maa ndo cua cahan; tyin maa Tatyí Ii Nyoo cua cahan.

¹² Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi.

¹³ Tandihí nyívi iyó nu ñuhu ñayívi ndasi cua cuñi ñi nyehe ñi tsi ndo tsacatyí yuhu. Maa tyin nyooho tsa cua cunyeeye ñi tsinú ñi tsi yu nda nu ndihi, cua cacu ndo.

¹⁴ Tandihí nyooho tsa cahví nu tutu Nyoo nu tyaa ra Daniel, ra cuví ndusu yuhu Nyoo tsa tsicoo tahañ tsanaha, cutuñi ñi ndo tyin iyó tsa janducaquiñi tan tsa jativí. Quívi tsa nyehe ndo tyin tsa nyíi yacan nu ña taahán tsi cunyii can, nyooho nyívi iyó Judea, quita ndo ñuu ndo tan cuhun ndo ityi yucu.

¹⁵ Nyooho tsa cua cuyucu jiñi vehe quívi can, cua nuu ndo, maa tyin ña cua nuu ndo tsa quihví ndo tsitsi vehe ndo tan tava ndo tsa iyó tsi ndo.

¹⁶ Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo.

¹⁷ ¡Ndahvi ñiñaha tsa ñuhú sehe quívi can! ¡Tan ndahvi ñi iyó sehe lee tsa ndi tyaxín! ¡Ndahvi ñi!

¹⁸ Ndañan tahvi ndo tsi Nyoo na ña tahan tsi cunu ndo quívi vitsin.

¹⁹ Tyin tundoho tsa cua nyehe nyívi quívi can, ñaha ca maa coo can ndaha tsinu maa ñuhu ñayívi nda cuanda vityin. Tan ndi ityi nuu ca tan ña cua nyehe nyívi tahan tundoho can inga tsaha.

²⁰ Tun tsatyin Jutu Mañi yo tan ña jandihí ra tsa cua nyehe yo tundoho quívi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyívi yihí cuenda ra, nyívi nacatsí vaha maa ra.

²¹ Tatun catyi nyívi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu ñi ndo.

²² Tyin cua quítsi nyívi jandaví ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandaví ñaha ñi nda cuanda nyívi nacatsí maa Nyoo, tatun cunyeeye ñi javaha ñi tacan.

²³ Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quívi can —catyi ra Jesús.

*Nu jacoto ra Jesús nácaa cua quítsi nyico ra inga tsaha
(Mt. 24.29-35, 42-44; Lc. 21.25-36)*

²⁴ Tan catyi nyico ra Jesús tyehen:

—Maa tyin tsa cua yaha nyehe nyívi tundoho quívi can, cua ndunaa ñicanyii, yoo ña cua jandunditsin ca tsi,

²⁵ tan cua cucoyo tiñuu. Tan tandihí tsa iyó andívi tan cua nacanda tsi naha tsi.

²⁶ Tacan tan cua nyehe ndo tsi yuhu, Rayñi tsa quee nda gloria, vatsí yu nu vico tsihin tunyee ñi cahnu tan tsihin tsa cahnu cuví Nyoo.

²⁷ Tan cuaha ángel cuenda yu cua jaquítsi yu tyin jandu iin ra naha nyívi nacatsí maa Nyoo. Cua quita ñi nanñi cahnu nu ñuhu ñayívi, nda nu ndihi ñuhu ñayívi tan nda nu ndihi andívi.

²⁸ Cutuñi ñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsító ndo tyin tsa cua quee tsiti tun.

²⁹ Tan juvin ñi tacan, tatun tsa cuví tandihí tsa iyo tsa caahán yu tuhun tsihin ndo, cua coto ndo tyin tsa cuyatyin quítsi yu; tan tsa nyanaá yu yuvehe cuví tsi.

³⁰ Tsa nditsa catyi yu tsihin ndo tyin tsa ndi cumañi ca cúu nyívi iyó nu ñuhu ñayívi ihya tan cua cuví tandihí tsa caahán yu tuhun tsihin ndo.

³¹ Tan coo quívi cua cundihí andívi tan cua cundihí ñuhu ñayívi, maa tyin tuhun caahán yuhu, ña cua cundihí maa tsi tyin tandihí tsi tan cua cundaa tsi.

³² 'Maa tyin quiví tan hora tsa cua cuvi tandihi yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

³³ 'Yacan cuenda ço nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quiví tan náa cuhva cua quitsi nyico yu.

³⁴ Tumaa iin rayí tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra.

³⁵ Yacan cuenda nyooho ço nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii.

³⁶ Yacan cuenda ço nyito vaha ndo tan ña cusu ndo tyin sana iñi ndo tan cua quitsi yu.

³⁷ Tsa caahán yu tsihin nyooho, caahán tucu yu tsihin tandihi ca nyiví: Ço nyito ndo.

14

Nu nducú ra jutu cuví ityi nuu naha ra cuhva tñn ra naha tsi ra Jesús (Mt. 26.1-5; Lc. 22.1-2; Jn. 11.45-53)

¹ Tsa ndi cumañi uvi quiví ca tan tahan tsi vico pascua tan vico nu tuhvá nyiví tsatsí paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tñn xeehe ra naha tsi ra Jesús tan cahñi ra naha tsi ra.

² Maa tyin natuhun tahan ra naha tan catyí ra naha:

—Ña cua tñn naha yo tsi ra quiví maa vico tyin coto nduvaa xaan nyiví —catyí ra naha.

Nu tyihí iin ñaha ndutya tami jiñi ra Jesús (Mt. 26.6-13; Jn. 12.1-8)

³ Tsa ndi cumañi ca tahan tsi vico can, nyí ra Jesús ñuu Betania, vehe ra Simón, ra tsa tsindohç cuehe tyaahyu. Tsitsi tsa nyaá ra Jesús tsatsí ra, tsaq iin ñaha ndahá ña iin yutyí tsa tsinç tsihin yuu tsa nañí alabastro. Tsitç can yihí ndutya tami tsa nañí nardo. Tan yahvi xaan nyaá ndutya tami can. Nuñá ña yuhu yutyí can tan tava ña ndutya tami can tan tyihí ña can jiñi ra Jesús.

⁴ Maa tyin juhva ra tsa yucú ican naha ra nduxaçañ ra naha tan catyí ra naha:

—¿Nacuenda tyin jativí ñaha ihya ndutya tami can?

⁵ Tun tsatyin xicç ña can, cuaha xaan xuhun cua ñihi ña tsihin can, tan cuvi jatinyee ña tsi nyiví ndaahvi tsihin xuhun can —catyí ra naha.

Tan cuxaçañ ra naha tsi ña.

⁶ Maa tyin ra Jesús catyí ra:

—¡Jaña ndo tsi ña! ¿Nacuenda cuñí ndo jandu uvi iñi ndo tsi ña? Tan tsa vaha javahá ña tsihin yu.

⁷ Tyin nyiví ndaahvi tandihi ñi quiví cua cuyucu ñi tsihin ndo, maa tyin yuhu, ña naha ca cunyí yu tsihin ndo.

⁸ Ñaha ihya javahá ña ndihi cuhva cuví ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyiví tsa ndi cumañi ca quihvi ñuhu ñi.

⁹ Tsa nditsa catyí yu tsihin ndo, tyin tandihí ityi nu cua cahan nyívi tuhun Nyoo naní cahnu nu ñuhu ñayívi, cua cahan ñi tuhun ñaha ihya tan tsa javahá ña, tyin tacan tan ña naa íñi nyívi tsi ña —catyí ra Jesús.

Nu xico ra Judas tsi ra Jesús
(Mt. 26.14-16; Lc. 22.3-6)

¹⁰ Tsa yaha yacan tan quitá iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsaahan ra tsicahan ra tsihin ra jutu cuví ityi nuu naha ra, tan jandaá ra tyíñu tsihin ra naha tyin cua cuhva cuenda ra tsi ra Jesús tsi ra naha.

¹¹ Cuhva tsa tsiñi ra naha tsa caahán ra, sñi xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsahá nducú ra Judas cuhva cuhva cuenda ra tsi ra Jesús tsi ra naha.

Nu cuxiñi ra Jesús tsihin ra tsicá tsihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Quivi jihna ñi tsa quitsahá vico nu tsatsi nyívi paan tsa nduve yutsan iya yihí tan quiví tuhvá ñi tsahñi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

¹³ Tacan tan tava tyíñu ra tsi uvi taahan ra naha tan catyí ra tsihin ra naha: —Cuaahan ndo tsitsi ñuu, tan ican cua nañihi ndo iin rayí yosó soco iin quiyi ndutya. Tsa nyehe ndo tsi ra, cuanyicun ndo tsi ra.

¹⁴ Tsa tsaa ndo yuvehe nu cua quihví ra, catyí ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo.

¹⁵ Tan cua janaha ra iin cuarto cahnu nu tsinu uvi pisu tsi ndo. Tsa nduvahá maa tsitsi tsi jahá ra, javaha ndo tsa cuxiñi yo tsitsi vehe can—catyí ra Jesús tsihin ra naha.

¹⁶ Tacan tan cuahán ra naha. Tsa tsaa ra naha tsitsi ñuu can, nañihí ra naha tandihí maa cuhva catyí ra Jesús tsihin ra naha. Tan javahá ra naha tsa cua cuxiñi ra naha cuenda vico pascua.

¹⁷ Tsa ndihí javahá ra naha tsa cua cuxiñi ra naha, tacan tan cuahán nyico ra naha nu nyí ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra.

¹⁸ Tan cuhva tsa nycú ra naha tsatsí ra naha nu mesa, tan catyí ra Jesús: —Tsa nditsa catyí yu tsihin ndo tyin iin nyooho tsa tsatsí tsihin yu cua xico tsi yu tsi ra xaan íñi tsi yu.

¹⁹ Tacan tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰ Tan nacahan ra Jesús tan catyí ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu.

²¹ Tyin yuhu, Rayí tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin jindahvi ra ndaahvi tsa cua xico tsi yu! Vaha ca tun tsatyin ña cacú ra —catyí ra Jesús.

²² Tan tsitsi tsa tsatsí ra naha, tacan tan quih̄in ra Jesús iin paan tan nacuhv̄a ra tyahvi nyoo tsi Nyoo tsa cuenda can, tan tsahn̄u sava ra can, tan sahā ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

²³ Tsa yaha yacan quih̄in ndih̄i ra vasu nu yih̄i vinu. Tsa yaha sahā ra tyahvi nyoo tsi Nyoo, tacan tan sahā ra can tsi ra naha. Tandih̄i ra naha tan tsih̄i ra naha vinu tsa yih̄i tsitsi vasu can.

²⁴ Tan catyí ra tsihin ra naha:

—Vinu ihya cuví tumaa niñi yu tyin tsihin niñi yu cua ndoo Nyoo tuhun tsa tsihin ndo tyin cua cati niñi yu tsa cuenda tsa vaha tsi nyoocho tan tsa vaha tsi cuaha nyivi.

²⁵ Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsa nda nu ndacá ñaha Nyoo quivi tsa yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra
(Mt. 26.30-35; Lc. 22.31-34; Jn. 13.36-38)

²⁶ Tsa ndih̄i tsit̄a ra naha yaa Nyoo, tan cuahán ra naha yucu yutun Olivo.

²⁷ Tacan tan catyí ra Jesús tsihin tandih̄i ra naha:

—Tandih̄i maa ndo tan cua nacao ih̄ni ndo tsi yu tsa cuaa vityin tyin catyí nu tutu Nyoo tyehen: “Tandih̄i mbee ticatyí jana yu cua cuhun tsiyo ti naha ti siin siin ityi tyin cua cah̄ni yu tsi ra jahá cuenda tsi ti naha ti”, catyí tsi.

²⁸ Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyoocho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacao ih̄ni tandih̄i ra naha tsi un, maa tyin yuhu ña cua nacao ih̄ni maa yu tsi un —catyí ra tsihin ra Jesús.

³⁰ Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitoocho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

³¹ Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandih̄i ca ra naha.

Nu nyii ra Jesús Getsemaní tsicán tahvi ra tsi Nyoo
(Mt. 26.36-46; Lc. 22.39-46)

³² Tacan tan tsaq̄ ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndoq̄ ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quih̄in ra tsi ra Pedro, ra Jacobo tan ra Juan cuahán tsihin ra. Tan tsaq̄ tucuih̄ya iñi cahnu tsi ra tan tuñu cuñi ra.

³⁴ Tan catyí ra tsihin ra naha:

—Cuih̄ya xaan cuñi yu; cah̄ni ña maa tucuih̄ya iñi ihya tsi yu, cuñi yu. Ndoq̄ ndo ihya, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaqūin ra nuu ra nda nu ñuhu. Tan tsic̄an tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicān tahvi ra.

³⁶ Tan tsa tsicān tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñi un cuví jatsiyo un tundoho ihya siqui yu. Maa tyin na cuví maa cuhva cuñi maa un, tan ñavin cuhva cuñi maa yu —catyí ra Jesús tsicān tahvi ra.

³⁷ Tacan tan cuahán ra nu nacoḡ ra tsi uñi ra tsicá tsihin ra. Tsa tsaḡ ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeē iñi un coo nyito un tsihin yu ndi intuhun hora?

³⁸ Ña cusu ndo; ndācan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsicān tahvi ra tsi Nyoo juvin ñi tsihin tuhun tsa caḡan ra tsa jihna ñi.

⁴⁰ Tacan tan tsaḡ nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasi maa tinuu ra naha jahā ñumaahna. Tan ña tsitó ra naha náa nacahan ra naha tsihin ra. Ndi maa ra tan ña caḡan ca ra.

⁴¹ Tan cuahán nyico ra. Tsa tsaḡ ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaḡ tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa taḡan tsi hora tsa cua cuhva cuenda ra tsi yuhu, Rayi tsa quee nda gloria.

⁴² Ndūvita ndo, coḡon ndo tyin tsa vatsí ra tsa xico tsi yu —catyí ra Jesús tsihin ra naha.

*Nu tsahā cuenda ra Judas tsi ra Jesús tsi nu xaan iñi tsi ra nahnu
(Mt. 26.47-56; Lc. 22.47-53; Jn. 18.2-11)*

⁴³ Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tiñ ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaḡ ra Judas tsihin nyivi cuaha can.

⁴⁴ Tsa ndi cumañi ca cahun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuví ra Jesús. Tan caḡan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jahā cuenda vaha ndo coto cunu ra —catyí ra nu quitsi tsi.

⁴⁵ Tsa tsaḡ ra Judas nu nyii ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra.

⁴⁶ Tacan tan quihin ra naha tsi ra Jesús cuahán tsihin ra naha.

⁴⁷ Maa tyin iin ra nyii tsihin ra Jesús, tavā ra mityi ra tan tsahnya ra soho musu ra jutu tsaahnu cuví ityi nuu.

⁴⁸ Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun.

49 Ndihi quivi tsinyi yu jacuahá yu tsi ndo tsitsi vehe ñuhu cahnu, tan ña quihin ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

50 Tacan tan tsinu tandihí ra tsicá tsihin ra, tan ndoq intuhun ña maa ra jahá ra naha.

51 Maa tyin ndooq intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tñin ndihí ra naha tsi ra.

52 Maa tyin nacoq ihñi ra ticatyí can tan tsinu tandi ra.

Nu tsicá tuhun ra mandoñi naha ra tsi ra Jesús tun juvin Sehe Nyoo tsi ra (Mt. 26.57-68; Lc. 22.54-55, 63-71; Jn. 18.12-14, 19-24)

53 Tacan tan tsindaca ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra.

54 Ra Pedro nyicún tsica nyicún tsica ñi ra tsi ra naha cuahán ra. Tan tsaá ra nda nuquehe yuvehe ra jutu tsaahnu cuví ityi nuu can. Tan ndooq ra tuñú ra ñuhu tsihin ra vitya naha ra.

55 Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha siqui ra Jesús, tyin tacan tan cuví cahñi ra naha tsi ra. Maa tyin ña ñihí maa ra naha cuatyí tyaa ra naha tsi ra.

56 Cuaha xaan nyivi cahán cuendu siqui ra, maa tyin ña nacatsí tahan maa tuhun caahán ndi intuhun ñi.

57 Yihi ñi nduvitá ñi tan cahán ñi maa ñi maa cuendu siqui ra, tan catyí ñi:

58 —Nyuhu tsiñi ndi tsa cahán ra tan catyí ra tyehen: “Yuhu cua cani yu vehe ñuhu cahnu tsa javahá nyivi. Tan cua jánduvita yu inga vehe ñuhu tsitsi tsa uñi quivi ñi. Maa tyin ñavin tahan vehe ñuhu tsa javahá nyivi?” catyí ra —catyí ñi.

59 Vasu ndi maa tacan caahán ñi, maa tyin ña nacatsí tahan maa tsa cahán ñi.

60 Tacan tan nduvitá ra jutu tsaahnu cuví ityi nuu mahñu tandihí ra yucú ican naha ra, tan tsicá tuhun ra tsi ra Jesús, tan catyí ra:

—¿A ña cua nacahan un nu caahán nyivi ihya? ¿A nditsa tsa caahán ñi, o ña nditsa? —catyí ra

61 Maa tyin ña nacahan maa ra Jesús tan nduve maa náa cahán ra. Tacan tan ra jutu tsaahnu cuví ityi nuu tsicá tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

62 Tan ra Jesús catyí ra tsihin ra:

—Juvín. Nyooho cua nyehe ndo tsi yuhu, Rayi tsa quee nda gloria, nyaá yu xiin cuaha Nyoo, ra iyó tandihí tunyee iñi, tan cua nyehe tucu ndo nu quitsi yu nu vico ityi andivi —catyí ra tsihin ra.

63 Tacan tan tsahnya ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñí maa ra tyin ña vaha tsa caahán ra, tan catyí ra:

—Ña tsiñi ñuhu ca tsa nducu yo tsi ra cuví tsa ndaa.

64 Tyin tsa tsiñi maa ndo tsa cahán ra. Tsicoq cuatyí ra nuu Nyoo tsihin tuhun cahán ra. ¿Náa catyí ndo vityin? —catyí ra.

Tacan tan nacahan tandihí ra naha tan catyí ra naha tyin taahán tsi cúu ra.

65 Tacan tan quitsahá tiví sñi juhva ra naha tsi ra. Tyasi ra naha nuu ra, tan cañi ra naha tsi ra tsihin tsiqui tan catyí ra naha tsihin ra:

—¿Cahan tsihin ndi yóo cañi tsi un! —catyí ra naha tsihin ra.

Tan cañj tucu ra vitya naha ra nuu ra.

*Nu cahan ra Pedro tyin ña nacotó ra tsi ra Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Tsitsi tsa ndi nyii ra Pedro nuquehe tsata vehe ra jutu tsaahnu cuví ityi nuu, tsaq iin ñaha cuví musu ra jutu can.

⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quitsaha nyehé xaan ña tsi ra, tan catyí ña tsihin ra:

—Tsicá tucu yooho tsihin ra Jesús, ra ñuu Nazaret can —catyí ña tsihin ra.

⁶⁸ Maa tyin ra Pedro tyihj xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitá ra ityi yuhu cora. Tan tsacu ñi tsitooho.

⁶⁹ Tacan tan ñaha can nanyehé nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

⁷⁰ Maa tyin tyihj xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¡Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa Nyoo tsi yu tun ña nditsa yu tsa caahán yu! —catyí ra.

⁷² Juvín ñi cuhva can navacu tsitooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yaha cahan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsaha ra tsacú ra.

15

*Nu jaqueé yuhu ra Pilato tsi ra Jesús
(Mt. 27.1-2, 11-14; Lc. 23.1-5; Jn. 18.28-38)*

¹ Tan tsa tuvj inga quivi ndu jin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihi ca ra cumí tyiñu tsa yihí ndaha tsi nyivi Israel. Nuuhñi ñi maa ra Jesús tan tsindaca ra naha tsi ra nuu ra Pilato.

² Tan tsicá tuhun ra Pilato tsi ra, tan catyí ra:

—¿A juvín un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahan ra cuví jutu ityi nuu naha ra siqui ra Jesús.

⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehé, cuaha xaan cuatyí tyaá ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihj ra Pilato náa cahan ra.

*Nu tsahá ra Pilato ndatu tsa cúu ra Jesús
(Mt. 27.15-31; Lc. 23.13-25; Jn. 18.38—19.16)*

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivi tyin tava ra.

⁷ Quiyí can nyíi iin ra nañí Barrabás vehe caa, tsihin inga ca ra tsahñí nyívi nu cuvaá nyívi síqui ra ndacá ñaha.

⁸ Tan tsahan nyívi tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá.

⁹ Tan nacahan ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

¹⁰ Tacan cahan ra tyin tuví iñi ra tyin tsahá cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñí ra naha nyehe ra naha tsi ra tyin cuaha nyívi nyicún tsi ra.

¹¹ Maa tyin ra jutu cuví ityi nuu can naha ra natyuhú ra naha tsi nyívi tsa cahan ñi na tava ra Pilato tsi ra Barrabás vehe caa.

¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

¹³ Tacan tan caná tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javahá ra? —catyí ra.

Ñi ican quitsahá caná tsaa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

¹⁵ Tacan tan tsa cuñí ra Pilato ndoo vaha ra nuu nyívi, tava ra tsi ra Barrabás vehe caa. Tsa yahá tava ra tsi ra can, tava tyiñu ra na ndoho ra Jesús. Tsa yahá ndoho ra Jesús, tan tsahá cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacá ra andaru can naha ra tsi ra nuquehe vehe tyiñu. Tan jandu iin ra naha tandihí ca andaru.

¹⁷ Tan jacunditsj ra naha iin jahma cuaaha tuun tsi ra. Tan javahá ra naha iin corona iñu. Tan tyihj ra naha can jiñi ra.

¹⁸ Tsa yahá tsacu nducu ra naha tsi ra, tava ra naha jahma cuaaha tuun tsa jacunditsj ra naha tsi ra. Tacan tan jacunditsj nyico ra naha jahma maa ra tsi ra. Tan cuahán ra naha tsihin ra cuaticaa ra naha tsi ra nu cruu.

—¡Nacumi tsi un, yooho Rey nyívi Israel! —catyí ra naha.

¹⁹ Tan cañi ra naha jiñi ra tsihin yutun, tan tiví sii ra naha tsi ra. Tan tsicuiñi tsiti ra naha nuu ra jahá ra naha tyin jacahnú ra naha tsi ra.

²⁰ Tsa yahá tsacu nducu ra naha tsi ra, tava ra naha jahma cuaaha tuun tsa jacunditsj ra naha tsi ra. Tacan tan jacunditsj nyico ra naha jahma maa ra tsi ra. Tan cuahán ra naha tsihin ra cuaticaa ra naha tsi ra nu cruu.

Nu tyaa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

²¹ Ityi cuahán ra naha tahan ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuiso ra cruu ra Jesús.

²² Tan tsindacá ra naha tsi ra Jesús iin nu nañí Gólgota, tan cuñí tsi catyí Yiqui Jiñi Ndiyí.

²³ Tan ican jacoḥo ra naha vinu sacá nuu tsihin numeri tsa nañí mirra tsi ra. Maa tyin ra Jesús ña cuñi ra coho ra can.

²⁴ Tsa yahá tyaa ra andaru naha ra tsi ra nu cruu, quihj ra naha jahma ra tan tava cuenda ra naha tyin cuñi ra naha coto ra naha yoo cua jaha canaa intuhun intuhun jahma can.

²⁵ Tyaa ra naha tsi ra nu cruu caa iin tsa tuví.

²⁶ Tan letra tsa tyaḡ ra naha jiñi cruu ra, catyí tsi nacuenda cua cúu ra. Tan catyí tsi tyehen: “Ra ihya cuví Rey nyívi Israel.”

²⁷ Tan tyaḡ ndihi ra naha uvi taahan ñasuhu tshin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra.

²⁸ Tacan cuví tan cundaḡ cuhva catyí nu tutu Nyoo tyehen: “Javaha nyívi tshin ra tumaa javahá ñi tshin ra caquiñi.”

²⁹ Tan nyívi yahá ican jacuñí nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—Jaan! ¡Yooho tsa caḡan tyin cua cani un vehe ñuhu cahnu, tan tsitsi tsa uñi quívi cua janduvaha nyico un itsi,

³⁰ Jacacu tsi un vityin tan nuu nu cruu juvin! —catyí ñi.

³¹ Tan juvin ñi tacan tsacú nducu tucu ra jutu cuví ityí nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—Jacacu ra tsi inga ca nyívi, maa tyin ña cuví jacacu ra tsi maa ra!

³² Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyívi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacu nducu ndihi nahnu tsi ra.

Nu tsihi ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunaḡ nanñi cahnu nda cuanda caa uñi tsa tseñi.

³⁴ Tan juvin ñi cuhva can canḡ tsa ra Jesús tshin tandihí tunyee iñi ra, tan catyí ra:

—Eloi, Eloi, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoḡ ihñi un tsi yu? —catyí ra.

³⁵ Juhva ra yucú ican naha ra tsiñi ra naha tsa caḡan ra tan catyí ra naha:

—¡Jihna ndo! Caná tsa ra tsi ra Elías, ra cuví ndusu yuhu Nyoo tahan tsanaha —catyí ra naha.

³⁶ Tacan tan tsinú xaan iin ra tsiquihin ra iin yahma tsa caá tumaa caá catyí, tan jatyiñi ra can tshin vinu íya. Tan tyaḡ ra can iin nu yutun tan jatuhva ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan canḡ tsa ra Jesús, tan tsihi ra.

³⁸ Tan jahma tsa ticaá tsitsi vehe ñuhu cahnu ndatḡ sava tsi, nda siqui tan nda cuanda ityi tsaha.

³⁹ Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa canḡ tsa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehé ñi. Tan mahñu ñi can nyii ña María tsa quee ñuu Magdala, tan ña María sihi ra José tan ra Jacobo ra tyuva ca. Tan nyii tucu ña Salomé.

⁴¹ Ñiñaha ihya tsinyicun ñi tsi ra Jesús, tan jatyinyee ñi tsi ra quívi tsicḡ nuu ra ityi Galilea. Tan yucú cuaha tucu ñiñaha inga ñuu tsa tsaḡ tshin ra ñuu Jerusalén ican.

Nu tsicutsi ra naha tsi ra Jesús

(Mt. 27.57-61; Lc. 23.50-56; Jn. 19.38-42)

⁴² Qui^vi tsa tuhvá nyi^vi janduvaha tsa catsi ñi cuenda inga qui^vi tuhvá ñi quitatu, juvin ñi tseñi can

⁴³ tsaq ra José ra ñuu Arimatea nu nyii ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayiví. Ña nayuhví ra tan tsahan ra tsindacan ra cuñu ñuhu ra Jesús tsi ra Pilato.

⁴⁴ Tsa tsito^o ra Pilato tyin tsa yaha^h tsihi^h ra Jesús, iyo xaan cuñi ra. Tacan tan cana^h ra tsi iin capitán tan tsica^h tuhun ra tsi ra tun nditsa tyin tsa tsihi^h ra Jesús.

⁴⁵ Tan tsa tsito^o vaha ra Pilato tyin tsa yaha^h tsihi^h ra Jesús, tava^h tyiñu ra na cuhva ra andaru naha ra cuñu ñuhu ra tsi ra José.

⁴⁶ Tacan tan tsijatá ra José iin jahma cuitsin tsa tsinu^h tsihin jahma vaha tsa nañi linu, tan janu^h ra cuñu ñuhu ra Jesús nu cruu. Yaha can tan cava^h nuu ra jahma can cuñu ñuhu ra. Tacan tan tyih^h ra cuñu ñuhu ra tsitsi iin ñaña tsa nyaá nduvaha^h tsitsi iin cava. Tan tyasi^h ra yuhu ñaña can tsihin iin yuu cahnu.

⁴⁷ Tan ña María, tsa quee^h ñuu Magdala, tan ña María, sihi ra José, tsahan ñi, tsinyehe^h ñi nu tinyi^h ra José can cuñu ñuhu ra Jesús.

16

Nu nandoto^o ra Jesús

(Mt. 28.1-10; Lc. 24.1-12; Jn. 20.1-10)

¹ Tsa yaha^h qui^vi quitatú nyiví, ña María ñuu Magdala, tan ña María sihi ra Jacobo, tan ña Salomé jata^h ñi ndutya tami tyin cuñi ñi cahun ñi cutyihí ñi can cuñu ñuhu ra Jesús.

² Tacan tan cuahán ñi nu nyaá ñaña ra tsa cunditsin cui^h ñi qui^vi quitsaha^h vitya. Tan tsaq ñi ican cuhva tsa cua cana^h cui^h ñi ñicanyihí.

³ Tan ityi^h cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaq ñi nyehe^h ñi tyin tsa catsiyo yuu cahnu tsa ndasí yuhu ñaña can.

⁵ Tan cuhva tsa quihví ñi tsitsi cava nu nyaá ñaña can, nyehe^h ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsí ra jahma cuitsin cañi. Tan nayuhví xaan ñi.

⁶ Maa tyin catyí ra tsihin ñi:

—Ña nayuhvi^h ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi^h nu cruu. Maa tyin nduve ca ra nyii ihya vityin tyin tsa nandoto^o ra. Nyehe^h ndo nu tinyi^h ra naha tsi ra.

⁷ Cuaahan ndo tan jacoto ndo tsi ra Pedro tan tsi inga ca ra tsica^h tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinu^h xaan ñi cuahán ñi, tyin ñihí ñi jahá tsa yuuhví ñi. Tan ña cahan maa ñi tsa cahan ñi tsihin ndi intuhun maa nyiví tyin yuuhví xaan ñi.

Nu quituví ra Jesús nuu ña María quee^h ñuu Magdala

(Jn. 20.11-18)

⁹ Ra Jesús nandoto^o ra qui^vi quitsaha^h vitya. Tan quituví ra jihna cui^h ca nuu ña María ñuu Magdala. Juvin ña cuví ña tsa tava^h ra utsa tatyí ña vaha.

¹⁰ Tsahan ña tsijacoto^o ña tsi ra tsicá tsihin ra, tyin yucú ra naha tsihin tucuihya iñi tan tsacú ra naha.

¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituvi ra Jesús nuu uvi ra tsicā tsihin ra
(Lc. 24.13-35)

¹² Tsa yaha yacan, tan quituvi ra Jesús nuu uvi ra tsa cuahán ityi cuhu naha ra. Maa tyin siin cuhva caá ra nyehe ra naha.

¹³ Tan tsinuhu ra naha tsijacoto ra naha tsi tandihi ca ra naha. Maa tyin juvin ñi ña tsinu iñi ra naha tsa cahan ra can naha ra.

Nu tsahā ra Jesús tyiñu tsi ra tsa tsicā tsihin ra
(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituvi ra Jesús nuu tandihi tsa utsi iin ra tsa tsicā tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinu iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahan nyivi tsa nyehe tsi ra tsa yaha nandoto ra.

¹⁵ Tan catyi ra tsihin ra naha:

—Cuaahan ndo nani cahnú nu ñuhu ñayivi, tan cahan ndo tuhun Nyoo tsihin tandihi nyivi, tan catyi ndo tsihin ñi nácaa jacacú Nyoo tsi ñi.

¹⁶ Tan nyivi tsa cua tsinu iñi tan coodutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siqui ñi tan cua cunaa ñi.

¹⁷ Tan tandihi tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan.

¹⁸ Cua tiin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhví, tan cua nduvaha nyivi.

Nu ndaa ra Jesús andivi
(Lc. 24.50-53)

¹⁹ Tsa ndihi cahan Jutu Mañi yo Jesús tsihin ra naha, tacan tan ndaa ra andivi, tan tsinyaā ra xiin cuaha Nyoo.

²⁰ Tacan tan ra tsicā tsihin ra quitā ra naha tan tsahan ra naha tandihi ñi ityi tsicahan ra naha tuhun Nyoo nácaa jacacú ra tsi yo. Juvin ñi maa Jutu Mañi yo jatyinyee tsi ra naha tyin tsahā ra tsa javaha ra naha cuaha tsa iyo. Tan tsihin yacan nyehe nyivi tyin nditsa tsa caahán ra naha.

Tan na cuvi tsi tacan ñi.

Tuhun Nyoo Tsa Tyaa Ra Lucas

Nu quitsaha jacotó ra Lucas tuhun ra Cristo tsi ra Teófilo

¹ Cuaha ñi nyivi nducu ñi cuhva tyaa ñi nuu tutu tandihi tsa cuvi nu yucú ndi ihya. Tyaa ñi cuhva

² nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi.

³ Tan yuhu tucu tsa yaha cahvi yu tan nducu tuhun vaha yu tandihi tsa cuvi nda nu quitsaha. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsaha tan nda nu ndihi.

⁴ Tyin tacan tan coto un tyin nditsa tsa jacuahá nyivi tsi un.

Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuvi ra Herodes rey tanhi cahnu cuenda Judea, tsicoo iin ra cuvi jutu, nañi ra Zacarías. Tan yihí ra cuenda ra cuvi jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvi jutu tahan tsanaha, cuvi ña.

⁶ Tan nduve maa cuatyí ñi nuu Nyoo. Tyin vaha xaan tyaa yahvi ñi tuhun caahan Nyoo Jutu yo. Tan yoñi maa cuvi tyaa cuatyí tsi ñi.

⁷ Tan nduve maa sehe ñi tsicoo. Tyin ña Elisabet, ña cuvi coo sehe ña. Tan tsa tsahnu xaan nduvi taahan ñi.

⁸ Iin quivi taahan tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo.

⁹ Tan cuhva iyó maa ra cuvi jutu naha ra, tava ra naha suerte, ndaa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahan tsi tsi ra Zacarías.

¹⁰ Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmi ra cutu can.

¹¹ Tan tsitsi tsa ndi nyí ra ican tan quituvi iin ángel Jutu Nyoo nu nyí ra. Tan nyaá nyityi ángel can ityi xiin cuaha nu nyaá altar nu tsahmi ra cutu.

¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra.

¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan.

¹⁴ Shi xaan cua cuñi un. Tan cuaha xaan nyivi cua cusi ndihi iñi quivi cua cacu ra.

¹⁵ Tyin sehe un, cahnu xaan cua cuvi ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii Nyoo tsi ra tsa ndi cumañi ca cacu ra tan tandihi tyambu tsa cua coo ra.

¹⁶ Tan cuaha xaan nyivi Israel cua cunyicun ñi tsi Jutu yo Nyoo jaha ra.

¹⁷ Juvin ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí Ii Nyoo tsi ra. Tyin cua cuvi ra tumaa ra Elías, ra cuvi ndusu yuhu Nyoo tahan tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquini, na tyaa yahvi ñi tuhun caahan Nyoo. Tacan cua janduvaha ra tsi nyivi tan cua catu vaha ñi tsi Nyoo —catyí ángel tsihin ra Zacarías.

¹⁸ Tan tsicá tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

²⁰ Tan vityin cua nduñihi un. Tyin ña tsinú iñi un tsa caahan yu tshin un. Tan ña cua cuvi cahan un nda cuanda tsa yaha cacu sehe ñasihi un. Tan nda quivi cundaa tandihi tsa cahan yu tshin un —catyí ángel ican tshin ra.

²¹ Tan nyivi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can.

²² Tan cuhva tsa quita ra Zacarías, ña cuvi maa cahan ra tshin ñi. Tan tuvji iñi ñi tyin iyó tsa nyehe ra tsitsi vehe ñuhu can. Tacan tan quitsaha caahan ra tshin ñi tshin ndaha ra. Tyin ña cuvi cahan ra.

²³ Tan quivi ndihi tyiñu jahá ra Zacarías vehe ñuhu can, tan cuanuhu ra yuvehe ra.

²⁴ Tsa yaha quivi can tan tsicuhun sehe ñasihi ra, ña Elisabet. Tan ña quita maa ña tsata vehe tsa tandihi tsa uhun yoo. Tan tsicá iñi ña:

²⁵ “Tyehen javaha Jutu Mañi yu tshin yu, tyin tacan tan ña cahan nyaa ca nyivi tsi yu”, cuñi ña tsicá iñi ña.

Nu jacoto in ángel tsi ña María tyin cua cacu ra Jesús

²⁶ Tsa quita iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea.

²⁷ Tyin cahan ra tshin iin ñaha yoco tsa nañi María. Tan tsa nyaá maa tsa cua tindaha ña tshin ra nañi José, ra cuvi tata ra rey David.

²⁸ Tan quihvi ángel ican nu iyó ña María. Tan catyí ra tshin ña:

—Nacumi tsi un, María. Ñihí un tumañi iñi nuu Nyoo. Maa ra iyó tshin un. Tan nasocó xaan ca ra tsi un tan ñavin ca tandihi ca ñaha —catyí ángel ican tshin ña.

²⁹ Tan tsa tsiñi ña tsa cahan ra, iyo xaan cuñi ña tsa cahan ra. Tan tsicá iñi ña: “¿Nacuenda tacan caahan ra ihya nacumi tsi yo?” tsicá iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo.

³¹ Vityin cua cahun sehe un. Tan cua cunañi ra Jesús.

³² Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi ra David, tsi saahnu ra.

³³ Tyin cua cundaca ñaha ra tsi nyivi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tshin ña.

³⁴ Tacan tan tsicá tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yi yu.

³⁵ Tan nacahan ángel tan catyí ra:

—Maa Tatyí li Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra li tsa cua cacu cua cunañi ra Sehe Nyoo.

³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuvi coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña.

³⁷ Tyin Nyoo nduve tsa ña cuvi jaha ra —catyí ángel tshin ña.

³⁸ Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyíi ña Elisabet

³⁹ Tan iin quiví can, numí ñi cuahán ña María iin ñuu tsa canyíi Judea nu maa ñi maa yucu iyó.

⁴⁰ Tan quihvǐ ña tsitsi vehe ra Zacarías. Tan nacuhvǎ ña nacumi tsi ña Elisabet.

⁴¹ Tan tsa tsiñi ña Elisabet tsa cahán ña María, tan natuñu sehe ña tsitsi ña. Tan ñihi nyaá Tatyí Ii Nyoo tsihin ña.

⁴² Tan ñihi xaan nacahán ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasocó ra tsi sehe un.

⁴³ ¿Tan yóo cuví yuhu? Tyin quítsi sihi Jutu Mañi yu quítsi nyehe ña nu nyaá yu.

⁴⁴ Cuhva tsa tsiñi yu tsa cahán un, tan natuñu sehe yu tsitsi yu. Tyin sii xaan cuñi ra.

⁴⁵ Tan sii xaan cuñi tucu maa añima un tyin tsinú iñi un. Tyin cua cuví cuhva tsa cahán Nyoo tsihin un —catyí ña Elisabet.

⁴⁶ Tan catyí ña María:

—Jacahnú yu tsi Nyoo tsihin tandihi añima yu.

⁴⁷ Tan sii xaan cuñi añima yu tsihin Nyoo ra jacacú tsi yu.

⁴⁸ Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quiví cua cahán nyiví tyin cahnu xaan tumañi iñi ñihj yu.

⁴⁹ Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

⁵⁰ Tan ndaahvi cuñi ra tsihin tandihi nyiví tsa cua coo tan tyaa yahvi ñi tsi ra.

⁵¹ Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyiví tsa cahnu xaan tsicá iñi ñi.

⁵² Quinyaa ra tunyee iñi iyó tsi nu cuví rey.

Tan cua janducahnu ra tsi nyiví ndaahvi.

⁵³ Tsahá Nyoo tsa vaha tsi nyiví cuñi coto tsa vaha.

Tan nyiví cuca tsa cuñi tyin nduve tsa tsiñi ñuhu tsi ñi, tsihin ndaha ndi ñi, jacuhún ra tsi ñi.

⁵⁴ Jatyinyeé ra tsi nyiví Israel tsa cuví ñi musu ra.

Tan ña naá iñi ra tsi ñi. Nyehe ndaahvi ra tsi ñi.

⁵⁵ Tumaá cuhva catyí Nyoo tsihin ra Abraham, tsii tsaahnu yo, tan tsihin sehe ra, tacan ñi javahá maa Nyoo —catyí ña María.

⁵⁶ Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

Quiví cacu ra Juan, ra tsa jacoondutyá tsi nyiví

⁵⁷ Tsa tsaa quiví tsa cacu sehe ña Elisabet, jacacu ña iin rayii.

⁵⁸ Tan nyiví vehe ña tsihin nyiví tsa iyó yatyin ñi yuvehe ña, sii xaan cuñi ñi. Tacan tucu maa ña. Tyin vaha xaan tsa javahá Nyoo tsihin ña.

⁵⁹ Tan tsa quitá una quiví tsa cacu ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñi ra naha tsa cunañi ra Zacarías tumaa nañi maa jutu ra.

⁶⁰ Maa tyin sihi ra catyí ña:

—Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyí ra naha.

62 Tan quitsaha tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñi ra tsa cunañi ra.

63 Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñi ra naha tsa tacan.

64 Juvín ñi maa hora can nacahan ra Zacarías. Tan quitsaha jacahnú ra tsi Nyoo.

65 Tan tandihi maa nyivi iyó yatyin yuvehe ñi, iyo xaan cuñi ñi cuví. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuví can.

66 Tan tandihi maa nyivi tsa tsitō can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahnú ra Zacarías tsi Nyoo

67 Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsaaha cuenda ra tsa caahan Nyoo tsihin ra, tan catyí ra:

68 —Cahnu xaan ra cuví Jutu yo Nyoo cuenda yo nyivi Israel.

Tyin quitsj ra nu yucú yo, tsa cuví yo nyivi maa ra. Tan jacacú ra tsi yo.

69 Tan tsaaha ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuví ra.

70 Tacan cua javaha ra, catyí Nyoo tahan tsanaha, quivi cahan ra cuví ndusu yuhu ra, tan catyí ra naha tyehen:

71 Cua jacacu Nyoo tsi yo ndaha nu xaan iñi tsi yo, tan nuu tandihi nu tsa ndasi cuñi nyehe tsi yo.

72 Tan cua cundaahvi iñi ra nyehe ra tsi nyivi yo tsa tsicoō tahan tsanaha.

Tan cua nducuhun iñi ra tsa cahan ra tsihin ñi tahan tsanaha.

73 Cahan maa Nyoo tsihin ra Abraham, tsi tsaahnu yo,

74 tan catyí ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnú yo tsi ra.

75 Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihi quivi tsa cua coo yo ñayivi —catyí ra Zacarías.

76 Tan catyí ra Zacarías tsihin lee can:

—Sehe luhlu yu, yooho cua cuví un ndusu yuhu Nyoo, ra nyaá gloria.

Tyin cahun un ityi nuu Jutu Mañi yo. Tan cua cahan un tuhun ra tsihin nyivi tyin tsa cuñi quitsi ra.

77 Tan cua jacoto un tsi nyivi tyin cua jaha Nyoo tucahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra tsi yo. Tan cundaahví xaan iñi ra tsi yo.

Tan cua jaquitsi ra iin ra jatyinyee tsi yo. Tan cuví ra tumaa ñuhú ñicanyii.

79 Tyin cua janaha ra ñuhú nditsin nu iyó nyivi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyí ra Zacarías.

80 Tan ra luhlu can cua cuahnu ca ra. Ñihi xaan tsicoō tunyee iñi tsi ra tsihin Tatyí Ii Nyoo. Tan tsicoō ra iin tsiqui ndi nda cuanda quivi tsa nacotō nyivi Israel tsi ra.

2

*Quivi cacu ra Jesús
(Mt. 1.18-25)*

¹ Quivi ican tsicoq iin ra ndacá ñaha, ra cuví rey cahnu, nañí ra Augusto. Tava tyiñu ra tsi ra nyisó tyiñu naha ra na tyaa ra naha sívi tandihí nyívi taniñ cahnu ñuu ñayívi.

² Ihya cuví tsa jihna ñi tsinyaq sívi nyívi. Tan ra Cirenio cuví ra ra ndacá ñaha tandihí ñuu nu cuví Siria.

³ Tan tandihí nyívi cuanuhu ñi ñuu ñi, tyin cua ndaca ñi sívi ñi.

⁴ Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuví ra.

⁵ Cuahán ra cuandacá ra sívi ra tsihin ña María, tan tsa nyaá maa tsa cua tindaha ñi. Tan ñuhú sehe ña.

⁶ Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña.

⁷ Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsí quití itya. Tyin ña ñihí ñi iin vehe coo ñi.

Cuhva cahán ángel tsihin ra jahá cuenda mbee

⁸ Yatyin ñi ñuu Belén can yucú ra jahá cuenda mbee tsa tsacuaa.

⁹ Tan sana iñi ra naha quituví iin ángel Nyoo. Tan jandunditsin Jutu yo Nyoo taniñ cahnu nu yucú ra naha. Tan nayuhví xaan ra naha.

¹⁰ —Ña nayuhvi ndo —catyí ángel can—. Tyin vatsí cahan yu iin tsa vaha xaan tsihin ndo. Siñ xaan cua cuñí tandihí cuiñ maa nyívi tsa cuenda tsi.

¹¹ Vityin nda iñi ra David cacu iin ra cua jacacu tsi nyívi. Cuví ra Cristo, ra cuví Jutu Mañi yo.

¹² Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyí ra tsitsi iin canuva nu tsatsí quití —catyí ángel can tsihin ra jahá cuenda mbee can.

¹³ Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

¹⁴ Cahnu xaan cuví Nyoo, ra nyaá gloria.

Tan nu ñuhu ñayívi, na coo tsa vaha añima nyívi tsa ñihí tumañi iñi Nyoo, catyí ra ángel naha ra.

¹⁵ Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacoto tsi yo —catyí ra naha.

¹⁶ Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyí ra lee can tsitsi iin canuva nu tsatsí quití itya.

¹⁷ Tan cuhva tsa nyehe ra naha tsi ra, quitsaha natuhún ra naha tandihí tuhun cahán ángel tsihin ra naha tsa cuenda lee ican tsihin ñi.

¹⁸ Tan tandihí nyívi tsa tsiñi tuhun caahán ra naha, iyo xaan cuñí ñi.

¹⁹ Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña.

²⁰ Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaq cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

²¹ Tsa ndu unā quivi ra Jesús, tan tyaa ñi tuñi Nyoo tsi ra tyin tacan catyi tuhun tsahnu maa ñi. Tan jacunañi ñi Jesús tsi ra. Juvín ñi maa sivi tsa catyi ángel tsihin ña María quivi tsa ndi cumañi ca cuhun ra Jesús tsitsi ña.

²² Tan tsa yahā quivi cuhva catyi ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

²³ Tacan ñi javahā ñi tyin catyi ley Nyoo tyin: “Tandihí sehe nuu ñi tsa cuví rayí, cua tyaa cuenda ñi tsi ra ndaha Jutu yo Nyoo”, catyi ley ican.

²⁴ Tan tsahan ñi tsijamañi ñi uvi taahan quiti, tyin tacan catyi maa ley Jutu yo Nyoo, nu catyi tsi tyehen: “Cuhva ndo uvi taahan curuu a uvi taahan paloma”, catyi ley can.

²⁵ Tan quivi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyivi ñuu Israel ican. Tan nyaá Tatyí Ii Nyoo tsihin ra Simeón.

²⁶ Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jacuitsi Jutu yo Nyoo.

²⁷ Tan Tatyí Ii jacuhun ra tsi ra Simeón can nda vehe ñuhu. Tan juvín ñi cuhva can tsaā jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyi maa ley.

²⁸ Tan cuhva tsa tsaā ñi nu nyaá ra Simeón tan quihín ra Simeón tsi ra Jesús. Tan tyihí jucun ndaha ra tsi ra. Tacan tan quitsahā jacahnú ra tsi Nyoo, tan catyi ra:

²⁹ —Jutu Mañi yu, vityin tsa cundaā cuhva tsa catyi maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihí nyivi.

³² Tan cua cuví ra ñuhu tsa cua jandunditsin añima nyivi tsa ñavin nyivi Israel cuví.

Tan cahnu ca cua jaha ra tsi nyivi Israel, tsa cuví ndi nyivi cuenda maa un —catyi ra Simeón.

³³ Tan ra José tsihin sihi ra Jesús, iyo xaan cuñi ñi tsa tsiñi ñi tsa cahān ra Simeón tsa cuenda lee ican.

³⁴ Tacan tan tsicān tahvi ra Simeón tsa cuenda ñi. Tan catyi ra tsihin ña María sihi ra Jesús:

—Nyehe tsi lee ihya. Cuaha xaan nyivi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaā ra tsi ra tan cuví ra tumaa seña tsa cuenda yo.

³⁵ Tacan tan coto tandihí yo náa tsicá iñi nyivi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyi ra Simeón tsihin ña.

³⁶ Tan ican, tsitsi vehe ñuhu cahnu can, nyii tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahā ña, maa tyin utsa cuiya ñi tsicoñ ña tsihin yii ña tan tsihí ra.

³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicān tahvi ña tan iyó nyitya ña.

38 Tan juvin ñi tsa ndi nyii ca ra José tan ña María tsihin lee ican, tan tsaq ña Ana nu yucú ñi. Tan quitsahá nacuhvá ña tyahvi nyoo tsi Nyoo. Tan cahān ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhú ñi nda ñuu Nazaret

39 Tacan tan tsa yahá tsa javahá ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhú ñi nda ñuu Nazaret tsa canyii Galilea nu cuví ñuu maa ñi.

40 Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahān ra luhlu Jesús tsihin ra maestro cuenda ley vehe ñuhu naha ra

41 Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya.

42 Tan tsa quitá tsa utsi uvi cuiya ra Jesús, tan tsaḥan tandihí ñi nda ñuu Jerusalén, cuhva tuhun tsa iyó maa ñi.

43 Tan quívi ndihí vico, tan vatsí nuhu ñi, maa tyin ra luhlu Jesús ndoḡ ra ñuu Jerusalén can. Tan ña jahá jutu ra tan sihi ra cuenda.

44 Tsicá iñi maa ñi tyin vatsí maa ra tyañu tandihí nyívi ican. Tan ndihí iin quívi tsicá ityi ñi. Tacan tan quitsahá nanducú ñi tsi ra tyañu nyívi nacotó tsi ñi.

45 Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

46 Tan tsa yahá uñi quívi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

47 Tan tandihí nyívi tsiñi tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra.

48 Cuhva tsa nyeḡ jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javahá un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

49 Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyeḡ yu tyiñu Jutu yu? —catyí ra.

50 Maa tyin ña cutuñi iñi ñi tsa caahán ra tsihin ñi.

51 Tacan tan cuanuhú ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihñin vaha ña tandihí tuhun ihya tsitsi añima ña.

52 Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan si xaan cuñi Nyoo tsihin ra, tacan tucu nyívi, si xaan cuñi ñi tsihin ra.

3

Nu cahān ra Juan, ra jacoondutyá tsi nyívi, tuhun Nyoo nuu tsiqui (Mt. 3.1-12; Mr. 1.1-8; Jn. 1.19-28)

1 Tsa quitá tsaḥan cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisantias ndacá ñaha ra Abilinia quívi can.

² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quívi can cahān Nyoo tsihin ra Juan sehe ra Zacarías iin nu tsiqui.

³ Tan ra Juan tsicá nuu ra tandihí ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyívi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tucahnu iñi cuatyí ñi, catyí ra.

⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahān tsanaha. Tan catyí ra:

Cua tyaa soho yo ndusu ra nu caná tsa ra nu tsiqui tan catyí ra:

“Ñuñā ndo iin ityi cuítí tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

⁶ Tacan tan tandihí nyívi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahān ra Juan tsihin nyívi.

⁷ Tan tsa cuahán nyívi tsa cuñí ñi jacoondutya ra tsi ñi, tan catyí ra tsihin ñi:

—¡Nyooho cuví ndo tumaa tata coo! ¿A cuñí ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

⁸ Yacan ñasama ndo cuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo. Tan ña nduyaa ndo cahan ndo tyin nyívi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyívi ra Abraham.

⁹ Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsítí vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahān ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsaá tucu ra tsa tavá xuhun cuenda ra ndacá ñaha nda ñuu Roma, tsa cuñí ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicā tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahān ra Juan tan catyí ra:

—Ña quinyaa ca ndo tsa tsii nyívi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tsihin yahvi ndo —catyí ra Juan.

¹⁵ Tan quívi can tandihí nyívi ndatú ñi tsi ra Cristo. Tan tsicá iñi ñi tun juvin ra Juan cuví Cristo.

¹⁶ Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan

ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhú ihñi.

¹⁷ Tan ra ican ndahá ra pala tyin cua jandava ra trigu. Cua natava siin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

¹⁸ Tan tacan cañan ra Juan tsihin nyivi can. Tan náa ndihi ca maa cuhva cañan ra tan jacoto ra tsi ñi nácaa tsa cua quitsi Sehe Nyoo.

¹⁹ Tacan tucu ñi nduxaān ra Juan tsi ra Herodes, ra ndacá ñaha Galilea, tsa cuenda tsa naquihñin ra tsi ña Herodías, ñasiñi ra Felipe, yañi ra, tsihin tsa cuenda náa ndihi tsa ña vaha javahá ra.

²⁰ Maa tyin ña tyaa yahvi maa ra Herodes tuhun cañan ra Juan. Nu ndihi tuhun tinyji ra tsi ra Juan tsitsi vehe caa.

Nu jacoondutya ra Juan tsi ra Jesucristo

(Mt. 3.13-17; Mr. 1.9-11)

²¹ Tsa ndi cumañi ca cahun ra Juan vehe caa tan jacoondutya ra tsi tandihi nyivi. Tan jacoondutya ndihi ra tsi ra Jesús. Tsa yaha tsicoondutya ra, tsicān tahvi ra tsi Nyoo, tacan tan nuñā andivi.

²² Tan nuu Tatyí Ii Nyoo siqui ra tumaa iin paloma. Tan cañan iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

Cuhva quitsi tata ra Jesucristo

(Mt. 1.1-17)

²³ Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihi nyivi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra.

²⁴ Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra.

²⁵ Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Eslí cuví tsi ra. Tan ra Eslí, sehe ra Nagai cuví tsi ra.

²⁶ Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra.

²⁷ Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra.

²⁸ Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra.

²⁹ Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra.

³⁰ Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra.

³¹ Tan ra Eliaquim, sehe ra Melea cuv̄i tsi ra. Tan ra Melea, sehe ra Mainán cuv̄i tsi ra. Tan ra Mainán, sehe ra Matata cuv̄i tsi ra. Tan ra Matata, sehe ra Natán cuv̄i tsi ra.

³² Tan ra Natán, sehe ra David cuv̄i tsi ra. Tan ra David, sehe ra Isaí cuv̄i tsi ra. Tan ra Isaí, sehe ra Obed cuv̄i tsi ra. Tan ra Obed, sehe ra Booz cuv̄i tsi ra. Tan ra Booz, sehe ra Salmón cuv̄i tsi ra. Tan ra Salmón, sehe ra Naasón cuv̄i tsi ra.

³³ Tan ra Naasón, sehe ra Aminadab cuv̄i tsi ra. Tan ra Aminadab, sehe ra Aram cuv̄i tsi ra. Tan ra Aram, sehe ra Esrom cuv̄i tsi ra. Tan ra Esrom, sehe ra Fares cuv̄i tsi ra. Tan ra Fares, sehe ra Judá cuv̄i tsi ra.

³⁴ Tan ra Judá, sehe ra Jacob cuv̄i tsi ra. Tan ra Jacob, sehe ra Isaac cuv̄i tsi ra. Tan ra Isaac, sehe ra Abraham cuv̄i tsi ra. Tan ra Abraham, sehe ra Taré cuv̄i tsi ra. Tan ra Taré, sehe ra Nacor cuv̄i tsi ra.

³⁵ Tan ra Nacor, sehe ra Serug cuv̄i tsi ra. Tan ra Serug, sehe ra Ragau cuv̄i tsi ra. Tan ra Ragau, sehe ra Peleg cuv̄i tsi ra. Tan ra Peleg, sehe ra Heber cuv̄i tsi ra. Tan ra Heber, sehe ra Sala cuv̄i tsi ra.

³⁶ Tan ra Sala, sehe ra Cainán cuv̄i tsi ra. Tan ra Cainán, sehe ra Arfaxad cuv̄i tsi ra. Tan ra Arfaxad, sehe ra Sem cuv̄i tsi ra. Tan ra Sem, sehe ra Noé cuv̄i tsi ra. Tan ra Noé, sehe ra Lamec cuv̄i tsi ra.

³⁷ Tan ra Lamec, sehe ra Matusalén cuv̄i tsi ra. Tan ra Matusalén, sehe ra Enoc cuv̄i tsi ra. Tan ra Enoc, sehe ra Jared cuv̄i tsi ra. Tan ra Jared, sehe ra Mahalaleel cuv̄i tsi ra. Tan ra Mahalaleel, sehe ra Cainán cuv̄i tsi ra.

³⁸ Tan ra Cainán, sehe ra Enós cuv̄i tsi ra. Tan ra Enós, sehe ra Set cuv̄i tsi ra. Tan ra Set, sehe ra Adán cuv̄i tsi ra. Tan ra Adán, sehe Nyoo cuv̄i tsi ra.

4

Nu nducu cuhva nu ña vaha tsi ra Jesús (Mt. 4.1-11; Mr. 1.12-13)

¹ Tan ñihi nyaá Tatyí li Nyoo tsihin ra Jesús tsa yaha tsi coondutyá ra, quita ra yutya Jordán tan cuanuhu ra. Tan quih̄in Tatyí li Nyoo tsi ra, tan tsaḥan ra iin nu cuv̄i nu tsiqui

² nu tsinyī ra uvi xico nduvi. Tan ña tsats̄i maa ra tandīhi quivi ican. Yaha can tan quits̄j tsa tsiocó ra. Tan nducú cuhva nu ña vaha tsi ra.

³ Tan catyí nu tsihin ra:

—Tatun juvin Sehe Nyoo cuv̄i tsi un, caḥan tsihin yuu ihya, na nanduvi tsi paan catsi un.

⁴ Tan ra Jesús nacahaḥan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyivi coonyito ñi, tyin coonyito ñi tsihin tandīhi tuhun caahán Nyoo —catyí ra Jesús tsihin nu ña vaha.

⁵ Tacan tan quih̄in nu ña vaha tsi ra Jesús, cuahán ra iin jiñi yucu sucun. Tan iin yaha ñi janahaḥ nu tandīhi tsa cuca nu ndacá ñaha nu ñuu ñayivi ihya tsi ra Jesús.

⁶ Tan catyí nu tsihin ra:

—Cuhva yu tandīhi tsa nyehé un tun cuñí un tyin maa Nyoo tsaḥ tsa cundaca ñaha yu tandīhi can, tan ndáa ra cuñí yu cuhva yu can, cuvi tsi ra.

⁷ Tatun yoocho tan cuñī tsi un nuu yu ihya tan jacahnu un tsi yu, tandīhi can cua cuhva yu tsi un —catyí nu ña vaha tsihin ra.

⁸ Tan nacahaḥan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jachanu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

⁹ Tacan tan quihñ nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaa nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu.

¹⁰ Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuando ra naha tsi un.

¹¹ Cua janahndi ra naha tsi un. Tan ña cua nañi tsaha un nu yuu.

¹² Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsaha caahán ra Jesús tuhun Nyoo tsihin nyivi
(Mt. 4.12-17; Mr. 1.14-15)

¹⁴ Tan tsa yaha tsa nducu cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyivi tuhun ra nñi cahnu Galilea can.

¹⁵ Tan jacuahá ra tsi nyivi nu cuví vehe ñuhu tandihí ñi ñuu. Tan tandihí ñi jacahnú ñi tsi ra.

Tsa tsaq nyico ra Jesús ñuu Nazaret nu tsahnú ra
(Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnú ra. Tan iin quivi quitatú nyivi, quihvi ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo.

¹⁷ Tan tsahá ra naha iin libru tsa tyaá ra Isaías ra cuví ndusu yuhu Nyoo. Tan cuhva tsa nuñá ra, nañihí ra iin nu catyí tsi:

¹⁸ Iyó Tatyí Ii Nyoo tsihin yu, tyin maa Nyoo tava tyiñu tsi yu cahan yu tuhun ra tsihin nyivi ndaahvi.

Tan janduvaha yu tsi nyivi tsa uhvi añima.

Tan maa ra tava tyiñu tsi yu tyin jacoto yu tsi nyivi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa.

Tan cua nacoq nuña yu tsi nyivi tsa iyó tundocho.

¹⁹ Tan jacoto yu tsi nyivi tyin tsa quita quivi tsa nyaá Nyoo tumañi iñi tsihin ñi.

²⁰ Tacan tan ndihí cahvi ra tan nacaşi ra nuu libru can. Tan nacuhva ra tsi iin ra tsa jatyinyeé tsihin tyiñu vehe ñuhu can. Tan tsinyaá ra Jesús. Tacan tan tandihí nyivi tsa nyecú ican, ndoq ñi tsa nyehé ñi tsi ra.

²¹ Tacan tan catyí ra tsihin ñi:

—Vityin quivi ihya tsa cundaa cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

²² Tan tandihí nyivi tsa nyecú can, vaha xaan cahan ñi tuhun ra. Tan iyo xaan cuñi ñi tsihin tandihí tsa vaha tsa cahan ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

²³ Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñi tucu ndo catyí ndo: “Tandíhi tsa javahá un ñuu Capernaum tsitó ndi, javaha ndíhi tucu can ñuu maa un ihya.”

²⁴ Tan cahán ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyívi ñuu ra naha tsi ra naha.

²⁵ Tan tsa nditsa tyin cuaha xaan ñi ndaahvi tsa tsihi y# tsicoo Israel ihya quívi tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahán ra tuhun Nyoo. Tan quívi can ña cuun maa savi uñi cuiya sasava. Tan tsicoo tama cahnu xaan.

²⁶ Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatyinyee ra tsi iin ñaha ndaahvi tsihi y# tsa tsicoo ñuu Sarepta tsa canyí Sidón.

²⁷ Tacan tucu quívi tsicá inga ra cuví ndusu yuhu Nyoo cuenda nyívi Israel, ra Eliseo. Cuaha xaan ra cuuhví tsihin cuehe tyaahyú tsicoo Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra quee ñuu Siria —catyí ra Jesús.

²⁸ Tsa yaha tsiñi ñi tandíhi tuhun can, tandíhi nyívi tsa yucú tsitsi vehe ñuhu can xaan xaan cuñi ñi cuví.

²⁹ Tan nduvitá ñi. Tan tava ñi tsi ra Jesús nda jíñi yucu sucun nda yuhu ñuu, tsa cuñi ñi janacava ñi tsi ra ican.

³⁰ Maa tyin ra Jesús yaha ra tyañu ñi tan cuahán ra.

Nu quitá tatyí ña vaha tsa yihí tsi iin rayi

(Mr. 1.21-28)

³¹ Tan cuahán ra Jesús ñuu Capernaum tsa canyí Galilea. Tan jacuahá ra tsi nyívi tsitsi vehe ñuhu tandíhi sauru, quívi tuhvá nyívi quitatú.

³² Tan iyo xaan cuñi ñi tsihin tsa cahán ra. Tyin ñihi xaan cahán ra tumaa tuhvá ra cumí tyiñu caahán.

³³ Tan iin quívi nyí ra Jesús vehe ñuhu tan iin ra yihí tatyí ña vaha catyí ra caná tsa ra jahá tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Ii Nyoo.

³⁵ Tacan tan nduxaán ra Jesús tsi tatyí ña vaha tsa yihí tsi ra can tan catyí ra:

—Táxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyívi nduva ra can nu ñuhu jahá tatyí ña vaha can, tan nduve ca náa javahá nu tsi ra can. Tan quitá nu cuahán nu.

³⁶ Tandíhi nyívi tsa nyehé can, iyo xaan cuñi ñi tan yuuhví ñi cuví. Tan quitsahá tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quitá tatyí ña vaha ican —catyí ñi.

³⁷ Tacan tan tandíhi ñi ityi quitá natuhun nyívi tuhun ra Jesús.

Nu janduvaha ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸ Tacan tan quitá ra Jesús tsitsi vehe ñuhu can. Tan cuahán ra vehe ra Simón. Tan nu tsaá ra can, canyí ña tyiso ra Simón cuuhví ña tan ñihi xaan

yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña.

³⁹ Tacan tan natuhva ra nu canyii ña tan nacañi nuu ra jiñi ra tan cahan ra tsihin cahñi can na quita tsi. Tacan tan quita cahñi can iin yaha ñi, tan nduvita ña can, quitsaha nanducu ña tsa catsi ra Jesús.

*Nu cuaha xaan nyivi cuuhvi janduvaha ra Jesús
(Mt. 8.16-17; Mr. 1.32-34)*

⁴⁰ Tan tsa tyiso ñicanyii, tandihí nyivi tsa iyó ñi cuuhvi vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhvi can tan janduvaha ra tsi ñi.

⁴¹ Tan cuaha xaan nyivi quita tatyí ña vaha tan cana tsaa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsaḥa ra tsa cahan nahnu, tyin tsitó nahnu tyin juvin ra cuví Cristo.

*Nu tsica ra Jesús cahan ra tuhun Nyoo tandihí ñuu cayucú Galilea
(Mr. 1.35-39)*

⁴² Tsa tuvi inga quivi, tan quee ra Jesús ñuu can. Tan cuahan ra iin nu taxin caá. Tan nyivi nanducu ñi tsi ra. Tan tsaḥa ñi nda nu nyii ra ican. Tan cuñi ñi tsa ña cahun ca ra.

⁴³ Tacan tan catyí ra Jesús tsihin ñi:

—Ndi cuñi ca tsi jacoto yu tsi nyivi tandihí ca ñuu nácaa tan quihvi Nyoo añima ñi tan cundaca ñaha ra tsi ñi. Tyin yacan cuenda vatsi yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

5

*Nu tsaḥa ra Jesús ndatu tsa cuaha xaan tyaca ñihí ra naha
(Mt 4.18-22; Mr. 1.16-20)*

¹ Iin quivi nyaá ra Jesús yuhu miñi nu cuví Genesaret. Tan tsaḥa cuaha xaan nyivi, tyin cuñi ñi tyaa soho ñi tuhun Nyoo. Tan tihin xaan nyii ra Jesús tyañu ñi.

² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quita ra tii tyaca. Tan nacatyá ra naha traya.

³ Tacan tan quihvi ra Jesús tsitsi iin yutun ndoo tsa cuví tsi ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaa ra Jesús tsitsi yutun ndoo can. Tan quitsaha caahán ra tsihin nyivi.

⁴ Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tii ndo tyaca.

⁵ Tan nacahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsaha tyaahnyá tsihin tsa vee tyaca can.

⁷ Tacan tan jandaha ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaḥa ra can naha ra. Tan

jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca.

⁸ Tsa nyehē ra Simón Pedro tsa cuvī tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹ Tyin ra Simón tsihin tandihi ra yucú tsihin ra, nayuhvi xaan ra naha tsa cuenda tsa cuaha xaan tyaca ñihí ra naha.

¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhvi xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tñin ndo tyaca ihya, tacan cua ñihi un nyivi cua cuvī nyivi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoo ra naha tandihi tsa iyó tsi ra naha. Tan cuahán ra naha tsihin ra Jesús.

Nu janduvaha ra Jesús tsi iin ra ndohó cuehe tyaahyú
(Mt 8.1-4; Mr. 1.40-45)

¹² Iin quivi nyii ra Jesús iin ñuu nu iyó iin ra ndohó cuehe tyaahyú. Tan tsa nyehē ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuvī janduvaha un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra.

¹⁴ Tacan tan catyí ra Jesús tsihin ra:

—Coto catyí tuhun un tsihin nyivi. Intuhun ñi tsa cua cahan yu tsihin un, cyaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaá ra Moisés, tan cua cuví tsi iin tsandaa tsi ra jutu can tan tsi nyivi tyin tsa nduvaha un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyivi, ñihi ca quitá tuhun ra. Tan cuaha xaan nyivi ndu iin tyin cuñi ñi tyaa soho ñi tsa caahán ra tan janduvaha ra tsi ñi.

¹⁶ Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvaha ra Jesús tsi iin ra xii
(Mt. 9.1-8; Mr. 2.1-12)

¹⁷ Iin quivi jacuaha ra Jesús tsi nyivi. Tan yucú juhva ra fariseo, ra tyaá yahvi xaan ley Nyoo tsa tyaá ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihi tanñi cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví.

¹⁸ Tacan tan tsaá ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyii ra Jesús.

¹⁹ Maa tyin ña ñihí ra naha nu quihvi ra naha tyin tuvi xaan nyivi. Tacan tan ndaa ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyii ra Jesús tyañu nu tuvi nyivi can.

20 Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyí ra Jesús tsihin ra can.

21 Tacan tan ra maestro cuenda ley vehe ñuhu tsihin ra cuví fariseo, quitsahá tsicá iñi ra naha: “¿Yóo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

22 Maa tyin ra Jesús tsitó ra tsa tsicá iñi ra naha. Tan catyí ra tsihin ra naha: —¿Nacuenda tsicá iñi ndo tacan?

23 ¿Náa tsa yí ca catyí yo? ¿A yí catyí yo: “Cuatyí un tsa yaha ndatsi”, a yí ca catyí yo tsihin iin nyívi xii: “Nduvita tan çaça un”?

24 Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

25 Tan nduvitá ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

26 Tandíhi nyívi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

27 Yaha can tan quitá ra Jesús vehe can. Tan nanyehe ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañí ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

28 Tacan tan nduvitá ra Leví. Tan nacoo ra tandíhi tsa iyó tsi ra. Tan cuahán ra tsihin ra Jesús.

29 Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi.

30 Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

31 Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor.

32 Yuhu ña vatsí yu jatyinyee yu tsi nyívi tsa tsicá iñi tyin vaha ñi, vatsí yu jatyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janaha ra Jesús tyin tatun tsa cuahán ra cua coo nyitya nyívi nyicún tsi ra

(Mt. 9.14-15; Mr. 2.18-20)

33 Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoo nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin

ra tsicá tsihin yooho, ndihi quivi tsatsí ra naha tan tsihí ra naha. ¿Nacuvi? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha ndo tatun nyíi ra tsa cua tindaha tsihin ñi? Ña cuvi. [Tyin sñi cuñi ñi, tan cuñi ñi catsi ñi.]

³⁵ Maa tyin cua quita quivi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra

(Mt. 9.16-17; Mr. 2.21-22)

³⁶ Tacan tan cahan tucu ra Jesús iin cuhva tsihin nyivi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaa can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihi nyivi vinu tsaa tsitsi ññi tsaahnu. Tyin cua tyahnya ññi can tsihin vinu tsaa can. Tan cua tivi vinu can tan tivi ndihi tucu ññi tsaahnu can.

³⁸ Yacan cuenda taahán tsi tyihi yo vinu tsaa tsitsi ññi tsaa. Tyin tacan tan nduvi taahan tsi tan cua jaha cuenda tahan tsi itsi.

³⁹ Tan yoñi tsihí vinu tsahnu, tan cuñi ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñi tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quivi quitatú nyivi

(Mt. 12.1-8; Mr. 2.23-28)

¹ Iin quivi quitatú nyivi, yahá ra Jesús mahñu tsa tatsj nyivi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsj ra naha tsiti can.

² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo?

³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javahá ra David tan ra cutahán tsihin ra quivi tsa tsisoco ra naha?

⁴ Quihví ra tsitsi vehe Nyoo. Tan quihñ ra paan tsa tyiso nyivi nuu altar Nyoo. Tan tsatsj ra. Tan tsahá ndihi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

Nu janduvaha ra Jesús tsi iin ra na ityi ndaha

(Mt. 12.9-14; Mr. 3.1-6)

⁶ Inga quivi quitatú nyivi quihví ra Jesús tsitsi vehe ñuhu. Tan quitsaha jacuahá ra tsi nyivi. Tan nyehé ra tsi iin ra tsa na ityi ndaha cuaha.

⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quivi quitatú nyivi, tyin tacan tan cuvi tyaa ra naha cuatyí tsi ra Jesús.

⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunyaa nyityi mahñu ra naha ihya.

Tacan tan ra na ityj ndaha can nduvita ra. Tan tsinyaa nyityi ra mahñu ra naha.

⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Naa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityj ndaha can:

—Cañihi ndaha un.

Tacan tan ra na ityj ndaha ican cañihi ra ndaha ra. Tan nduvaha ndaha ra.

¹¹ Maa tyin ra yucú ican naha ra, cuxaən ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

¹² Quivi ican ndaa ra Jesús iin yucu. Tan ñiñu maa tsican tahvi ra tsi Nyoo.

¹³ Tan tsa tuvi, cana ra tsi tandihi ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñi tsi catyí tsi “ra tsa tava tyiñu Nyoo”.

¹⁴ Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé;

¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuvi ra cuenda partido tsa cuñi cahun cuatyí siqui ñuu Roma tsa ndacá ñaha tsi ñi;

¹⁶ tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuaha ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsa cuaha tucu nyivi quee ñuu Jerusalén tsihin tandihi ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsa ñi tyin tyaa soho ñi tuhun caahán ra Jesús. Tan tandihi nyivi cuuhvi cuñi ñi tsa janduvaha ra tsi ñi.

¹⁸ Tan tandihi nyivi tsa yihí tatyí ña vaha janduvaha ra tsi ñi.

¹⁹ Tan tandihi ñi cuñi ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahan ra Jesús tsihin nyivi tsa naquihin ndaahvi ra

(Mt. 5.1-12)

²⁰ Tacan tan nanyehə ra Jesús tsi ra tsicá tsihin ra. Tan catyí ra tsihin ra naha:

—Tandihí nyooho tsa ndaahvi, si xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandihí nyooho tsa tsisocó vityin, si xaan cua cuñi ndo. Tyin coo quivi ña cua cusoco ca maa ndo. Tan tandihí nyooho tsa tsacú tsa cuiihya cuñi ndo, si xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa si cuñi ndo.

²² Cusi iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyí ñi tyin nyivi ña vaha cuvi ndo tyin tsinú iñi ndo tsi maa yu tsa cuvi yu Rayi quee nda gloria.

²³ Sii cuñi ndo quivi can tyin tacan tucu javaha nyivi ñi tahan tsanaha. Cuxaan ñi tsi ra cuvi ndusu yuhu Nyoo. Ndava ndo tsihin tsa sii cuñi ndo. Tyin cahnu xaan ndatu cua ñihi ndo nda gloria.

Tsehe cahan ra Jesús tsihin nyivi ña tsinú iñi tsi ra

²⁴ Maa tyin ndahvi nyooho, ñi cuca. Tyin vityin sii xaan cuñi ndo tsihin tandihi tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuihya iñi. Tan cua vacu xaan ndo.

²⁶ Tan ndahvi nyooho tsa vaha caahan nyivi tuhun ndo. Tyin tacan caa tucu nyivi tsicoo tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyivi xaan iñi tsi ndo

(Mt. 5.38-48; 7.12)

²⁷ Tandihi nyooho tsa tsiñi tsa caahan yu, catyi yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehe tsi ndo.

²⁸ Cahan ndo tsa vaha tsihin nyivi tsa caahan ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahan nyaá tsi ndo.

²⁹ Tatun iin ra cañi iin tsiyo nuu ndo, cuhva ndihi ndo inga tsiyo, nacañi ndihi maa ra. Tatun iin ra quinyaá tsaqueta nditsi ndo, cuhva ndihi ndo camiseta ndo.

³⁰ Cuhva ndo náa ndihi tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi.

³¹ Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi.

³² Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó.

³³ Tan tatun tsihin nyivi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyivi, nduve tsa vaha icá ndo cuvi can, tyin nyivi caquiñi, tacan icá tucu ñi can.

³⁴ Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can tumañi iñi tsi ñi.

³⁵ Maa tyin nyooho, cuñi ndo tsi nyivi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyivi tsa ña nacuhvá tyahvi nyoo tsi ra, tan tsihin nyivi caquiñi.

³⁶ Cu uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaá yo tsi inga nyivi

(Mr. 7.1-5)

³⁷ Ña cahan nyaá ndo tsi nyivi, tacan tan Nyoo ña cua cahan nyaá ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo.

³⁸ Cuhva ndo tsa tsiñi ñuhu tsi nyivi. Tacan tan cua kuhva tucu maa Nyoo tsa tsiñi ñuhu tsi maa ndo. Cuaha cua kuhva ra tsi ndo. Tyin tumaa kuhva cua kuhva ndo tsi nyivi, tacan kuhva cua kuhva Nyoo tsi ndo —catyí ra Jesús.

³⁹ Tan tsahaḡa ra Jesús kuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva.

⁴⁰ Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahaḡa cahví ra. Cua coto ra nda ndihi cahví ra.

⁴¹ ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

⁴² Tatun tinuu maa un nyii iin yutun cahnu, ¿nácaa cua cuví catyí un tsihin ra yañi un: “Naha, na tava yu tsahan luhlu tsa nyii tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuví nyehé vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi

(Mt. 7.17-20; 12.34-35)

⁴³ Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

⁴⁴ Tandihí yutun nacotó yo tsi tun tsihin tsiti tun. Tyin tiñata, ña cua kuhva tun mangu. Tan ndi intuhun iñu nduuhva ña cua kuhva tun uvas [tsa cuví yucu vixi].

⁴⁵ Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi

(Mt. 7.24-27)

⁴⁶ ¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu?

⁴⁷ Vityin cua catyí yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo kuhva catyí yu.

⁴⁸ Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahán ra yuu. Tan tyaḡa ra tyihyo tsaha vehe can tsata yuu can. Tan quivi nduñihí cuún savi, ndutya can tsatyaḡa xaan tsi tsaha vehe, maa tyin vehe can ña taní maa tsi tyin vaha xaan quita tyihyo tsaha tsi.

⁴⁹ Maa tyin nyivi tsa tsiñi tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaḡa savi, tan cuñihí cuún savi, tan yahaḡa ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

7

Nu janduvahá ra Jesús musu iin ra capitán andarú

(Mt. 8.5-13)

¹ Ndihi cahan ra Jesús tsihin nyivi, tacan tan cuanuhuḡa ra inga tsaha nda ñuu Capernaum.

² Tan ñuu can iyó iin ra capitán. Tan iyó iin musu ra tsa cuñí xaan ra. Tan cuuhví ra can. Tan tsa cuñí cúu ra.

³Tan tsa tsiṭó ra capitán can tuhun ra Jesús, tacan tan tavaṛ tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra.

⁴⁻⁵Tacan tan tsaṛ ra tsahnu ican naha ra nu nyíi ra Jesús. Tan quitsaha caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyívi cuví ra tsihin yo tsa cuví yo nyívi Israel. Nda cuanda javaha ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñí ra tyin janduvaha un tsi ra.

⁶Tacan tan cuahán ra Jesús tsihin ra naha. Maa tyin tsa ndi cumañi ca tsa ra nda vehe ra capitán can, tan ra capitán can tavaṛ tyiñu ra tsi ra vaha iñi tsi ra. Tacan tan tsaṛ ra naha nu nyíi ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra.

⁷Yacan ña cana iñi ra quitsi ra nu nyíi un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra?

⁸Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tavaṛ tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹Tsa tsiñj ra Jesús tsa cahan ra can naha ra, tan iyo xaan cuñí ra. Tan nanyehę ra tsi nyívi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tuma ra ican —catyí ra Jesús.

¹⁰Tacan tan cuanuhu ra vaha iñi tsi ra capitán can naha ra. Tan tsa tsaṛ ra naha nda yuvehe, tan nyehe ra naha tyin tsa nduvahaṛ musu ra.

Nu janandotó ra Jesús tsi sehe iin ñaha ndaahvi tsihiṽyí

¹¹Tsa yahaṛ yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyívi.

¹²Tacan tan cuhva tsa cua tsa ra yatyin ñuu ican, nyehe ra tyin cuaha xaan nyívi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihiṽyí. Tan intuhun ñi maa ra cuví sehe ña, tan tsihiṽyí ra.

¹³Tan tsa nyehe ra Jesús tsi ña, tan cundaahviṽ iñi ra nyehe ra tsi ña. Tan catyí ra tsihin ña:

—Ña vacu un.

¹⁴Tsahan natuhvaṛ ra tan tñin ra tsatun tsa nyíi ndiyi can. Tacan tan ra nyisó tsi ndiyi can naha ra tsicuñiṽ ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

¹⁵Tacan tan nduvitaṽ ndiyi can. Tan nacunyaṛ ra. Tacan tan quitsaha caahán ra. Tan ra Jesús tacanuhvaṛ cuenda ra tsi ra tsi sihi ra.

¹⁶Tsa nyehe ñi tsa tacan nandotó ra jahaṛ ra Jesús tan yuuhví xaan ñi, tan quitsahaṛ jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaṛ nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

¹⁷Tan tandihiṽ maa nyívi tanñi cahnu Judea, tsiṭó ñi tsa javahaṛ ra Jesús.

*Nu jacuhun ra Juan uvi taahan ra tsa tsicá tsihin ra nu nyíi ra Jesús
(Mt. 11.2-19)*

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha.

¹⁹ Tan tava tyiñu ra tsi ra naha na cuhun ra naha nu nyíi ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra.

²⁰ Tacan tan ra tsa jacuhun ra Juan, cuahán ra naha. Tan tsaá ra naha nu nyíi ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehé ñi jahá ra.

²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyí tuhun ndo tsihin ra Juan tandihí tsa nyehe ndo, tan tandihí tsa tsiñi ndo. Tan catyí ndo tsihin ra: ra cuaa nanyehé ra, ra coxo nacacá ra, ra ndoho cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin

²³ sií xaan cuñi ñi nyicún tsi yu tun ña ndu uví ñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quívi tsañan ndo nuu tsiqui ndii ícan? ¿A nyehe ndo iin ndoo tsa janduvá tatyí?

²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.

²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo.

²⁷ Juvín ñi tuhun ra Juan cuví tsa nyaá nuu tutu tsa tyaá ra Isaías tañan tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un. Na natyiso vaha ra ityi nu cua cuhun un.

²⁸ Tan catyí yu tsihin ndo tyin tsitsi tsa tandihí ra tsa cacú jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ Tandihí nyívi tan ra tava xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuii xaan tsi.

³⁰ Maa tyin tandihí ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús.

³¹ Tan catyí tucu ra:

—¿Náa cua jandu inducu yu tsihin nyoooho, nyívi iyó quívi ihya? ¿Yóo caá tumaa caá ndo?

³² Tumaa ra nyihi cuví nyoooho. Tyin ra nyihi jasiquí nuyahvi. Tan caná tsaá tahan ra naha, tan catyí ra naha: “Tiví ndi tiyoo tan ña tsañi ndo yaa.

Tan tsitaṅ ndi yaa cuiihya, tan ña tsacuṅ ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.]

³³ Tyin ra Juan, ra jacoondutyá, quitsí ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra.

³⁴ Tan quitsí tucu yuhu tan cuví yu Rayí tsa queeṅ nda gloria. [Tan tsatsí yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra.

³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacotoṅ ra tsi ra Jesús tyin cuhun ra cucatsi ra nda yuvehe ra. Tan tsaṅ ra Jesús vehe ra, tan tsicunyaṅ ra nu mesa.

³⁷ Tacan tan iin ñaha sii iñi ñuu ícan tsitoṅ ña tyin nyii ra Jesús ícan. Tan tsaṅ ña tsihin iin yutyí yuu xiñu tsitú tsi ndutyá tami.

³⁸ Tan tsinyaṅ ña yatyin ñi tsaha ra. Tan quitsahá tsacuṅ ña tyin ndu uví iñi ña cuatyí ña. Tan cuún ndutyá nuu ña. Tan tsihin ndutyá nuu ña nacatyá ña tsaha ra Jesús. Yahá can tan jana ityiṅ ña tsaha ra tsihin ixi jiñi ña. Tan tyayuhuṅ ña tsaha ra. Tacan tan tyosoṅ ña ndutyá tami ícan tsata tsaha ra.

³⁹ Tsa nyehé ra fariseo can tsa tacan ícaṅ ña, tan tsicá iñi ra: “Tatun nditsa tsa Nyoo jaquitsí tsi ra ihya, cua nacoto ra yóo ñaha tñin tsaha ra, tyin ñaha ícan, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ícan:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahán ra Simón, tan catyí ra:

—Vaha, cahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayii nyaá cuenda ra xuhun tsi iin ra tsa tuhvá tsahá nuu xuhun. Tan iin ra ícan nyaá cuenda ra uhun cientu denario. Tan inga ra nyaá cuenda ra uvi xico utsi ñi denario.

⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ícan, jahá ra tucahnu iñi tsi nduvi taahan ra naha. Tan vityin catyi tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ícan? —catyí ra Jesús.

⁴³ Tacan tan nacahán ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

⁴⁴ Tacan tan nanyehé ra Jesús tsi ñaha ícan, tan catyí ra tsihin ra Simón:

—¿A nyehé un tsi ñaha ihya? Yuhu quihviṅ yu tsitsi vehe un, tan ña tsahá un ndutyá tsa ndoo tsaha yu tumaa cuhva tsa iyó yu. Tan ñaha ihya nacatyá ña tsaha yu tsihin ndutyá nuu ña. Tan jana ityiṅ ña tsihin ixi jiñi ña.

⁴⁵ Yooho ña tyayuhuṅ un ndaha yu, tumaa cuhva tsa iyó yu, maa tyin maa ña nda cuanda tsa quihviṅ yu ihya tan ña jandihí ña tsa tyayuhú ña tsaha yu.

⁴⁶ Tan yooho ña tyihí un acetye jiñi yu, maa tyin ñaha ihya tyihí ña ndutyá tami tsaha yu.

⁴⁷ Tan catyí yu tsihin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñí xaan ña tsi yu. Tan nyívi tsa jahá yu tucahnu iñi luxu ñi cuatyí ñi, luxu ñi cuñí ñi tsi yu —catyí ra Jesús.

⁴⁸ Tacan tan catyí ra Jesús tsihin ña can:

—Cuatyí un tsa yahá catsiyó, tyin tsa jahá Nyoo tucahnu iñi tsi un —catyí ra Jesús tsihin ña.

⁴⁹ Tacan tan ra yucú tsihin ra quitsahá tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyívi.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacú un tyin tsinú iñi un tsi yu. Cuaahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹ Tsa yahá can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyívi. Tan jacotó ra tsi ñi tuhun vaha nácaa cuñí Nyoo cundaca ñaha ra tsi ñi. Tan tsa utsi uvi taahan ra tsa tavá tyiñu ra, cuahán ra naha tsihin ra.

² Tan cuahán tucu juhva ñiñaha tsa janduvahá ra: ñi cuhví tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvahá ña.

³ Tan cuahán tucu ña Juana, ñasiñhi ra Chuza, ra cumí tyiñu cuenda ra Herodes, tan ña Susana tsihin tandiñi ca ñiñaha tsa jatyinyee tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo (Mt. 13.1-9; Mr. 4.1-9)

⁴ Tan cuaha xaan nyívi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsahá caahán ra tsihin ñi tsihin iin cuhva tsahá cuenda ra, tan catyí ra:

⁵ —Quitá iin ra vehe ra. Cuahán ra nu iyó tyiñu jahá ra, tyin cua tatsi ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyívi tsata can. Tan quitsí saa tan tsatsí ti.

⁶ Tan juhva ca tsiti can cucoyo tyañu yuu. Caná tsiti ican. Maa tyin na ityi tsi tyin luxu cuií ñi ñuhu yihí tsaha tsi. Tan nduve catsin.

⁷ Tan juhva ca tsiti cucoyo tyañu iñu. Maa tyin quívi caná trigu iin caa ñi tsihin iñu can, iñu can tsahñi tsi trigu can.

⁸ Maa tyin juhva ca tsiti cucoyo nu ñuhu vaha. Tan quívi tsahnu tsi, vaha xaan tsahá tsi tsiti. Tyin tsa iin ñi tsiti ican, cientu tsiti quitá tsihin tsi —catyí ra Jesús.

Tan tsa yahá tsahá ra cuhva can, tan quitsahá caná tsa ra tyin na tyaa soho nyívi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacotó ra Jesús nacuenda jacuahá ra tsi nyívi tsihin cuhva caahán ra tsihin ñi

(Mt. 13.10-17; Mr. 4.10-12)

⁹ Yahá can tan ra tsicá tsihin ra, nducu tuhun ra naha tsi ra náa cuñí tsi catyí cuhva tsa cahan ra tsihin nyívi.

¹⁰ Tacan tan catyí ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñí ñi maa tyin ña cua cutuñi iñi ñi náa tuhun cuví can.

Nu tsaḥa cuenda ra Jesús cuenda ra tsa tatsi

(Mt. 13.18-23; Mr. 4.13-20)

¹¹ Cuhva tsa tsaḥa yu tsi ñi, cuñí tsi catyi tsi tyehen: tsiti can, tuhun Nyoo cuví tsi.

¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Si xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihí ñi tsa tsinu iñi ñi.

¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi si ca cuñí ñi tsihin tsa si caá tsa iyó nu ñuhu ñayivi. Tan cuví ñi tumaa cuví yutun tsa ña tsaḥa tsiti.

¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añima ñi tyin tsinu iñi ñi tsihin tanii añima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

Nu caḥan ra Jesús tyin ña cua tyihi xeehe yo ñuhu tsa jandunditsin Nyoo añima yo coto quinyaa ra itsi

(Mr. 4.21-25)

¹⁶ Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihví nyivi tsitsi vehe maa tyin nditsin.

¹⁷ Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo.

¹⁸ Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

Nu tsaḥa cuenda ra Jesús tyin tumaa yañi ra, tan tumaa sihi ra, tacan cuví nyivi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaḥa sihi ra Jesús tsihin yañi ra nu nyii ra. Maa tyin ña cuví tsaḥa ñi tyin tuvi xaan nyivi.

²⁰ Tacan tan jacoto nyivi nyecú ican tsi ra Jesús, tan catyi ñi:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

²¹ Tacan tan nacahan ra Jesús, tan catyi ra:

—Tandihí maa nyivi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyi ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quiví quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsaha tyihí tsi ndutya tsitsi yutun ndoo ican. Tan cuñi nyee yutun ndoo can tyin cuaha xaan ndutya quihví.

²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñi nyee yo tsitsi ndutya —catyí ra naha.

Tacan tan nduvita ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi.

²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñi ra naha. Tan quitsaha tsicá tuhun tahan ra naha:

—¿Yóo ra cuví ra ihya? Tyin nda cuando tatyí tan ndutya tan tyaá yahvi tsi tsa caahán ra.

Nu nduvaha iin ra yihí tatyí ña vaha nda Gadara

(Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíí yuhu miñi ityi nuu Galilea tsa canyíí inga tsiyo miñi can.

²⁷ Tan quita ra Jesús tsitsi yutun ndoo ican. Tan ican tsaá iin ra ñuu tsa canyíí Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsi ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyiví iyó. Ra ican tsaá ra nu nyíí ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

³⁰ Tan nducu tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacaahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.]

³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuví maa quita nahnu.

³² Tan tsicán nahnu tsi ra Jesús na cuhva ra quihví nahnu tsitsi quini tsa yucú yuhu miñi ican tsatsi ti naha ti. Tacan tan tsaha ra Jesús ndatu tsa quihví nahnu tsitsi quini ican naha ti.

³³ Tan quitã nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinu quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhvi xaan ra naha. Tan tsinu ra naha cuahán ra naha cua nacatyí tuhun ra naha tsa cuví can tsihin nyivi nda ñuu. Tan tandihi ñi nyivi tsa nyehe ra naha, tan nacatyí tuhun ra naha tsa cuví ican.

³⁵ Tacan tan tsañan nyivi tsinyehe ñi náa tsa cuví, tan tsañ ñi nu nyii ra Jesús. Tan nañihí ñi tsi ra tsa tsa yaha quitã tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhvi xaan ñi cuví.

³⁶ Tacan tan tandihi ñi tsa nyehe tsa cuví ican, nacatyí tuhun ñi tsihin tandihi ca nyivi nácaa quitã tatyí ña vaha tsi ra ndaahvi can, tan nduvahã ra.

³⁷⁻³⁹ Tacan tan tandihi nyivi iyó Gadara can quitsahã caahán ñi tsihin ra Jesús na cunuhu ra ityi nu quee ra. Tyin nayuhvi xaan ñi tsa javahã ra tsihin nu tatyí ña vaha ican. Tacan tan ra tsa quitã nu tatyí ña vaha can nahnu, cahán ndaahvi ra tsihin ra Jesús, na cuhva ra cahun ndihi ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihi tsa javahã Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahã ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihi nyivi ñuu ican nácaa janduvahã ra Jesús tsi ra.

Nu nduvahã ña sehe ra Jairo tan ñaha tsa tñin jahma ra Jesús

(Mt. 9.18-26; Mr. 5.21-43)

⁴⁰ Quivi tsa tsaã ra Jesús inga tsaha tsa tsañan ra inga tsiyo miñi can, cuaha xaan nyivi ndatú tsi ra. Tan sñi xaan cuñi ñi tyin tsaã nyico ra.

⁴¹ Tacan tan tsaã iin ra tsa nañi Jairo, ra cuví ityi nuu vehe ñuhu, tan tsicuiñi tsiti ra nuu ra Jesús. Tan quitsahã caahán ndaahvi ra tsihin ra na cahun ra vehe ra.

⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi.

⁴³ Tan tsihin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuún niñi ña. Tan tsa ndihi maa xuhun ña janaã ña tsihin doctor tan ña nduvahã ña.

⁴⁴ Maa tyin tsaã ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

⁴⁵ Tacan tan catyí ra Jesús:

—¿Yóo tñin jahma yu?

Tan tandihi ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyiví t̃j̃n jahma yu, tyin tuṽj̃ iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quitsaha ñihí ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenda t̃j̃n ña jahma ra, tan nácaa nduvahá ña iin yaha ñi ican. Tan tsiñi tandihí nyiví tsa nacatyí tuhun ña.

⁴⁸ Tacan tan catyí ra Jesús tsihin ña:

—Tsa nduvahá un tyin tsinú iñi un tsi yu. Cuaahan tsihin tsa vaha —catyí ra.

⁴⁹ Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yahá tsih̃j̃ ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñi ra Jesús tsa cahán ra ican, tan catyí ra tsihin ra Jairo:

—Ña nayuhvi un. Ts̃j̃nu iñi. Tan ña sehe un cua nduvaha ña —catyí ra.

⁵¹ Tan cuhva tsa tsaá ra Jesús vehe ra Jairo, ña tsaá ra quihví nyiví tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihví ñi tsitsi vehe nu canyí ñaha luhlu tsa tsih̃j̃ can.

⁵² Tan tandihí ñi tsacú xaan ñi tsa cuenda tyin tsih̃j̃ ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsih̃j̃ ña. Quixí ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsih̃j̃ ña.

⁵⁴ Tacan tan t̃j̃n ra Jesús ndaha ña. Tan tsaá nacahán ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvitá ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñí ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuṽj̃ ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Caná ra Jesús tsa utsi uvi taahan ra tsicá tsihin ra. Tan tsaá ra tunyee iñi cahnú tsi ra naha tyin cuví tava ra naha tatyí ña vaha tsi nyiví, tan cuví janduvaha ra naha tsi nyiví cuuhví.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyiví. Tan tava tucu ra tyiñu tsi ra naha na janduvaha ra naha tsi nyiví cuuhví.

³ Tan catyí ra tsihin ra naha:

—Nduve tsa cuiso ndo ityi cahun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cahun tsihin ndo.

⁴ Tan ndáa cuṽj̃ ñi vehe tsaá ndo, ndo ndo ican nda cuanda quita quiví tsa cahun ndo inga ñuu.

⁵ Tan nu ña cuñí nyiví tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvahá ra naha tsi nyivi cuuhví.

Nu cuñí ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanií cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandoto.

⁸ Tan yihí ñi catyí ñi tyin ra Elías quituví nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto.

⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehé ra tsi ra.

Nu tsahá ra Jesús tsa catsi uhun mil rayii

(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaá nyico ra tava tyiñu ra Jesús, tan nacatyí tuhun ra naha tsihin ra Jesús tandihí maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañí Betsaida.

¹¹ Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihín cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

¹² Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyii yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyoocho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandihí nyivi ihya. Ndi maa cuhun ndi cujata ndí, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayii yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandihí ñi jahá ra naha.

¹⁶ Tan quihín ra Jesús uhun taahan paan ican tsihin uvi taahan tyaca ican. Tan nanyehé ndaa ra ityi andivi, tan nacuhvá ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsahá ra tsi ra tsicá tsihin ra, na tsatsa ra naha can tsi nyivi.

¹⁷ Tacan tan tandihí ñi tsatsi ñi, tan ndaha vaha iñi ñi. Yahá can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyí ra Pedro tyin ra Jesús cuví ra Cristo, ra jacacú tsi yo

(Mt. 16.13-19; Mr. 8.27-29)

18 Iin quiví quita s̄in ra Jesús tsihin ra tsicá tsihin ra. Tan tsicān tahvi ra tsi Nyoo. Tan nu ndih̄i tsicān tahvi ra, tan tsicā tuhun ra tsi ra tsicá tsihin ra tan catyí ra tsihin ra naha:

—¿Náa catyí nyiví tuhun yu, yóo ra cuví yu, catyí ñi?

19 Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyā tsi nyiví, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahañ tsanaha cuví un —catyí ra naha.

20 Tacan tan nducū tuhun ra Jesús tsi ra naha, tan catyí ra:

—Tan nyooho, ¿yóo ra cuví yuhu, cuñí maa ndo?

Tan nacahan ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

21 Tan catyí ra Jesús tsihin ra naha tyin ña cahan ra naha can tsihin nyiví.

Nu jacoto ra Jesús nácaa cua cahñi nyiví tsi ra

(Mt. 16.20-28; Mr. 8.30—9.1)

22 Tacan tan catyí ra tsihin ra naha inga tsaha:

—Yuhu Rayii tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quiví cua nandoto yu —catyí ra Jesús.

23 Tacan tan catyí ra tsihin ra naha:

—Nyooho tsa cuñí cunyicun tsi yu, çahnya iñi ndo tsa cuñí maa ndo javaha ndo, tacan tan cuví javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandih̄i quiví nyehé ndo tundoho. Tyin yacan cuví tumaa cruu tsa taahán tsi cuiso ndo tatun cua cunyicun ndo tsi yu.

24 Tan nyooho tsa ña cuñí nyehe tundoho tan ña cuñí ndo cuhva ndo ñayiví iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayiví iyó ndo tsa cuenda yu, cua cacu ndo.

25 Nduve yahvi nyaá cua ñihi ndo tandih̄i tsa iyó nu ñuhu ñayiví ihya, tun ña cua cacu añima ndo.

26 Tyin tatun cahan nuu ndo tsa xaan cuñí nyiví nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsaa quiví quitsi yu inga tsaha. Tyin cua quitsi nyico yuhu Rayii tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra.

27 Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

28 Una quiví yaha tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra.

29 Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sii xaan cuitsin tsi tan xiñu tsi.

30 Tacan tan quituví uvi taahan ra natuhún tsihin ra, ra Moisés tan ra Elías.

31 Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra.

³² Tan vasu cuñí xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tsihin ra nycé tsihin ra.

³³ Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucu ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quitsi iin vico síqui ra naha. Tan nayuhvi xaan ra naha tsa quihvi ra naha tsitsi vico ican.

³⁵ Tacan tan tsitsi vico ican tsíñi ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyáa soho ndo tsa caahán ra —catyí ndusu ican.

³⁶ Tan tsa yahá cahan ndusu ican, tan nanyehé ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehé ra naha.

Nu janduvahá ra Jesús tsi iin ra luhlu tsa yihí tatyí ña vaha
(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra.

³⁸ Tacan tan caná tsaa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu.

³⁹ Tan tuhvá tatyí ña vaha quihví tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra.

⁴⁰ Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tavá ra naha tsi nu —catyí ra.

⁴¹ Tacan tan nacahan ra Jesús tan catyí ra:

—Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeé iñi yu nyehé yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndáca sehe un tsi yu.

⁴² Tan cuhva tsa natuhvá ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tavá ra tsi nu tatyí ña vaha ican. Tan janduvahá ra tsi ra. Tacan tan nacuhvá cuenda ra tsi ra tsi jutu ra.

⁴³ Tan tandihí nyivi, iyo xaan cuñí ñi tsa cahnu tsa javahá Nyoo nu yucú ñi.

Tsitsi tsa iyo cuñí nyivi tsa javahá ra Jesús, tan catyí ra tsihin ra tsicá tsihin ra:

Nu cahan ra Jesús inga tsaha tyin cua cahñi nyivi tsi ra
(Mt. 17.22-23; Mr. 9.30-32)

⁴⁴ —Tyáa soho vaha ndo tuhun caahán yu. Tan ña naa iñi ndo. Tyin Rayii tsa queé nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñí iñi ra naha nacuenda cahan ra tacan. Tyin Nyoo ña tsahá ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús náa cuví tsa caahán ra.

Nu janaha ra Jesús yóo ra tsa cahnu ca cuví nu ndacá ñaha Nyoo
(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quitsaha caahán yuhu tahan ra naha, ndáa ra cahnu ca cuví tsitsi tsa utsi uvi taahan ra naha.

⁴⁷ Tan tsitó ra Jesús tsa tsicá iñi ra naha, tan quihjñ ra iin ra luhlu.

⁴⁸ Tan catyí ra tsihin ra naha:

—Tatun tsihin sivi yu naquihñ cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihñ cuenda ndo cuví can. Tan tatun naquihñ cuenda ndo tsi yu, tsi maa Nyoo tsa jaquitsi tsi yu, naquihñ cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyinyeé tsi yo
(Mr. 9.38-40)

⁴⁹ Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsaha ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuvj iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihñ ra ityi tan cuahán ra ñuu Jerusalén.

⁵² Tan tavá tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús.

⁵³ Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén.

⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhj andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaḡn ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsí yuhu.

⁵⁶ Tyin Rayii tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyivi tsa cuñi quihvi cuenda ra Jesús
(Mt. 8.19-22)

⁵⁷ Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cuhun yu tsihin un tandihi ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayii tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahan ra tan catyí ra tsihin ra:

—Nacoo tsi nyívi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cuaahan cahan un tuhun Nyoo tsihin nyívi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cuhva na cuhun jihna yu cacahan yu tsihin nyívi vehe yu —catyí ra.

⁶² Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñi nyico ra tsa tsa nacoo ra, ña cuví cuhva ra tsi ra cundaca ñaha Nyoo —catyí ra Jesús tsihin ra.

10

Nu tavq ra Jesús tyiñu tsi uñi xico utsi taahan ra cua cahan tuhun Nyoo tsihin nyívi

¹ Tsa yahá can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cuhun ra Jesús.

² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatinyee ra naha tsi ndo cahan ndo tuhun Nyoo tsihin nyívi.

³ Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsañi tsi mbee. Tan tacan tucu cua cuñi nyívi cahñi ñi tsi ndo.

⁴ Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyívi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi.

⁵ Cuhva tsa quihvi ndo tsitsi vehe iin nyívi, cahan ndo tsihin ñi. Tan catyí ndo, na coo tsa vaha añima ñi.

⁶ Tan tacan tucu tatun iyó nyívi vaha iñi vehe ican, cua ndoo tsa vaha can tsihin ñi. Maa tyin tatun yofñi ñi vaha añima, ña cua ndoo tsa vaha tsihin ñi.

⁷ Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quivi tsa cuhun ndo inga ñuu.

⁸ Tan nu tsaa ndo iin ñuu tan vaha cahan ñi tsihin ndo, catsi ndo tandihi tsa cuhva ñi catsi ndo.

⁹ Tan janduvaha ndo tsi ñi cuuhví ñuu ican. Tan catyí ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.”

¹⁰ Maa tyin tatun tsaa ndo iin ñuu tan ña cuñi nyívi tyaa soho ñi tsa caahán ndo, quita ndo ityi cahnu. Tan catyí ndo tsihin ñi:

¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyí tyin cuatyí ndo ndoo can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñi tsi tsa

cundaca ñaha ra tsi ndo.” Tacan catyi ndo tsihin ñi —catyi ra Jesús tsihin ra tsa uñi xico utsi can naha ra.

¹² Tan catyi tucu ra tsihin ra naha:

—Quivi tsa tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho can ñavin ca nyivi tsicoo tahan tsanaha ñuu Sodoma, —catyi ra Jesús.

Nyivi ña tyaá soho tuhun caahán ra Jesús cua nyehe ñi tundoho
(Mt. 11.20-24)

¹³ Tan catyi ra Jesús:

—Ndahvi nyoocho, nyivi ñuu Corazin! Tan jndahvi nyoocho nyivi ñuu Betsaida! Tyin nyehé ndo tsa iyo javahá yu, tan ña cuñi ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyoocho vityin, numi xaan ca cunditsi ñi jahma tucuiihya iñi tan cunyecu ñi nu nyaa: tsa ndu uvi iñi ñi cuatyí ñi cuví can.

¹⁴ Yacan cuenda, nyoocho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can.

¹⁵ Tan nyoocho nyivi ñuu Capernaum, cuñi maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyi ra Jesús.

¹⁶ Tan catyi ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyoocho, tsa caahán yuhu tyaá soho ñi. Tan nyivi ña tyaá soho tsa caahán nyoocho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyi ra Jesús tsihin ra naha.

Nu tsaq nyico tsa uñi xico utsi ra tsa tsahán tsicahán tuhun Nyoo

¹⁷ Ihya cuví nu tsaq nyico tsa uñi xico utsi ra tsa tsahán tsicahán tuhun Nyoo tsihin nyivi. Tan sii xaan cuñi ra naha. Tan catyi ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahán ndi tsihin sivi un —catyi ra naha.

¹⁸ Tacan tan catyi ra Jesús tsihin ra naha:

—Tacan tyin yuhu nyehe yu andivi nu canacava nu ña vaha, nu nañi Satanás. Tumaa cañi iin tatsa savi, tacan canacava nu.

¹⁹ Tan maa yuhu, tsahá tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo.

²⁰ Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyi ra Jesús tsihin ra naha.

Nu jacahnú ra Jesús tsi Nyoo tsa sii cuñi ra tyin janahá Nyoo tsa vaha tsi nyivi ndaahvi

(Mt. 11.25-27; 13.16-17)

²¹ Tacan tan sii xaan cuñi ra Jesús jahá Tatyí Ii Nyoo, tan catyi ra:

—Jacahnú yu tsi un, Jutu yu, tyin yoocho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyi ra Jesús.

²² Tan catyi ra Jesús tsihin tandihi ra naha:

—Tandihi maa tsahá Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra

tsitó tsi ra. Tan yoñi tsító yóo ra cuví Nyoo Jutu, intuhun ñi Sehe ra tsító tsi ra. Tan coto tucu nyívi tsa cuñi Sehe Nyoo jacoto ra tsi ñi —catyí ra Jesús.

²³ Tacan tan nanyehę ra nu nyecú ra tsicá tsihin ra. Tan caahán xeehe ra tsihin ra naha:

—Si xaan cuñi nyooho tan nyívi tsa iyó vityin tyin nyehé ndo tsa javahá yu.

²⁴ Tyin cuaha xaan rey tan ra cuví ndusu yuhu Nyoo taħan tsanaha, cuñi ra naha nyehe ra naha tsa nyehé nyooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuahę ra Jesús tsi yo tyin taahán tsi jatyinyee yo tsi tandihi ñi maa nyívi

²⁵ Tacan tan tsaę iin ra maestro cuenda ley vehe ñuhu. Tan quitsahę tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cahun yu coo yu ñayívi nyito tsa ña cua naa maa?

²⁶ Tacan tan nacahán ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

²⁷ Tacan tan nacahán ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin tanii ańima yo tan tsihin tandihi cuhva tsicá ińi yo, tan tsihin tandihi tunyee ińi tsa iyó tsi yo, tan tsihin tandihi tsa tsiñi tuńi tsa iyó tsi yo. Tan cuñi yo tsi nyívi tumaa tsa cuñi yo tsi maa yo. Tacan catyí ley —catyí ra ican.

²⁸ Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayívi nyito tsa ña cua naa maa —catyí ra Jesús.

²⁹ Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyívi cuñi yu? —catyí ra.

³⁰ Tacan tan nacahán ra Jesús, tan catyí ra:

—Iin ra queę ñuu Jerusalén cuahán ra nda ñuu Jericó. Tan taħan ra tsi nu ñasuhu nahnu. Tan suhų nahnu tandihi maa tsa nyisó ra, nda cuanda jahma ra. Tan cañi nahnu tsi ra nda cuanda tsaquın taxin ña nahnu tsi ra. Tan nacoq ihñi nahnu tsi ra ican.

³¹ Tacan tan yahę iin ra cuví jutu ityi can. Maa tyin tsa nyehe ra tsi ra canyiı ican, ndasava ñi yahę tsiyo ra.

³² Tacan tan yahę tucu iin ra yihi cuenda vehe ñuhu, ra cuví tata ra Leví. Maa tyin tsa nyehe ra tsi ra canyiı ican, juvin ñi ndasava yahę ra.

³³ Tacan tucu iin ra Samaria yahę ra juvin ñi ityi can. Tan nyehe ra tsi ra canyiı ican, tan quitsı tsa ndaahvi cuñi ra nyehé ra tsi ra.

³⁴ Tan natuhva ra nu canyiı ra, tan quitsahę tyaa ra numeri tsi ra, tyihı ra acetye tsihin vinu nu uhvi can. Tan tyaa ra iin jahma vita nu uhvi can. Yahę can tan jandaę ra tsi ra tsata burru jana ra, tan quihın ra tsi ra, cuahán tsihin ra nu nyaá iin vehe. Tan jahę cuenda ra tsi ra.

³⁵ Tan tsa inga quivi tsa cuñi cahun ra Samaria. Tan tava ra uvi taahan xuhun. Tan tsaħa ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndih̄i nacatȳi tuhun ra Jesús, tan nducȳ tuhun ra tsi ra maestro can, tan catȳi ra:

—Vaha. ¿Tsa uñi taahan ra naha, tan ndáa ra cuv̄i ra vaha iñi tsi ra ndaahvi tsa tsinyā ndaha nu ñasuhu nahnu? —catȳi ra Jesús.

³⁷ Tacan tan catȳi ra maestro ican:

—Ra tsa cundaahvī iñi tsi ra —catȳi ra.

Tacan tan catȳi ra Jesús:

—Cuaahan tan ica tucu yooho tacan tsihin nȳivī tsa nyehé tundocho —catȳi ra.

Nu tsinyā ra Jesús vehe ña Marta tsihin ña María

³⁸ Tan quih̄in ra Jesús itȳi cuahán ra. Tan tsā ra iin ñuu. Tan ican iyó iin ñaha tsa nañi Marta. Tan tsā ra vehe ña. Tan tsah̄ ña quih̄vi ra tsitsi vehe ña.

³⁹ Tan ña Marta, iyó iin tahan ña nañi María. Tan ña María tsicunyā ña yatyin ñi tsaha ra Jesús, tyin tyaa soho ña tsa caahán ra.

⁴⁰ Tan ña Marta cuaha xaan tyiñu javahá ña. Tan tsā ña nu nyaá ra Jesús, tan catȳi ña tsihin ra:

—Yooho tata. ¿A ña tsicá iñi yooho tyin ña tahan yu nacō ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catȳi ña tsihin ra.

⁴¹ Maa tyin ra Jesús catȳi ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can.

⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsj̄ ña tyiñu vaha ca javahá ña. Tan yoñi cuv̄i quinyaa can tsi ña —catȳi ra Jesús tsihin ña Marta.

11

Nu jacuah̄a ra Jesús tsi ra tsicá tsihin ra nácaa ndacan tahvi ra naha tsi Nyoo (Mt. 6.9-15; 7.7-11)

¹ Cuv̄i iin tsaha tsa tsicán tahvi ra Jesús. Tsa ndih̄i tsic̄an tahvi ra, tan catȳi iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janah̄a ra Juan tsi ra tsica tsihin ra —catȳi ra.

² Tacan tan catȳi ra Jesús tsihin ra:

—Cua cuhva yu cuhva tsi ndo nácaa. Tyehen ndacan tahvi ndo, catȳi ndo: Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quiv̄i tsa ndaca ñaha un nu ñuhu ñayiv̄i ihya.

Na javaha nȳivī nu ñuhu ñayiv̄i ihya tandih̄i cuhva cuñi maa un, tumaa cuhva cuv̄i nda gloria.

³ Cuhva tsa catsi ndi tan yaha ndi iin iin quiv̄i.

⁴ Jaha tucahnu iñi tsi ndi tsa cuenda cuatȳi ndi. Tyin nyuhu jahá tucu maa ndi tucahnu iñi tsi nyiv̄i xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan j̄acacu tsi ndi tan ña cua cunyeey nu ña vaha tsihin ndi.

Tacan ndacan tahvi ndo —catȳi ra Jesús.

⁵ Tan catȳi tucu ra:

—Na catȳi yo tyin iin nyooho iyó iin ra vaha iñi tsi ndo, tan tsā ra vehe ndo tsa tsa cuaa tan catȳi ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu.

⁶ Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa cuhva yu catsi ra.”

⁷ Tan nyooho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra.

⁸ Tan catyi yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo.

⁹ Tan tacan tucu nyooho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña.

¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca.

¹² Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi.

¹³ Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí li ra cunyaa añima ndo tun ndacan ndo tsi ra.

Nu xaan iñi tsi ra Jesús catyi nahnu tyin tsihin tunyee iñi nu ña vaha javahá ra tsa iyo

(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha tsa janduñihi tsi iin rayii. Tsa quita nu tatyí can tsi ra can, cuví nacahan ra. Tacan tan iyo xaan cuñi nyivi tsa nyehe ñi tsa cuví.

¹⁵ Tan yihí ñi catyi ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihi tatyí ña vaha —catyi ñi.

¹⁶ Tan yihí ñi cuñi ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi.

¹⁷ Maa tyin ra Jesús tsitó ra tsa tsicá iñi ñi. Tan catyi ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihí tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tiví nu yucú ñi.

¹⁸ Tan tacan tucu nu ña vaha, tatun natahvi nahnu, cua cundihí tunyee iñi tsa iyó tsi nahnu. Caahán yu tyehen tsihin ndo, tyin catyi ndo tyin tsihin tunyee iñi nu Beelzebú tavá yu tsi nu tatyí ña vaha nahnu.

¹⁹ Maa tyin tun tsatyin tavá yu tsi nahnu tumaa cuhva catyi ndo, ndaca tuhun ndo tsi ra nyecú tsihin ndo yó tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo.

²⁰ Maa tyin catyi yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñi tsi catyi yacan tyin nditsa tyin Nyoo, ra taahán tsi cundaca ñaha tsi nyivi, tsa tsaá ra nu yucú ndo.

Nu jacuahq̄ ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuvī quinyaa ñasuhua.

²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuvī jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyiví ña jahá tyiñu tsihin yu, jatíví ñi tyiñu jahá yu. Tan tatun ña caahán ñi tuhun Nyoo tsihin nyiví, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyiví tsi yu.

Nu jacuahq̄ ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ Tatun iin nu tatyí ña vaha quitq̄ nu tsi iin nyiví, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.”

²⁵ Tacan tan tsaq̄ nyico nu añima nu quee nu. Tan nyehé nu tyin ndi xaan tan sii xaan caá.

²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyiví tsa nditsa iyó vaha ñi nu ñuhu ñayiví

²⁷ Tsitsi tsa ndi caahán ca ra Jesús yacan, tan canq̄ tsa iin ñaha tsa nyii mahñu nyiví ican. Tan catyí ña:

—Ñáa tsa sii cuñí ñaha tsa jacacu tsi un, ñaha tsa jacaxin tsi un! —catyí ña.

²⁸ Maa tyin ra Jesús catyí ra:

—Sii xaan ca cuñi nyiví tsa tsiñí tuhun caahán Nyoo tan tyaá yahvi ñi itsi —catyí ra.

Nyiví ña vaha, maa ñi maa tsa iyo cuñí ñi nyehe ñi
(Mt. 12.38-42; Mr. 8.12)

²⁹ Tacan tan tsaq̄ ca nyiví nu nyii ra Jesús. Tan catyí ra tsihin ñi:

—Nyiví tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuvī tsa jahahq̄ Nyoo tsihin ra Jonás, ra cuvī ndusu yuhu Nyoo tsanaha. Nduve inga ca tsa iyo cua nyehe ñi.

³⁰ Tumaa tsa janahq̄ ra Jonás tsi nyiví ñuu Nínive tahq̄n tsanaha tyin ii Nyoo, tacan tucu yuhu, Rayii tsa quee nda gloria, janahq̄ yu tsi nyiví tsa iyó vityin tyin ii Nyoo.

³¹ Quiví cua tatsi tuñi Nyoo tsi nyiví, cua nandoto ñaha cuvī reina ityi sur tahq̄n tsanaha, tan cua catyí ña tyin cahun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahq̄n ra Salomón. Tan vityin cahnu ca cuvī ra nyaá tsihin ndo tan ñavin ca ra Salomón.

³² Tan quiví cua cutuñi tandihí nyiví, cua nandoto nyiví tsicoq̄ ñuu Nínive tahq̄n tsanaha, tan cua catyí ñi tyin nyooho nyiví tsa iyó vityin cahun ndo anyaya, tyin nyiví Nínive ican, nasamaq̄ ñi cuhva iyó ñi quiví cahq̄n ra Jonás tuhun Nyoo tsihin ñi. Tan vityin cahnu ca cuvī ra nyaá tsihin ndo tan ñavin ca ra Jonás.

Nu janahq̄ ra Jesús tyin na jaha yo cuenda añima yo na coo tsa nditsin jahá Nyoo

(Mt. 5.15; 6.22-23)

³³ Ndi intuhun ndo tan ña tuhvá ndo tyaá ñuhu tyuma tan tyihí xeehe ndo can, a tinyíi ndo can tsitsi iin caja. Tyin ñuhu can taahán tsi cunyií can nu sucun. Tyin tatun quihví nyívi tsitsi vehe ndo, nditsin.

³⁴ Tinuu yo, iin ñuhu nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyívi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo.

³⁵ Yacan cuenda jahá ndo cuenda tsi ndo, na coo tsa nditsin jahá Nyoo añima ndo, tan ña coo tsa naa.

³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi tanñi cahnu ndo. Tumaa tsa nyaá iin ñuhu tyuma jandunditsín tsi tanñi cahnu ndo cuví can —catyí ra Jesús.

Nu cuxaqān ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahañ ra Jesús tsihin nyívi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaq̄ ra Jesús vehe ra. Tan quihví ra tsihunyaq̄ ra nu mesa.

³⁸ Tacan tan ra fariseo ican iyo cuñí ra tyin ña nacatyq̄ ra Jesús ndaha ra tsa ndi cumañi ca catsi ra, tumaa cuhva iyó maa ra naha.

³⁹ Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quíñi xaan caá can tyin ña nacatyá ndo can. Tacan cuví nyooho. Tyin cuñí nyívi tyin vaha ndo. Maa tyin xeehe ñi suhú ndo tan javahá ndo tsa ña vaha.

⁴⁰ Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo?

⁴¹ Taahán tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin tanñi añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñí vaha ca ndo tsi Nyoo tan javaha ndo cuhva cuñí ra, tan ña jandihí ndo tsa cuhva ndo diezmo can.

⁴³ ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaá yahvi nyívi tsi ndo nuyahví.

⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyí. Tyin tsañi nyívi tsata can tan ña tsitó ñi tyin nyíi ndiyi tsitsi ñaña ican. Tyin nduve ca cuhva canyí nu nyíi ndiyi ican. Cuñí maa nyívi tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacañan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahañ tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyinyeé ndo tsi ñi.

⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuvı ndusu yuhu Nyoo tsa tsahñi ra cuvı tsiı tsaahnu ndo tahañ tsanaha.

⁴⁸ Yacan cuñi tsi catyi tyin ndoó ndo vaha tsa javahá tsiı tsaahnu ndo naha ra. Tyin tsiı tsaahnu ndo tsahñi ra naha tsi ra cuvı ndusu yuhu Nyoo. Tan nyooho janduvahá ca ndo ñaña ra naha.

⁴⁹ Yacan cuenda catyi Nyoo tahañ tsanaha tsihin tsa tsiñi tuñi ra tyin cua jaquitsi ra tsi ra cua cuvı ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha.

⁵⁰ Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihı ra cuvı ndusu yuhu ra tsa tsahñi tsiı tsaahnu ndo naha ra nda cuenda tsinı ñuhu ñayivi tan nda cuenda vityin.

⁵¹ Nda cuenda niñi ra Abel tsa tsati tsa tsahñi ra Caín yañi ra tsi ra, tan nda cuenda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyi Nyoo tyin cua tatsi tuñi ra tsi nyivi tsa iyó vityin tsa catyi cuatyı nyivi tsa tsicoq tahañ tsanaha.

⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihı xeehe ndo ndaha tucu yuvehe nu quihvi nyivi ityi nu nyaá Nyoo. Tan ndi maa ndo ña quihvi ndo nu nyaá Nyoo. Tan ndi ña tsahá ndo tsa quihvi inga nyivi tsa cuñi quihvi —catyi ra Jesús.

⁵³ Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsahá nducú tuhun xaan ra naha tsi ra Jesús.

⁵⁴ Tyin cuñi ra naha tsa cahan ra Jesús iin tsa ña vaha, tyin tacan tan cuvı tyaa ra naha cuatyı tsi ra.

12

Nu jacuahá ra Jesús tyin ña cuvı tyihı xeehe yo cuatyı yo

¹ Cuenda mil nyivi ndu iin nda cuenda catyihı tahañ ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyı ra tsa cuvı tumaa yutsan iya. Tyin ndaá paan jahá yutsan iya, tan tacan cuvı cuatyı ra can naha ra. Tyin jahá ra naha tyin vaha ra. Maa tyin ña cuvı tyihı xeehe ra naha cuatyı ra naha.

² Tyin nduve iin tsa yihı xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi.

³ Yacan cuenda, náa ndihı tsa caahán ndo nu xeehe, cua quita tsi nu nditsin. Tan náa ndihı tsa caahán ndo tsitsi vehe ndo, cua cana tsa nyivi jiñi vehe.

*¿Yóo taahán tsi nayuhvi yo, a tsi nyivi a tsi Nyoo?
(Mt. 10.28-31)*

⁴ Tan catyi yu tsihin ndo tsa cuvı ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuvı javaha nu tsi yo.

⁵ Maa tyin cua catyi yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuvı quinyaa tsa nyito ndo. Tan yaha yacan tan cuvı tyihı ra tsi ndo anyaya.

⁶ 'Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti.

⁷ Tan nyoooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

*Na ña nayuhvi yo cahan yo tuhun ra Jesucristo tsihin nyivi
(Mt. 10.32-33; 12.32; 10.19-20)*

⁸ 'Catyi yu tsihin ndo tyin tandihi nyoooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayií nda gloria quee yu.

⁹ Maa tyin nyoooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo.

¹⁰ Tan vasu cuxaan nyivi tsi yuhu, Rayií tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

¹¹ 'Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumi tyiñu naha ra, ña caca iñi ndo náa tuhun cua nacahan ndo.

¹² Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyi ra Jesús.

Nu tsaha cuenda ra Jesús tyin ña taahán tsi nyiyo iñi yo tsa cuca

¹³ Iin ra tsa nyii tsihin nyivi cuaha tsa ndu iin nu nyii ra Jesús, catyi ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyi ra Jesús tsihin ra:

—¿Tsa, yóo tsaha tsi yu tsa cuví yu juez tan natahvi yu ndaha tyiñu ndo? —catyi ra.

¹⁵ Tan yahá can tan catyi ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

¹⁶ Tacan tan tsaha cuenda ra Jesús iin cuhva tsi tandihi nyivi, tan catyi ra:

—Tsicoo iin ra cuca. Tan cuaha xaan ndaha tyiñu ñihí ra nu jahá tyiñu ra.

¹⁷ Tacan tan tsicá iñi ra: “¿Nacaa javaha yu? Nduve nu quihí tandihi ndaha tyiñu ihya.”

¹⁸ Tan catyi ra: “Tsa tsitó yu nácaa cua javaha yu. Cua cani yu tandihi yaca nyihi yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can.

¹⁹ Tacan tan cua catyi yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, çatsi vaha, coho vaha, tan çusi iñi.”

²⁰ Tan Nyoo catyi ra tsihin ra can: “Ra soho, tsacuaa vityin cua cúu un, tan tsa naquihin vaha un ¿Yóo tsii cua cuví yacan?” catyi Nyoo tsihin ra can.

²¹ Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyi ra Jesús.

*Ña caca xaan iñi yo náa ndihi tsa tsiñi ñuhu tsi yo
(Mt. 6.25-34)*

²² Tacan tan catyi ra Jesús tsihin ra tsicá tsihin ra:

—Tacan ñi catyi yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo.

²³ Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsi yo.

²⁴ Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa.

²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo.

²⁶ Tatun ndi luxu can tan ña cuví jahá ndo, ¿nacuenda tsa tsicá xaan iñi ndo tandihí ca tsa tsiñí ñuhu tsi ndo?

²⁷ Jaha ndo cuenda nácaa iyó yutun ita tyin ña jahá tyiñu tun tan ndi ña taví tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sii caá tsa tsinditsi ra tumaa tsa jacunditsi Nyoo tsi yutun ita ican.

²⁸ Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra.

²⁹ Ña caca xaan iñi ndo tuhun tsa catsi ndo tan tsa coho ndo.

³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo.

³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

*Tsa vaha tsa iyó gloria
(Mt. 6.19-21)*

³² Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihvi ndo nu ndacá ñaha ra.

³³ Xico ndo tsa iyó tsi ndo. Tan jatinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo jativi can ndacan, ndi nu ñasuhu, tan ndi quiti.

³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ Cuatu vaha ndo tsi yu tsihin ñuhú nditsin Nyoo quivi quitsi yu inga tsaha.

³⁶ Tan cuví ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra.

³⁷⁻³⁸ Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra.

³⁹ Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra.

⁴⁰ Tan tacan cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

*Musu vaha tan musu ña vaha
(Mt. 24.45-51)*

⁴¹ Tacan tan quitsahá nducu tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyivi?

⁴² Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican.

⁴³ Tan sñi xaan cuñí musu ican tatun cuhva tsa jahá tyiñu ra, tan cua tsa tsitoho ra. Tyin tyaá yahvi ra tandihi tsa taahán tsi ica ra.

⁴⁴ Tan catyí yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quíhi ndaha ra. Tyin vaha tyaá yahvi ra tsihin tyiñu jahá ra.

⁴⁵ Maa tyin tatun tsicá iñi musu ican tyin naha xaan cuahán tsitoho ra, tan quitsaha cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsí ñi tan tyiñu tsiñi nyixi ñi iyó ra.

⁴⁶ Tacan tan sana iñi ra cua tsa tsitoho ra quívi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

⁴⁷ Tan iin musu tsa tsitó nácaa iyó tsitoho ra tan ña javahá ra cuhva cuñí tsitoho ra, cuaha xaan tundoho cua nyehe ra.

⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahán ra Jesús tyin tsacatyí ra cua cañi tahan nyivi tsihin nyivi ñi (Mt. 10.34-36)

⁴⁹ Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña ñuhu ihya!

⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu.

⁵¹ Cuñi maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo.

⁵² Tyin tsa vityin tan ityi nuu ca, uhun taahan nyivi iin vehe ñi cua cusin ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi.

⁵³ Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahán ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi (Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví.

⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo.

⁵⁶ Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenta tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya

(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha?

⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa.

⁵⁹ Tatun tacan cua cuví, catyí yu tsihin ndo tyin ña cua quita ndo nda cuanda tyahvi ndo tandihí tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹ Tacan tan juvin ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra.

² Tan nacahan ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihi ra naha?

³ Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo.

⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoq ñuu Jerusalén, cuñí maa ndo?

⁵ Ñavin. Tyin tatun nyooho tan ña nasama ndo cuhva iyó ndo, cua cunaa ndo.

Nu tsahá cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsahá cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nya tun nu ñuhu ra. Tan tsahan ra tsinyehé ra tatun iñi tsiti tun. Tan nyehe ra tyin nduve.

⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra.

⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú.

⁹ Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvahá ra Jesús tsi iin ñaha tihí tsata

¹⁰ Iin quivi tsa quitatú nyivi, jacuahá ra Jesús tsi nyivi tsitsi vehe ñuhu.

¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña.

¹² Tacan tan nyehe ra Jesús tsi ña. Tan caná ra tsi ña. Tan quitsahá caahán ra tsihin ña, tan catyí ra:

—Tsa nduvahā un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoq ña. Tacan tan quitsahā jacahnú ña tsi Nyoo.

¹⁴ Maa tyin ra cuví ityi nuu vehe ñuhu, cuxaḡn xaan ra tsi ra. Tyin quivi quitatú janduvahā ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuví ndo numeri. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu nyooho quití jana ndo tan jacohó ndo ndutyá tsi ti quivi quitatú yo?

¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa caḡan ra Jesús yacan, tandihi maa nu xaan iñi tsi ra nducahan nuu nahnu. Maa tyin tandihi ca maa nyivi sñi xaan cuñi ñi tsihin tsa cahnu tsa iyo javahā ra Jesús.

Nu caḡan ra Jesús tyin tumaa iin tsiti mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi?

¹⁹ Tumaa iin tsiti mostaza, tacan cuví tsi. Tyin iin ra tatsj ra iin tsiti ican nu ñuhu ra, tan canā iin yutun luhlu, tan tsahnú tun. Tan cuví tun iin yutun cahnu xaan. Tacan tan tsaḡ saa naha ti nuu yutun ican. Tan javahā ti taca ti nuu tun.

Nu caḡan ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo?

²¹ Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyaá Nyoo

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun Nyoo tsihin nyivi tandihi ñi ñuu nu yahá ra.

²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahān ra Jesús, tan catyí ra:

²⁴ —Nānducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuñi ndo quihvi ndo ndacan, tan ña cuví.

²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyi ndo: “Nuña yuvehe.” Tan ra ican cua catyi ra tsihin ndo: “Ña tsitó yu ndáa ityi queḡ nyooho.”

²⁶ Tacan tan nyooho cua catyi ndo: “Nyuhu tsatsi ndi tan tsihi ndi tsihin un. Maa un jacuahā un tuhun Nyoo tsi ndi ityi nu nyecú vehe ndi”, cua catyi ndo tsihin ra.

²⁷ Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Çatsiyo nyaha ndo nu nyaá yu tandihi nyooho nyivi javahá tsa ña vaha”

²⁸ Tacan tan cua vacu ndo tan catsan ña cua cuvi nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihi ra cuvi ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata.

²⁹ Tan cua quisi nyivi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra.

³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyi ra.

*Nu cuihya xaan cuñi ra Jesús nyehé ra tsi nyivi ñuu Jerusalén
(Mt. 23.37-39)*

³¹ Juvín ñi maa quivi can tsaq juhva ra fariseo. Tan catyi ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyi ra naha.

³² Tan catyi ra Jesús tsihin ra naha:

—Cuaahan ndo tan cahan ndo tsihin ra tsa cuvi tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhvi tsihin cuehe, tacan tan cundihi tyiñu jahá yu.

³³ Maa tyin nda cuanda tahan tsi tsa ndihi maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuvi cúu iin ra cuvi ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyivi Jerusalén! tyin tsahñi ndo tsi ra cuvi ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa jahá cuenda iin ndivi sihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñi ndo.

³⁵ Nyehe ndo vityin tyin tsa nacoq yu tsi ndo. Tan catyi yu tsihin ndo tyin ña cua nyehe ca ndo tsi yu nda cuanda quita quivi tsa cua catyi ndo tyin cahnu xaan ra vatsi tsihin sivi Nyoo Jutu yo —catyi ra Jesús.

14

Nu janduvahā ra Jesús tsi iin ra cuuhvi tsa iyó cuiñu quivi quitatú nyivi

¹ Cuví tsi iin quivi quitatú nyivi. Tan ra Jesús cuahán ra cua catsi ra vehe iin ra cuvi ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuvi tyaa ra naha tsi ra Jesús.

² Tacan tan yatyin ñi nuu ra Jesús nyaá iin ra cuuhvi tsa iyó cuiñu.

³ Tan catyi ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhvi quivi quitatú yo? ¿Náa catyi ley Nyoo? —catyi ra.

⁴ Tacan tan tandihí ra naha, taxin ña tsinyecú ra naha. Tacan tan tyiso ndaha ra Jesús jiñi ra cuuhví can. Tan janduvahá ra tsi ra. Tan catyí ra tsihin ra na cunuho ra.

⁵ Tacan tan catyí ra Jesús tsihin ra fariseo naha ra:

—Tatun nyooho tan canacavaá iin burru jana ndo, a inga quití jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quiví quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihí ra nycé vico ican nacatsí ra naha tyayu vaha ca cunyecu ra naha. Tacan tan tsaḥá cuenda ra tyehen tsi ra naha:

⁸ —Ndáa quiví cuhun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuvi tan ñavin ca maa ndo,

⁹ tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña.

¹⁰ Maa tyin catyí yu tsihin ndo, tyin ndáa quiví cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quitsi maa ra tsa caná tsi ndo tan cua cahan ra tsihin ndo: “Amigos, ñaha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyiví nycé yuhu mesa tsihin ndo.

¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

¹² Tacan tan catyí tucu ra tsihin ra caná tsi ra nu iyó vico can:

—Ndáa quiví coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyiví un, ndi tsi nyiví nycé yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsaḥan ñi vico vehe un.

¹³ Maa tyin catyí yu tsihin un tyin ndáa quiví coo vico vehe un, cana tsi nyiví ndaahvi, nyiví cuuhví, nyiví coxo, tan tsihin nyiví cuaa.

¹⁴ Tacan tan sii cua cuñi un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quiví cua nandoto un tsihin nyiví vaha.

*Nu tsaḥá cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo
(Mt. 22.1-10)*

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyiví tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoḡ ra iin vico cahnu xaan vehe ra. Tan caná ra cuaha xaan nyiví.

¹⁷ Tacan tan tsaḡ cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa taḥan tsi cuhva cuxiñi ñi.

¹⁸ Maa tyin tandihí ñi ican quitsahá caahán ñi tyin ña cua cuhun ñi. Tan iin ra ican catyí ra: “Ndi jatá yu iin ñuhu. Tan cuñi tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.”

¹⁹ Tacan tan inga ra ican catyí ra: “Ndi jatá ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuví cuhun yu.”

²⁰ Tacan tan inga tucu ra ican catyí ra: “Ndi tindahá cuii ñi yu, tan ña cua cuvi cuhun yu”, catyí ra.

²¹ Tacan tan musu ra ican cuanuhu ra. Tan catyí tuhun ra tandihí tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihí maa ityi. Tan quitsi ndaca un tsi nyívi ndaahví, nyívi cuuhví, nyívi coxo, tan tsihin nyívi cuaa”, catyí ra.

²² Tan tsa yahá tsaá nyico musu ican tan catyí ra tsihin ra tsitoho ra: “Tsa javahá yu tandihí maa tsa cahán un tsihin yu. Tan nuña ca tsitsi vehe”, catyí ra.

²³ Tacan tan tsitoho ra catyí ra tsihin ra: “Cuaahan cua nducu ca nyívi tandihí maa ityi. Tan jañiñi un tsi ñi na quitsi ñi, tyin na cutu tsitsi vehe yu.

²⁴ Tyin catyí yu tsihin un tyin ndi intuhun ñi tsa caná yu tsa jihna, ña cua catsi ñi tsihin yu”, catyí ra —catyí ra Jesús.

*Cuaha xaan tundoho nyehé yo tatun cuenda ra Jesús yihí yo
(Mt. 10.37-38)*

²⁵ Cuaha xaan nyívi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶ —Tandihí nyooho tsa nyicún tsi yu, tatun cuñi ca ndo tsi nyívi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo.

²⁷ Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuvi ndo nyívi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo.

²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihí tuñi iñi ndo tun quita vehe cahnu can tsihin xuhun tsa nyii tsi ndo.

²⁹ Tyin tatun quitsahá jandaá ndo vehe ican, tan ña cuví jandihí ndo tyin nduve ca xuhun ndo, cua vacu nducu nyívi tsi ndo.

³⁰ Tan cua catyi ñi: “Ra ican quitsahá javahá ra vehe ra, tan ndi ña cuví jandihí ra can”, cua catyi ñi.

³¹ A tatun iin rey tan cuñi ra cañi tahan ra tsihin inga rey ¿a ña cunyaa jihna ra tan nyehe ra tatun ñihí tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican?

³² Tan tatun tsitó ra tyin ña cua cuví jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihí taxin ra itsi.

³³ Tan tacan cuví nyooho. Tatun ña cahnya iñi ndo tandihí maa tsa cuñi ndo tan tandihí tsa cumí ndo, ña cua cuví cunyicun ndo tsi yu.

*Nu jacuahá ra Jesús tyin tumaa ñi tsa ndihí tsa uhva, tacan cuví yo tatun
ndu uvi iñi yo tsa tsinú iñi yo tsi ra
(Mt. 5.13; Mr. 9.50)*

³⁴ Vaha ñi tyin jacu uhvá tsi tsa catsi yo. Maa tyin tatun ndihí tsa uhva tsi, ña vaha ca tsi.

³⁵ Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyí ra Jesús.

15

*Nu jacuahá ra Jesús tyin tumaa mbee tsa cuanaá tacan cuví yo
(Mt. 18.10-14)*

1 Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvā ra naha nu nyíí ra Jesús, tan tyaá soho ra naha tsa caahán ra.

2 Tacan tan ra fariseo naha ra tsihin ra maestro cuenda ley vehe ñuhu naha ra quitsahā caahán nyaa ra naha tsi ra Jesús, tan catyí ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

3 Tacan tan ra Jesús tsahā cuenda ra cuhva ihya, tan catyí ra:

4—Nyooho tsa iyó iin cientu mbee jana, tun cunaa intuhun tí, ¿a ña cua nacoo ndo tsi tandihí ca tí, tan cunanducu ndo tsi mbee tsa cunaa can nda cuanda tsa nañihí ndo tsi tí?

5 Tan tsa yaha nañihí ndo tsi tí, tyiso soco ndo tsi tí. Tan sií xaan cua cuñí ndo.

6 Tan tsa tsa nyico ndo vehe ndo, tan ndu iín ndo tsihin ra vaha iñi tsi ndo tan tsihin nyívi iyó yatyin yuvehe ndo, tacan tan catyí ndo tsihin ñi tyin na cusíí ndihí iñi ñi tsihin ndo tyin nañihí ndo mbee jana ndo tsa tsinaā.

7 Tan catyí yu tsihin ndo, tyin tacan tucu sií xaan ca cuñí ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyívi tsa nduve cuatyí tan ña cuñí ca tsi tsa nasama ñi cuhva iyó ñi.

Ñaha tsa tsinaā xuhun tan nañihí ña

8 Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña taníí tsitsi vehe ña. Tan cua nanducu ña xuhun can nda cuanda tsa nañihí ña can.

9 Tan tsa yaha nañihí ña, cua cuhun ña cunanducu ña tsi ñi vaha iñi tsi ña, tsihin nyívi tsa iyó yatyin yuvehe ña, tan cua cahan ña tsihin ñi: “Cusií ndihí iñi ndo tsihin yu tyin tsa nañihí yu xuhun yu tsa tsinaā”, cua catyí ña.

10 Tan catyí yu tsihin ndo tyin tacan tucu sií cuñí ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahā ra Jesús nácaa cuñí Nyoo tsi iin ra ndu uvi iñi cuatyí

11 Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra.

12 Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahví sava ra tsa tsii ra tan tsahā ra tsi nduvi taahan sehe ra.

13 Tan ña cuaha ñi quiví tan ra luhlu ican xico ra tandihí maa tsa tsahā jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaā ra tandihí maa xuhun ra tsihin tusíí iñi. Tan quiñi xaan icá ra tsicá nuu ra.

14 Tacan tan tsaa tama ityi nu iyó ra. Tan quitsahā tsisocó ra tyin tandihí xuhun ra janaā ra.

15 Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi tí naha tí.

16 Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñí ra catsi ra tsa tsatsí quini ican naha tí. Tan yofi maa tsahā tsa catsi ra.

17 Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñí cúu yo jahá soco.

18 Vityin cua cunuho yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra.

19 Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuví tsi yo” cuñí ra tsicá iñi ra.

20 Tacan tan quihín ra ityí cuanuho ra nda vehe jutu ra. Tan cañi ca vatsí ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsinu xaan ra tsijatahan ra tsi ra. Tan tsinumí nyaá ra tsi ra.

21 Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yo sehe un”, catyí ra tsihin jutu ra.

22 Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihí ndo iin xehe nundaha ra. Tan tyihí ndihí ndo zapatu tsaha ra.

23 Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico.

24 Tyin ra sehe yu ihya tsa tsihi ra cuñí maa yu, tsicá iñi yu. Cuñí maa yu tyin ña cua nyehe ca yu tsi ra, tan tsaá nyico ra”, catyí jutu ra can. Tacan tan quitsahá tsicoo ñi vico. Tan sii xaan cuñí ñi tyin tsaá nuhu nyico ra.

25 Tacan tan inga sehe ra, ra tsa tsitsa, nyii ra tsicuhu. Tan tsa cua tsaá nuhu ra nda yuvehe ra, tan tsiñí ra tyin iyó yaa. Tan tuví iñi ra tyin tsañí ñi yaa.

26 Tacan tan tsa cuyatyin ra nda yuvehe ra tan caná ra tsi iin musu ra. Tan tsica tuhun ra tsi ra can náa cuví xaan can.

27 Tacan tan musu can catyí ra: “Ra yañi un tsaá nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsaá ra yañi un, tan nduve náa tahan ra”, catyí musu can tsihin ra.

28 Tacan tan nduxaan xaan cuñí ra can. Tan ña cuñí ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe.

29 Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahan un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu.

30 Maa tyin vityin tsaá nuhu nu sehe un ihya, nu tsa janaá xuhun tsihin ñaha sii iñi. Tan tsahá un iin becerru quiti xaahan tsi nu”, catyí ra tsihin jutu ra.

31 Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsii un cuví can.

32 Tan vityin taahan tsi tyin javaha yo vico ihya, tan cusii iñi yo. Tyin tsaá nuhu ra yañi un, ra tsa tsihi, cuñí maa yu. Tumaa tsa nandoto nyico ra cuví can, tyin tsinaá ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

1 Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaá ra tandihí tsa iyó tsi ra.

² Tacan tan cana ra cuca ican tsi ra tan catyí ra tshin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tshin yu”, catyí ra cuca can tshin ra.

³ Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsitoho yu ña cuñi ca ra tsa jaha tyiñu yu tshin ra. Tan nduve tunyee iñi iyó tsi yu tsa jaha tyiñu yu tshin ñuhu. Tan cahán xaan nuu yu caya yu tsitsi ñuu.

⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tshin yu quivi tsa nduve ca tyiñu cua jaha yu, tan vaha cua tsa yu vehe ñi”, tsicá iñi ra can.

⁵ Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tshin iin ra ican: “¿Náa nyaá cuenda un tsi tsitoho yu?” catyí ra.

⁶ Tacan tan nacahan ra ican tan catyí ra: “Yuhu nyaá cuenda yu cumi mil litru aceteye.” Tacan tan ra yihí ndaha tyiñu ican catyí ra tshin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra.

⁷ Tacan tan tsa inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahan ra ican: “Nyaá cuenda yu iin mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra.

⁸ Tacan tan tsitó tsitoho ra tsa ña vaha tsa javaha ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tshin ra tsicá tshin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

⁹ Tan catyí yu tshin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo.

¹¹ Tan catyí yu tshin ndo, tatun ña javahá ndo tsa vaha tshin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo.

¹² Tyin tandihi tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumañi iñi tshin tsi, ña cua cuhva ra tsa cuvi tsi ndo.

¹³ Iin musu ña cuvi coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús.

¹⁴ Tan tsa tsiñi ra fariseo naha ra tandihi tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun.

¹⁵ Tacan tan catyí ra Jesús tshin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihi tsa cahan cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tshin tsa ndacá ñaha Nyoo tsi yo

16 'Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuvĭ ndusu yuhu Nyoo tahaŋ tsanaha, yacan cuvĭ tsa janaha ityi tsi nyiviŋ nda cuanda quivi tsa quitsĭ ra Juan. Tan ra Juan quitsaha caahan ra tuhun vaha tyin tsa cuñĭ quitsi Nyoo tyin cua cundaca ñaha ra. Tan tandihi nyiviŋ nducú xaan ñi kuhva tsa quihvi ñi nu ndacá ñaha ra.

17 "Tan catyĭ yu tsihinŋ ndo, tyin vasu cunaa andivi tan nu ñuhu ñayiviŋ ihya, maa tyin tsa cuvĭ ley Nyoo tsa tyaa ra Moisés, ña cua cunaa tsi tyin cua cundaa tandihi tsi.

Nu jacuahā ra Jesús tyin ña vaha tsa nacoo ihñi rayiñ ñasihhi ra
(Mt. 19.1-12; Mr. 10.1-12)

18 "Tatun iin rayiñ tan iyó ñasihhi ra, tan nacoo ihñi ra tsi ña, tan tindaha ra tsihin inga ñaha, coo cuatyĭ ra nuu Nyoo. Tan tatun tindaha inga rayiñ tsihin ñaha tsa nacoo yĭ, coo tucu cuatyĭ ra can nuu Nyoo.

Nu jacuahā ra Jesús tsi nyiviŋ cuenda ra cuca tsihin ra Lázaro

19 "Tsicoo iin ra cuca. Tan vaha xaan jahma tsinditsĭ ra. Tan tandihi quivi iyó vico jahá ra tan tsatsĭ vaha ra.

20 Tan tsicoo tucu iin ra ndaahvi tsa tsinañĭ Lázaro. Tan ra ihya cuaha xaan ndihiŋ iñi tsi ra. Tan nyaá ra yuvehe ra cuca ican.

21 Ra ndaahvi can, cuñĭ ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra.

22 Tan iin quivi tsihiŋ ra ndaahvi can. Tan ángel maa Nyoo na quihĭn tsi ra tan tsindacā ra naha tsi ra nda nu nyaá ra Abraham gloria. Tacan tan tsihiŋ tucu ra cuca can. Tan tsicutsĭ ñi tsi ra.

23 Tacan tan ra cuca ican nyehé xaan ra tundoho nu nyiĭ ra anyaya. Tan nanyehé ra nu cañi xaan nu nyaá ra Abraham tsihin ra Lázaro.

24 Tacan tan canā tsaa ra cuca can tan catyĭ ra: "Tyatya Abraham, cundaahvi iñi tsi yu. Jaquitsi tsi ra Lázaro tan na jatyiĭ ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhŋ ihya", catyĭ ra.

25 Tan ra Abraham catyĭ ra tsihin ra: "Nducuhun iñi tyin vaha xaan tsicoo un nu ñuhu ñayiviŋ. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho.

26 Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehé ña cuvĭ kuhun ra naha nu nyiĭ un. Tan ndi ra yucú nu nyiĭ un, ña cuvĭ quitsi ra naha nyehé", catyĭ ra Abraham tsihin ra cuca can.

27 Tacan tan catyĭ ra cuca ican: "Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu.

28 Tyin iyó uhun taahan ca ra yañi yu naha ra. Tan cuñĭ yu tyin catyi tuhun ra Lázaro tsihin ra naha nácaa nyiĭ yu nyehé yu tundoho ihya, coto quitsi ndihi ra naha ihya", catyĭ ra.

29 Tacan tan catyĭ ra Abraham: "Iyó ley tsa tyaa ra Moisés. Tan iyó tuhun tsa tyaa ra cuvĭ ndusu yuhu Nyoo tahaŋ tsanaha. Na tyaa yahvi ra yañi un naha ra, tun cuñi ra naha", catyĭ ra Abraham.

30 Tacan tan catyĭ ra cuca ican: "Tyatya Abraham. Ña cua tyaa yahvi ra naha. Maa tyin tatun yoo tsa nandoto, tan kuhun cucahan tsihin ra naha, tacan tan cua tyaa soho ra naha tan cua nasama ra naha kuhva iyó ra naha", catyĭ ra cuca ican.

31 Tan ra Abraham catyĭ ra: "Tatun ña cuñĭ ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuvĭ ndusu yuhu Nyoo tahaŋ

tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

— Tacan ñi iyó tsa quiñi caá tsa jatívi tsi nyivi. Maa tyin ndahvi ra ndaahvi tsa jatívi tsi nyivi.

² Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jatívi ca ra tsi nyivi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javahá ra. Tun nasama ra cuhva iyó ra, jaha ndo tucahnu iñi tsi ra.

⁴ Tan ndi maa javaha ra tsa ña vaha tsihin ndo utsa tsaha tsa iin quiñi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javahá ra; tandihí tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵ Tacan tan catyí ra tava tyiñu ra Jesús tsihin ra:

— Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha:

— Tatun tsinú iñi ndo tsi yu vasu tumaa cuhva iin tsiti mostaza tsa luhlu cuiñi ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

— Tatun iin nyooho tan iyó iin musu ndo, tan tsaa ra tsa tsahán ra tsicuhu tsijahá tyiñu ra, a tsijahá cuenda ra quiñi jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra.

⁸ Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihí un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.

⁹ Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra.

¹⁰ Tacan tucu maa ndo tsihin Nyoo. Quiñi ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyaa hyú

¹¹ Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea.

¹² Tan nu tsaa ra iin ñuu, quitá utsi taahan ra cuuhví tsihin cuehe tyaa hyú. Tan tsicuiñi ra naha ndasava.

¹³ Tan caná tsaa ra naha tan catyí ra naha:

— Yooho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahā ndo.

Tacan tan cuahán ra naha. Tan ityi cuahán ra naha tan nduvahā ra naha.

¹⁵ Tacan tan tsa nyehe iin ra ican tyin tsa nduvahā ra, vatsí tsihin tsata nyico ra nu nyíi ra Jesús. Tan quítsahā caná tsaa ra, jacahnú ra tsi Nyoo.

¹⁶ Tan tsa tsaa ra nu nyíi ra Jesús, tsicuiñi tsiiti ra, tan nacañi nuu ra jiñi ra nda nu ñuhu nuu ra Jesús. Tan nacuhvā ra tyahvi nyoo tsi ra. Ra tsa nduvahā ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvahā? ¿Náa inga ñn taahan ca ra naha?

¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahā ican:

—Nduvita, cuaahan. Nduvahā un tyin tsinú ñi un tsi Nyoo —catyí ra Jesús tsihin ra.

Cuhva cua quítsi Nyoo cua cundaca ñaha ra nu iyó yo ihya
(Mt. 24.23-28, 36-41)

²⁰ Tsicā tuhun ra fariseo naha ra tsi ra Jesús, tan catyí ra naha:

—¿Ama cua quítsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.

²¹ Ña cua cuví catyi nyivi: “Juvín ra nyíi ihya, juvín ra nyíi ityi ican.” Tyin Nyoo tsa tsaa ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahā yacan tan catyí ra tsihin ra tsicá tsihin ra:

—Cua tsaa quivi tsa cua cuñi ndo nyehe ndo tsi yuhu Rayi quee nda gloria. Maa tyin ña cua nyehe ndo tsi yu.

²³ Yihí ñi cua catyí ñi tsihin ndo: “Ihya nyíi ra.” Inga ñi cua catyí ñi: “Ndacan nyíi ra.” Maa tyin coto cuhun ndo cunyehe ndo. Tan ña cunycun ndo tsi ra can tyin ñavin yu cuví can.

²⁴ Tyin tandihí nyivi cua nyehe tsi yuhu, Rayi tsa quee nda gloria, quivi cua quítsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi andivi, tacan cua cuví quivi cua quítsi yu inga tsaha.

²⁵ Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu.

²⁶ Tumaa quivi tsa tsicoo ra Noé, tacan cua cuví quivi cua quítsi nyico yuhu Rayi quee nda gloria.

²⁷ Quivi tsicoo ra Noé, tsatsi nyivi. Tsihí ñi. Tindahá ñi. Tan tsahā ñi shehe sihi ñi tindaha, nda cuanda quivi quihvi ra Noé tsitsi yutun ndoo tan cuun savi xaan. Tan tandihí ñi can tsihí ñi jahā ndutyá.

²⁸ Tacan tucu cuví quivi tsicoo ra Lot. Tsatsi ñi. Tsihí ñi. Jatá ñi. Xicó ñi. Tatsi ñi itu. Tan javahá ñi vehe ñi.

²⁹ Tan quivi tsa quitā ra Lot ñuu Sodoma ican, cuun ñuhu tsihin azufre tsa quee nda andivi. Tan tsahñi ñuhu can tandihí nyivi Sodoma.

³⁰ Tacan cua cuví quivi quítsi nyico yu tsa cuví yu Rayi quee nda gloria.

³¹ Tatun nyecú ndo nuquehe quivi quítsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

³² Nducuhun ñi ndo tsa tahān ñasihí ra Lot.

³³ Tandihí nyooho tsa cuñí tsa iyó nu ñuhu ñayiví ihya, cua cunaa ndo. Tan tandihí nyooho tsa ña tyaá yahvi tsa iyó nu ñuhu ñayiví ihya, cua cacu ndo.

³⁴ Tan catyí yu tshin ndo tyin tsacuaa can, uvi taahan nyiví cua cava iin nu tsito. Iin ñi cua naquihin yu. Tan inga ñi cua ndoo ñi.

³⁵ Tan uvi taahan ñiñaha, iin caa ñi cua nyico ñi quiví can. Intuhun ña cua naquihin yu. Tan inga ña cua ndoo ña.

³⁶ Tan catyí yu tshin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷ Tsa tsiñí ra naha tsa cahān ra Jesús tacan, tsicā tuhun ra naha tsi ra:

—¿Numaa tahan cua cuvi yacan, Jutu Mañi yu? —catyí ra naha.

Tacan tan nacahān ra Jesús, tan catyí ra:

—Nu canyí ndiyí, ican cua nataca nditsii.

18

Nu jacuahā ra Jesús tyin tumaa tsa cahān yuhu iin ñaha tsiñí yí tshin juez, tacan taahán tsi ndacan yo tsi Nyoo

¹ Tshahá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihí iñi ra naha.

² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyiví tan ña tyaá yahvi ra.

³ Tan juvin ñuu ican iyó iin ñaha ndaahvi tsa tsiñí yí. Tan tsaahán ña tsicahán ña tshin ra can, tyin tsicán ña cuatyí tsaha iin nu xaan iñi tsi ña.

⁴ Tan juez ican ña tyaá yahvi nu tsa caahán ña. Ña jandaā maa nu tyiñu tsicán ña. Tan tsanaha xaan tsicán ña. Tacan tan quitsahā tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyiví,

⁵ maa tyin ñaha ihya tshahá xaan ña tsiñí tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsiñí tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican.

⁷ Tan vihi ca cuví Nyoo tshin yo, ¿a ña cua jatyinyee ra tsi nyiví tsa nacatsí ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi?

⁸ Catyí yu tshin ndo, tyin numi ca cua jatyinyee ra tsi ñi. Maa tyin quiví tsa cua quitsi nyico yu tsa cuví yu Rayí tsa quee nda gloria, tsitó Nyoo tun nañihi ca yu tsi nyiví tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsahā cuenda ra Jesús iin cuhva cuenda ra tsa vaha xaan jahá tsi maa ra naha, tan ndasí cuñí ra naha nyehé ra tsi inga nyiví. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra.

¹¹ Tan ra fariseo ican nduvitā nyityi ra, tan quitsahā caahán ra tshin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyiví cuví yu. Tyin iyó ñi suhú ñi. Quiñi icá ñi. Tan yihí ra naha

iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya.

¹² Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can.

¹³ Tan ra tsa tavá xuhun can tsa cañi luxu nyaá ra. Tan ña cana iñi ra nanyehe ndaa ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu iñi tsicoó tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

*Nu nasocó ra Jesús tsi tsa nyihi
(Mt. 19.13-15; Mr. 10.13-16)*

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehe ra tsicá tsihin ra tyin cuaha tsa nyihi tsaa nu nyaá ra, cuxaan ra naha tan ña tsahá ra naha chun tsa nyihi can.

¹⁶ Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya.

¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsahá ra Jesús cuhva tyin yñi xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

¹⁹ Tacan tan catyí ra Jesús tsihin ra:

—¿Nacuenta catyí un tyin ra vaha cuví yu? Tan intuhun ñi maa Nyoo cuví ra vaha.

²⁰ Yooho tsitó un tandihi tuhun tsa tsahá Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

²¹ Tacan tan ra ican catyí ra:

—Tandihí maa yacan tan tyaá yahvi yu nda tahān luhlu yu tan nda cuenda vityin —catyí ra.

²² Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahān tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

²³ Maa tyin tsa tsiñi ra tsa cahan ra Jesús, nducuihya xaan cuñi ra, tyin cuca xaan ra.

²⁴ Tan tsa nyehé ra Jesús tyin nducuihya cuñi ra, tan catyí ra:

—Yñi xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

²⁵ Yatyi xaan ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

²⁶ Tan nyivi tsa tsiñi tsa cahān ra catyí ñi:

—Tatun tacan, ¿yóo cua cuví cacu? —catyí ñi.

²⁷ Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

²⁸ Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoq ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyooho tsa nacoq vehe, a ñasihí ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,

³⁰ cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacotoq ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

³¹ Tan canā siin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayii tsa quee nda gloria: tandihí tyiñu tsa tyaq ra cuví ndusu yuhu Nyoo tahān tsanaha.

³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tivi sii ra naha nuu yu.

³³ Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

³⁴ Maa tyin ña cutuñi iñi ra tsicá tsihin ra tsa cahān ra, tan ndi ña tsitó ra naha náa tuhun cahān ra tsihin ra naha. Tyin ña cuví cutuñi iñi ra naha.

Nu janduvahaq ra Jesús iin ra cuaa ñuu Jericó

(Mt. 20.29-34; Mr. 10.46-52)

³⁵ Cuhva tsa cua tsa ra Jesús ñuu Jericó, tan yuhu ityi ican nyaá iin ra cuaa, cayá ra.

³⁶ Tacan tan tsiñi ra cuvaa tsa yahá cuaha nyivi. Tan tsicā tuhun ra náa cuenda ñihi xaan cúvaa.

³⁷ Tan catyí tuhun nyivi tsihin ra tyin ra Jesús, ra ñuu Nazaret, vatsí.

³⁸ Tacan tan quitsahaq caná tsa ra tan catyí ra:

—¡Yooho Jesús, tata ra rey David! ¡Cúndaahvi iñi tsi yu! —catyí ra.

³⁹ Tan ra tsa cuahān ityi nuu ican naha ra, catyí ra naha tsihin ra, nacasi ra yuhu ra. Maa tyin tsa ca canā tsa ra, tan catyí ra:

—¡Yooho, tata ra rey David! ¡Cúndaahvi iñi tsi yu! —catyí ra.

⁴⁰ Tacan tan tsicuiñi ra Jesús. Tan tavaq tyiñu ra na cuhun ra naha cuquihin ra naha tsi ra. Tan cuhva tsa tsaq ra nu nyaá ra Jesús, tan nducú tuhun ra Jesús tsi ra:

⁴¹ —¿Náa cuñi un javaha yu tsihin un?

Tacan tan ra cuaa ican nacahān ra, tan catyí ra:

—Jutu Mañi yu, cuñi yu nanyehe yu —catyí ra.

⁴² Tacan tan catyí ra Jesús tsihin ra:

—Nanyehe. Tsa nduvahaq tinuu un tyin tsinú iñi un tsi yu —catyí ra.

⁴³ Tan iin yaha ñi, nanyehę ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihi nyivi tsa nyehe tsa cuvı can, jacahnú ndihi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihvi ra Jesús ñuu Jericó. Tan cua yaha ra tsitsi ñuu.

² Tan ñuu can iyó iin ra cuca xaan, nañi ra Zaqueo. Tan cuvı ra ityi nuu tsihin ra tavá xuhun cuenda ra ndacá ñaha nda ñuu Roma.

³ Ra ihya cuñi xaan ra nacoto ra tsi ra Jesús. Tan ña cuvı nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra.

⁴ Tacan tan tsinú xaan ra cuahán ra ityi nuu, tan ndaę ra iin nu yutun cahnú tsa nañi sicómoro tsa nyaá yuhu ityi nu cua yaha ra Jesús, tan cuvı nyehe ra tsi ra Jesús.

⁵ Tan cuhva tsa quita ra Jesús nu nyaá yutun can, nanyehę ndaa ra ityi siqui tan nyehe ra tsi ra Zaqueo. Tan catyı ra tsihin ra:

—Zaqueo, janumi nuu un nu yutun juven. Tyin vityin cuñi tsi tsa cuhun yu yuvehe un —catyı ra tsihin ra.

⁶ Tacan tan numi xaan nuu ra Zaqueo. Tan si xaan cuñi ra. Tan quihin ra tsi ra Jesús cuahán tsihin ra yuvehe ra.

⁷ Tan tsa nyehe nyivi tsa tacan cuvı, tandihi ñi quitsaha caahán nyaá ñi tsi ra Jesús. Tan catyı ñi tyin ndoó ra vehe iin ra iyó cuatyı.

⁸ Tan nu nyecú ra naha tsitsi vehe, ra Zaqueo tsinyaę nyityi ra. Tan catyı ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa tsi ñi, vityin cua nacuhva cuenda yu cumi taahan ca tsaha tsi ñi —catyı ra tsihin ra.

⁹ Tacan tan catyı ra Jesús:

—Vityin cacu un, tan nyivi ra Abraham cuvı tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.]

¹⁰ Tyin yuhu, Rayi tsa queę nda gloria, vatsı yu vatsı nanducu yu tan vatsı jacacu yu tsi nyivi tsa cuanaę maa —catyı ra Jesús.

Nu jacuhę ra Jesús tsi yo na jaha tyiñu yo tsihin tsa tsaha Nyoo tsi yo (Mt. 25.14-30)

¹¹ Tan tsitsi tsa tsiñi nyivi tsa caahán ra Jesús, tan quitsaha tsahá cuenda ra inga cuhva ihya tsi ñi. Tyin tsa cuñi tsaa ra ñuu Jerusalén. Tan nyivi cuñi maa ñi tyin tsa cua quitsaha cundaca ñaha ra ndacan.

¹² Tacan tan catyı ra:

—Tsiçoę iin ra cuca tan tsa cuñi cuhun ra iin ñuu cañi. Tyin ndacan cua quihin cuenda ra tyiñu tsa cuvı ra rey, tyin tacan tan cua quitsı nuhu nyico ra ñuu ra.

¹³ Tsa ndi cumañi ca cuhun ra, cana ra utsi taahan musu ra. Tan tsaha cuenda ra iin xuhun tsi iin iin ra naha. Tan catyı ra tsihin ra naha: “Jaha tyiñu ndo tsihin xuhun ihya nda cuanda quitsı nyico yu”, catyı ra.

¹⁴ Maa tyin nyivi ñuu ra, ndasi cuñi ñi nyehé ñi tsi ra tan ña cuñi ñi tsa cundaca ñaha ra tsi ñi. Tan jacuhun ñi tsi ra cuhun cunyicun tsi ra, tyin cahan ra naha tyin ña cuñi ñi tsa cundaca ñaha ra tsi ñi.

15 Maa tyin ra ican cuv̄j maa ra rey. Tacan tan tsaḡ nyico ra nda ñuu ra. Tan quiv̄i tsa tsaḡ ra, canḡ ra tsi musu ra, ra tsa nacoḡ ra xuhun tsihin. Tyin cuñí ra coto ra nácaa xuhun jahḡ canaa xuhun ra tsa nacoḡ ra.

16 Tan tsaḡ iin ra ican. Tan catyí ra: “Yooho taa, jahḡ canaa yu utsi taahan ca siquí xuhun tsa nacoḡ un tsi yu”, catyí ra.

17 Tacan tan catyí ra rey can tsihin ra: “Vaha xaan. Yooho cuv̄i musu vaha. Tyin javahaḡ un ndih̄i tyiñu tsa tavaḡ yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

18 Tacan tan tsaḡ tucu inga ra tsa tsaḡ ra xuhun. Tan catyí ra: “Juhun xuhun ihya. Jahḡ canaa yu uhun taahan ca siquí xuhun tsa nacoḡ un tsi yu”, catyí ra.

19 Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra.

20 Tacan tan tsaḡ tucu inga ra can. Tan catyí ra: “Juhun xuhun tsa tsaḡ un tsi yu. Yuhu naquih̄in vaha yu itsi tsitsi pañitu.

21 Tyin yuuhv̄i xaan yu tsi un, tyin yooho xaan xaan un. Tyin tuhv̄a un naquih̄in tsa ñavin tsa tats̄j un. Tan naquih̄in un ndaha tyiñu quit̄a nu jahḡ tyiñu inga nyiv̄i”, catyí ra can.

22 Tacan tan ra rey ican catyí ra tsihin ra: “Yooho musu ña vaha cuv̄i un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquih̄in yu tsa ña tats̄j yu, tan naquih̄in yu ndaha tyiñu inga nyiv̄i,

23 ¿nacuv̄i tyin ña tsityih̄i un xuhun yu banco tyin tsaḡ yu maa tyin tsa nandaa xuhun yu?” catyí ra rey can.

24 Tan catyí ra tsihin ra nyecú ican: “Quinyaa ndo xuhun tsa tsaḡ yu tsi ra ihya, tan cuhva ndo tsi ra tsa jahḡ canaa utsi taahan ca siquí tsa tsaḡ yu tsi ra”, catyí ra.

25 Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha.

26 Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahḡ tyiñu tsihin tsa tsaḡ yu tsi ra, cuaha ca cua cuhva yu tsi ra. Tan ra tsa tsaḡ yu luxu ñi, tan ña cuñí ra jahḡ tyiñu ra tsihin tsi, cua quinyaa yu tandih̄i can tsi ra.

27 Tan tandih̄i nyiv̄i xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

*Nu tsaḡ ra Jesús ñuu Jerusalén
(Mt. 21.1-11; Mr. 11.1-11; Jn. 12.12-19)*

28 Tsa yahaḡ cahan ra Jesús yacan, tan jañih̄i ra cuahán ra ñuu Jerusalén.

29 Tacan tan tsa cuñí tsaḡ ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tavaḡ tyiñu ra tsi uvi taahan ra tsicá tsihin ra.

30 Tan catyí ra tsihin ra naha:

—Cuaahan ndo ñuu tsa canyí yatyin ñi ihya. Ican cua nañih̄i ndo iin burru luhlu, quit̄i tsa ñaha ca quih̄i tyayu. Nuuhñí ti. Ndats̄i ndo tsi ti. Tan quits̄i ndaca ndo tsi ti tsi yu.

31 Tatun yóo tsicá tuhun tsi ndo: “¿Nacuenda ndats̄i ndo tsi ti?” catyí ndo tsihin ñi: “Ndats̄i ndi tsi ti tyin tsif̄i ñuhu ti tsi ra ndacá ñaha.”

32 Tacan tan ra tsicá tsihin ra, cuahán ra naha. Tan nañih̄i ra naha tsi ti tumaa tsa cahan maa ra tsihin ra naha.

33 Tan cuhva tsa ndatsí ra naha tsi ti, tsaá tsitoho ti. Tan nducú tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha.

34 Tacan tan nacahan ra can naha ra:

—Ndatsí ndi tsi ti tyin tsiñí ñuhu ti tsi ra ndacá ñaha —catyí ra naha.

35 Tacan tan quihín ra naha tsi ti. Tan tsindacá ra naha tsi ti nu nyíi ra Jesús. Tan tyiso ra naha jahma ra naha tsata ti. Tacan tan jandaá ra naha tsi ra Jesús tsata ti.

36 Tacan tan cuahán ra Jesús. Tan cuaha xaan nyívi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican.

37 Tsa tsa cua cuyatyin tandihi nyívi tan ra Jesús nu iñi nuu yucu Olivo, quitsahá caná tsa tandihi ñi tsinú iñi tsi ra tsihin tsa s#i cuñí ñi. Tan jacahnú ñi tsi Nyoo tyin cuaha xaan tsa iyo javahá ra nyehe ñi.

38 Tan catyí ñi:

—¡Na jacahnu yo tsi ra Rey ihya tyin vatsí ra tsihin sívi Nyoo Jutu yo! ¡Tan na coo tsa taxin andívi! ¡Tan na jacahnu yo tsi Nyoo! —catyí ñi.

39 Tacan tan juhva ra fariseo tsa cuahán tsihin ñi, catyí ra naha:

—Maestro, jácutexin tsi nyívi ihya —catyí ra naha.

40 Tan nacahan ra Jesús tan catyí ra:

—Tatun nyívi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

41 Tacan tan tsa tsaá ra Jesús yatyin ñi yuhu ñuu Jerusalén, nanyehe ra ñuu can tan quitsahá tsacú ra tsa cuihya cuñí ra.

42 Tan catyí ra:

—Vaha xaan tun tsatyin cuvi coto ndo tan cutuñí iñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yíhi tsa vaha can, tan ña cuví nañihi ndo can.

43 Coo quívi cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihi ityi cua quitsi nahnu. Tan cañi tahan nahnu tsihin ndo.

44 Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

*Nu tava ra Jesús tsi nu xicó tsitsi vehe ñuhu cahnu nahnu
(Mt. 21.12-17; Mr. 11.15-19; Jn. 2.13-22)*

45 Tacan tan quihví ra Jesús tsitsi cora vehe ñuhu cahnu. Tan quitsahá tavá ra tandihi nyívi xicó tan nyívi jatá tsa yucú nu quehe.

46 Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyooho jananduví ndo itsi vehe ñasuhu —catyí ra Jesús.

47 Tan tandihi quívi tsaahán ra Jesús tsijacuahá ra tsi nyívi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuando ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra.

48 Maa tyin ña ñihí maa ra naha nácaa javaha ra naha tyin tandihi nyívi tan vaha tyaa soho ñi tsa caahán ra Jesús.

20

Nu tsicq̄ tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahān ra tsihin nyivi

(Mt. 21.23-27; Mr. 11.27-33)

¹ Iin quivi jacuahá ra Jesús tsi nyivi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaq̄ ra jutu tsa cuvī ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuvī mandoñi naha ra.

² Tan catyí ra naha tsihin ra Jesús:

—Catyí tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo.

⁴ ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, a nyivi?

⁵ Tacan tan ra ican naha ra quitsahā caahán yuhu tahan ra naha tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo nacuenda ña tsinū iñi yo tsa cahān ra Juan.

⁶ Tun catyí tucu yo tyin nyivi jaquitsi tsi ra, tandihī nyivi cua cahñi ñi tsi yo tsihin yuu. Tyin tandihī ñi, tan cuñí ñi tyin ndusu yuhu Nyoo cuvī ra Juan —catyí ra naha.

⁷ Tacan tan nacahān ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyivi.

⁸ Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahā ra Jesús tyin tumaa cuvī juhva ra caquiñi naha ra, tacan cuvī ra tsa cua cahñi tsi ra

(Mt. 21.33-44; Mr. 12.1-11)

⁹ Tacan tan tsaḥā cuenda ra Jesús iin cuhva ihya tsi nyivi:

—Iin ra, tatsi cuaha ra nu ñuhu ra yoho tsiti yucu tsa cua cuvī vinu. Yaha can tan tsaḥā nuu ra ñuhu can tsi juhva ra jahá tyiñu. Tacan tan naha cuahān ra inga ñuu.

¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundii ra jacunuhu ra naha tsi ra.

¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahān nyaa ra naha tsi ra. Tan jacunuhu ra naha tsi ra. Tan juvín ñi nduve tsa tsaḥā ra naha cuiso ra cunuhu ra.

¹² Tacan tan ra cuvī tsitoho yoho can jacuhun nyico ra inga ra. Maa tyin juvín ñi tacan javahā nyico ra naha tsihin ra can. Tan jañicueehē ra naha tsi ra. Tan tava ra naha tsi ra.

¹³ Yaha can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiq̄i cua tyaa yahvi ra naha tsi ra, tyin sehe yu cuvī tsi ra”, catyí ra.

¹⁴ Maa tyin tsa nyeḥē ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha.

¹⁵ Tacan tan tava ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra?

¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¿Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyehe ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javaha vehe cuatyíñu ra, yacan cuví yuu tsa tsiñi ñuhu ca.

¹⁸ Yoo nyivi cua canacava tsata yuu can, cua tahnú cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

¹⁹ Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuvj iñi ra naha tyin tsa cahán ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

Nu jacuahá ra Jesús tsa cuenda tsa tyahvi nyivi xuhun tsi ra ndacá ñaha ñuu Roma

(Mt. 22.15-22; Mr. 12.13-17)

²⁰ Tacan tan jacuhun ra naha tsi juhva ra nducu cuhva tsi ra Jesús. Tan jahá ra naha tyin ra vaha cuví ra naha. Tyin tacan tan coto ra naha náa tsa ña vaha cua cahán ra Jesús tan cuví tiin ra naha tsi ra. Tan cuhva cuenda ra naha tsi ra tsi ra ndacá ñaha.

²¹ Yacan tsicá tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un.

²² Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

²³ Tan ra Jesús tuvj iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu?

²⁴ Janaha jihna ndo iin xuhun tsi yu, na nyehe yu. ¿Yoo nuu nyaá xuhun can tan yoo sivi nyaá can? —catyí ra.

Tacan tan nacahán ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

²⁵ Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahán ra. Tan taxin ña cuví ra naha.

Nu cuñi ra cuví saduceo naha ra jandavi ñaha ra naha tsi ra Jesús
(Mt. 22.23-33; Mr. 12.18-27)

²⁷ Tsa yaha can tan tsaꝯ juhva ra cuví saduceo nu nyíi ra Jesús. Maa ra naha cuví ra tsa catyí tyin ña nandoto nyívi tun tsa tsihí ñi.

²⁸ Tacan tan catyí ra naha tsihin ra Jesús:

—Maestro, jandoꝯ ra Moisés tyiñu ihya tyin tatun iin ra tsihí tan nandoꝯ ñasihi ra, tatun nduve sehe ra tsicoꝯ tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

²⁹ Maa tyin cuñi ndi coto ndi nácaa, tyin tsicoꝯ iin ra tan tsicoꝯ utsa sehe ra. Tan ra tsa ñihi ca tsicoꝯ ñasihi ra, maa tyin nduve sehe ñi tsicoꝯ, tan tsihí ra.

³⁰ Tacan tan naquihin ra tsa tsinu uvi tsi ña can. Tan nduve tucu sehe ñi tsicoꝯ. Tan tsihí tucu ra can.

³¹ Tan juvin ñi tacan javaha ra tsinu uñi. Tandihí tsa utsa ra naha javaha tacan. Ndi intuhun ra tan ña tsicoꝯ sehe ra tsihin ña.

³² Tan nu ndihí tuhun tsihí ndihí maa ña.

³³ Tan cuñi ndi coto ndi yóo ra cua cuví yi ña tsitsi tsa tandihí tsa utsa taahan ra naha quívi cua nandoto nyívi —catyí ra saduceo naha ra.

³⁴ Tacan tan nacahan ra Jesús, tan catyí ra:

—Ihya nu ñuhu ñayívi, rayíi tan ñaha tindahá ñi.

³⁵ Maa tyin nyívi tsa nacatsí Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.

³⁶ Tan nduve tuhun tsihí iyó ndacan tyin cua cuví ñi tumaa ángel. Tan cua cuví ñi sehe Nyoo tyin nandoto ñi.

³⁷ Tan tsa cuenda tuhun tsa nandoto ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyívi tsihí cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés.

³⁸ Tacan catyí ra tyin Nyoo, ñavin Nyoo cuenda nyívi tsihí cuví ra. Nyoo cuenda nyívi nyito cuví ra. Tyin tsa cuenda Nyoo tandihí yo tan nyito añima yo vasu tsa tsihí cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha: —Vaha xaan nacahan un, Maestro —catyí ra naha.

⁴⁰ Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo (Mt. 22.41-46; Mr. 12.35-37)

⁴¹ Tacan tan tsicꝯ tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra?

⁴²⁻⁴³ Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra: “Cunya xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahan tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñi ñi tsa cahan ra Jesús tsihin ra tsicá tsihin ra nu cahan ra tyehen:

⁴⁶—Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahán ra naha vico.

⁴⁷Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyivi tan catyí ñi tyin vaha xaan nyivi cuví ra naha. Maa tyin juven ñi maa ra naha cuví ra quinyaá vehe ñi ndaahvi tsa tsihi yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsihi yí
(Mr. 12.41-44)

¹ Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyí tsitsi vehe ñuhu cahnu.

² Tan nyehe tucu ra tsi iin ñaha ndaahvi tsa tsihi yí. Tan tyihí ña uvi taahan ñi xuhun nyíhi.

³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can.

⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu cahan ra Jesús tyin cua tani vehe ñuhu cahnu
(Mt. 24.1-2; Mr. 13.1-2)

⁵ Tacan tan juhva nyivi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyivi. Tacan tan catyí ra Jesús:

⁶—Coo quivi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayivi
(Mt. 24.3-28; Mr. 13.3-23)

⁷ Tacan tan nducú tuhun nyivi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Naca tan coto ndi tacan tsa cuyatyin tsa naa ñuhu ñayivi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuyatiñu ra naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayivi”, cua catyí ra. Maa tyin ña cunyicun ndo tsi ra naha.

⁹ Tan quivi cua ñihi tuhun ndo tyin tsa iyó cuyati tan ñihi cañi tahan nyivi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsaa quivi tsa cua naa ñuhu ñayivi.

¹⁰ Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuyati.

¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyivi tsa yuuhví ityi andivi. Tan cuaha xaan tsa iyo nahnu tsa ña tuhvá nyivi nyehe tan cua nyehe ñi.

12 Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihi ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

13 Tacan tan cuví cahan ndo tuhun yu tsihin ñi.

14 Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican.

15 Tyin yuhu cua cuhva yu tuhun cua cahan ndo. Tan cua cuhva yu tsa nyityí jiñi ndo nuu cua cahan ndo. Ndi intuhun nuu xaan iñi tsi ndo tan ña cuvi jaha nahnu tsi ndo.

16 Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyivi tsi ndo.

17 Tandihí nyivi tan ndasi cua cuñi ñi nyehe ñi tsi ndo tsacatyí yuhu.

18 Maa tyin ndi intuhun ixí jiñi ndo tan ña cua cunaa.

19 Tatun ña ndu uvi iñi ndo tsa nyicun ndo tsi yu, cua cacu ndo.

20 Quivi cua nyehe ndo tyin ñi canduvi yuhu ñuu Jerusalén ihya nyecú andarú, coto ndo tyin tsa cuñi naa ñuu ihya.

21 Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya.

22 Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuví tandihí cuhva catyí nu tutu Nyoo.

23 Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo.

24 Andaru cua cahñi ra naha tsi juhva nyivi tsihin mityi. Tan cua tiin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

*Nacaa cua quitsi Rayi tsa quee nda gloria inga tsaha
(Mt. 24.29-35, 42-44; Mr. 13.24-37)*

25 Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu.

26 Tan cua cúu naaha ñi tsihin tsa yuuhvi ñi tsa tsicá iñi ñi náa ndihí tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan.

27 Tacan tan cua nyehe ñi tsi yuhu, Rayi tsa quee nda gloria, vatsí nuu yu tsitsi vico tsihin tunyee iñi Nyoo, tan tsihin tsa cahnu cuví ra.

28 Tan cuhva tsa cua quitsaha yacan tan jandu iin ndo iñi ndo tan cusí iñi ndo tyin numi xaan cua cacu ndo —catyí ra.

29 Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihí ca yutun.

30 Tatun tsa nduyutyá numa tun tsa cuyatyin cuun savi.

31 Tan tacan tucu nyooho, tatun tsa nyehe ndo tyin tsa quitsaha cuví tandihí tsa cahan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

³² Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyívi tsa iyó nu ñuhu ñayívi.

³³ Coo quívi cua naa andívi tan ñuhu ñayívi, maa tyin tuhun caahán yu, ña cua cundihi tsi.

³⁴ Tan jáha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayívi ihya. Jáha ndo cuenda coto ndundava iñi ndo tsihin yacan. Tan coto sana iñi ndo tan quita quívi cua quitsi yu tan cua quitsi tundoho cua nyehe ndo.

³⁵ Tyin tacan cua cuvi, tandihi nyívi iyó nu ñuhu ñayívi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi.

³⁶ Maa tyin nyooho cuatu ndo. Ndācan tahvi ndo tsi Nyoo tandihi quívi, na jacacu ra tsi ndo. Tan ña nyehe ndo tandihi tundoho tsa cua coo. Ndācan tahvi ndo, tacan tan cua cuvi tsa ndo nu nyaá yuhu, Rayi tsa quee nda gloria —catyí ra Jesús.

³⁷ Tan tandihi quívi jacuahá ra Jesús tsi tandihi nyívi tsitsi vehe ñuhu cahnu. Tan tsa tsacuaa tsicá ra yucu Olivo.

³⁸ Tan tandihi nyívi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús

Mt. 26.1-5, 14-16; Mr. 14.1-2, 10-11; Jn. 11.45-53

¹ Tan tsa nyanaá yatyin quívi tsa cua coo vico pascua, vico nu tuhvá nyívi tsatsi paan tsa nduve yutsan iya yihí.

² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyívi.

³ Tacan tan quihví nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús.

⁴ Tan nu ihya, tsahán nu tsicahán nu tsihin jutu tsa cuví ityi nuu tan tsihin ra yihí ndaha tsi ra jáhá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas.

⁶ Tan ra Judas ndoḡ ra vaha. Tan quitsahá nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyívi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quívi tsa cuví vico tsa tsatsi nyívi paan tsa nduve yutsan iya yihí. Tan juven ñi quívi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra.

¹¹ Tan catyí ndo tsihin tsitoho vehe can: “Ra cuví Maestro, cuñí ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra.

¹² Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvahá maa tsi. Tan ndacan cua javaha ndo tsa cuxiñi yo —catyí ra tsihin ra naha.

¹³ Tacan tan cuahán ra naha. Tan nañihi ra naha tandihi tumaa tsa cahán ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴ Tacan tan tsa tahañ tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa.

¹⁵ Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu.

¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quihñ ra iin vasu vinu. Nacuhva ra tyahvi nyoo tsi Nyoo. Yaha can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu.

¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

¹⁹ Yaha can tan quihñ ra paan, tan tsahá ra tyahvi nyoo tsi Nyoo, tan tsahnyá sava ra can. Tsahan tsahá ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰ Tan tsa yaha cuxiññ ra naha, tacan tan quihñ ra vasu vinu, tan catyí ra:

—Tsihin vinu ihya ndoo Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

²¹ Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya.

²² Tyin yuhu, Rayii tsa quee nda gloria, cua tahan yu tumaa tsa nyaá maa tsa cua tahan yu. Maa tyin ñdahvi ra tsa cua nacuhva cuenda tsi yu! —catyí ra Jesús.

²³ Tacan tan ra tsicá tsihin ra Jesús quitsaha nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahán yuhu tahan ra tsicá tsihin ra Jesús, yoo ra cahnu ca cuví

²⁴ Yaha can tan quitsaha caahán yuhu tahan ra tsicá tsihin ra Jesús, ndáa ra cahnu ca cuví.

²⁵ Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatinyeé ra naha tsi ñi.

²⁶ Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi

ndo. Tan tatun cuñí ndo cundaca ñaha ndo, cuñí tsi tsa cuvi ndo musu tandihi ndo.

²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyooho cuvi ndo tsa nyecú tsihin yu tandihi nu nyehe yu tundoho.

²⁹ Yacan cuenda, yuhu tsaha yu iin nu cua cundaca ñaha ndo tumaa tsa tsaha Jutu yu tsa cundaca ñaha yu.

³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyi ra Pedro tyin ña nacoto ra tsi ra (Mt. 26.31-35; Mr. 14.27-31; Jn. 13.36-38)

³¹ Tacan tan catyi ra Jesús tsihin ra Pedro:

—Nyehhe vaha un, yooho Simón. Tyin nu ña vaha tsa tsicān ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo.

³² Maa tyin tsicān tahvi xaan yu tsi ra tsa cuenda un, na ña jandihi un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyiinyee un tsi ra yañi un naha ra tsa ña cua jandihi ra naha tsa tsinú iñi ra naha tsi yu —catyi ra Jesús tsihin ra Simón.

³³ Tan ra Simón catyi ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyi ra.

³⁴ Tacan tan catyi ra Jesús tsihin ra:

—Pedro, catyi yu tsihin un tyin vityin tsa ndi cumañi ca vacu tsitooho, yooho cua catyi un uñi tsaha tyin ña nacoto un tsi yu —catyi ra Jesús tsihin ra.

Nu tsa cuñí tsaa cuhva tsa cua nacuhva cuenda ra Judas tsi ra Jesús

³⁵ Tacan tan tsicā tuhun ra Jesús tsi ra tsicá tsihin ra tan catyi ra tsihin ra naha:

—Ndūcuhun iñi ndo quivi tsa jacuhun yu tsi ndo tsa cahān ndo tsihin nyivi, tan nduve tsa tsindahā ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyi ra Jesús.

—Nduve —catyi ra naha.

³⁶ Tacan tan catyi ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

³⁷ Tyin catyi yu tsihin ndo, tyin tandihi tuhun yu tsa nyaá nu tutu Nyoo cua cundaa tsi, tyeheh catyi tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyi tuhun yu nu tutu Nyoo. Tan tandihi tsa catyi tsi tsa cuenda yu cua cundaa tsi —catyi ra.

³⁸ Tacan tan catyi ra tsicá tsihin ra:

—Ihya nyecú uvi taahan mityi —catyi ra naha.

—Tsa iyó vaha ñi —catyi ra Jesús.

Nu tsicān tahvi ra Jesús tsi Nyoo nda Getsemaní (Mt. 26.36-46; Mr. 14.32-42)

³⁹ Tacan tan quitã ra Jesús vehe nu nyí ra. Tan cuahán ra yucu Olivo, cuhva tuhvã maa ra tsicã. Tan ra tsicã tsihin ra cuahán ra naha nyicún ra naha tsi ra.

⁴⁰ Tan tsa tsaa ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuíñi tsiti ra. Tan quitsahã caahán ra tsihin Nyoo,

⁴² tan catyí ra:

—Tyatya Jutu yu, tun yooho tan cuñí un, jatsiyo tundoho tsa cua nyehe yu ihya. Maa tyin na ña cuví cuhva cuñí maa yu. Na cuví cuhva cuñí maa un —catyí ra Jesús.

⁴³ Tacan tan quituvi iin ángel Nyoo, tyin cuhva ra tunyee ñi tsi ra Jesús.

⁴⁴ Tan tsitsi tsa nyehé xaan ra Jesús tundoho tsa cuihya xaan cuñí ra, tan ñihi ca tsican tahvi ra tsi Nyoo. Tan cuaha xaan tyeen ra quitã tan tsatí tsi nu ñuhu, tan caá tsi tumaa caá ñiñi.

⁴⁵ Tacan tan nduvitã ra tsa ndihí cahán ra tsihin Nyoo. Tan cuahán nyico ra nu yucú ra tsicã tsihin ra. Tan nyehe ra tyin quixí ra naha, tsa cuenda tsa cuihya xaan cuñí ra naha, ña cunyeé ñi ra naha ñumaahna tan quixí ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Ndúvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

Nu tsahã cuenda ra Judas tsi ra Jesús tsi nu xaan ñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaa cuaha ra catsaa. Tan ityi nuu, vatsí nu Judas, iin ra tsicã tsihin ra Jesús. Tan natuhvã nu nu nyaá ra Jesús tyin tyayuhu nu tsi ra.

⁴⁸ Tacan tan cahán ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa queé nda gloria tsi nu xaan ñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsahã nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

⁵⁰ Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahã ra itsi.

⁵² Tan ra jutu tsa cuví ityi nuu naha ra tsihin ra yihí ndaha tsi ra jahã cuenda vehe ñuhu naha ra, tan ra cuví mandoñi naha ra, juvin ra naha cuví ra tsahán tsitñin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun.

⁵³ Ndihi quivi tsinyi yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaa cuhva tsa ndunaã tyin nu ña vaha ndacá ñaha. Yacan cuenda vatsí tñin ndo tsi yu.

Nu cahán ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Tacan tan t̄in ra naha tsi ra Jesús. Tan tsindac̄a ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyciún ra.

55 Tan tsa tsāa ra naha vehe ra jutu tsaahnu tsa cuví ityi nuu, jatahan ra tsa cuví musu naha ra ñuh̄u nuquehe. Tan tsinyec̄u ra naha tan̄i canduvi nu cayú ñuh̄u can. Tan tsinyāa nd̄ihi ra Pedro tyañu ra naha.

56 Tan tsa ndunditsín tsa cayú ñuh̄u ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

57 Maa tyin ra Pedro catyí ra:

—Yuhu ña nacotó yu tsi ra can.

58 Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

59 Tan tsa yah̄a iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

60 Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navac̄u ñi iin tsitooho.

61 Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cah̄an ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

62 Tacan tan quit̄a ra Pedro ityi tsata vehe. Tan tsac̄u xaan ra tsa cuihya cuñi ra.

Nu tsac̄u nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

63 Tacan tan ra jahá cuenda tsi ra Jesús, quitsah̄a tsac̄u nducu ra naha tsi ra. Tan cañi ra naha tsi ra.

64 Tsañi ra naha jahma nuu ra, tan quitsah̄a cañi ra naha nuu ra. Tan catyí ra naha tsihin ra:

—Nacoto yóo ra cañi tsi un —catyí ra naha tsihin ra.

65 Tan cuaha xaan ca maa tsa cah̄an nyaa ra naha tsi ra.

Nu tsic̄a tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

66 Tan tsa cundits̄in inga quivi, tan ndu iin ra cuví mandoñi tsañu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuu naha ra. Tan quih̄in ra naha tsi ra Jesús, cuahán tsihin ra nda nu cua coo Junta Cahnu. Tan nduc̄u tuhun ra naha tsi ra Jesús:

67 —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuví, ña cua tsinu iñi ndo tsa cahan yu.

68 Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

⁶⁹ Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihí tunyee iñi —catyí ra Jesús.

⁷⁰ Tacan tan tandihí ra naha tsicá tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñí ndo tsa caahán ra. Ña cuñí ca tsi tsandaa. Tyin tsa tsiñí maa yo tsa cahan ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvitá tandihí ra naha. Tan tsindacá ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

² Tacan tan quitsahá tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví ra Cristo, ra tsa jaquitsj Nyoo tyin cuví ra rey —catyí ra naha tsihin ra Pilato.

³ Tacan tan ra Pilato tsicá tuhun ra tsi ra Jesús:

—¿A yoocho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tisihi tsahá ra, tyin jacuahá ra tsi nyivi. Tsa jihna ñi quitsahá caahán ra tsihin nyivi iyó ñuu tsa cayucú Galilea. Tan naní ityi vatsí ra, jacuahá ra tsi nyivi. Tan vityin tsa tsaá ra Judea ihya tan juvin ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiñí ra Pilato yacan, tan nducú tuhun ra tatun ra Galilea cuví ra Jesús.

⁷ Tan catyí nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyi ra ñuu Jerusalén.

⁸ Tan cuhva tsa nyehe ra Herodes tsi ra Jesús, sii xaan cuñí ra. Tyin tsanaha xaan cuñí ra nyehe ra tsi ra. Tyin ñihí tuhun ra tyin cuaha xaan tsa iyo javahá ra. Tan cuñí xaan ra nyehe ra iin tsa iyo tsa cua javaha ra Jesús.

⁹ Tan cuaha xaan tsa nducú tuhun ra Herodes tsi ra Jesús. Maa tyin ra Jesús ña nacahan maa ra.

¹⁰ Ican nyecú ndihí tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyí tsi ra Jesús.

¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsj nuu ra naha iin jahma yahvi tan sii caá tsi ra Jesús, tumaa

caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

¹² Tan quivi can ra Pilato tshin ra Herodes nduvahá iyó ra naha. Tyin nu quitsj quivi, ña cuví nyehé tahan ra naha tsi ra naha.

Nu cutuñi ra Jesús tyin cua cúu ra
(Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tshin tandihí nyivi.

¹⁴ Tan catyí ra tshin ñi:

—Nyooho quitsj ndaca ndo tsi ra ihya nu nyaá yu. Tan catyí ndo tyin jatívi ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahán ndo can nañihí yu.

¹⁵ Tan ndi ra Herodes tan ña nañihí ra ndi intuhun cuatyí ra. Yacan jaquitsj nyico ra tsi ra inga tsaha nu nyaá yu. Nyehé ndo tyin nduve cuatyí ra. Tan yacan ña taahán tsi tsa cúu ra.

¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

¹⁷ Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.

¹⁸ Maa tyin tandihí nyivi iin caa ñi caná tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

¹⁹ Tan ra Barrabás can nyii ra vehe caa tsa cuenda tsa cañi tahan ra tshin ra cumí tyiñu ñuu can. Tan inga tuhun tyin tsahñi ra nyivi.

²⁰ Tan ra Pilato cuñí ra jaña ra tsi ra Jesús. Tan quitsahá caahán ra tshin nyivi can inga tsaha tyin cua jaña ra tsi ra.

²¹ Maa tyin nyivi tsaa ca caná tsaa ñi:

—¡Tyaa tsi ra nu cruu. Na cúu ra nu cruu!

²² —¿Náa tsa ña vaha javahá ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

²³ Maa tyin nyivi caná tsaa ca ñi, tan catyí ñi tyin nacañi ra tsi ra Jesús nu cruu. Tan maa ñi tan tshin ra jutu tsa cuví ityi nuu naha ra, ñihí ñi tsa cuñí ñi tyin caná tsaa xaan ñi.

²⁴ Tacan tan javahá ra Pilato cuhva cahán ñi.

²⁵ Tan jañá ra tsi ra Barrabás, ra tsa nyii vehe caa tsa cuenda tsa cañi tahan ra tshin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñí maa ñi.

Nu tyaa ra naha tsi ra Jesús nu cruu
(Mt. 27.32-44; Mr. 15.21-32; Jn. 19.17-27)

²⁶ Tacan tan quihñ andaru tsi ra Jesús. Tan cuahán ra tshin ra naha. Tan tiñ tucu ra naha tsi iin ra ñuu Cirene nañi Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cahun ra ityi tsata ra.

²⁷ Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñí ñi tsacatyí tundoho tahan ra.

²⁸ Maa tyin ra Jesús nanyehé ra nuu ñi. Tan catyí ra tshin ñi:

—Tandihí nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo.

²⁹ Tyin cua quitsj quivi cua nyehé xaan ndo tundoho. Tan cua cahan nyivi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tshin

ndo: “Vaha xaan tyin nduve sehe ndo tsiocoq tyin cuaha xaan tundoho nyehé yo vityin”, cua catyí ñi tsihin ndo.

³⁰ Tyin quiví can cua cuñi ñi nduva yucu tsata ñi tan quihvi xeehe ñi.

³¹ Tyin tatun tyehen icá nyívi tsihin iin yutun vaha, yaha ca cuhva cua ica ñi tsihin yutun ityí —catyí ra Jesús tsihin ñiñaha ñuu Jerusalén can.

³² Tan quihñin tucu andaru can naha ra tsi uvi taahan ra iyó cuatyí, tyin cahñi ndihi ra naha tsi ra naha iin caa ñi tsihin ra Jesús.

³³ Tacan tan tsaq ra naha iin nu nañi Yiqui Jiñi Ndiyí. Tan ican tyaq ra naha tsi ra Jesús nu cruu. Tan tacan tyaq ndihi tucu ra naha tsi nduvi taahan ra iyó cuatyí can naha ra. Iin ra tyaq ra naha nuu cruu xiin cuaha ra Jesús. Tan inga ra can tyaq ra naha nuu cruu xiin satyin ra.

³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can.

³⁵ Tan nyívi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyívi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

³⁶ Tan juvin ñi cahñan nyaá ra andaru can naha ra tsi ra. Tan natuhva ra naha nu ticaá ra. Tan tsaha ra naha vinu iya tsihi ra.

³⁷ Tan catyí ra naha tsihin ra:

—Tatun rey cuenda nyívi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaq ra Pilato tsihin sahan griego, sahan latin, tan sahan hebreo. Tyehen caahán letra can: “Juvín ra ihya cuví Rey cuenda nyívi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsaha caahán nyaa ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihi tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin.

⁴¹ Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yooho Jesús, nducuhun iñi tsi yu quiví cundaca ñaha un —catyí ra.

⁴³ Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyah un tsihin yu nda paraíso [nu yucú añima nyívi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsaha ndunaá nu ñuhu ñayiví, nda cuanda caa uñi tsa tseñi.

⁴⁵ Tyin ndunaq ñicanyii. Tan jahma tsa ticaá tsitsi vehe ñuhu cahnu, ndata sava tsi.

⁴⁶ Tacan tan canq tsa ra Jesús tan catyí ra:

—Tyatya, Jutu yu, tyaa cuenda yu aña yu ndaha un —catyí ra.

Tan cuhva tsa cahan ra tacan, tan tsihi ra.

⁴⁷Tan ra cuví capitán cuenda andaru can naha ra, nyehe ra tandihi tsa cuví. Tan jacahnu ra tsi Nyoo, tan catyí ra:

—Nduve tsa cuí cuatyí ra ihya tsicoo —catyí ra.

⁴⁸Tan tandihi nyivi tsa nyecú ican, nyehe ñi tsa cuví. Tan cuahán ñi tan quitsaha cañi ndaha ñi yiqui nyica ñi. Tyin tsitó ñi tyin ña vaha tsa javaha ñi tsihin ra Jesús.

⁴⁹Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰Tan iyó iin ra vaha, nañi ra José. ra ñuu Arimatea tsa canyii Judea. Tan cuví ra iin ra cuví ityi nuu cuenda Junta Cahnu nyivi Israel.

⁵¹Tan ra José can ndatú ra quivi tsa cua cundaca ñaha Nyoo. Tan ña ndog ra vaha tsihin tsa javaha ra cutahán tsihin ra, ra cuví jutu tsa cuví ityi nuu naha ra.

⁵²Tacan tan tsahan ra José can tsindacan ra cuñu ñuhu ra Jesús tsi ra Pilato.

⁵³Tan yaha tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javaha nyivi tan ñaha ca quihvi ndiyi tsitsi can.

⁵⁴Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

⁵⁵Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyii cuñu ñuhu ra.

⁵⁶Tan cuanuhu ñi nda yuvehe ñi. Tan janduvahá ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quivi can tumaa catyí maa tuhun tsa tsaha cuenda Nyoo tsi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹Tsa tuví tumingu quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi.

²Tan cuhva tsa tsaá ñi, nyehe ñi tyin tsa cuatsiyó yuu tsa ndasí yuhu ñaña can.

³Tan quihvi ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús.

⁴Tan yucú ñi tsihin tsa yuuhvi ñi. Tan ña tsitó ñi náa cua javaha ñi. Tan sana iñi ñi quituví uvi taahan rayi nuu ñi. Tan xiñu xaan jahma nditsí ra naha.

⁵Tan tsihin tsa yuuhvi ñi, tan tsaquin ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

⁶Nduve ca ra nyii ihya, tyin tsa nandoto ra. Nducuhun iñi ndo tsa cahan ra tsihin ndo quivi tsicá ra Galilea.

⁷Catyí ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quivi cua nandoto ra. Tacan catyí ra tsihin ndo —catyí ángel can naha ra tsihin ñi.

⁸ Tacan tan nducuhun iñi ñi tsa cahān ra Jesús quivi can.

⁹ Tan cuanuhu ñi. Tan nacatyj tuhun ñi tsihin tsa utsi iin ra tsa tavā tyiñu ra Jesús tan tsihin tandihi ca nyivi tsa tsinyicun tsi ra.

¹⁰ Tan ñiñaha tsa tsicatyi tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha.

¹¹ Maa tyin ra tavā tyiñu ra Jesús cuñí maa ra naha tyin caahán ñi maa ñi. Tan ña tsinú iñi ra naha tsa caahán ñi.

¹² Maa tyin ra Pedro nduvitā ra tan tsinú xaan ra cuahán ra cua nyehe ra tsitsi ñaña nu tinyi ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyií nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñí ra tsa cuví.

*Tsa cuví ityi cuahán ñuu Emaús
(Mr. 16.12-13)*

¹³ Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén.

¹⁴ Tan cuahán ra naha tan natuhún tahan ra naha náa ndihi tsa cuví.

¹⁵ Tan tsitsi tsa natuhún ra naha, tan ra Jesús tahān ra tsi ra naha ityi cuahán ra naha.

¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasi tsi nuu ra naha, tan ña cuví nacoto ra naha tsi ra Jesús.

¹⁷ Tacan tan nducu tuhun ra Jesús tsi ra naha:

—¿Náa natuhún xaan ndo? ¿Nacuenta cuiihya xaan cuñí ndo? —catyi ra tsihin ra naha.

¹⁸ Tan iin ra tsa nañí Cleofas nacahān ra tan catyi ra:

—Tandihí nyivi tsitó tsa cuví ñuu Jerusalén. ¿A ra inga ñuu cuví yooho tyin ña tsitō un tsa cuví? —catyi ra.

¹⁹ Tacan tan catyi ra Jesús tsihin ra naha:

—¿Náa cuví?

Tan nacatyj tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javahā ra tsa cahnu tan cahān ra tsa vaha nuu Nyoo tan nuu tandihi nyivi.

²⁰ Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsahā cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu.

²¹ Tan vityin tsa quitā uñi quivi tsa cuví yacan. Tan nyuhu cuñí maa ndi tyin juvín ra cua jacacu tsi yo tsa cuví yo nyivi Israel.

²² Maa tyin vityin iyo xaan cuñí ndi tsa nacatyj juhva ñiñaha tsihin ndi. Tyin maa ñi tsahān ñi nu ñaña ra tsa tuví.

²³ Tan nduve ca cuñu ñuhu ra canyií. Tan nacatyj tuhun ndihi ñi tyin nyehe ñi uvi taahan ángel. Tan catyi ángel can naha ra tsihin ñi tyin ra Jesús nyito ra.

²⁴ Yahā yacan tan tsahān tucu juhva ra cutahán tsihin ndi tsinyehē ra naha nu ñaña. Tan nyehe ra naha tyin tsa nditsa cuví tsa cahān ñiñaha can. Maa tyin ña nyehe ra naha tsi ra Jesús —catyi ra naha tsihin ra Jesús.

²⁵ Tacan tan catyi ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahān ra cuví ndusu yuhu Nyoo tahān tsanaha.

26 ¿A ña tsító ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

27 Tacan tan quitsaha tsahá cuenda ra nácaa cuahán tuhun maa ra nu tutu Nyoo. Tan quitsaha caahán ra tuhun tsa tyaá ra Moisés tahan tsanaha. Tan yaha can tan cahan ra tuhun tandihi libru tsa tyaá ra cuví ndusu yuhu Nyoo.

28 Tan cuhva tsa tsaá ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

29 Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha.

30 Tan cuhva tsa tsinyaá ra yuhu mesa tsihin ra naha, quihín ra paan. Tan tsahá ra tyahvi nyoo tsi Nyoo. Tan tsahnú sava ra, tan tsahá ra tsi ra naha.

31 Tan iin yaha ñi nuñá nuu ra naha tan nacoto ra naha tsi ra Jesús. Maa tyin ra Jesús naá ihñi ñi ra.

32 Tacan tan quitsahá natuhún tahan ra naha tan catyí ra naha:

—Yacan cuenda vaha xaan cuñi añima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

33 Ña ndatu ca ra naha, tan cuanuhu ra naha nda ñuu Jerusalén. Tan ñihi tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha.

34 Tacan tan tsa utsi iin ra can naha ra nacatyí tuhun ra naha tsihin ra tsa ndi tsaá can naha ra:

—Ndítsa tyin Jutu Mañi yo nandoto ra. Tyin ra Simón nyehe ra tsi ra —catyí ra naha.

35 Tacan tan ra tsa ndi tsaá can nacatyí tuhun ndihi ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnú sava ra paan.

Nu quituvi ra Jesús nu yucú ra tsicá tsihin ra
(Mt. 28.16-20; Mr. 16.14-18; Jn. 20. 19-23)

36 Ndi natuhún ca ra naha yacan tan quituvi ra Jesús tyañu ra naha. Tan tsahá ra nacumi tsi ra naha, tan catyí ra:

—Ña coo tsa vaha añima ndo.

37 Tacan tan nayuhvi xaan ra naha. Tan cuñi ra naha tyin tatyí ndiyi cuví can.

38 Tacan tan catyí ra Jesús tsihin ra naha:

—¿Nacuenda yuuhvi xaan ndo? ¿Tan nacuenta tsicá xaan iñi ndo?

39 Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndiyi nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

40 Tan cuhva tsa cahan ra yacan, tan janahá ra ndaha ra tsihin tsaha ra tsi ra naha.

41 Maa tyin maa ra naha, tsa cuenda tsa iyo cuñi ra naha tan siñ cuñi ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

42 Tacan tan tsahá ra naha luxu tyaca tyihyo tsihin ndutya ñuñu tsi ra.

43 Tan quihín ra. Tan quitsahá tsatsí ra nu nyecú ra naha.

44 Tan catyí ra tsihin ra naha:

—Tandihí tsa tahañ yu, yacan cuví tsa catyí yu tsihin ndo quiví can. Tan catyí yu tsihin ndo tyin tacan cua cuvi, tumaa cuhva nyaá tuhun tsa tyaa ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsahañ cuenda ra Jesús cuhva catyí nu tutu Nyoo. Tan cutuñi ñi tandihí ra naha jahañ ra.

⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quiví cua nandoto ra.

⁴⁷ Tan taahán tsi coto nyiví tuhun ra Cristo, tyin tatun ndu uvi ñi ñi cuatyí ñi, cua coo tucahnu ñi tsi ñi. Tan jihna ñi cua cahan ra naha tsihin siví ra Cristo ñuu Jerusalén, yaha can tan tandihí ca ñuu taniñ cahnu nu ñuhu ñayiví.

⁴⁸ Tan catyí tucu ra Jesús tsihin ra naha:

—Tan nyooho cuví tsandaa tsa cuenda tandihí tsehe.

⁴⁹ Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee ñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16.19-20)

⁵⁰ Tacan tan ra Jesús cuahán ra tsihin tandihí ra tsicá tsihin ra nda ñuu Betania. Tan cañihí ra ndaha ra. Tan nasocó ra tsi ra naha.

⁵¹ Tan tsitsi tsa nasocó ra tsi ra naha, nandañ ra andiví.

⁵² Tacan tan tandihí ra naha quitsahañ jacahnú ra naha tsi ra. Tan siñ xaan cuñí ra naha, cuanuhú ra naha nda ñuu Jerusalén.

⁵³ Tan tandihí quiví tsiyucú ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduvj tsi iin rayii, tan rayii can cuví ra Cristo

¹ Nda quivi jihna ñi, nda ndi cumañi ca coo tandihi tsa iyó, tan tsa iyó maa ra cuví Tuhun tsa Caahán Nyoo. Nyii ra tsihin Nyoo. Tan Nyoo cuví ra.

² Tan iyó ra tsihin Nyoo nda quivi jihna ñi.

³ Tan tsihin ra, javaha Nyoo tandihi cuui maa tsa iyó. Tan nduve tsa javaha Nyoo tsa intuhun ñi maa ra.

⁴ Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín añima nyivi.

⁵ Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶ Tsicoo iin ra tsa jaquitsj Nyoo, nañi ra Juan.

⁷ Quitsj ra cuví ra tsa ndaa. Tyin cahan ra tumañi iñi cuenda ra cuví ñuhu can, tyin tacan tan tsinu iñi tandihi nyivi tsi ra.

⁸ Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra.

⁹ Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi añima tandihi nyivi tsa iyó nu ñuhu ñayivi ihya.

¹⁰ Ra cuví Tuhun tsa Caahán Nyoo quitsj ra nu ñuhu ñayivi. Tan juvin ñi maa ra tsihin Jutu ra javaha ra naha ñuhu ñayivi. Maa tyin nyivi iyó nu ñuhu ñayivi ihya, ña nacoto ñi tsi ra tsa ra Cristo cuví ra.

¹¹ Quitsj ra nu iyó nyivi ñuu ra, nyivi Israel, tan ña naquihin vaha ñi tsi ra.

¹² Maa tyin tandihi nyivi tsa naquihin vaha tsi ra, tan tsinú iñi ñi tyin ra Cristo cuví ra, tsaha ra ndatu tsi ñi tsa cuví ñi sehe Nyoo.

¹³ Juvin ñi nacacu tsa. Maa tyin ñavin tumaa tsa cacu ñi tsa culee ñi cuenda cuñu ñuhu ñi. Tan ndi ñavin tsa cuenda tsa cuñi iin rayii coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacu tsa ñi jahá maa Nyoo.

¹⁴ Tan ra cuví Tuhun tsa Caahán Nyoo nanduvj ra iin rayii. Tan tsicoo ra tsihin yo. Tan nyehe ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsitu ra tsihin tsa nditsa tan tsa vaha.

¹⁵ Tan ra Juan can cahan ra tumañi iñi tsa cuenda ra, tan catyí ra:

—Juvín ra ihya cuví ra tsa cahan yu tuhun quivi can, tyin ra tsa vatsí ityi tsata yu, cahnu ca cuví ra tan ñavin ca maa yu. Tyin nda quivi cacu yu tan tsa iyó maa ra —catyí ra Juan.

¹⁶ Tandihí yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo.

¹⁷ Ra Moisés tsaha cuenda ra ley Nyoo tsi yo. Maa tyin ra Jesucristo tsahá ra tsa naquihín yo tsa vaha Nyoo. Tan caahán ra tsa nditsa tsihin yo.

¹⁸ Tan nduve maa yoo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

*Nu caahán ra Juan, ra jacoondutyá, tumañi iñi cuenda ra Jesucristo
(Mt. 3.11-12; Mr. 1.7-8; Lc. 3.15-17)*

¹⁹ Ra cuví ityi nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví

tata ra Leví, na cahun ra naha nu nyíí ra Juan tan ndaca tuhun ra naha tsi ra yóo ra cuví ra.

²⁰ Tan tsicā tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihí xeehe ra.

²¹ Tacan tan tsicā tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo taḥan tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicā tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

²² Tan tsicā tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndi tsihin ra tsa tavā tyiñu tsi ndi yóo ra cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa caḥan ra Isaías ra cuví ndusu yuhu Nyoo tuhun yu taḥan tsanaha —catyí ra Juan tsihin ra naha.

²⁴ Ra fariseo naha ra cuví ra tavā tyiñu tsi ra can naha ra, na ndaca tuhun ra naha tsi ra Juan.

²⁵ Tan tsicā tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyiví? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyiví tsihin ndutya. Maa tyin mahñu ndo nyíí iin ra tsa ña nacotó ndo.

²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuví ndatsí yu ñii nditsan ra —catyí ra Juan.

²⁸ Tandihí yacan cuví nu nañí Betábara tsa canyíí inga tsiyo yutya cahnu Jordán nu tsinyíj ra Juan jacoondutyá ra.

Ra Jesucristo, Mbee Ticatyi Luhlu jana Nyoo

²⁹ Tsa inga quiví nyeḥe ra Juan tsi ra Jesús cuahán ra nu nyíí ra, tacan tan catyí ra Juan:

—Nyeḥe jihna ndo, ra ihya cuví Mbee Ticatyi Luhlu jana Nyoo ra tsa quihín nya cuatyí nyiví iyó nu ñuhu ñayiví ihya.

³⁰ Tuhun ra caḥan yu quiví catyí yu tsihin ndo tyin ityí tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu.

³¹ Ndi yuhu tan ña nacotó yu tsi ra quiví can. Maa tyin vityin vatsí yu jacoondutyá yu tsihin ndutya tyin tacan tan nacoto nyiví Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyeḥe yu Tatyí Ii Nyoo tsa quitsí ityí andiví tan quitsí tsi tumaa iin paloma, tan ndoḡ tsi tsihin ra.

³³ Yuhu ñaha ca nacoto yu yóo ra cuví ra quiví can. Maa tyin Nyoo, ra tsa tavā tyiñu tsi yu jacoondutya yu tsi nyiví tsihin ndutya, catyí ra tsihin yu:

“Quiví nyehe un Tatyí li, vatsí nuú tsi síqui iin rayíi, tan ndoo tsi tsihin ra, juvin ra can cuví ra tsa cua jacoondutya tsi nyívi tsihin Tatyí li yu”, catyí Nyoo tsihin yu.

³⁴ Yuhu tsa yahá nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

Ra tsa quitsahá nyicún jihna tsi ra Jesús

³⁵ Tsa inga quívi nyíi nyico ra Juan nu nyíi ra tan yucu ndíhi uvi taahan ra tsicá tsihin ra.

³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyí Luhlu jana Nyoo —catyí ra.

³⁷ Tsa tsiñi nduvi taahan ra nyicún tsi ra Juan tsa cahān ra, tacan tan cuahan ra naha cuanyicun ra naha tsi ra Jesús.

³⁸ Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahān ra naha tan catyí ra naha:

—Maestro, ¿numaa iyó un?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahān ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaā ra naha ndacan tumaa caa cumi tsa tseñi.

⁴⁰ Iin ra tsa tsiñi tsa cahān ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

⁴¹ Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñi tsi catyí, ra Cristo, o cuñi tucu tsi catyí, ra tsa nacatsi vaha Nyoo tyin quitsi ra cuví ra rey tsa cuenda yo.

⁴² Tacan tan quihin ra Andrés tsi ra Simón yañi ra cuahān tsihin ra nu nyíi ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñi tsi catyí tsi “Pedro”, tan tsa nduvi sívi can, cuñi tsi catyí tsi “cava”, [tumaa iin yuu cahnu].

Nu canā ra Jesús tsi ra Felipe tan ra Natanael

⁴³ Tsa inga quívi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

⁴⁴ Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro.

⁴⁵ Tacan tan tsahān ra Felipe tsinanducú ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahān tucu ra cuví ndusu yuhu Nyoo tuhun tahān tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶ Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahān ra Felipe tan catyí ra:

—Naha tan nyehe un —catyí ra.

⁴⁷ Tacan tan tsa cua cuyatyin ra Natanael nu nyíi ra Jesús. Tan nanyehē ra Jesús tyin vatsí ra, tan quitsahā catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

⁴⁸ Tacan tan tsicā tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyíi un tsaha yutun higo can —catyí ra Jesús tsihin ra.

⁴⁹ Tacan tan quitsahā catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

⁵⁰ Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

⁵¹ Tan catyí ra Jesús tsihin ra naha:

—Tsa nditsa catyí yu tsihin ndo tyin nyoooho cua nyehe ndo cua nuña andívi tan cuaha xaan ángel Nyoo cua ndaa, tan cua nuu ra naha siqui yuhu Rayíi tsa queē nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyíi Galilea

¹ Tsa yahā uñi quiívi tan tsicoo iin vico tindaha ñuu Caná tsa canyíi Galilea. Tan ican nyíi sihi ra Jesús.

² Tan nyívi javahā vico can canā ndihí ñi tsi ra Jesús tan tsihin tandihí ra tsicá tsihin ra tyin cuhun ra naha.

³ Tacan tan cuahán ra naha. Tan tsitsi tsa yucú ra naha nu iyó vico can, tan ndihí vinu ñi javahā vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihí iñi yo yacan, Miyan? Tyin ñaha ca tsa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyoooho tandihí tsa cua cahan ra tsihin ndo —catyí ña tsihin ra naha.

⁶ Tan nyecú iñu quisi yuu nahnu tsa yihí ndutyá tsa tuhvá ra Israel naha ra tsatyíñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutyá tsitsi can.

⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutyá —catyí ra tsihin ra naha.

Tacan tan tsitú cuií quisi can jahā ra naha.

⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan icā ra naha.

⁹ Ra cuví ityi nuu cuenda vico can tsihi ra naha ndutyá tsa nanduví vinu. Maa tyin ña tsitó ra naha nu maa queē can. Maa ñi maa ra tsa tyihí mesa can

naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can.

¹⁰ Tan catyí ra tsihin ra:

—Tandihí nyívi, jihna ca vinu vaha tuhvá ñi tava. Yaha can tan tatun tsa tsihi xaan nyívi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyívi. Tan ra tsicá tsihin ra tsinu ñi ra naha tsi ra tyin ra ican cuví ra tsa jaquitsí Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihí ra tsicá tsihin ra. Tan ican tsiyucú ñi juhva quívi.

Nu jacunu ra Jesús tsi nyívi xicó nuquehe yuvehe ñuhu cahnu
(Mt. 21.12-13; Mr. 11.15-18; Lc. 19.45-46)

¹³ Tsa cua tahan tsi quívi vico pascua tsa jacahnú nyívi Israel. Yacan cuenda cuahán ra Jesús ñuu Jerusalén.

¹⁴ Tsa tsaá ra ñuu can, quíhvi ra nuquehe vehe ñuhu cahnu, tan nyehe ra yucú cuaha nyívi xicó ñi nuquehe can. Yihí ñi xicó ñi indiquí, mbee ticatyí, tan paloma. Tan yucú ndihí tucu nyívi nasamá xuhun.

¹⁵ Tsa nyehe ra Jesús tandihí yacan, tacan tan javaha ra iin yoho. Tan tsihin yoho can jacunu ra tsi tandihí nyívi nuquehe vehe ñuhu iin cahnu ñi tsihin mbee tan tsihin indiquí jana ñi. Tan ñi nasamá xuhun can, jatucuatyí ra xuhun ñi nu ñuhu tan janduva ra mesa ñi.

¹⁶ Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tsihin ñi.

¹⁷ Tacan tan ra tsicá tsihin ra, nducuhun ñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun ñi ra naha.

¹⁸ Tacan tan ra cuví ityi nuu tsihin nyívi Israel quitsaha tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsaha Nyoo ndatu tsi un tsa javaha un yacan? —catyí ra naha tsihin ra.

¹⁹ Tan nacahan ra Jesús tan catyí ra:

—Caní ndo vehe ñuhu ihya, tan tsitsi tsa uñi quívi ñi tan cua janduvita nyico yu itsí inga tsaha —catyí ra tsihin ra naha.

²⁰ Tacan tan quitsaha catyí ra nyecú ican naha ra tsihin ra:

—Uvi xico iñu cuiya jaha tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi quívi ñi tan cua janduvita un itsí inga tsaha! —catyí ra naha tsihin ra.

²¹ Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra.

²² Yacan cuenda tandihí ra tsicá tsihin ra nducuhun ñi ra naha yacan quívi nandoto ra. Tan cutuñi ñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinu ñi ra naha tsa cahan ra Jesús tan tsa nyaá nuu tutu Nyoo.

Ra Jesús tsitó ra tsa iyó añima nyívi

²³ Tsitsi tsa ndi nyíi ra Jesús ñuu Jerusalén, quívi iyó vico pascua, cuaha xaan nyívi quitsaha tsinu ñi tsa caahán ra tsa cuenda tsa cuaha tsa iyo javaha ra.

²⁴ Maa tyin ra Jesús ña nñi cuñí ra nyehé ra tsi tandihí ñi tyin tsitó ra cuhva tsicá iñi ñi.

²⁵ Ña tsifiñuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi añima yo.

3

Nu jacuahá ra Jesús tsi ra Nicodemo

¹ Tsioco iin ra cuví fariseo tsa nañí Nicodemo. Tan cuví ra iin ra cuví ityi nuu tsihin ra Israel naha ra.

² Ra Nicodemo ihya, tsahan ra nu nyí ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tavá tyiñu tsi un tsa quitsi un jacuahá un tsi ndi. Tyin yoñi nyivi tan cuví javahá ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

³ Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyivi inga tsaha, ña cua cuví nyehe ñi nu ndacá ñaha Nyoo —catyí ra.

⁴ Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa ra inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñí tsi nacacu tsa ñi tsihin Tatyí li Nyoo.

⁶ Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsa tsihin Tatyí li Nyoo, Tatyí li Nyoo iyó añima ñi.

⁷ Ña cu iyo iñi un tsa caahán yu tsehe tsihin un tyin tandihí nyivi cuñí tsi nacacu tsa ñi.

⁸ Tumaa tsa yihí tatyí tandihí ñi ityi tan tsiñí un cucayú vatsí tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihí nyivi nacacu tsa tsihin Tatyí li Nyoo —catyí ra Jesús tsihin ra.

⁹ Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyivi Israel, taahán tsi coto un tsehe.

¹¹ Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo.

¹² Tatun ña tsinú iñi ndo tsa caahán yu tuhun nu ñuhu ñayivi ihya tsihin ndo, ¿nácaa cua tsinu iñi ndo tatun cua cahan yu tuhun gloria tsihin ndo?

¹³ Yoñi tsahan gloria tsinyehé nácaa iyó. Intuhun ñi maa yuhu Rayi tsa quee nda gloria nyehé yu nácaa iyó gloria, tyin ndacan quee yu.

¹⁴ Tumaa tsa ticaá ra Moisés iin coo tsa tsinú tsihin caa nu yutun iin nu tsiqui, tacan cua ticaa nyivi tsi yuhu Rayi tsa quee nda gloria nuu cruu.

¹⁵ Tacan tan tandihí nyivi tsa tsinú iñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

Nyoo cuñí xaan ra tsi tandihí nyivi

¹⁶ Nyoo cuñí xaan ra tsi tandihí nyivi iyó nu ñuhu ñayivi. Yacan cuenda tsahá ra tsa cúu Sehe mañi ra nu cruu tsa cuenda ñi. Tyin tacan tan tandihí

ñi tsa tsinú iñi tsi Sehe ra, ña cunaa ñi, tan coo ñi ñayivi nyito tsa ña cua naa maa.

¹⁷ Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

¹⁸ Yacan cuenda nyivi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinú iñi tsi yu, tsa cunaa ñi tyin ña tsinú iñi ñi tsi yu tsa cuví yu Sehe mañi Nyoo.

¹⁹ Nyivi ña tsinú iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi.

²⁰ Tandihí nyivi javahá tsa ña vaha, ña taahán iñi ñi coo ñi nu nditsin, tyin ña cuñí ñi tsa quituvi tsa ña vaha javahá ñi.

²¹ Maa tyin nyivi taahán iñi tsa nditsa, naquitá ñi nu nditsin tyin tacan tan nyehe nyivi tyin javahá ñi cuhva cuñí Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyivi, tuhun ra Jesús inga tsaha

²² Tsa yaha yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ícan juhva quivi, tyin jacoondutyá ra naha tsi nyivi.

²³ Tacan tucu ra Juan nyíí ra jacoondutyá ra tsi nyivi nu cuví Enón yatyin ñi nu cuví Salim, tyin ícan ñuhú cuaha ndutya. Tan tsaá nyivi tan tsicoondutyá ñi.

²⁴ Yacan javaha ra Juan tsa ndi cumañi ca quihvi ra vehe caa.

²⁵ Tacan tan quitsaha caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyivi tsi ñi nuu Nyoo.

²⁶ Tacan tan cuahán ra naha nu nyíí ra Juan. Tan catyí ra naha tsihin ra: —Maestro, ra tsa tsinyij tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihí ra tsi nyivi tan tandihí nyivi nyicún tsi ra —catyí ra naha tsihin ra.

²⁷ Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo.

²⁸ Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyí catsi yu tyin ra jaquitsi Nyoo ityi nuu ra Cristo cuví yu.

²⁹ Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyíí ra ícan. Tan cusí iñi ra tsiñi ra tsa caahán ra tsa cua tindaha. Tan tacan tucu yuhu, sii cuñí yu tyin naquihín nyivi tuhun caahán ra Jesús tan nyicún ñi tsi ra.

³⁰ Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayivi

³¹ Ra tsa quee nda gloria, cahnu ca cuví ra tan ñavin ca tandihí nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra.

³² Tan caahán ra tsa nyehé ra tan tsa tsiñi ra, maa tyin yoñi tsinú iñi tsa caahán ra.

³³ Tatun yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra.

³⁴ Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsaḥa ra itsi tsi ra. Tsaḥa ra naní Tatyí li ra tsi ra.

³⁵ Nyoo Jutu yo cuñi ra tsi Sehe ra. Tan nacuhva cuenda ra tandíhi maa tsi ra.

³⁶ Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñi tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsitó ra cuví fariseo naha ra tyin cuaha xaan ca nyivi nyicún tsi ra Jesús tan ñavin cá ra Juan. Tan cuaha xaan ñi tsicoondutyá.

² Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi.

³ Tan quivi tsa tsitó ra Jesús tyin tsitó ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñi tsi yaha ra ican.

⁵ Tacan tan tsaḡ ra iin ñuu tsa canyíi Samaria tsa nañi Sicar yatyin ñi nu cuví ñuhu ra Jacob nu tsaḥa ra tsi ra José sehe ra.

⁶ Ican nyaá iin soco pila tsa catyí nyivi tyin tsii ra Jacob cuví. Tsa quita ra Jesús nu nyaá soco can tan tsinyaḡ ra yuhu soco can tyin tatu xaan ra tyin cañi xaan ityi tsicḡ ra tan maa hora cuví.

⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaḡ iin ñaha Samaria tyin cua tava ña ndutyá tsitsi soco can. Tacan tan catyí ra Jesús tsihin ña:

—Cuhva luxu ndutyá coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutyá coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.)

¹⁰ Tacan tan nacahán ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutyá tsi un, maa un cua ndacan ndutyá tsi yu. Tan cua cuhva yu ndutyá nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutyá cuhva un tsi yu? tan ndi nduve náa ndaha un ¿Nu maa cua quihin un ndutyá nyito can cuhva un coho yu?

¹² Ra Jacob tsii tsaḥnu yo, nacoḡ ra soco ihya tsi ndi. Juvín ihya tsihi maa ra ndutyá tan tsihin tandíhi sehe ra. Tan juvín ñi ihya tsihi tucu quiti jana ra naha. ¿A cahnu ca ra cuví yooho tan ñavin ca ra can? —catyí ña tsihin ra.

¹³ Tacan tan nacahán ra Jesús tan catyí ra tsihin ña:

—Tandíhi nyivi tsihi ndutyá ihya, cua na ityi nyico iñi ñi.

¹⁴ Maa tyin nyivi tsihi ndutyá tsa tsahá yuhu, ña cua na ityi ca iñi ñi. Tyin ndutyá tsa tsahá yuhu cua cana tsi tsitsi añima ñi tumaa caná ndutyá iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

¹⁵ Tacan tan quitsahḡ caahán ña tsihin ra:

—Yooho tatta, cūhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan cua quihin y# un tan quitsi ndo —catyí ra tsihin ña.

¹⁷ Tan nacahan ña tan catyí ña:

—Nduve y# yu iyó.

Tacan tan catyí ra Jesús tsihin ña:

—Nditsa tsa caahan un, tyin nduve y# un iyó.

¹⁸ Tyin tsa uhun y# un tsicoo, tan ra cumí tsi un vityin ñavin y# un tsi ra. —catyí ra tsihin ña.

¹⁹ Tsa tsiñi ña tsa cahan ra tacan, quitsaha catyí ña tsihin ra:

—Yooho tatta, tuví iñi yu tyin ra cuví ndusu yuhu Nyoo cuví un.

²⁰ Tsi tsahnú ndi, ra ñuu ihya naha ra, jacahnú ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahan tsi jacahnú yo tsi Nyoo —catyí ña tsihin ra.

²¹ Tacan tan nacahan ra Jesús tan catyí ra tsihin ña:

—Tsinu iñi tsa caahan yu tsihin un. Tyin vatsí hora tsa cua jacahnú ndo tsi Jutu yo Nyoo. Maa tyin ña tsiñihuhú ca tsa quitsi ndo yucu ihya, a cahun ndo nda Jerusalén.

²² Nyooho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyivi jaha Nyoo.

²³ Maa tyin cua tsaa hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnú ñi tsi ra tsihin aña ñi tan tsihin tsa nditsa. Tuma jaquihín ityi maa Tatyí Ii Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra.

²⁴ Tyin Nyoo Tatyí Ii cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tuma jaquihín ityi maa Tatyí Ii tsi ñi —catyí ra tsihin ña.

²⁵ Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandihí tsihin yo —catyí ña tsihin ra.

²⁶ Tacan tan nacahan ra Jesús tan catyí ra tsihin ña:

—Ra tsa caahan un tuhun can, juven ra caahan tsihin un —catyí ra tsihin ña.

²⁷ Tacan tan tsaa nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenta natuhún ra tsihin ñaha can.

²⁸ Tacan tan nacoo ña quiyí ña tan cuanuhu ña nda ñuu. Tan catyí ña tsihin nyivi:

²⁹ —Cohon ndo cūnyehe ndo tsi iin ra tsa cahan tandihí cūhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

³⁰ Tacan tan quita nyivi ñuu can tan cuahán ñi cua nyehe ñi nu nyí ra Jesús.

³¹ Tan tsa ndi cumañi ca tsaa ñi nu nyí ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, catsi luxu —catyí ra naha.

³² Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

³³ Tacan tan ra tsicá tsihin ra, quitsahá natuhún tahan ra naha, tan catyí ra naha:

—¿A iyó yóo quitsj quitsj ndaca tsa catsi ra? —catyí ra naha.

³⁴ Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñí ra tsa jaquitsj tsi yu, tan javahá yu tyiñu tsañá ra tsi yu.

³⁵ Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsj yo.” Maa tyin yuhu catyí yu tsihin ndo: Nyehe ndo tyin tsa ndihi tsa tatsj ndo cuaan tan tsa nyecú vaha tsi tsa cua naquihin vaha yo itsi.

³⁶ Ra tsa naquihín vaha can ñihí ra yahvi ra. Tan tsa naquihín vaha ra, cuví tsi nyívi tsa cua coo ñayivi nyito tsa ña cua naa maa. Tacan tan ra tsa tatsj tan ra tsa naquihín cusii iñi ra naha.

³⁷ Tan iyó iin cuhva tuhvá nyívi caahán tan catyí ñi tyin siin nyívi tatsi tan siin nyívi naquihín vaha. Tan nditsa yacan.

³⁸ Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyooho cucahnu ndo tan cua naquihin vaha ndo ñiñi can —catyí ra Jesús tsihin ra naha.

³⁹ Tan cuaha xaan nyívi ñuu Samaria can quitsahá tsinú iñi ñi tsi ra Jesús tsa cuenda tsa cañan ñaha can, tyin catyí ña: “Cahán ra tsihin yu tandihi cuhva iyó yu”, catyí ña.

⁴⁰ Cuhva tsa tsaá ñi nu nyíi ra Jesús, tan cañan ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quívi.

⁴¹ Tan cuaha ca nyívi quitsahá tsinú iñi ñi tsa tsiñi ñi tsa caahán ra.

⁴² Tacan tan quitsahá catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cañan un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyívi iyó nu ñuhu ñayivi ihya —catyí ñi.

Nu janduvahá ra Jesús sehe iin ra cumí tyiñu

⁴³ Tsa yaha uvi quívi tan quee ra Jesús nu cuví Samaria tan cuahán ra ityi nu cuví Galilea, nu cacú ra.

⁴⁴ Vasu ndi maa juvin ñi maa ra cañan tyin iin ra cuví ndusu yuhu Nyoo, nyívi ñuu ra ña jahá ñi tsa ñayivi tsi ra.

⁴⁵ Tacan tan tsa tsaá ra Galilea, nyívi iyó ican, vaha caahán ñi tsihin ra, tyin tsañan ñi vico Jerusalén, tan nyehe ñi tsa vaha tsa javahá ra.

⁴⁶ Tacan tan cuanuhu nyico ra Jesús nda ñuu Caná tsa canyii Galilea nu nanduvj ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum.

⁴⁷ Quívi tsa tsitó ra can tyin tsa tsaá nyico ra Jesús nda Galilea tsa tsañan ra nda Judea, tsañan ra tsinyehé ra tsi ra Jesús. Tan tsican ra tumañi iñi tsi ra na cuhun ra vehe ra tan janduvaha ra tsi sehe ra, tyin tsa cuñí cúu cuii ña sehe ra.

⁴⁸ Tacan tan catyí ra Jesús tsihin ra:

—Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

⁴⁹ Maa tyin ra can catyí ra tsihin ra Jesús:

—Yooho taa, çohon ñi tsihin yu tsa ndi cumañi ca cúu sehe yu —catyí ra tsihin ra Jesús.

⁵⁰ Tacan tan catyí ra Jesús tsihin ra:

—Cuñuhu yuvehe un. Sehe un nyito ra, tsa nduvahā ra —catyí ra tsihin ra.

Tacan tan ra can tsiñu iñi ra tsa cahān ra Jesús tan cuanuhu ra.

⁵¹ Tsa tsa cuyatyin ra yuvehe ra, quitā musu ra tan caahān ra naha tsihin ra:

—¡Taa, sehe un nyito ra; tsa nduvahā ra!

⁵² Tacan tan quitsahā tsicā tuhun ra tsi ra naha náa hora quitsahā vaha cuñi ra. Tan catyí ra naha tsihin ra:

—Icu kuhva caa iin tsa yahā hora quitā cahñi tsi ra —catyí ra naha.

⁵³ Tacan tan tsito ra can, tyin hora can cahān ra Jesús tsihin ra, “Cuñuhu tyin sehe un nyito ra, tsa nduvahā ra.” Tan maa ra can tsihin tandihñi nyivi ra quitsahā tsiñu iñi ñi tsi ra Jesús.

⁵⁴ Yacan cuví tsa iyo tsa tsiñu uvi javahā ra Jesús tsa tsaā nyico ra Galilea tsa yaha tsahān ra Judea.

5

Nu janduvahā ra Jesús iin ra cuuhví

¹ Tsa yahā can tan cuahān ra Jesús ñuu Jerusalén inga tsaha tyin nyivi ñuu Israel jacahnú ñi iin vico.

² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyi. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor.

³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can.

⁴ Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yahā ñi nacandá ndutya can, nduvahā ñi vasu ndi maa cuehe cahnu ndohó ñi.

⁵ Tan ican canyí iin ra cuuhví tan tsa iyó oco tsahun uñi cuiya cuuhví ra.

⁶ Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsicā tuhun ra tsi ra ndaahvi can, tan catyí ra:

—¿A cuñi un nduvaha un?

⁷ Tan ra cuuhví can nacahān ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahān ñi tsaha tsa cuñi yo quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan caca un —catyí ra tsihin ra.

⁹ Juvín ñi hora can tan nduvahā ra, naquihin ra yuvi ra, tan nacacā ra. Maa tyin quivi quitatú nyivi cuví quivi can.

¹⁰ Yacan ra cuví ityi nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vityin, yacan cuenda ña taahān tsi cuiso un yuvi un —catyí ra naha tsihin ra.

¹¹ Tan ra tsa nduvahā can nacahān ra tan catyí ra:

—Ra tsa janduvahā tsi yu, catyí ra tsihin yu: “Naquihin yuvi un tan caca un”, catyí ra tsihin yu.

¹² Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cahān tsihin un tyin naquihin un yuvi un tan caca un? —catyí ra naha.

13 Maa tyin ra tsa nduvahā can ña tsitó ra yóo janduvahā tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra.

14 Yahā can tan nañihí ra Jesús tsi ra tsa nduvahā can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca siquí un —catyí ra tsihin ra.

15 Tacan tan tsaḥan ra tsicahān ra tsihin ra Israel naha ra tyin ra Jesús cuví ra janduvahā tsi ra.

16 Tsa cuenda tsa janduvahā ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahñi ra naha tsi ra.

17 Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

18 Tan tsa cuenda tsa caḥan ra yacan, xaan ca cuñi ra Israel can naha ra. Tan ñihi ca cuñi ra naha cahñi ra naha tsi ra tyin cuñi maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

19 Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu.

20 Tyin cuñi xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can.

21 Tumaa janandotó Nyoo Jutu yu ndiyi, tan tsahá ra ñayivi coo ñi, tacan tucu yuhu tsa cuví yu Sehe ra, tsahá yu ñayivi coo nyivi cuñi maa yu cuhva yu.

22 Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsahā ra ndatu tsi yuhu tsa cuví yu Sehe ra tyin jandaa yu cuatyí nyivi.

23 Tacan icá Nyoo Jutu yu tsa cuñi ra jacahnu nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsi tsi yu.

24 Tan tsa nditsa caahán yu tyin nyivi tyaá soho tsa caahán yu tan tsinú iñi ñi tsi ra tsa jaquitsi tsi yu, iyó ñi ñayivi nyito tsa ña cua naa maa. Tan ña cua cuhnu ca ñi nyaya tsa catyí cuatyí ñi tyin tsa jacacu Nyoo tsi ñi tan ña yihi ndaha ca tuhun tsihí tsi ñi, tan tsahā ra ñayivi nyito iyó ñi.

25 Nyivi; tumaa ndiyi cuví ñi. Tan tsa nditsa caahán yu tsihin ndo tyin vatsi quivi cua cuñi ñi ndusu Sehe Nyoo. Tan nyivi tsa cua tyaa yahvi tsa caahán ra, cua coo ñi ñayivi nyito tsa ña cua naa maa. Tan vityin cuví quivi tsa caahán yu tuhun.

26 Tyin Nyoo Jutu yu iyó ra ñayivi nyito tsa ña cua naa maa. Tan tsahā ra ndatu can tsi yuhu tsa cuví yu Sehe ra tyin cuhva yu ñayivi can coo nyivi.

27 Tan tsahā tucu Nyoo ndatu tsi yu tsa jandaa yu cuatyí nyivi, tyin Rayii quee nda gloria cuví yu.

28 Ña iyo cuñi ndo tsa caahán yu tyehen, tyin cua tsaa quivi tsa cuñi ndiyi yucú tsitsi ñaña ndusu Sehe Nyoo.

29 Tan cua quita ñi tsitsi ñaña ñi. Tacan tan nyivi tsa javaha tsa vaha cua nandoto ñi tyin coo ñi ñayivi nyitó. Maa tyin nyivi tsa javaha tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayivi nyito coo nyivi

30 'Yuhu ña cuví javaha yu tsa javahá yu tsa intuhun ñi maa yu. Yuhu jandaá yu cuatyí nyivi tumaa cuhva tavá tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñi maa yu, tyin javahá yu cuhva caahán maa Jutu yu, ra tsa jaquitsj tsi yu.

31 Tan tatun juven ñi maa yu cuví tsa ndaa tsa cuenda yu, nduve yahvi nyaá tsa ndaa can.

32 Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa.

33 Nyooho tavá tyiñu ndo na ndaca tuhun ra naha tsi ra Juan. Tan tuhun tsa cahán ra, tsa nditsa cuví tsi.

34 Maa tyin yuhu ña tsiñiñuhú tsa cuví rayi tsa ndaa tsa cuenda yu. Maa tyin caahán yu tuhun tsa cahán ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo.

35 Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quivi cusii iñi ndo tsihin ñuhú nditsin can.

36 Maa tyin yuhu iyó iin tsa ndaa vaha ca tsi yu tan ñavin ca tsa caahán ra Juan. Tyin tandihí tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsj tsi yu.

37 Tacan tucu Jutu yu, ra tsa jaquitsj tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehé ndo tsi ra.

38 Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsj tsi yu.

39 Nyooho tsihin cuenda xaan cahví ndo nu tutu Nyoo, tyin cuñi maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi.

40 Tan nyooho ña cuñi ndo quitsi ndo nu nyaá yu tan cuhva yu ñayivi nyito coo ndo.

41 'Yuhu ña nducú yu tsa jacahnu nyivi tsi yu.

42 Tyin yuhu tsitó yu tsi ndo tan tsitó yu tyin ña cuñi ndo tsi Nyoo.

43 Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo.

44 Nyooho ña cuví tsinu iñi ndo tsi yu tyin cuñi ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó.

45 Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñi maa ndo tyin ley tsa tyaá ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaá ra.

46 Tyin tun tsatyin nditsa tsa tsinú iñi ndo tsa cahán ra Moisés, tacan cua tsinu ndihí iñi ndo tsa caahán yuhu. Tyin tuhun yuhu cuví tsa tyaá ra.

47 Maa tyin tatun ña tsinú iñi ndo tuhun tsa tyaá ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityí nuu tsihin ra Israel naha ra.

6

*Nu jacatsi ra Jesús uhun mil rayi#
(Mt. 14.13-21; Mr. 6.30-44; Lc. 9.10-17)*

¹ Tsa yaha yacan, tan cuahán ra Jesús inga tsiyo miñi cahnu tsa nañi Nduitya Ñuhu Galilea. Tan juvin ñi nañi tucu tsi Miñi Tiberias.

² Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví.

³ Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra.

⁴ Tan tsa cuyatyin cuii tahan tsi quivi vico pascua tsa jacahnú nyivi Israel.

⁵ Tan nyehé ra Jesús tyin cuaha xaan nyivi nyicún tsi ra, tacan tan quitsaha caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

⁶ Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra.

⁷ Tacan tan nacahan ra Felipe tan catyí ra:

—Xuhun tsa quihin yo tsa jahá tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

⁸ Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

⁹ —Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

¹⁰ Tacan tan catyí ra Jesús tsihin ra naha:

—Cahan ndo tsihin tandihí nyivi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayi#, [tan siin maa ñi ñaha tsihin tsa nyihí].

¹¹ Tacan tan quihin ra Jesús paan can tan tsa yaha tsaá ra tyahví nyoo tsi Nyoo, tan tsaá ra can tsi ra tsicá tsihin ra. Tan ra can naha ra, tsaá ra naha can tsi tandihí nyivi tsa nyecú can. Juvín ñi tacan icá nyico ra tsihin tyaca can. Tan tsatsj ndaha iñi ñi.

¹² Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

¹³ Naquihin vaha ra naha can, tan jacutú ra naha utsi uvi tyica tsihin tsa ñahñu tsa ndoo tsa uhun taahan paan can.

¹⁴ Tacan tan tsa yaha nyehé nyivi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa quitsi maa nu ñuhu ñayivi ihya —catyí ñi.

¹⁵ Maa tyin tsa tuvj iñi ra Jesús tyin cuñi ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

*Nu tsicá ra Jesús nu ndutyá
(Mt. 14.22-27; Mr. 6.45-52)*

¹⁶ Tsa cunaaha, nuú ra tsicá tsihin ra Jesús yuhu miñi can.

¹⁷ Tan quihví ra naha tsitsi yutun ndoo tyin cua yaha sava ra naha mahñu miñi can tan cua tsaá ra naha ñuu Capernaum. Tsa cunaaha tan ra Jesús ñaha ca maa tsaa ra.

¹⁸ Tacan tan tsaá tatyí ñihi. Tan iyo nduvitá ndutyá miñi can.

19 Tsa tsa yahá ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyin ra nu cuahán yutun ndoo can, nayuhvi xaan ra naha.

20 Maa tyin catyí ra Jesús tsihin ra naha:

—¡Maa yu cuví, ña nayuhvi ndo!

21 Tacan tan tsaá ra naha quihvi ra Jesús tsitsi yutun ndoo can. Tan iin yaha ñi tsaá ra naha yuhu miñi nu cuahán ra naha.

Nu nanducú nyivi tsi ra Jesús

22 Tsa tuvi inga quivi tan tsito nyivi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha.

23 Maa tyin tsaá taahan ca yutun ndoo tsa quee ñuu Tiberias yatyin ñi nu nacuhva Jutu Mañi yo tyahvi nyoo tsi Nyoo tan tsatsi nyivi paan.

24 Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaá tan cuahán ñi nda ñuu Capernaum cua nanducú ñi tsi ra.

Ra Jesús cuví paan tsa tsahá ñayivi nyito coo yo

25 Tsa tsaá ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaá un ihya? —catyí ñi tsihin ra.

26 Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyooho nanducú ndo tsi yu maa tyin ñavin cuenda tsa nyehe ndo tsa iyo tsa javahá yu. Nanducú ndo tsi yu tyin tsatsi ndo tan ndaha iñi ndo.

27 Ña jaha tyiñu ndo cuenda tunyee iñi tsa tsatsi ndo tsa cua ndihí ñi maa, jaha tyiñu ndo cuenda tunyee iñi tsa catsi ndo tsa ña cua ndihí tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayi tsa quee nda gloria —catyí ra Jesús.

28 Tacan tan quitsahá tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

29 Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

30 Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un?

31 Tsii tsahnu ndi tsatsi ñi maná nu tsiqui, tumaa tsa caahán tuhun Nyoo tyehen: “Andivi quee paan tsatsi nyivi jahá Nyoo” —catyí ñi tsihin ra Jesús.

32 Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaá paan tsa quee andivi tsatsi ñi, tyin maa Nyoo Jutu yu cuví ra tsahá paan nditsa tsa quee andivi.

33 Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

34 Tacan tan quitsahá catyí ñi tsihin ra:

—Taa, cuhva paan can catsi ndi tandihí ñi quivi —catyí ñi.

35 Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyívi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi.

³⁶ Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñi ndo tsinu iñi ndo tyin juvin yu cuví ra tsa cuví jatinyee tsi ndo

³⁷ Tandihí nyívi tsa tsahá Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi.

³⁸ Tyin yuhu tsa quee andívi; vatsí yu vatsí javahá yu cuhva cuñi ra tsa jaquitsí tsi yu. Ña vatsí yu vatsí javaha yu cuhva cuñi ñi maa yu.

³⁹ Tan cuhva cuñi ra tsa jaquitsí tsi yu, yacan cuví tsehe: tsa ña cunaa ndi intuhun nyívi tsa tsahá ra tsi yu, tan janandoto yu tsi ñi nu cua cundihi quívi.

⁴⁰ Jutu yu, ra tsa jaquitsí tsi yu, cuñi ra tyin tandihí nyívi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayívi nyito tsa ña cua naa maa. Tan juvin ñi yu cua janandoto tsi ñi nu cua cundihi quívi —catyí ra Jesús tsihin ñi.

⁴¹ Tsa cuenda tsa cahán ra Jesús yacan, tan quitsahá caahán nyaa nyívi Israel tsi ra tyin catyí ra: “Yuhu cuví paan tsa quee andívi”, catyí ra.

⁴² Tacan tan quitsahá catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andívi quee ra? —catyí ñi.

⁴³ Tacan tan catyí ra Jesús tsihin ñi:

—Jandihí ndo tsa caahán nyaa ndo.

⁴⁴ Yoñi maa nyívi cuví quitsí quitsí nyicún tsi yu taton ñavin Jutu yu, ra tsa jaquitsí tsi yu, caná tsi ñi. Tan cua janandoto yu tsi ñi nu cua cundihi quívi.

⁴⁵ Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyívi” catyí tsi. Yacan cuenda nyívi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶ Ñavin tsa tyin nyehé ñi tsi Nyoo Jutu yu, tyin yoñi nyehé tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra.

⁴⁷ Tsa nditsa catyí yu tsihin ndo tyin nyívi tsa tsinú iñi tsa caahán yu tsa iyó ñi ñayívi nyito tsa ña cua naa maa.

⁴⁸ Yuhu cuví paan tsa tsahá tsa coo nyito añima ñi.

⁴⁹ Tsii tsaahnu ndo tsatsí ñi maná nu tsiquí, maa tyin juvin ñi tsihí ñi.

⁵⁰ Maa tyin yuhu, tuhun paan tsa quee andívi caahán yu tsihin ndo, tyin nyívi tsa cua catsi paan can, ña cua cúu ñi.

⁵¹ Juvín ñi maa yu cuví paan nyito tsa quee andívi. Nyívi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayívi tsa iyó yu tsa cuenda tandihí nyívi iyó nu ñuhu ñayívi —catyí ra Jesús tsihin ñi.

⁵² Tacan tan nyívi Israel can quitsahá natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³ Tan catyí ra Jesús:

—Tsa nditsa catyí yu tsihin ndo, tyin yuhu cuví Rayí tsa quee nda gloria, tan taton nyooho tan ña cua catsi ndo cuñu ñuhu yu, tan ña coho ndo ñañi yu, ña cuví coo ndo ñayívi nyitó.

⁵⁴ Nyívi tsatsí cuñu ñuhu yu tan tsihí ñi ñañi yu, iyó ñi ñayívi nyito tsa ña cua naa maa. Tan yuhu cua janandoto yu tsi ñi nu cua cundihi quívi.

⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan ñañi yu cuví vinu tsa nditsa tsa taahán tsi coho ñi.

⁵⁶ Nyiví tsatsí cuñu ñuhu yu tan tsihí ñi niñi yu, iin ñi cuví ñi tsihin yu. Tan iin ñi cuví yu tsihin ñi.

⁵⁷ Jutu yu, ra tsa jaquitsj tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyiví tsatsí cuñu ñuhu yu, cua coo ñi tsihin tunyee iñi tsa iyó tsi yu.

⁵⁸ Tuhun paan tsa quee andiví caahán yu. Paan ihya ñavin tumaa maná tsa tsatsj tsi tsaahnu yo cuví tsi, tyin juvin ñi tsihí ñi. Nyiví tsatsí paan tsa cuví cuñu ñuhu yu, ña cua cundihí maa tsa coo ñi —catyí ra Jesús.

⁵⁹ Juvin yacan jacuahá ra Jesús nu ndu iin nyiví tsitsi vehe ñuhu ñuu Capernaum.

⁶⁰ Cuaha xaan nyiví nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yíi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

⁶¹ Tacan tan tuvj iñi ra Jesús tyin ña cuñí ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñí ndo tsa caahán yu ihya?

⁶² Tan ¿náa cua javaha ndo tatun nyehe ndo tsi yuhu Rayí tsa quee nda gloria nandaa nyico yu inga tsaha ityi nu quee yu?

⁶³ Tatyí Ii Nyoo tsahá ñayiví nyito. Tan cuñu ñuhu, ña jatyinyeé tsi tsa coo yo ñayiví can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyitó aña ndo.

⁶⁴ Maa tyin yihí ndo ña tsinú iñi ndo tsi yu —catyí ra Jesús.

Tyin nda quiví jihna tan tsa tsitó maa ra yóo ña cua tsinú iñi tsi ra tan yóo cua xico tsi ra.

⁶⁵ Tan catyí ra:

—Yacan cuenda catyí yu tsihin ndo tyin yoñi nyiví cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

⁶⁶ Nda quiví can, tan cuaha xaan nyiví nyicún tsi ra Jesús nacoo ñi tsi ra. Tan ña tsicá ca ñi tsihin ra.

⁶⁷ Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñí ndihí tucu nyooho cuhun ndo? —catyí ra tsihin ra naha.

⁶⁸ Maa tyin nacahán ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahán tuhun ñayiví nyito tsa ña cua naa maa.

⁶⁹ Nyuhu tsinú iñi ndi, tan tsitó ndi tyin yooho cuví ra Cristo Sehe Nyoo nyito.

⁷⁰ Tan nacahán ra Jesús tan catyí ra:

—¿A ñavin yuhu nacatsj tsi tandihí tsa utsi uvi ndo? Tan intuhun ndo yihí nu ña vaha —catyí ra.

⁷¹ Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

¹ Tsa yahā yacan, tan nyí ra Jesús tsicá nuu ra nu cuví Galilea. Ña cuñí ra cuhun ra nu cuví Judea tyin ra cuví ityi nuu tsihin nyivi Israel can naha ra cuñí ra naha cahñi ra naha tsi ra.

² Tan tsa cuyatyin quivi vico tsa jacahnú nyivi Israel ndihi ñi cuiya. Tan nañi tsi Vico Tyahva.

³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un.

⁴ Tyin tatun cuñí yo tsa coto nyivi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyivi —catyí tandihi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra.

⁶ Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyooho ndáa quivi ñi cuví cuhun ndo.

⁷ Tyin vaha cuñí nyivi nyehé ñi tsi ndo, maa tyin yuhu ndasi cuñí ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi.

⁸ Cuaahan nyooho vico can. Yuhu ña cuhun yu tyin ñaha ca tsaa hora tsa taahán tsi cuhun yu —catyí ra.

⁹ Yahā can tan ndoo ra nu cuví Galilea.

Nu nyii ra Jesús nu iyó vico Tyahva

¹⁰ Tsa yahā cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra.

¹¹ Tan ra cuví ityi nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyii ra can? —catyí ra naha.

¹² Tan caahán nyivi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyivi”, catyí ñi.

¹³ Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

¹⁴ Tsa cusava iyó vico tan tsaā ra Jesús tsitsi vehe ñuhu cahnu tan quitsahā jacuaha ra tsi nyivi.

¹⁵ Tan ra cuví ityi nuu can iyó cuñí ra naha tan quitsahā natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

¹⁶ Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsj tsi yu cuví tsi.

¹⁷ Tatun yihí nyooho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu.

¹⁸ Nyivi tsa caahán cuenda maa ñi, caahán ñi tyin cuñí ñi tsa jacahnu nyivi tsi ñi. Maa tyin ra nducú tsa jacahnu nyivi tsi Nyoo, ra tsa jaquitsj tsi ra, ra ican caahán tsa nditsa. Tan ña jandaví ñaha ra.

¹⁹ ¿A ña nditsa tyin ra Moisés tsaḥ ra ley tsi ndo? Maa tyin ndi intuhun nyooho tan ña tyaá yahvi ndo ley can. ¿Nacuenda cuñí ndo cahñi ndo tsi yu? —catyí ra.

²⁰ Tan nacahan nyivi tan catyí ñi tsihin ra:

—Tatyí ña vaha yihí tsi yooho. Yoñi cuñí cahñi tsi un —catyí ñi tsihin ra.

21 Tan catyí ra Jesús:

—Tsacatyí tsa javahá yu tsa iyo quivi quitatu yo, yacan ndasi cuñi ndo nyehé ndo tsi yu.

22 Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yíi ndo. Vasu ñavin ra quitsahá tsihin tuhun can, maa tyin nyivi cuví nyivi ra ityi tsata, jihna ca ñi javahá tacan. Yacan cuenda javahá ndo can vasu taahán tsi quivi quitatu yo.

23 Tan vityin, vaha tatun tsa cuenda tsa ña cuñi ndo cumañi ndo ley ra Moisés tan javahá ndo tuhun can vasu quivi quitatú yo cuví. Maa tyin tatun tacan javahá ndo, ¿nacuenta tyin cuxaan ndo tsi yu tsa janduvahá yu tsi ra can quivi quitatú yo?

24 Ña tyaa ndo cuatyí siqui nyivi tatun ña tsitó vaha ndo náa javahá ñi. Cuatu ndo nda nyehe vaha ndo, tacan tan coto ndo náca tatsi tuñi ndo tsi ñi tsihin tsa ndaa tan tsihin tsa nditsa.

Nu cahān ra Jesús tuhun maa ra

25 Tacan tan juhva nyivi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra?

26 Caahán nditsin ra tsihin nyivi. Tan yoñi caahán náa caahán tsihin ra. Vasiqui tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsi Nyoo.

27 Yoo tsitó vaha yo nu quee ra ihya, tan quivi quitsi ra Cristo yoñi maa cua coto numaa ityi cua quee ra —catyí ñi.

28 Ra Jesús nyii ra tsitsi vehe ñuhu jacuahá ra, tan tsitó ra tsa natuhún nyivi, yacan cuenda ñihi cahān ra tan catyí ra:

—¡Nyooho cuñi maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsi yu cuenda maa yu. Yuhu vatsi yu cuenda ra tsa jaquitsi tsi yu, ra tsa cuví tsa nditsa. Nyooho ña nacotó ndo tsi ra.

29 Yuhu nacotó yu tsi ra tyin cuenda ra vatsi yu, tan maa ra jaquitsi tsi yu —catyí ra Jesús.

30 Tacan tan cuñi ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quivi tsa taahán maa tsi tñin ra naha tsi ra.

31 Maa tyin cuaha xaan nyivi tsinú iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin tñin ra naha tsi ra Jesús

32 Tsa tsiñi ra fariseo naha ra tsa caahán nyivi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tñin ra naha tsi ra Jesús.

33 Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsi tsi yu.

34 Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuví cahun ndo nu cua cunyaa yu —catyí ra Jesús.

35 Tacan tan quitsahá natuhún tahan ra cuví ityi nuu tsihin nyivi Israel naha ra:

—¿Numaa cua cahun ra ihya tsa ña cua nañihi yo tsi ra? ¿A cahun ra nu iyó ra Israel ñuu Grecia naha ra tyin jacuaha ra tsi nyivi iyó Grecia can?

³⁶ ¿Náa cuñí tsi catyi tsa caahán ra tsihin yo? Tyin catyi ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuvi cuhun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí Ii ra añima ñi

³⁷ Quiví ndihi tsicoo vico, yacan cuví quívi tsa ñiñi ca. Tan quívi can nduvita ra Jesús tan ñihi caahán ra tan catyi ra:

—Tatun ndáa nyoocho na ityi iñi ndo, ñaha ndo tan tsinu iñi ndo tsa caahán yu.

³⁸ Tyin nyivi tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuñí ra catyi ra tyin ñi tsinú iñi tsi ra cua ñihi ñi Tatyí Ii Nyoo, tyin quívi can ñaha ca quítsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

Nu natahvi sava nyivi tsa cuenda ra Jesús

⁴⁰ Juhva nyivi tsa tsíñi yacan, catyí ñi:

—Nditsa tsa cuí tyin ra ihya cuví ndusu yuhu Nyoo tsa nyaá tsa cua quítsi —catyí ñi.

⁴¹ Tan inga ñi catyí ñi:

—Ra ican cuví ra Cristo ra tsa jaquítsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuvi ra Cristo?

⁴² Tyin nu tutu Nyoo catyí tsi tyin ra Cristo cua cuvi ra nyivi tata ra rey David, tan ra ñuu Belén tsa canyí nu cuví Galilea cua cuvi ra, tumaa ra David —catyí ñi.

⁴³ Tacan tan nyivi can natahvi sava ñi tsa cuenda ra Jesús.

⁴⁴ Yihí ñi cuñí ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tñin tsi ra.

Ra cuví ityi nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuví ityi nuu tsihin ra jutu naha ra. Tan tsicā tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¡Ndi intuhun tsaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandaví ñaha ndihi ra can tsi nyoocho?

⁴⁸ Nyehé ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can.

⁴⁹ Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahān nu nyí ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

⁵¹ —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahā ra —catyí ra tsihin ra naha.

⁵² Tacan tan nacahān ra naha tan catyí ra naha tsihin ra:

—¿A juven ñi ra Galilea cuví ndihí tucu yooho? Cahvi nu tutu Nyoo tan nyehe un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvj tsihin rayii tsa ñavin yii ña cuví

⁵³ Tacan tan cuanuhu intuhun intuhun ra naha nda yuvehe ra naha.

8

¹ Maa tyin ra Jesús cuahán ra yucu Olivo.

² Tsa cunditsin inga quivi, cuahán nyico ra Jesús inga tsaha vehe ñuhu cahnu. Tan tandihí nyivi natuhvā ñi nu nyii ra. Tan tsinyaā ra tan quitsahā caahán ra tsihin ñi.

³ Tacan tan ra jacuahá ley vehe ñuhu tan ra cuví fariseo naha ra tsaā ra naha tsihin iin ñaha iyó yii tyin tiiñ ra naha tsi ña nu tsicoo cuatyí ña tsihin inga rayii. Tan tyaa ra naha tsi ña mahñu nyivi tsa nyecú can.

⁴ Tan quitsahā catyí ra naha tsihin ra Jesús:

—Maestro, tiiñ ndi tsi ñaha ihya nu tsicoo cuatyí ña tsihin inga rayii.

⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siqui ra. Tacan tan tsinyaā tyayii ra Jesús nu ñuhu tan quitsahā tyaa ra letra nu ñuhú tsihin nundaha ra.

⁷ Maa tyin nducú tuhun ca ra naha tsi ra, tacan tan nduvitā nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

⁸ Tan tsinyaā tyayii nyico ra tan quitsahā jañihí ca ra tyaa ra letra nu ñuhu.

⁹ Tsa tsiñi ra naha tsa caahán ra tacan, tuvj iñi ra naha tyin iyó tucu cuatyí maa ra naha. Tan quitsahā quitā intuhun intuhun ra naha, jihna ca ra tsahnu naha ra quitā. Cuhva tsa ndihí ra naha quitā cuahán tan ndoo intuhun ña maa ra Jesús tsihin ñaha can mahñu nu nyecú nyivi can.

¹⁰ Tacan tan nduvitā nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaa cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyivi

¹² Tacan tan cahán nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsin añima nyivi iyó nu ñuhu ñayivi. Yóo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

14 Nacahan ra Jesús tan catyí ra:

—Vasu juvin ñi maa yu caahan tumañi iñi tsa cuenda yu, maa tyin tsa caahan yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu.

15 Nyooho yatyi xaan caahan ndo tsa caa nyivi. Maa tyin yuhu, ña caahan yu tsa caa ñi.

16 Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu.

17 Nu ley nyooho nyaá tyin tatun uvi ra tsahá tsa ndaa, cuñí tsi tsinú iñi yo tsa caahan ra naha.

18 Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

19 Tacan tan tsica tuhun ra naha tsi ra:

—¿Numaa nyii jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihi ndo tsi Jutu yu —catyí ra.

20 Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu nyii caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahan tsi cuhun ra.

“Nu cuhun yuhu ña cua cuvi cuhun ndo”, catyí ra Cristo

21 Tacan tan quitsaha caahan nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyooho ña cua cuvi cuhun ndo —catyí ra Jesús tsihin ra naha.

22 Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuvi cuhun yo nu cuahan ra —catyí ra naha.

23 Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu.

24 Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quivi cúu ndo —catyí ra Jesús tsihin ra naha.

25 Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha cahan yu tsihin ndo nda quivi jihna.

26 Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa tyin tsa caahan yu tsihin nyivi iyó nu ñuhu ñayivi, cuví tsa tsiñi yu tsa caahan ra tsa jaquitsi tsi yu. Tan maa ra caahan tsa nditsa —catyí ra Jesús.

27 Maa tyin ra Israel naha ra ña cutuñi iñi ra naha tatun tuhun Nyoo Jutu yo cahan ra tsihin ra naha.

²⁸ Yacan cuenda catyí ra tshin ra naha:

—Cua tyaa ndo tsi yuhu, ra cuví Rayí tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu.

²⁹ Tyin Jutu yu, ra tsa jaquitsí tsi yu, nyí ra tshin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñí ra —catyí ra Jesús.

³⁰ Tsa cahán ra Jesús yacan, cuaha xaan ra naha quitsahá tsinú ñi tsi ra.

Nyívi cuví sehe Nyoo tan nyívi javahá tsa caquiñi

³¹ Tacan tan catyí ra Jesús tshin nyívi Israel, tsa quitsahá tsinú ñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyívi tsa nditsa yíhi cuenda yu.

³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahán ra naha tan catyí ra naha:

—Nyuhu nyívi tata ra Abraham cuví ndi. Ndi iin tsaha tan ñaha ca cuví ndi musu nyívi. ¿Naca tsa catyí yoocho tyin quita nuña ndi? —catyí ra naha tshin ra.

³⁴ Tan catyí ra Jesús:

—Tsa nditsa catyí yu tshin ndo tyin tandíhi nyívi javahá tsa caquiñi, musu cuenda tsa caquiñi cuví ñi.

³⁵ Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra.

³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo.

³⁷ Tsa tsitó yu tyin tata ra Abraham cuví ndo. Maa tyin yíhi ndo cuñí ndo cahñi ndo tsi yu, tyin ña naquihín vaha ndo tsa caahán yu.

³⁸ Yuhu caahán yu tsa janahá Jutu yu tsi yu. Tan nyoocho javahá ndo tsa caahán ra cuví jutu ndo tshin ndo —catyí ra tshin ra naha.

³⁹ Tan nacahán ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tshin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra.

⁴⁰ Maa tyin nyoocho, vasu caahán yu tshin ndo tsa nditsa tsa janahá Nyoo tsi yu, nyoocho cuñí ndo cahñi ndo tsi yu. ¡Ra Abraham ña javahá ra tacan!

⁴¹ Nyoocho javahá ndo tuma javahá jutu ndo —catyí ra tshin ra naha.

Tacan tan nacahán ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsí tsi yu.

⁴³ ¿Nacuenda ña cutuñí ñi ndo tsa caahán yu tshin ndo? Tsa cuenda tyin ña cuñí ndo tyaa soho ndo tsa caahán yu.

⁴⁴ Cuihna cuví jutu ndo. Tan sehe nu tsi ndo. Tan cuñí ndo javaha ndo cuhva cuñí nu. Tan nu ña vaha can cuví nu tsahñí nyívi nda quívi jihna. Tan

ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñi nu tsa coo ñi cuhva iyó nu tyin vatya xaan nu. Tan jutu nyivi vatya cuví nu.

⁴⁵ Tan yuhu caahán yu tsa nditsa, maa tyin nyooho ña tsinú iñi ndo tsa caahán yu.

⁴⁶ ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu?

⁴⁷ Nyivi cuenda Nyoo tyaá soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñi ndo tyaa soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tshin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tshin ra.

⁴⁹ Tan nacahán ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu.

⁵⁰ Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu.

⁵¹ Tsa nditsa catyí yu tyin nyivi tsa tyaá yahvi tsa caahán yu ña cua tsaa tuhun tsihiñi añima ñi —catyí ra Jesús tshin ra naha.

⁵² Tacan tan nacahán ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihí ca ra cuví ndusu yuhu Nyoo tsihiñi ra naha. Tan yooho catyí un tyin nyivi tyaá yahvi tsa caahán un ña cua cúu ñi.

⁵³ ¿A cahnu ca ra cuví yooho tan ñavin ca ra Abraham jutu yo? Maa ra tsihiñi ra tan tacan tucu ra cuví ndusu yuhu Nyoo. ¿Yóo ra cuví yooho cuñi maa un? —catyí ra naha tshin ra.

⁵⁴ Tan nacahán ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra.

⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra.

⁵⁶ Ra Abraham tsii tsaahnu yo sii xaan cuñi ra tyin cua nyehe ra quivi cua quitsi yuhu nu ñuhu ñayivi. Nyehe ra quitsi yu tan sii xaan cuñi ra —catyí ra Jesús tshin ra naha.

⁵⁷ Tacan tan catyí ra Israel can naha ra tshin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸ Tan nacahán ra Jesús tan catyí ra:

—Tsa nditsa catyí yu tshin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tshin ra naha.

⁵⁹ Tacan tan quihñi ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yahá ra mahñu ra naha tan quitá ra tsitsi vehe ñuhu can cuahán ra.

9

Nu janduvahā ra Jesús tsi iin ra cuaa nda cacū ra

¹ Cuhva tsa yahā ra Jesús iin nu yahā ra, nyehe ra tsi iin ra cuaa nda cacū ra.

² Tan quitsahā tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacū ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

³ Tan nacahan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can.

⁴ Tsa tsinu cahñi, cuñí tsi tsa javaha yu tyiñu ra tsa jaquitsí tsi yu. Tyin tsa yatyin cuii cua cuaa tan ña cua cuví ca jaha tyiñu yo.

⁵ Tsa ndi nyíi yu nu ñuhu ñayivi ihya, ñuhu jandunditsín [cuenda nyivi iyó] nu ñuhu ñayivi ihya cuví yu.

⁶ Tsa yahā tsa cahan ra Jesús tacan, tan tiví sñi ra nu ñuhu. Tan jatyií ra luxu nyahyu tsihin sñi ra tan tyaā ra tinuu ra cuaa can.

⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñí tsi catyí: “Jacuhun Yu Tsi Un.”

Tacan tan ra cuaa can tsahan ra tsinacatyā ra nuu ra. Tan cuhva tsa tsaā nyico ra, tsa nyehé ra.

⁸ Tacan tan nyivi iyó yatyin yuvehe ra, tan nyivi tsa nyehe tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsahā tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañí Jesús, ra ican jatyií nyahyu tan tyaā ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yahā nacatya yu nuu yu tan nanyehe yu —catyí ra tsihin ñi.

¹² Tacan tan quitsahā tsicá tuhun ñi tsi ra:

—¿Tan numaa nyíi ra can vityin?

Tan catyí ra tsihin ñi:

—Ña tsitó yu —catyí ra.

Nu janahmā ra cuví fariseo naha ra tsi ra cuaq tsa nduvahā

¹³ Tacan tan tsindacā ñi tsi ra tsa nduvahā can nuu ra cuví fariseo naha ra.

¹⁴ Tyin quivi tsa jatyií ra Jesús nyahyu tan janduvahā ra tsi ra can, cuví tsi quivi quitatú nyivi.

¹⁵ Yacan cuenda ra cuví fariseo naha ra tsicá tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaā ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

16 Tacan tan catyí juhva ra fariseo naha ra:

—Ra tsa javaha yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javaha ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahvj sava ra naha.

17 Tan tsicā tuhun nyico ra naha tsi ra nduvaha can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvaha tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

18 Maa tyin ra cuví ityi nuu tsihin nyivi Israel ña cuñí ra naha tsinu iñi ra naha tsa cuaa ra can tan nanyehē ra. Nda cuanda cana ra naha tsi jutu ra tan tsi sihi ra.

19 Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaa ra cacu ra? ¿Nacaa tsa cuví nyehé ra vityin? —catyí ra naha.

20 Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quivi cacu ra.

21 Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvaha tinuu ra. Ndaa tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

22 Jutu ra tan sihi ra caahán ñi tacan tsa cuenda tyin yuuhvi ñi tsi ra cuví ityi nuu tsihin nyivi Israel naha ra, tyin tsa natuhun tahan ra naha tyin cua tava cuii ra naha tsi nyivi vehe ñuhu, tun cahan ñi tyin ra Jesús cuví ra Cristo, ra tsa jaquitsj Nyoo.

23 Yacan cuenda catyí ñi: “Ndaa tuhun ndo tsi maa ra. Ra tsa ñihi cuví ra.”

24 Tacan tan cana nyico ra naha tsi ra tsa nduvaha can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

25 Tacan tan nacahan ra tsa nduvaha can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

26 Tan tsicā tuhun nyico ra naha tsi ra inga tsaha tan catyí ra naha:

—¿Naa ica ra tsihin un? ¿Nacaa ica ra tan nanyehē un? —catyí ra naha tsihin ra.

27 Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Naa cuenda cuñí ndo tsa cahan yu inga tsaha? ¿A cuñí ndihi ndo cunyicun ndo tsi ra can?

28 Tacan tan nduxaan ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoo tsa naha yihí ndi.

29 Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

30 Tacan tan nacahan ra tsa nduvaha can tan catyí ra:

—¡Naa tsa iyo cahnu cuví tsehe! Nyooho ña tsitó ndo numaa quee ra, tan jananyehē ra tsi yu.

³¹ Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñi ra, tyaá soho Nyoo tsa caahán ra.

³² Ndi iin tsaha tan ñaha ca cuñi yo tatun iyó iin ra jananyehé tsi iin ra cuaá nda cacú ra.

³³ Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴ Tacan tan catyí ra naha tsihin ra:

—Yooho ra iyó cuatyí cuví un nda cacú un. ¿Tan cuñi un jacuaha un tsi nyuhu? —catyí ra naha.

Tan tava cuí ra naha tsi ra vehe ñuhu.

Nyivi tsa nduve tuhun Nyoo iyó añima tumaa tsa cuaa ñi

³⁵ Tsító ra Jesús tyin tava ra naha tsi ra tsa janduvahá ra vehe ñuhu. Tan tsa ñihí tahan ra tsihin ra tan catyí ra tsihin ra:

—¿A tsinú iñi yooho tsa caahán Rayi tsa quee nda gloria? —catyí ra tsihin ra.

³⁶ Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

³⁷ Tan catyí ra Jesús:

—Tsa nyehe un tsi ra. Tan juven ra natuhún tsihin un —catyí ra tsihin ra.

³⁸ Tacan tan tsicuiñi tsi ti ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

³⁹ Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsító tuhun Nyoo cua nanyehé ñi tyin coo tuhun Nyoo añima ñi. Tan nyivi cuñi tyin nditsin nyehe ñi, catyí ñi tyin tsító ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

⁴⁰ Tacan tan juhva ra fariseo tsa nyecú tsihin ra Jesús tsifí ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹ Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsító ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuenda ra, tan tsító ñi tsi ra tsa jaquitsi Nyoo tyin jahá cuenda ra tsi ñi

¹ Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu.

² Maa tyin ra tsa quihvi ityi yuhu cora, ra jahá cuenda mbee can cuví ra.

³ Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tava ra tsi ti ityi tsata cora.

⁴ Tsa yaha tava ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra.

⁵ Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

⁶ Tyehen caħan ra Jesús tshin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

Ra Jesús cuví ra jahá cuenda vaha mbee ticatyi

⁷ Tacan tan catyi ra Jesús tshin nyivi inga tsaha:

—Tsa nditsa catyi yu tshin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyi jana yu.

⁸ Tandihí ra tsa quitsi tsa ndi cumañi quitsi yu, ra suhu cuví ra naha. Maa tyin mbee jana yu ña tyaa yahvi ti naha ti tsa caħan ra naha.

⁹ Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cuhun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsí ti.

¹⁰ Iin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsi yu tyin coo vaha ndo ñayivi nyitó tsa ña cua naa maa.

¹¹ Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can.

¹² Maa tyin ra cuví musu, tatun nyehé ra vatsí lobo tsa cuví quiti xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tñi quiti xaan can tsi mbee can. Tan jacunu ti tsi mbee can ityi can tan ityi ihya.

¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu,

¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu.

¹⁶ Iyó tucu inga mbee jana yu tsa ña yihí tsitsi cora ihya. Cuñi tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

¹⁷ Jutu yu cuñi ra tsi yu tyin tsahá yu ñayivi yu tsacatyi nyivi. Maa tyin yaha can, tan cua nacuhva nyico ra ñayivi yu.

¹⁸ Yoñi cuví quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyi ra Jesús.

¹⁹ Tsa tsiñi nyico ra tsa cuví ityi nuu tshin nyivi Israel naha ra tsa caahán ra Jesús tacan, natahvi sava nyico ra naha inga tsaha.

²⁰ Tan cuaha xaan ra naha catyi:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyi ra naha.

²¹ Tan inga tucu ra naha catyi:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyi ra naha.

Nu ña cuñi ra cuví ityi nuu tshin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnú.

²³ Tan ra Jesús tsicá nuu ra vehe ñuhu can ityi nu nañi corredor ra Salomón.

²⁴ Tan tsinu nduvi ra cuví ityi nuu tshin nyivi Israel naha ra tsi ra Jesús. Tan quitsahá tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahān catsi tsihin ndi vityin ihya —catyí ra naha.

²⁵ Tan catyí ra Jesús:

—Tsa yahā cahan yu tsihin ndo, tan ña tsinú iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu.

²⁶ Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo.

²⁷ Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu.

²⁸ Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaa tsi ti naha ti tsitsi ndaha yu.

²⁹ Maa Jutu yu tsahá tsi ti naha ti tsi yu. Tan cahnu ca cuví maa ra tan ñavin ca tandihi nyivi. Tan yoñi cuví quihin nyaa tsi ti tsitsi ndaha ra.

³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra.

³² Tan catyí ra Jesús tsihin ra naha:

—Cuaha xaan tsa vaha javahā yu nuu ndo tsihin tunyee iñi Jutu yu. ¿Tan ndáa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahā un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

³⁵ Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyivi naquihin tsa caahán ra.

³⁶ Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya znácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

³⁷ Tatun ña javahá yu tsa javahá Jutu yu, ña tsinu iñi ndo tsi yu.

³⁸ Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutya ra Juan tsa jihna, tan ndoo ra ican.

⁴¹ Cuaha nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javahā ra Juan, maa tyin tandihi tsa cahan ra cuenda ra ihya tan nditsa —catyí ñi.

⁴² Tan cuaha xaan nyivi tsa iyó ityi can tsinú iñi tsa caahán ra Jesús.

11

¹ Ñuu Betania tsicoo iin ra cuuhvi tsa nañí Lázaro. Tan ñuu can iyó ña María tsihin ña Marta tahan ña.

² Ña María, cuhva ra Lázaro, juvin ña cuví ñaha tsa tyoso ndutyta tami tsaha Jutu Mañi yo, tan jana ityi ña tsaha ra tsihin ixi jiñi ña.

³ Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhvi xaan ra.

⁴ Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhvi ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

⁵ Cuñi xaan ra Jesús tsi ña Marta tan ña tahan ña, tan ra Lázaro cuhva ñi.

⁶ Maa tyin quivi tsa tsiñi ra tyin cuuhvi ra Lázaro, ndoo ra uvi quivi ca nu nyii ra.

⁷ Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸ Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

⁹ Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhú tsa jandunditsín nu ñuhu ñayivi ihya.

¹⁰ Maa tyin tatun tsacuaa tsicá nuu ra, cuví nduva ihñi ra tyin nduve ñuhú Nyoo jandunditsín nu cuahan ra.

¹¹ Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

¹² Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

¹³ Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra.

¹⁴ Tacan tan cahñ catsi ra Jesús tsihin ra naha:

—Ra Lázaro tsa tsihi ra.

¹⁵ Tan cusii iñi yu tyin yoñi yu nyii ndacan. Tyin tacan vaha ca tsa cuenda nyoocho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

¹⁶ Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayivi nyito coo yo

¹⁷ Tsa tsaq ra Jesús Betania, ñihí tuhun ra tyin tsa cumi quivi nyii ra Lázaro tsitsi ñuhú.

¹⁸ Ñuu Betania can canyii tsi yatyin ñi nu canyii ñuu Jerusalén, tumaa iin cuhva tsa uvi kilómetro sasava.

¹⁹ Tan cuaha ra cuví ityi nuu tsihin nyivi Israel cuahan cua nyehe nu nyii ña Marta tan ña María cua jatinyee ra naha tsi ñi tyin tsihi cuhva ñi.

²⁰ Tan ñihí tuhun ña Marta tyin tsa cua tsa ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe.

21 Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu.

22 Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

23 Tan catyí ra Jesús tsihin ña:

—Cuhva un cua nandoto ra.

24 Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

25 Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú ñi tsa caahán yu, vasu tsa tsihi ñi maa tyin coo nyico ñi.

26 Tan tandihi ñi nyitó tan tsinú ñi ñi tsi yu, ña cua cúu ñi. ¿A tsinú ñi un tsa caahán yu ihya? —catyí ra tsihin ña.

27 Tan catyí ña:

—Tsinú ñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacu ra Jesús nu ñaña ra Lázaro

28 Tsa yahá tsa cahán ña Marta tacan, tan tsahán ña tsiquihin ña tsi ña María tahan ña, tan xeehe ñi cahán ña tsihin ña:

—Tsa tsaá Ra Maestro ihya. Tan caná ra tsi un —catyí ña.

29 Tsa tsiñi ña María tsa caahán ña, numi xaan ña nduvitá ña, tan cuahán ña nu nyii ra Jesús.

30 Tan ñaha ca quihvi ra Jesús tsitsi ñuu hora can, ndi nyii ra nu nañihí ña Marta tsi ra.

31 Tan nda yuvehe ña María, yucú ra cuví ityi nuu tsihin nyivi Israel jatyinyeé ra naha tsi ñi. Tan nyehe ra naha tyin numi quitá ña. Tan cuñi maa ra naha tyin cuahán ña nu ñaña cua vacu ña. Tan cuahán ndihí ra naha tsata ña.

32 Tan cuhva tsa tsaá ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

33 Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihaya xaan cuñi ra.

34 Tan tsicá tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

35 Tan tsacu ra Jesús.

36 Tacan tan catyí ra Israel can naha ra:

—Nyehe ndo tyin yahá xaan cuñi ra tsi ra —catyí ra naha.

37 Maa tyin catyí juhva ra naha:

—Ra ihya jananyehé ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandoto ra Jesús tsi ra Lázaro

38 Nducuihaya xaan cuñi nyico ra Jesús inga tsaha tan natuhvá ra nu ñaña can. Tyin tsitsi yavi yuu cuví can. Tan ndasí iin yuu yuhu can.

39 Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

⁴⁰ Maa tyin catyí ra Jesús tshin ña:

—¿A ña caahán yu tshin un tyin tatun tsinú iñi un, cua nyehe un tsa cahnu cuví Nyoo? —catyí ra tshin ña.

⁴¹ Tacan tan jatsiyō ra naha yuu can. Tan nanyehē ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu.

⁴² Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsj tsi yu —catyí ra Jesús tshin Nyoo.

⁴³ Tsa yahā tsa cahān ra tacan, canā tsa ra, tan catyí ra:

—¡Lázaro, quita nu nyii un juvin!

⁴⁴ Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tshin jahma. Tan nuuhñi nuu ra tshin iin jahma tumaa javahá nyivi Israel tshin ndiyi. Tan catyí ra Jesús tshin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tshin ñi.

Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Tan cuaha xaan ra cuví ityi nuu tshin nyivi Israel tsa tsahan tshin ña María quitsaha tsinú iñi ra naha tsa nyehe ra naha tsa javahā ra Jesús.

⁴⁶ Maa tyin juhva ra naha tsahan ra naha tsijacotō ra naha tsi ra fariseo naha ra tsa javahā ra Jesús.

⁴⁷ Tacan tan ra fariseo can naha ra tan ra cuví ityi nuu tshin ra jutu naha ra jatitahan ra naha tsi ra tuhvá ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can.

⁴⁸ Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua cani ra naha vehe ñuhu yo tan ñuu yo —catyí ra naha.

⁴⁹ Maa tyin ra Caifás ra tsahnu tsa cuví ityi nuu tshin ra jutu naha ra cuiya can, cahān ra tan catyí ra tshin ra naha:

—Nyooho nduve maa náa tsitó ndo.

⁵⁰ Ndi ña cutuñi iñi ndo tyin vaha ca tsa cúu intuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

⁵¹ Ra Caifás can ñavin tsa cuñi maa ra tan caahán ra, tyin ra cuví ityi nuu tshin tandihi jutu cuví ra cuiya can, yacan cuenda maa Nyoo jacahan tsi ra nu catyi ra tyin ra Jesús cua cúu ra tsa cuenda tandihi nyivi ñuu Israel.

⁵² Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuví sehe Nyoo tsa iyó tandihi ca ñuu.

⁵³ Tacan tan nda quivi can tan ra cuví ityi nuu tshin nyivi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyi yatyin ñi nu tsiqui, nu cuví ñuhu ityi. Tan ndoó ra ican tshin ra tsicá tshin ra.

⁵⁵ Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén

cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can.

⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tshin jutu, catyí ra naha tyin tatun ndáa nyivi tsitó nu nyíi ra Jesús, na catyi tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús (Mt. 26.6-13; Mr. 14.3-9)

¹ Cumañi iñu quivi ca tsa tahan tsi vico pascua, tan tsaq ra Jesús ñuu Betania nu iyó ra Lázaro, ra tsa janandotq ra.

² Ican javahq ñi tsa cuxiñj ra Jesús. Ña Marta tyihj ña coho nu mesa. Tan tsinyaq ra Jesús nu mesa. Tan nyaá ndihi tucu ra Lázaro tshin ra.

³ Tacan tan quihin ña María tumaa sava litru ndutya tami tsa tsinu tshin maa ñi maa yucu tsa nañi nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahq can tan jana ityi ña tsaha ra tshin ixi jiñi ña. Nani cahnu maa tsitsi vehe can tsitu xico ndutya tami can.

⁴ Tan ican nyíi tucu ra Judas Iscariote, sehe ra Simón. Cuví ra iin ra tsicá tshin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahq catyí ra Judas can tshin ñi can:

⁵ —¿Nacuenda ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahvi iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can.

⁷ Tacan tan catyí ra Jesús tshin ra:

—Jaña tsi ña, tyin ñaha ihya javahq ña tyehen tsa cuenda tsa cua quihvi cuñu ñuhu yu tsitsi ñuhu.

⁸ Nyivi ndaahvi tacan ñi nyecú maa ñi tshin ndo, maa tyin yuhu ña cua cunya ca yu tshin ndo tacan —catyí ra Jesús tshin ra Judas.

Nu nducú cahñi ndihi ra Israel naha ra tsi ra Lázaro

⁹ Cuaha xaan nyivi Israel ñihj tuhun ñi tyin ra Jesús nyíi ra Betania, tan tsahan ñi ican. Ñavin intuhun ñi ra Jesús cuñi ñi nyehe ñi tyin cuñi ndihi tucu ñi nyehe ñi tsi ra Lázaro, ra tsa janandotq ra Jesús.

¹⁰ Tacan tan ra cuví ityi nuu tshin jutu natuhun tahan ra naha tyin cua cahñi ndihi ra naha tsi ra Lázaro.

¹¹ Tyin tsa cuenda ra tan cuaha xaan nyivi Israel quitá tsiyo ñi tan quitsahq tsinu iñi ñi tsi ra Jesús.

Nu quihvi ra Jesús ñuu Jerusalén (Mt. 21.1-11; Mr. 11.1-11; Lc. 19.28-40)

¹² Cuaha xaan nyivi tsaq ñi ñuu Jerusalén tsa cuví vico pascua. Tan tsa inga quivi tsitq ñi tyin ra Jesús cua tsa ra ñuu can.

¹³ Tacan tan tsahnyq ñi ndaha ndicaha tan cuahán ñi cua jatahan ñi tsi ra Jesús. Tan caná tsa ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsí ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyivi Israel! —catyí ñi, caná tsaá ñi.

¹⁴ Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

¹⁵ Ña nayuhvi ndo nyivi ñuu Sión
Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quivi can ra tsicá tsihin ra Jesús, ña cutuñi iñi ra naha tsa nyaá nu tutu Nyoo. Maa tyin tsa yaha cuanuhu ra Jesús nda gloria, nducuhun iñi ra naha tyin tandihi yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

¹⁷ Nyivi tsa nyehe quivi tsa cana ra Jesús tsi ra Lázaro tsitsi ñaña, quivi janandoto ra tsi ra, nacatyí tuhun ñi tsa nyehe ñi.

¹⁸ Yacan cuenda cuaha xaan nyivi tsijatahan tsi ra Jesús, tyin tsito ñi tsa iyo tsa javaha ra.

¹⁹ Tacan tan ra cuví fariseo catyí ra naha natuhun tahan ra naha:

—Tsa nyehe maa ndo tyin nduve maa náa cuví javahá yo, tyin tandihi nyivi tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

²⁰ Yucú tucu juhva ra Grecia mahñu nyivi tsa tsahan tsijacahnu vico ñuu Jerusalén.

²¹ Tacan tan natuhva ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahan ndaahvi ra naha tsihin ra tan catyí ra naha:

—Taa, cuñi ndi cahan ndi tsihin ra Jesús —catyí ra naha.

²² Tan tsahan ra Felipe tsicahan ra tsihin ra Andrés. Tan tsahan nduvi ra naha tsicatyí tuhun ra naha tsihin ra Jesús tyin ra Grecia can cuñi ra naha cahan ra naha tsihin ra.

²³ Tan nacahan ra Jesús, tan catyí ra:

—Vityin tsa tsaq hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayi tsa quee nda gloria.

²⁴ Tsa nditsa catyí yu tsihin ndo tyin tatun iin tsiti tan ña cua quihvi tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi.

²⁵ Nyivi tsa cuñi xaan ñayivi iyó ñi, cua cunaa ñi. Maa tyin nyivi ña cuñi ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi.

²⁶ Ndáa nyooho nyivi cuñi javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

Nu caahán ra Jesús nácaa cua cúu ra

²⁷ Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya.

²⁸ Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahan iin ndusu ityi andivi tan catyí tsi tyehen:

—Tsa yahá jacahnu yu sivi yu, tan cua jacahnu nyico yu inga tsaha —catyí ndusu can.

²⁹ Tan nyivi nyecú ican, tsiñi ñi ndusu can, tan catyí ñi tyin savi cahān. Tan inga ñi catyí tyin iin ángel cahān tsihin ra.

³⁰ Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahān ndusu can, tyin tsa cuenda tsa vaha tsi maa ndo cuví can.

³¹ Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya.

³² Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihí nyivi cahun ñi tsihin yu —catyí ra Jesús.

³³ Caahán ra tacan tsa cuenda tsa cuñi ra cutuñi iñi ñi tyin tacan cua cúu ra.

³⁴ Tan nacahān nyivi tan catyí ñi tsihin ra:

—Tuhvá ndi tsiñi cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayi quee nda gloria nu cruu? Tan zyóo ra cuví Rayi tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵ Tacan tan catyí ra Jesús tsihin ñi:

—Ñuhú tsa jandunditsín nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi.

³⁶ Tsjinu iñi ndo tsi yuhu ra cuví ñuhú nditsin, tsitsi tsa ndi nyíi yu tsihin ndo. Tacan tan cuví ndo nyivi iyó nu nditsin.

Tsa yahá cahān ra Jesús tacan tan jatsiyó ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús

³⁷ Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra.

³⁸ Tyin taahán tsi tsa cuví tumaa tsa cahān ra Isaías ra cuví ndusu yuhu Nyoo, nu cahān ra tyehen:

Jutu Mañi yu, yoñi cuñi tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahān tsanaha.

³⁹ Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaá nyico tucu ra Isaías tyehen:

⁴⁰ Nyoo jacuaa ra tsi ñi. Tan jandundava ra añima ñi,

tan ña cua nyehe ñi tsihin tinuu ñi,

tan ña cua cutuñi iñi ñi tsihin añima ñi,

tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cahān ra tyehen tyin nyehe ra tsa cahnu cuví Jutu Mañi yo Jesús, tan cahān ra tuhun ra.

⁴² Cuaha xaan nyivi Israel tsinú iñi tsi ra Jesús. Tan nda cuenda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu.

⁴³ Tyin cuñi ra naha nduvaha ra naha nuu nyivi tan ñavin nuu Nyoo.

Tuhun cahān ra Jesús cua tatsi tuñi tsi nyivi

⁴⁴ Ñihi caahán ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsi tsi yu.

⁴⁵ Tan nyivi tsa nyehé tsi yu, nyehé ndihi ñi tsi ra tsa jaquitsi tsi yu.

⁴⁶ Yuhu cuví tumaa ñuhu nditsin tan vatsí yu jandunditsin yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa.

⁴⁷ Maa tyin tatun yihí ndo tsiñi ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi.

⁴⁸ Nyivi tsa ña cuñi naquihin vaha tsa caahán yu tan ña cuñi ñi javaha ñi tumaa cuhva cuñi yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihí quivi.

⁴⁹ Tyin ñavin cuenda maa yu caahán yu. Jutu yu, ra tsa jaquitsi tsi yu, tsahá ra tyiñu tsi yu caahán ra náa cua cahan yu tan náa cua jacuaha yu.

⁵⁰ Tan tsitó yu tyin tyiñu tsa tsahá ra, tsahá tsi ñayivi nyitó tsa ña cua naa maa coo nyivi. Yacan cuenda, tandihí tsa caahán yu, caahán yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

¹ Tsa ndi cumañi ca iin quivi tan tahan tsi vico pascua, tsa tsitó maa ra Jesús tyin tsa cua tsa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñi xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñi xaan ra tsi ñi tyin cua cúu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quihvi nu ña vaha añima ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra.

³ Maa tyin ra Jesús tsitó ra tyin tsahá Jutu ra tandihí tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra.

⁴ Tacan tan nduvita ra tan tavá ra jahma tsa nditsí ra ityi tsata, tan tsahñi ra iin toalla tsitsi ra.

⁵ Tacan tan tyihí ra ndutya tsitsi iin tsicoho tan quitsahá nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra: —Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

⁸ Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuví un.

⁹ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹⁰ Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo nanñi cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa nanñi ñi. Nyooho tsa ndoo maa ndo, vasu ña tandihí ndo ndoo —catyí ra Jesús.

11 Cahān ra tsa ña tandihī ra naha ndoo tyin tsitó ra yóo cua xico tsi ra tsi nu xaan iñi tsi ra nahnu.

12 Tsa yahā nacatyā ra Jesús tsaha ra tsicá tsihin ra, tan tsinditsj nyico ra jahma ra, tan tsinyaā nyico ra inga tsaha nu mesa tan catyí ra tsihin ra naha: —¿A cutuñi iñi nyooho tsa javahā yu tsihin ndo?

13 Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu.

14 Yuhu tsa cuví yu Ra Jacuahá tan Jutu Mañi ndo, nacatyā yu tsaha ndo, tan tacan cuñi tsi tsa nacatyā tahan maa ndo tsaha ndo.

15 Yuhu tsahā yu iin cuhva tsi ndo tyin javaha ndo tumaa cuhva javahā maa yu.

16 Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuví ra tan ñavin ca ra tsa tavā tyiñu tsi ra.

17 Tatun cutuñi iñi ndo yacan, tan javahá ndo can, sī xaan cua coo ndo.

18 Ñavin tsa cuenda tandihī ndo caahán yu. Yuhu tsitó maa yu yóo nacatsj yu. Maa tyin cuñi tsi tsa cuví tumaa caahán tuhun Nyoo tyehen: “Ra tsa tsatsj paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo.

19 Caahán yu tyehen tsihin ndo tsa ndi cumañi ca cuví can tyin quivi cua cuví yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihī tsa iyó.

20 Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuví can. Tan nyivi tsa naquihín vaha tsi yuhu, naquihin vaha ndihī ñi tsi ra tsa jaquitsj tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu
(Mt. 26.20-25; Mr. 14.17-21; Lc. 22.21-23)

21 Tsa yahā tsa cahān ra Jesús yacan, tan quitsahā nducuihyá xaan cuñi añaima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

22 Tacan tan ra tsicá tsihin ra, quitsahā nyehé nuu tahan ra naha, tan ña tsitó ra naha yóo tuhun caahán ra Jesús.

23 Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuví ra tsa cuñi xaan ra Jesús.

24 Tan ra Simón Pedro javahā ra seña tsi ra can, na ndaca tuhun ra yoó tuhun caahán ra Jesús.

25 Tacan tan ra ican tsinyaá naa ca ra tsi ra Jesús, tan tsicā tuhun ra tsi ra: —Jutu Mañi yu, ¿yoó ra cuví ra tsa caahán un tuhun?

26 Tan nacahān ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuví ra —catyí ra.

Tacan tan quihj ra luxu paan tan jatyii ra, tan tsahā ra tsi ra Judas Iscariote, sehe ra Simón.

27 Tsa quihj ra Judas paan can tan quihvi nu ña vaha añaima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

²⁸ Maa tyin ndi intuhun ra tsa nyecú nu mesa can, ña cutuñí iñi ra naha nacuenda cahan ra tacan tsihin ra can.

²⁹ Ra Judas cuví ra yihí ndaha yitin nu yihí xuhun, yacan cuenda yihí ra naha cuñí maa ra naha tyin cuñí ra Jesús tsa cujata ra tsa tsiñí ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñí maa ra naha.

³⁰ Tsa yaha quihin ra Judas paan can, tacan tan quitá ra. Tan tsacuaa cuví can.

Tyiñu tsa tsa tavá ra Jesús tsi yo: tsa cuñi tahan yo tsi yo

³¹ Tsa yaha tsa cuahán ra Judas, tan catyí ra Jesús:

—Vityin cua nyehe nyivi tsa cahnú cuví yuhu Rayii tsa quee nda gloria. Tan cua nyehe ñi tsa cahnú cuví Nyoo tsa cuenda yu.

³² Tatun Rayii tsa quee nda gloria jacahnú ra tsi Nyoo, tacan tucu Nyoo cua jacahnú ra tsi ra. Tsa tsaá quivi cua jacahnú ra tsi ra.

³³ Sehe yu, ña naha ca cua cunyii yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuvi cuhun ndo nu cua cuhun yu.

³⁴ Tsahá yu iin tyiñu tsa tsi ndo: Cuñi tahan ndo tsi ndo. Tumaa tsa cuñí maa yu tsi ndo, tacan cuñí tsi tsa cuñí tahan ndo tsi ndo.

³⁵ Tatun cuñí tahan ndo tsi ndo, tandihí nyivi tan cua coto ñi tyin nyivi nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra (Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuvi cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicun yu tsi un vityin? Tan tsa iyó vaha iñi yu tsa cuhva yu ñayivi yu tsa cuenda un —catyí ra.

³⁸ Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityi cuhun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Tsjinu iñi ndo tsi Nyoo, tan tsjinu ndihí iñi ndo tsi yu.

² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo.

³ Tsa yaha tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu.

⁴ Nyooho tsa tsitó maa ndo nu maa cuhun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi itiyi? —catyí ra.

⁶ Tan catyí ra Jesús:

—Yuhu cuví itiyi tsa cuahán gloria. Tan yuhu cuví tsa nditsa. Tan juvin ñi yuhu cuví ra tshá ñayivi coo ndo. Tan tsa cuenda yuhu ñi, tan cuví tsa ndo nu nyaá Jutu yu.

⁷ Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi itiyi nuu, cua nacoto ndihi ndo tsi ra, tyin tsa nyehé ndo tsi ra —catyí ra Jesús.

⁸ Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

⁹ Tan nacahan ra Jesús, tan catyí ra:

—Yooho Felipe, tsa naha xaan nyí yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo?”

¹⁰ ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu.

¹¹ Tsinu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú iñi ndo yacan, cuví tsinu iñi ndo tsi yu tsa cuenda tyiñu Nyoo Jutu yu tsa javahá yu.

¹² Tsa nditsa caahán yu tsihin ndo tyin nyivi tsinú iñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu.

¹³ Tan tandihí tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra.

¹⁴ Yuhu cua javaha yu náa ndihi tsa ndacan ndo tsa cuenda yu.

Nu caahán ra Jesús tyin cuhva ra Tatyí Ii ra tsi yu

¹⁵ Tatun cuñi ndo tsi yu, tyaa yahvi ndo tsa caahán yu.

¹⁶⁻¹⁷ Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí Ii Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuví naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo.

¹⁸ Ña cua naco cuí yu tsi ndo. Cua quitsi nyico yu nu yucú ndo.

¹⁹ Juhva cuí ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihi ndo.

²⁰ Quivi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo.

²¹ Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñi tsi yu. Tan ñi tsa cuñi tsi yu, Jutu yu cua cuñi ra tsi ñi. Tan cuñi ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

²² Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihí nyivi iyó nu ñuhu ñayivi?

²³ Nacahan ra Jesús tan catyi ra:

—Nyivi cuñi tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi.

²⁴ Nyivi ña cuñi tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

²⁵ Caahán yu tandihí tuhun ihya tsihin ndo tsitsi tsa ndi nyii yu tsihin ndo.

²⁶ Maa tyin nu cuahán ca tsi ityi nuu cua jaquitsi Jutu yu Tatyí li ra tsihin sivi yu. Tan cua jatyi yee ra ican tsi ndo, tan cua cuhva ra tunyee iñi tsi ndo, tan cua janaha ra fandihí tsi ndo. Tan cua janducuhun iñi ra tsi ndo tsa tsa yaha cahan yu tsihin ndo.

²⁷ Jandoó yu iin tsa taxin coo aña ndo, tumaa tsa taxin cuñi aña maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña caça xaan iñi ndo tan ña nayuhvi ndo.

²⁸ Tsiñi ndo tsa cahan yu nu catyi yu tyin cua cuhun yu tan cua quitsi nyico yu nu yucú ndo. Tatun cuñi ndo tsi yu, cua cusii iñi ndo tyin catyi yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu.

²⁹ Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

³⁰ Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihya. Maa tyin ña ndacá ñaha nu tsi yu.

³¹ Tyin tacan tan coto nyivi iyó nu ñuhu ñayivi, tyin yuhu cuñi yu tsi Nyoo Jutu yu, tan javahá yu tyiñu tavá ra tsi yu.

Ñduvita ndo, tan cohon ndo, na cua tsiyo yo ihya.

15

Nu cahan ra Jesucristo tyin cuví ra tumaa yoho tsa cuví uvas

¹ Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can.

² Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti.

³ Tsa yaha janduvaha Jutu yu tsi nyooho tsihin tsa jacuahá yu tsi ndo.

⁴ Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuví javaha ndo tsa vaha tatun ña iin ñi cuví ndo tsihin yu.

⁵ Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu.

⁶ Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

⁷ Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñi maa ndo tsi yu, tan yuhu cua cuhva yu tsa cua ndacan ndo.

⁸ Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu.

⁹ Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo.

¹⁰ Tatun tyaá yahvi ndo tsa caahán yu, ña cua naa iñi ndo tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñí xaan ra tsi yu.

¹¹ Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo.

¹² Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñí maa yu tsi ndo.

¹³ Tatun yaha xaan cuñí tahan yo tsi yo, cana maa iñi yo cuhva yo ñayivi iyó yo tsa cuenda inga yo.

¹⁴ Nyooho cuví ra vaha iñi tsi yu tatun javahá ndo tsa caahán yu tsihin ndo.

¹⁵ Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihi tsa caahán Jutu yu tsihin yu tan jacotó yu itsi tsi ndo.

¹⁶ Ñavin nyooho nacatsi tsi yuhu tyin maa yu nacatsi tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tiví maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu.

¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñí ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñí nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñí ñi nyehé ñi.

¹⁹ Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsi yu tsi ndo mahñu ñi. Yacan cuenda ndasi cuñí ñi nyehé ñi tsi ndo, tyin ñavin ca nyivi cuenda nu ñuhu ñayivi ihya cuví ndo.

²⁰ Ndycuhun iñi ndo tsa cahán yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaa yahvi ndihi ñi tsa jacuahá ndo tsi ñi. Tan tatun ndasi ícá ñi tsihin yu, ndasi cua ica ndihi ñi tsihin ndo.

²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

²² Tun tsatyin ña quitsi yu cahán yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yahá cahán yu tsihin ñi.

²³ Nyivi tsa ndasi cuñí nyehé tsi yu, ndasi cuñí ndihi ñi nyehé ñi tsi Jutu yu.

²⁴ Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehé ñi tandihí yacan. Vasu ndi maa tsa nyehé ñi can maa tyin ndasi cuñí ñi nyehé ñi tsi yu, tan tsi Jutu yu.

²⁵ Maa tyin tandihí yacan cuví, tyin cuñí tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñí ñi nyehé ñi tsi yu”, catyi tsi.

²⁶ Maa tyin cua quitsi Tatyí Íi, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsaa yu nu nyaá Jutu yu tan cua jaquitsi ndi Tatyí Íi nu yucú ndo. Tan cua cahan ra tumañi iñi tsa cuenda yu.

²⁷ Tan nyooho tucu cua cahan ndo tumañi iñi tsa cuenda yu, tyin yucú ndo tshin yu nda quiví quitsahá jahá tyiñu yu.

16

¹ Caahán yu tyehen tshin ndo tyin tacan tan ña jandihí ndo tsa tsinú iñi ndo tsi yu.

² Cua tava cuivi nyivi tsi ndo vehe ñuhu. Tan coo quiví cua cahñi ñi tsi ndo, tan cua cuñi ñi tyin tyiñu Nyoo javahá ñi.

³ Tacan cua ica ñi tyin ña nacoto ñi tsi Jutu yu tan ndi tsi maa yu.

⁴ Caahán yu tsehe tshin ndo tyin quiví tsa cua cuvi tumaa cuhva caahán yu tshin ndo, cua nducuhun iñi ndo tyin tsa yahá cahan yu tuhun ihya tshin ndo.

Ña cahan yu tyehen tshin ndo nda jihna tyin ndi nyiví maa yu tshin ndo.

Tyiñu jahá Tatyí Ii Nyoo

⁵ Maa tyin vityin cua cuhun yu tyin cunyaa yu tshin ra tsa jaquitsí tsi yu. Ndi intuhun ndo tan ña tsicá tuhun ndo tsi yu nu maa cua cuhun yu.

⁶ Tyin tsa nducuihya cuñi ndo tsa caahán yu tyehen tshin ndo.

⁷ Caahán yu tsa nditsa tshin ndo tyin vaha ca tsa cuhun yu cuenda tsa vaha tsi maa ndo. Tyin tatun ña cuhun yu, ña cua quitsi Tatyí Ii tsa cua cuhva tunyee iñi tsi ndo. Maa tyin tatun cuhun yu, cua jaquitsi yu tsi ra.

⁸ Tan quiví quitsi ra, cua jacoto ra tsi nyiví iyó nu ñuhu ñayiví ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo.

⁹ Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.

¹⁰ Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu.

¹¹ Tan cua coto ñi tyin cua jandaa Nyoo cuatyí ñi tyin tsa yahá cundaq cuatyí nu cuví cuihna, nu ndacá ñaha nu ñuhu ñayiví ihya.

¹² Tan cuaha ca tsa nyaá cahan yu tshin ndo, maa tyin ña cua cutuñi iñi ndo can vityin.

¹³ Quiví quitsi Tatyí Ii tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiñí ra. Tan cua jacoto ra náa cua cuvi nu cuahan ca tsi ityi nuu.

¹⁴ Cua jacahnu ra tsi yu, tyin cua naquihin ra tuhun yu tan cua janaha ra can tsi ndo.

¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí Ii cua naquihin ra tuhun yu, tan cua janaha ra tsi nyooho.

Ra tsicá tshin ra Jesús cuihyá xaan cuñi ra naha, maa tyin nu cuahan ca tsi quiví cua cusí iñi ra naha, catyí ra Jesús

¹⁶ Ña naha cuivi ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tshin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tshin yo tyin ña naha cuivi ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra.

18 ¿Náa cuñí tsi catyí tsa “ña naha cuii ca” can? Ña cutuñí iñi yo náa tuhun caahán ra —catyí ra naha.

19 Tan tuví iñi ra Jesús tyin cuñí ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?

20 Tsa nditsa caahán yu tsihin ndo tyin nyooho cua nducuihya iñi ndo tan cua vacu ndo, maa tyin nyívi cuenda nu ñuhu ñayívi cua cusí iñi ñi. Vasu cuihya cuñí ndo vityin, tucuihya iñi can cua nanduvi tsi tsa síi.

21 Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa síi cuñí ña tyin cacu iin lee sehe ña.

22 Tacan tucu nyooho vityin, cuihya xaan cuñí ndo. Maa tyin cua nyehe nyico yu tsi ndo inga tsaha. Tacan tan cua cusí nyico iñi añima ndo. Tan yoñi cuví quihin nyaa tsa síi can tsi ndo.

23 ‘Quívi can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin sívi yu.

24 Nda vityin tan ñaha ca ndacan ndo tsa ndacan ndo tsihin sívi yu. Ndacan ndo tan cua ñihi ndo tan cusí xaan iñi ndo.

Ra Jesucristo cuví jaha canaa ra tsa ña vaha iyó nu ñuhu ñayívi

25 ‘Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyí tuhun catsi yu tuhun Jutu yu tsihin ndo.

26 Quívi can tsihin sívi yu cua ndacan ndo tsa ndacan ndo tsi ra. Tan ña tsiñí ñuhu ca tsa cahan ndaahvi yu tsihin Jutu yu tsa cuenda ndo.

27 Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú iñi ndo tyin nu nyaá Nyoo quee yu.

28 Nu nyaá Jutu yu quee yu tyin quítsi yu nu ñuhu ñayívi ihya. Maa tyin vityin cua nacoo yu ñuhu ñayívi ihya tyin cua cunuhu nyico yu nu nyaá ra —catyí ra Jesús.

29 Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.

30 Vityin nyehé ndi tyin tsitó un tandihí cuii maa, tan ña tsiñí ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

31 Tan catyí ra Jesús:

—Tan vityin ¿a tsinú iñi ndo tsi yu?

32 Maa tyin caahán yu tsihin ndo tyin tsa vatsí hora. Tan vityin cuví hora tsa cua cahun ndo síin síin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu.

33 Caahán yu tandihí tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayívi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayívi ihya.

1 Tsa yahā cahān ra Jesús yacan, nanyehē ndaa ra ityi andivi tan catyí ra:

—Jutu Mañi yu, tsa tsaq hora vityin. Jācahnu tsi yu tsa cuví yu sehe un, tyin tacan tan jaca hnu tucu maa yu tsi un.

2 Tyin tava tyiñu un tsi yu tsa quihi ndaha yu tandihi nyivi, tan cuhva yu ñayivi nyitó tsa ña cua naa maa tsi tandihi nyivi tsa tsaḥa un tsi yu.

3 Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

4 Tsa jaca hnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihi tsi javaha yu.

5 Tan vityin, Jutu Mañi yu, cua quitsi nuhu nyico yu nu nyaá un, tan cuñi yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

6 Tandihi ra tsa tsaḥa un tsi yu naha ra, ra tsa natava vaha un mahñu nyivi iyó nu ñuhu ñayivi ihya, jacotó yu tsi ra naha yoo ra cuví yooho. Tsii maa un cuví tsi ra naha tan tsaḥa un tsi ra naha tsi yu. Tan tyaá yahvi ra naha tsa caahán un.

7 Vityin tsitó ra naha tyin tandihi tsa tsaḥa un tsi yu, nu nyaá un quee tsi.

8 Tyin catyi tuhun yu tsihin ra naha tsa cahān un tsihin yu, tan naquihin vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

9 Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihi nyivi, maa tyin tsicán tahvi yu tsa cuenda ra tsa tsaḥa un tsi yu naha ra, tyin tsi maa un cuví ra naha.

10 Tandihi nyivi tsa cuví tsii un, tsaḥa tucu un tsi ñi tsi yu. Tan maa ñi janahá tsa cahnu cuví yu.

11 Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyata nyico yu tsihin un. Jaha cuenda tsi ra tsa tsaḥa un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo.

12 Quivi tsinyij yu nu ñuhu ñayivi ihya tsihin ra naha, jaha cuenda yu tsi ra tsa tsaḥa un tsi yu naha ra tsihin tunyee iñi tsa iyó tsi un. Tan jaha cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaa tan quita cuhva tumaa tsa catyi nu tutu maa un.

13 Vityin tsa cua quitsi yu nu nyaá un, maa tyin tsitsi tsa ndi nyii yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñi maa yu.

14 Yuhu cahān yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñi ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu.

15 Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jaha cuenda tsi ra naha coto náa jaha nu ña vaha tsi ra naha.

16 Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha.

17 Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa.

¹⁸ Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo.

¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu ifi tsi yu, tsa cuenda tsa cua cahan ra ihya naha ra ityi nuu ca.

²¹ Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihí nyivi iyó nu ñuhu ñayivi cua tsinu ifi ñi tyin maa un jaquitsi tsi yu.

²² Yuhu tsahá yu tsa cahnú cuví un tsi ñi nyicún tsi yo. Juvín ñi maa tsa cahnú cuví un tsa tsahá un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo.

²³ Yuhu nyí yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihí nyivi iyó nu ñuhu ñayivi tyin maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

²⁴ Jutu Mañi yu, maa un tsahá tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnú cuví tsa tsahá un tsi yu, tyin cuñi un tsi yu nda ndi cumañi ca tsinu ñuhu ñayivi.

²⁵ Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu.

²⁶ Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

18

*Nu cua tyihi ra Israel naha ra tsi ra Jesús vehe caa
(Mt. 26.47-56; Mr. 14.43-50; Lc. 22.47-53)*

¹ Tsa yahá tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra.

² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra.

³ Tan ican tsaá ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaá ra naha ican, nyisó ra naha mityi, tan nyisó ra naha lámpara tan ñuhú yiti.

⁴ Tan ra Jesús tsa tsitó maa ra tandihí tsa cua tahan ra. Quitá ra tan tsica tuhun ra tsi ra naha:

—¿Yóo nanducú ndo? —catyí ra.

⁵ Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan ifi tsi ra nahnu, nyí ndihi ra tsihin ra naha.

⁶ Cuhva tsa caḥan ra Jesús: “Yuhu cuví”, tandihi ra naha nacacā tsata ra naha tan nduva ra naha nu ñuhu.

⁷ Tacan tan tsicā tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

⁸ Tan catyí ra Jesús:

—Tsa caḥan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyí ra Jesús tsihin ra naha.

⁹ Yacan caḥan ra Jesús tyin na cundaa tsa caḥan ra nda ityi tsata ca nu catyí ra: “Ra tsa tsahā Jutu yu tsi yu, ndi intuhun ra naha tan ña tsinaá ra naha.”

¹⁰ Tacan tan tava ra Simón Pedro mityi tsa ndahá ra tan tsahnya ra soho cuaha iin ra tsa nañ Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra.

¹¹ Maa tyin ra Jesús catyí ra tsihin ra Pedro:

—Naṭyihí mityi un tsitsi vena un. Tatun Nyoo Jutu yu tan cuñí ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

Nu tsindacā ra naha tsi ra Jesús nuu ra cuví ityi nuu tsihin jutu naha ra (Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tiñ ra naha tsi ra Jesús, tan tsahñi ra naha tsi ra,

¹³ tacan tan tsindacā ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu.

¹⁴ Ra Caifás can cuví ra tsa caḥan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayi tsa cuenda tandihi nyivi ñuu.

Nu caahán ra Pedro tyin ña nacotó ra tsi ra Jesús (Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicā tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can.

¹⁶ Maa tyin ra Pedro ndoo ra ityi tsata vehe. Yacan cuenda quitā ra tsa nacotó ra jutu can, tan caḥan ra tsihin ñaha tsa nyaá yuvehe can. Tan jayahā ra tsi ra Pedro ityi tsitsi nuquehe can.

¹⁷ Tacan tan ñaha tsa nyaá yuvehe can tsicā tuhun ña tsi ra Pedro, tan catyí ña:

—¿A ñavin yooḥo cuví iin ra tsicā tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jataḥan ra naha ñuhū tyin vitsin xaan. Tan nyecú nyityi ra naha tuñu ra naha ñuhū. Tan nyii ndihi tucu ra Pedro tuñu ra ñuhū tsihin ra naha ican.

Nu janahmā ra jutu tsaahnu tsi ra Jesús (Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsahā tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi.

²⁰ Tan catyí ra Jesús tsihin ra:

—Yuhu nuu tandihí nyívi cahān yu. Tan jacuahā yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihí nyívi Israel ndu iin. Tan nduve nu cahān xeehe yu.

²¹ ¿Nacuenda tsicá tuhun un tsi yuhu? Vaha ca ndāca tuhun un tsi nyívi tsa tsiñi tsa cahān yu, tan maa ñi cua catyí tuhun náa cahān yu tsihin ñi tyin maa ñi tsitó náa cahān yu —catyí ra Jesús tsihin ra.

²² Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

²³ Tan catyí ra Jesús:

—Tatun cahān yu iin tsa ña vaha, cahān tsihin yu nda tsa ña vaha cahān yu. Maa tyin tatun cahān yu tsa vaha, ¿nacuvi tyin cañi un tsi yu? —catyí ra Jesús tsihin ra can.

²⁴ Yahā can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

*Nu caahán nyico ra Pedro inga tsaha tyin ña nacotó ra tsi ra Jesús
(Mt. 26.71-75; Mr. 14.66-72; Lc. 22.58-62)*

²⁵ Tan nyaá nyityi ra Pedro tuñu ra ñuhu. Tan catyí ra naha tsihin ra:

—¿A ñavin yooho cuví iin ra tsicá tsihin ra can? —catyí ra naha tsihin ra.

Tan ra Pedro tyihj xeehe ra, tan catyí ra:

—Ñavin. Ñavin yu cuví —catyí ra.

²⁶ Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyívi ra tsa tsahnyā ra Pedro soho, quitsahā tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can?

—catyí ra tsihin ra Pedro.

²⁷ Tan tyihj xeehe nyico ra Pedro inga tsaha. Juvín ñi cuhva can tan navacu ñi iin tsitooho.

*Nu cutuñi ra Jesús nuu ra Pilato
(Mt. 27.1-2, 11-14; Mr. 15.1-5; Lc. 23.1-5)*

²⁸ Yahā can tan quitā ra naha tsihin ra Jesús yuvehe ra Caifás tan tsindacā ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyívi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuví cuxiñi ñi quivi vico pascua.

²⁹ Yacan cuenda quitā ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyívi Israel naha ra.

³⁰ Tan nacahān ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

³¹ Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahān ra Israel can naha ra tan catyí ra naha:

—Maa tyin nyuhu nyívi Israel nduve ndatu iyó tsi ndi tsa cahñi ndi tsi nyívi —catyí ra naha.

³² Tacan cundaq tsa cahān ra Jesús nácaa cua cúu ra.

³³ Yahā can tan quihvī nyico ra Pilato tsitsi vehe tyiñu can inga tsaha. Tan canā ra tsi ra Jesús tan tsicā tuhun ra tsi ra:

—¿A yooho cuvī rey cuenda nyivi Israel? —catyí ra tsihin ra.

³⁴ Tan catyí ra Jesús:

—¿A tsa cuñí ñi maa un tsicá tuhun un tsehe tsi yu o iyó inga nyivi natyuhu tsi un cuhva cahān un tsihin yu? —catyí ra Jesús tsihin ra Pilato.

³⁵ Tan catyí ra Pilato:

—Ñavin ra ñuu Israel cuvī yuhu. Juvín ñi maa ra ñuu maa un naha ra tan ra cuvī ityi nuu tsihin jutu ñuu maa un cuvī ra tsahā cuenda tsi un tsi yu. ¿Náa javahā un? —catyí ra tsihin ra Jesús.

³⁶ Tacan tan nacahān ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuvī tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuvī tsi —catyí ra Jesús tsihin ra Pilato.

³⁷ Tacan tan catyí ra Pilato tsihin ra:

—¿Tun tacan, rey cuvī maa un? —catyí ra Pilato tsihin ra Jesús.

Tan nacahān ra Jesús tan catyí ra:

—Rey cuvī yu tumaa tsa caahán maa un. Yacan cuenda cacū yu tan vatsi yu nu ñuhu ñayivi ihya, tyin cahan yu tsa nditsa. Tandihī nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

³⁸ Tan catyí ra Pilato tsihin ra:

—¿Tan náa cuvī tsa nditsa? —catyí ra.

Tsa yahā tsa tsicā tuhun ra Pilato yacan, quitā ra tsicahān nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹ Maa tyin nyooho iyó ndo tuhun tsa tsicán ndo na tava yu tsi iin ra nyii vehe caa tsa iyó vico pascua ihya. ¿A cuñí ndo tava yu tsi ra tsa cuvī rey cuenda ndo tsa cuvī ndo nyivi Israel? —catyí ra Pilato tsihin ra naha.

⁴⁰ Tacan tan quitsahā caná tsa tandihī ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuvī ra iin ñasuhu.

19

¹ Tacan tan quihñin ra Pilato tsi ra Jesús tan tavā tyiñu ra na cañi andaru tsi ra.

² Tan andaru can javahā ra naha iin corona iñu tan tyihī ra naha jiñi ra Jesús. Tan jacunditsī ra naha iin jahma tunduuhva tsi ra, tahan tsa tuhvā ra cuvī rey tsinditsī.

³ Tacan tan natuhvā ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

⁴ Tacan tan quitā nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihi yu —catyí ra Pilato tsihin ra naha.

⁵ Tan quitã ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsahã caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan çahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsiñi ra Pilato yacan, tan nayuhvi xaan ca ra.

⁹ Tan quihvi nyico ra inga tsaha tsitsi vehe tyiñu, tan tsicã tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacan tan catyí ra Pilato tsihin ra:

—¿Nacuenda ña caahan un tsa caahan yu? ¿A ña tsitó un tyin ra cumí tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹² Tsa ndihi cahan ra Jesús yacan, tan quitsahã nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahan tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³ Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaã ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyiti yuu”.

¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

¹⁵ Maa tyin canã tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yofni ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacan tan tsahã cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihin andaru tsi ra, cuahan ra tsihin ra naha.

*Nu tsihi ra Jesucristo nu cruu
(Mt. 27.32-44; Mr. 15.21-32; Lc. 23.26-43)*

17 Tan nyisó ra Jesús cruu ra, cuahán ra iin nu nañi: “Yiqui Jiñi Ndiyí”. Tan tsihin yuhu hebreo nañi tsi Gólgota.

18 Ndacan tyaá ra naha tsi ra nu cruu tsihin nduyu. Tan tyaá ra naha uvi taahan ca ra naha xiin ra. Ticaá ra naha iin ra nu cruu tsa nyaá tsiyo cuaha ra. Tan inga ra tyaá ra naha tsiyo satyin ra. Tan ticaá ra naha tsi ra Jesús mahñu.

19 Tan tava tyiñu ra Pilato na cunyaa letra jiñi cruu can. Tan catyí tsi tyeheh: “Ra Jesús ra ñuu Nazaret, Rey cuenda nyivi ñuu Israel.”

20 Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín.

21 Yacan cuenda ra cuví ityi nuu tsihin jutu cahán ra naha tsihin ra Pilato: —Ña tyaá un: “Rey cuenda nyivi ñuu Israel”, vaha ca tyaá un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

22 Maa tyin catyí ra Pilato:

—Tsa tsa yaha tyaá yu, nandoo maa tsi tacan —catyí ra tsihin ra naha.

23 Tsa yaha tyaá ra andaru can naha ra tsi ra Jesús nu cruu, naquihín ra naha jahma ra. Tsa cumi taahan ra naha quihín luxu luxu jahma ra. Tan ndoo jahma ra tsa quicu cañi ñi tsa tsindasí ra.

24 Tan andaru can natuhún tahan ra naha:

—Ña cua cahnya yo itsi. Jasiqúi suuhva jihna yo na nyehe yo yóo cua jaha canaa jahma can —catyí ra naha.

Tacan cuví tumaa caahán nu tutu Nyoo nu catyí tsi tyeheh: “Tsatsá tahan ra naha luxu luxu jahma yu tan jasiqúi suuhva ra naha tsihin tsi, nyehe ra naha yóo ra jaha canaa itsi.” Tan yacan cuví tsa javahá ra andaru can naha ra.

25 Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasíhi ra Cleofas, tan ña María quee ñuu Magdala.

26 Tan nanyehe ra Jesús tsi sihi ra, nyaá ña yatyin ñi. Tan nanyehe tucu ra tsi ra tsa tsicá tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

27 Tacan tan catyí ra tsihin ra tsa cuñi xaan ra:

—Tsaa, va sihi un nyaá tsihin un juvin —catyí ra tsihin ra.

Nda quivi can tan quihín ra tsi ña, cuahan tsihin ra yuvehe ra. Tan jaha cuenda ra tsi ña.

Nu tsihi ra Jesús

(Mt. 27.45-56; Mr. 15.33-41; Lc. 23.44-49)

28 Tsa yaha yacan, tsa nyehe ra Jesús tyin tsa ndihí tyiñu jaha ra. Tacan tan catyí ra:

—Na ityi iñi yu —catyí ra.

Tan tsihin yacan cundaá tsa nyaá nu tutu Nyoo nu caahán tsi nácaa cua cúu ra.

29 Tan ican nyaá iin quiyi nu yihí vinu iya. Tacan tan jatyiij ra naha tsa cuví yahma tumaa caa catyí tsihin vinu iya can. Tan tyaá ra naha yacan nu iin yutun hisopo. Tan jandaá ra naha tan tyanaá ra naha can yuhu ra.

30 Tsihi ra Jesús vinu can tan catyí ra:

—Tsa iyó vaha tandihí vityin —catyí ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

³¹ Tsa ndi cumañi intuhun ña quivi tan tahan tsi quivi vico cahnu pascua, tan ra cuvı ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuvı tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha.

³² Tacan tan cuahán andaru nu nyecú cruu can. Tan tsahnú ra naha sihin iin ra ticaá iin tsiyo xiin ra Jesús. Tan tsahnú nyico ra naha sihin inga ra tsa ticaa inga tsiyo xiin ra.

³³ Maa tyin cuhva tsa natuhva ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnú ca ra naha sihin ra.

³⁴ Maa tyin iin andaru can tutsı ra yoco xaan yiqui naha ra Jesús. Tan quitá nifi tan ndutya.

³⁵ Ra tsa nacatyı tuhun yacan, ra tsa nyehe vaha cuvı ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho.

³⁶ Tacan cuvı tyin tacan tan cundaa tsa catyı tuhun Nyoo nu catyı tsi: “Ndi intuhun yiqui ra tan ña tahnú.”

³⁷ Tan iyó inga nyico nu catyı tsi nu tutu Nyoo tyehen: “Cua nyehe nyivi tsi ra tsa tutsı ra naha yoco xaan.”

Nu quihvi ñuhu ra Jesús

(Mt. 27.57-61; Mr. 15.42-47; Lc. 23.50-56)

³⁸ Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuvı ra iin ra yihı cuenda ra Jesús vasu tsa xeehe ñi tsa cuenda tsa yuuhvi ra tsi ra cuvı ityi nuu tsihin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús.

³⁹ Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsaá ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quitá tsi tumaa oco utsi kilu tsa tandihı tsi.

⁴⁰ Tacan tan ra José tsihin ra Nicodemo quihin ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyihı ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu.

⁴¹ Yatyin ra tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi intuhun ndiyi.

⁴² Ican ñi tinyi ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Tsa naa ca tsa cuvı tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndası yuhu ñaña can.

² Tacan tan tsinu xaan ña cuahán ña nu nyiı ra Simón Pedro tan inga ra tsica tsihin ra Jesús, ra tsa cuñi xaan ra Jesús. Tan catyı ña tsihin ra naha:

—Quihin nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyı ña María tsihin ra Pedro tan tsihin inga ra can.

³ Tacan tan ra Pedro tan inga ra can cuahán ra naha nu ñaña.

⁴ Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaq nu ñaña.

⁵ Quitsaha nyehé ihñi ra tsitsi ñaña, tan nyehé ra jahma cuiñi tsa cavá nuu cuñu ñuhu ra Jesús, canyíi can. Maa tyin ña quihvi ra tsitsi ñaña.

⁶ Yaha can tan tsaq ndihi ra Simón Pedro tsata ra, tan ra ican quihvi ra tsitsi ñaña can. Juvín ñi nyehé ndihi ra can jahma can canyíi tsi.

⁷ Tan juvín ñi nyehé ndihi ra tyin jahma tsa tsindasi jíñi ra Jesús, ña iin ñi nu canyíi can tsihin inga jahma can, yihí tahnú can tan cayucú siin can.

⁸ Tacan tan quihvi ndihi inga ra tsicá tsihin ra Jesús can, ra tsa tsaq tsa jihna nu ñaña can. Tan nyehé ra tsa cuví can, tan tsinu iñi ra.

⁹ Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra.

¹⁰ Tacan tan cuanuhu ra tsicá tsihin ra Jesús nda yuvehe ra naha.

Nu quituvi ra Jesús nuu ña María quee ñuu Magdala

(Mr. 16.9-11)

¹¹ Maa tyin tsa tsaq nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehé ihñi ña tsitsi ñaña can.

¹² Tan nyehé ña uvi taahan ángel nditsí ra naha jahma cuitsin, nyecú ra naha nu tsicavá cuñu ñuhu ra Jesús. Iin ra nyaá ityi nu tsicavá jíñi ra, tan inga ra nyaá ityi nu tsicavá tsaha ra.

¹³ Tan tsicá tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihín nyivi tsi Jutu Mañi yu, tan ña tsitó yu nu maa tinyíi ñi tsi ra —catyí ña tsihin ángel can.

¹⁴ Ndi caahán ca ña yacan, tan nanyico coo ña tan nyehé ña tsi ra Jesús ican. Maa tyin ña tsitó ña tatun ra Jesús cuví ra.

¹⁵ Tacan tan tsicá tuhun ra Jesús tsi ña:

—¿Nacuenta tsacú un? ¿Yóo nanducú un? —catyí ra tsihin ña.

Cuñi maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yooho quihín tsi ra Jesús, çahan tsihin yu nu maa tsindaca un tsi ra, tyin cunaquihín yu tsi ra —catyí ña tsihin ra.

¹⁶ Tacan tan catyí ra Jesús tsihin ña:

—¡María! —catyí ra tsihin ña.

Tan nanyehé ña tan çahan ña tsihin ra tsihin yuhu hebreo, tan catyí ña:

—¡Raboni! —Tan cuñi tsi catyí can: “Maestro”.

¹⁷ Tan catyí ra Jesús tsihin ña:

—Ña tñin un tsi yu, tyin ñaha ca cuhun yu nu nyaá Jutu yu. Maa tyin çaaahan tan çahan un tsihin tandihi yañi yu tyin cuahan yu nu nyaá Jutu yu, tan juvín ñi Jutu ndihi ndo cuví tsi ra. Cuahan yu nu nyaá Nyoo yu, tan juvín ñi Nyoo ndo cuví tsi ra —catyí ra Jesús tsihin ña.

¹⁸ Tacan tan tsahan ña María ñuu Magdala can tsjacoto ña tsi ra tsicá tsihin ra Jesús tyin nyehé ña tsi ra tan çahan ra yacan tsihin ña.

Nu quituvi ra Jesús nuu ra tsicá tsihin ra

(Mt. 28.16-20; Mr. 16.14-18; Lc. 24.36-49)

¹⁹ Juvín ñi maa quivi can nu quitsaha vitya, tsa cua cuaa tan ndu iin ra tsicá tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituvi ra

tan tsinyaꝯ nyityi ra mahñu ra naha. Tan tsaḥꝯ ra nacumi tsi ra naha, tan catyí ra:

—Na coo tsa taxin añima ndo —catyí ra.

²⁰ Tsa yaha tsa caḥan ra yacan tan janaha ra ndaha ra tan xiin ra tsi ra naha. Tan ra ican naha ra sii xaan cuñi ra naha tsa nyehe ra naha tsi Jutu Mañi yo.

²¹ Tan catyí nyico ra Jesús inga tsaha tshin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tshin ra naha.

²² Tacan tan tiví ra tsi ra naha tan catyí ra tshin ra naha:

—Naquihin ndo Tatyí Ii Nyoo.

²³ Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tshin ra naha.

Nu nyehe ra Tomás tsi Jutu Mañi yo tsa yaha nandotoꝯ ra

²⁴ Maa tyin ra Tomás, iin rꝯ tsicꝯ tshin ra Jesús, ra tsa catyí ñi: “ra tñihí”, yoñi ra nyii tshin ra naha tsa tsaḥan ra Jesús.

²⁵ Yaha can tan nacatyí tuhun ra tsicꝯ tshin ra Jesús tshin ra:

—Nyehe ndi tsi Jutu Mañi yo —catyí ra naha tshin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihvi nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

²⁶ Tsa yaha una quivi yucú nyico ra tsicꝯ tshin ra Jesús tsitsi iin vehe. Tan nyii ra Tomás tshin ra naha. Tacan tan vasu ndi maa ndasi vaha yuvehe, maa tyin ra Jesús quihvi ra tan tsinyaꝯ nyityi ra mahñu ra naha. Tan tsaḥꝯ ra nacumi tsi ra naha tan catyí ra:

—Na coo tsa taxin añima ndo.

²⁷ Tacan tan quitsaha catyí ra tshin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuvi un ra ndava iñi. Tsinu iñi —catyí ra Jesús tshin ra Tomás.

²⁸ Tacan tan nacaḥan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tshin ra:

—Yooho Tomás, vityin tsinú iñi un tyin nyehé un tsi yu. Sii ca cuñi nyivi tsa nduve tsa nyehe tan tsinú iñi ñi —catyí ra Jesús tshin ra Tomás.

Nu jacoto ra Juan jacuenda tsinu libru ihya

³⁰ Cuaha ca tsa iyo javaha ra Jesús nuu ra tsicꝯ tshin ra, maa tyin ña tandihí tsi nyaá nu libru ihya.

³¹ Tsinyaꝯ tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

21

Nu quituví ra Jesús nuu utsa taahan ra tsicꝯ tshin ra

¹ Tsa yaha can tan quituví ra Jesús nuu ra tsicꝯ tshin ra inga tsaha. Tyehen quituví ra yatyin ñi yuhu miñi Tiberias:

² Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsicꝯ tshin ra Jesús.

³ Tan catyí ra Simón Pedro tsihin ra naha:

—Cuahan yu cua t̄in yu tyaca —catyí ra.

Tan catyí ra naha tsihin ra:

—Cuhun nd̄ihi ndi tsihin un —catyí ra naha.

Cuahán ra naha tan quihv̄i ra naha tsitsi iin yutun ndoo, maa tyin tsacuaa can ndi intuhun maa tyaca ña ñih̄i ra naha.

⁴ Tsa cuñi cunditsin tan quituv̄i ra Jesús nu nyiti yuhu miñi can. Maa tyin ra tsic̄a tsihin ra, ña nacot̄o ra naha tsi ra.

⁵ Tacan tan catyí ra tsihin ra naha:

—Nyooho ra cuatyí, ¿a ñaha ca ñihi ndo tyaca?

Tan nacah̄an ra naha tan catyí ra naha:

—Ñaha ca ñihi ndi.

⁶ Tacan tan nacah̄an ra Jesús tan catyí ra:

—C̄uaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tsihin ra naha.

Tacan ic̄a ra naha. Yaha can tan ndacua ña cuv̄i ca tava ra naha traya can nu ndutya, tsa cuenda tsa cuaha tyaca yih̄i tsitsi can.

⁷ Tan ra tsa cuñi xaan ra Jesús catyí ra tsihin ra Pedro:

—¡Jutu Mañi yo cuv̄i ra! —catyí ra tsihin ra Pedro.

Tsa tsiñi ra Simón Pedro tyin Jutu Mañi yo cuv̄i ra, tsinditsi ra jahma ra, tyin tav̄a ra can tsa cua t̄in ra tyaca, tan quihv̄i ra cuahán ra tsitsi ndutya can.

⁸ Tan inga ra tsa tsic̄a tsihin ra Jesús tsāa ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi.

⁹ Tsa nuu ra naha nu ñuhu, nyehe ra naha iin nu cayú tuun ñuhu. Tan canyíi iin tyaca tsihin paan nuu tuun ñuhu can.

¹⁰ Tan catyí ra Jesús tsihin ra naha:

—Nd̄aca ndo taahan tyaca tsa ndi t̄in ndo —catyí ra Jesús tsihin ra naha.

¹¹ Tan ndāa ra Simón Pedro nu yutun ndoo tan quitsah̄a ixtá caa ra traya tyin tsitu cuii can yih̄i tyaca nahnu. Cientu uvi xico utsi uñi ti yih̄i tsitsi can. Tan vasu cuaha xaan ti, maa tyin ña tan̄i traya can.

¹² Tacan tan catyí ra Jesús tsihin ra naha:

—Naha ndo tyin curumusa ndo —catyí ra Jesús tsihin ra naha.

Tan ndi intuhun ra tsic̄a tsihin ra, ña can̄a iñi ra naha ndaca tuhun ra naha yoo ra cuv̄i ra tyin tsit̄o ra naha tyin Jutu Mañi yo cuv̄i ra.

¹³ Tacan tan natuhv̄a ra Jesús tan quih̄in ra paan can, tan tsah̄a ra tsi ra naha. Tan juvin ñi tacan ic̄a ra tsihin tyaca.

¹⁴ Yacan cuv̄i nu tsinu uñi tsaha quituv̄i ra Jesús nuu ra tsic̄a tsihin ra tsa yah̄a nandot̄o ra.

Nu caahán ra Jesús tsihin ra Simón Pedro

¹⁵ Tsa yah̄a tsa curumusa ra Jesús, tan tsic̄a tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacah̄an ra Pedro tan catyí ra:

—Tacan Jutu Mañi yu, maa un tsit̄o tyin cuñi yu tsi un —catyí ra Pedro.

Tan catyí ra Jesús tsihin ra:

—C̄uhva tsa catsi mbee nyihi jana yu —catyí ra Jesús tsihin ra Pedro.

¹⁶ Tsic̄a tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tsihin ra.

Nacah̄an ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tsihin ra.
Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsicā tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Cuhva tsa tsicā tuhun ra tsi ra tsa tsinu uñi tsaha tatun cuñi ra tsi ra, ra Pedro nducuihya xaan cuñi ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñi yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu.

¹⁸ Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñi un cuhun un —catyí ra Jesús tsihin ra Pedro.

¹⁹ Tsa cahan ra Jesús yacan, cuñi ra cahan ra nácaa cua cúu ra Pedro tan cua jacahnu ra tsi Nyoo tacan. Yaha can tan catyí ra Jesús tsihin ra Pedro:

—¿Naha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰ Tacan tan natsico coo ra Pedro tan nyehe ra tyin nyicún inga ra tsa tsicā tsihin ra Jesús tsi ra naha, ra tsa cuñi xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsicā tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsicā tuhun ra quivi tsa ndi cumañi ca cúu ra Jesús.

²¹ Cuhva tsa nyehe ra Pedro tsi ra, tsicā tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

²² Nacahan ra Jesús tan catyí ra:

—Tatun cuñi maa yu tsa coo ra nda cuanda quitsi yu inga tsaha, ¿náa cuenda yooho? Cōhon yooho tsihin yu —catyí ra Jesús tsihin ra Pedro.

²³ Tacan tan iin yaha ñi tsinu tuhun ihya nu nycéu yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñi yuhu tsa coo ra nda cuanda quitsi yu inga tsaha, ¿náa cuenda yooho?”

²⁴ Yuhu cuví ra can, ra tsa cahan ra Jesús tuhun. Tan nyehe yu tandihí cuui maa tsa cuví tan tyaa yu nu libru ihya. Yuhu tsitó yu tyin tandihí tsa tyaa yu, tsa nditsa caahán tsi.

²⁵ Iyó cuaha ca tsa javaha ra Jesús. Tun tsatyin tsicunyaá tandihí can nu libru, tsicá iñi yu tyin ndi ña cua cutahan can naní cahnu nu ñuhu ñayivi.

Tan na cuví tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyí Ii Nyoo

¹ Yooho Teófilo, quívi tsa jacuhun yu tutu tsa jihna ñi can tsi un, tyaá yu tandihí tsa quitsahá javahá ra Jesús tan tandihí tsa jacuahá ra nda quívi jihna ñi,

² tan nda quívi nandaá ra andívi. Tan tsa ndi cumañi ca nandaá ra andívi, nacatsí ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra.

³ Tan cuaha xaan tundoho nyehé ra Jesús tan tsihi ra. Tan tsa yaha tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quívi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

⁴ Tsa ndi nyí ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tsihin ndo quívi can.

⁵ Nditsa tyin tsihin ndutya jacoondutya ra Juan tsi nyívi. Maa tyin nyooho ña cuaha ca quívi tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaá ra Jesús andívi

⁶ Tsa ndu iin ra tava tyiñu ra Jesús, tan tsicá tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacahan ra Jesús tan catyí ra tsihin ra naha:

—Ña taahan tsi coto nyooho ndáa quívi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi.

⁸ Tyin quívi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihí ñuu tsa cayucú Judea tan Samaria, tan nda cuanda naní cahnu ñuhu ñayívi —catyí ra Jesús tsihin ra naha.

⁹ Tan tsa yaha tsa cahan ra Jesús tuhun ihya, tan tsitsi tsa nyehé ra naha tsi ra, nandaá ra andívi, tan quihvi ra tsitsi vico. Tacan tan ña nyehé ca ra naha tsi ra.

¹⁰ Tan cuhva tsa nyehé ndáa ra naha andívi, quituvi uvi taahan ángel Nyoo tsa nditsi jahma cuitsin yatyin ñi nu nyecú ra naha.

¹¹ Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andívi? Ra Jesús tsa nyehé ndo nandaá ihya, juvin ra cua quitsi inga tsaha, tan tyehen cua nyehé nyico ndo tsi ra —catyí ángel tsihin ra naha.

Nu nacatsí ra tava tyiñu ra Jesús tsi ra Matías tyin jaha tyiñu ra tyiñu tsa javahá ra Judas

¹² Tacan tan quita ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyí ñuu

can, tumaa sava hora ñi tan tsaá yo. Tyin sava hora ñi cuví caca nyivi quivi quitatú ñi, tyin tacan catyí maa ley tsa tyaa ra Moisés.

¹³ Tsa tsaá ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo.

¹⁴ Tan tandihí ra ican naha ra ndu iín ra naha tandihí quivi tan tsicán tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵ Tan tsa tandihí nyivi tsa ndu iín quivi can quitá maa cientu oco ñi. Tacan tan nduvitá ra Pedro. Tan catyí ra tsihin ñi:

¹⁶ —Nyooho yañi, tsa nyaá tucu maa tsa tahañ ra Jesús cuhva ihya tan vityin tsa cundaá tsa cahañ ra David jaha Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra.

¹⁷ Tan ra Judas cuví ra iin ra tsa tsinyi tsihin yo. Tan iin caa ñi jaha tyiñu ra tsihin yo.

¹⁸ Maa tyin tsahañ ra, tan jata ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndata tsitsi ra tan quitá tandihí tsiti ra.

¹⁹ Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsañi Niñi Nyivi.

²⁰ Tyin nu libru Salmo catyí tsi cuenda ra Judas tyehen:
Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javaha ra.

²¹⁻²² Tan vityin yucú ra tsa cutahañ tsihin yo quivi tsinyi Jutu Mañi yo Jesucristo tsihin yo; nda quivi jacoondutya ra Juan tsi ra, tan nda quivi nandaá ra cuahán ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

²³ Tacan tan cana ra naha tsi uvi taahan ra naha. Cana ra naha tsi ra José tsa nañi Barsabás, tan juvin ñi nañi tucu ra Justo; tan cana tucu ra naha tsi ra Matías.

²⁴ Tan tsicán tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsi maa un,

²⁵ tyin cuiiso ra tyiñu tsa jacunaá ra Judas tsa cuenda cuatyí ra, tan cuahán ra nu taahán maa tsi cahun ra —catyí ra naha, tsicán tahvi ra naha tsi Nyoo.

²⁶ Tacan tan tava cuenda ra naha ndáa ra cua tahan tsi cuiiso tyiñu can. Tan tahañ tsi tsi ra Matías. Ra ican cuví ra tahañ tsi cutahan tsihin tsa utsi iin ra tsa tava tyiñu ra Jesús.

2

Nu nuu Tatyí Ii Nyoo

¹ Tsaá quivi vico Pentecostés, tan ndu iin tandihí nyivi tsa tsinú iñi tsi ra Jesús.

² Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi.

³ Tacan tan quituvj tumaa iin ñuhu tan tsaq tsi siqui intuhun intuhun ñi.

⁴ Tan tandihí ñi tsitü ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

⁵ Tan quiví can cuaha xaan ra ñuu Israel tsaq ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihí ñuu tsa cayucú nu ñuhu ñayiví.

⁶ Tan tsa tsiñí ra can naha ra tsa iyo xaan cuví nu yucú nyiví cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñí ra yuhu ra naha tsa caahán ñi jahá Tatyí Ii Nyoo.

⁷ Iyo xaan cuñí ra naha tan quitsaha natuhún tahan ra naha tan catyí ra naha:

—¿A ñavin nyiví ñuhu Galilea cuví tandihí ñi tsa caahán ihya?

⁸ ¿Nacuenda tyin tsiñí yo caahán ñi cuhva caahán intuhun intuhun yo?

⁹ Ihya yucú yo tsa cuví yo nyiví quee Partia, Media, Elam, Mesopotamia, Judea, Capadocia, Ponto, Asia,

¹⁰ Frigia, Panflia, Egipto, tan nyiví quee ityi nuu ca Cirene ityi Africa. Tan yucú tucu yo tsa cuví yo nyiví ñuu Roma tan iyó yo ñuu ihya. Tan juhva yo cuví yo nyiví Israel nda quiví cacú yo. Tan inga yo cuví yo nyiví nanduvj cuenda nyiví Israel tan nyicún yo ley tsa tyaq ra Moisés.

¹¹ Iyó tucu yo tsa cuví yo nyiví quee Creta tan Arabia. Maa tyin tandihí yo tan tsiñí yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

¹² Tandihí ra naha, iyo xaan cuñí ra naha, tan tsicá tuhun tahan ra naha tan catyí ra naha:

—¿Náa cuñí tsi catyí tandihí tsa cuví ihya? —catyí ra naha.

¹³ Maa tyin inga ra jacuñí nyaa ra naha tsi ñi, tan catyí ra naha tyin tsiñí ñi.

Nu caahán ra Pedro tsihin nyiví

¹⁴ Tacan tan nduvitá ra Pedro tsihin tsa utsi iin ca ra tavá tyiñu ra Jesús. Tan ñihi cahan ra tan catyí ra:

—Nyooho yañi, tsa cuví ndo ra ñuu Israel, tan tandihí nyooho tsa iyó ñuu Jersualén ihya. Cuñí tsi tsa coto ndo tuhun ihya. Tan tyaq soho vaha ndo tsa cua cahan yu tsihin ndo.

¹⁵ Tyin cuñí maa ndo tyin tsiñí ndi. Maa tyin ñavin nyixi tsihí ndi, tyin ña tuhvá nyiví coho nyixi hora ihya, tyin ndi jatyaan.

¹⁶ Maa tyin tsa cuví ihya cuví tsa cahan ra Joel, ra cuví ndusu yuhu Nyoo tahan tsanaha. Tyin catyí ra:

¹⁷ Nu cua ndihí quiví, catyí Nyoo, cua jaquitsi yu Tatyí Ii yu siqui tandihí nyiví. Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyiví tsahnu cua nyehe ñi ñumaahna jaha yu.

¹⁸ Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyiví ityi andiví.

Tan ityi nu ñuhu ñayiví cua javaha ra tsa iyo, seña niñi, seña ñuhu, tan vico yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihí tuhun caahán ra ihya cua cuví tsi tsa ndi cumañi ca tahan tsi quívi quítsi Jutu Mañi yo.

Tan quívi cua quítsi ra, iyo xaan cua cuví.

²¹ Tan tandihí nyívi tsa tsicán tahvi tsi ra cua cacu ñi, catyí ra Joel jahá Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsí tsi ra, tan tsa janahá Nyoo tsi yo tyin nditsa tsa nacatsí ra tsi ra, tsahá ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihí tsa caahán yu ihya.

²³ Maa tyin quívi nacuhvá cuenda ndo tsi ra, javahá ndo tumaa cuhva tyaa maa Nyoo cuhva nda quívi jihna ñi. Tyin tsahá cuenda ndo tsi ra tsa ra caquíni. Tan ticaá ra naha tsi ra nu cruu. Tsaññi ra naha tsi ra jahá ndo.

²⁴ Maa tyin Nyoo janandotó ra tsi ra. Jacacu ra tsi ra tyin ña cuví cundaca ñaha tuhun tsihi tsi ra.

²⁵ Tyin ra David cahan ra tuhun cahan ra Cristo tahan tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

²⁶ Yacan cuenda si xaan cuñi yu. Tan jacahnú yu tsi Nyoo tsihin tsa si cuñi yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

²⁷ Tyin yooho, Nyoo Jutu yu, ña cua nacoo ihñi un aña yu nu yucú aña nyívi tsa tsihi,

tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

²⁸ Tan janahá un tsi yu ityi nu coo yu ñayívi ña cua naa maa.

Tan cua jacutu un tsi yu tsihin tusi iñi tyin maa un nyaá tsihin yu, catyí ra David cahan ra tsa cahan ra Cristo tahan tsanaha.

²⁹ Nyooho yañi, tsitó vaha yo tyin ra David tsii tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin.

³⁰ Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuví ra Cristo. Tan ra Cristo, cuví ra cua cundaca ñaha tumaa tsa tsindaca ñaha ra David.

³¹ Tan ra David tumaa tsa tyin nyehé ra tsa cua cuví nu cuahán ca tsi ityi nuu. Tan cahan ra tuhun tsa cahan ra Cristo. Tan catyí ra tyin ña cua ndoo aña ra nu yucú aña nyívi tsa tsihi. Tan ndi ña cua tyahyu cuñu ñuhu ra, catyí ra.

³² Tan ra Jesús can janandotó Nyoo tsi ra. Tan tandihí maa ndi cuví ndi tsandaa tsa cuenda tsa nandotó ra.

³³ Jutu Nyoo jacahnú ra tsi ra Jesús, tan tsihin ndaha cuaha ra cañihí ra tsi ra nda gloria. Tan ra Jesús naquihñin cuenda ra Tatyí Ii tsa catyí Jutu yo Nyoo tahan tsanaha tyin cuhva ra tsi yo. Tan yacan cuví tsa tsahá ra tsi ndi vityin. Juvín tsi cuví tsa nyehé ndo tan tsiñi ndo.

³⁴ Tyin ñavin ra David nanda ityi andívi. Maa tyin maa ra David cahan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: “Cunya xiin cuaha yu

³⁵ tsitsi tsa cua caquin yu tsi ra xaan iñi tsi un tsaha un”, catyí ra David jahá Nyoo.

³⁶ Tacan cahan ra Pedro tsihin ra naha, tan catyí tucu ra:

—Nyooho tan tandihí ca nyívi Israel, coto vaha ndo tyin tuhun ra Jesús, yacan cuví tsa caahán yu tsihin ndo ihya. Ticaa ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jahá Nyoo —catyí ra Pedro.

³⁷ Cuhva tsa tsiñi ra naha tsa cahan ra Pedro tuhun ihya, cuiihya xaan cuñi ra naha cuví. Tan tsicá tuhun ra naha tsi ra Pedro tan tsi tandihí ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

³⁸ Tacan tan catyí ra Pedro tsihin ra naha:

—Intuhun intuhun ndo ndu uvi ñi ndo cuatyí ndo tan ñasama ndo cuhva iyó ndo. Tan coondutya ndo tsihin sivi ra Jesucristo. Tan cua jaha ra tucahnu ñi cuatyí ndo. Tacan tan cua cuhva Nyoo Tatyí Ii ra tsi ndo.

³⁹ Tyin tahañ tsanaha catyí Nyoo tyin cuhva ra Tatyí Ii ra tsi yo, tan tsi sehe yo, tan tsi nyívi tsa cañi iyó. Tyin tandihí nyívi tsa cua nacana Jutu Nyoo cua cuhva ra Tatyí Ii ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsahá cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyívi caquiñi iyó nu ñuhu ñayívi ihya —catyí ra tsihin ra naha.

⁴¹ Tacan tan tandihí ra tsa tyaá yahvi tuhun cahan ra Pedro tsicoondutya ra naha. Tan quitá tumaa uñi mil nyívi tsa tandihí ñi, tan ndu ñin ñi tsihin nyívi yihí cuenda ra Jesucristo.

⁴² Tan tandihí quívi ndu ñin tandihí ñi, tan ñi ñi ñi tyaá soho ñi tsa jacuahá tandihí ra tava tyiñu ra Jesucristo tsi ñi. Tan ñin ñi cuví ñi tsihin tahan ñi, tan tsicán tahvi ñi tan tsatsí ñi paan tan tsihí ñi vinu tyin tacan tan ña cua naa ñi ñi tyin tsihí ra Cristo tsa cuenda cuatyí ñi.

Cuhva iyó nyívi yihí cuenda Jutu Mañi yo Jesucristo quívi can

⁴³ Tan cuaha tsa iyo javahá tandihí ra tsa tava tyiñu ra Jesucristo jahá Nyoo. Tan tandihí ñi iyo cuñi ñi.

⁴⁴ Tandihí ñi yihí cuenda ra Cristo ñin caa ñi iyó ñi tsihin tsa iyó tsi ñi.

⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyívi tahan ñi cuhva tsa tsiñi ñuhu tsi intuhun intuhun ñi.

⁴⁶ Tandihí quívi tan ndu ñin ñi nda vehe ñuhu cahnu. Tan nda yuvehe ñi ñin caa ñi tsatsí ñi paan tan tsihí ñi vinu. Tan sii cuñi ñi tsatsí ñi tyin ñin ñi cuví ñi.

⁴⁷ Tan jacahnú ñi tsi Nyoo. Tan vaha caahán tandihí nyívi tuhun ñi. Tan ñin tan ñin quívi tan nducuahá ca nyívi quíhví cuenda Jutu Mañi yo Jesús tyin jacacú ra tsi ñi.

3

Nu nduvahá ñin ra coxo

¹ ñin quívi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyívi Israel cuahán cuandacán tahvi tsi Nyoo.

² Tan ñin ra ndaahvi, coxo ra nda quívi cacú ra, nyaá ra yuhu cora vehe ñuhu cahnu can tandihí maa quívi. Tyin tsindacá ñi tsi ra na ndacan ra xuhun tsi nyívi quíhví yuhu cora can, tan nañi tsi Yuhu Cora Sii Caá.

³ Tacan tan nyehe ra coxo can tsi ra Pedro tsihin ra Juan tsa cua quihvi ra naha yuhu cora can. Tan tsican ra xuhun tsi ra naha.

⁴ Tan nyehe ra Pedro tan ra Juan tsi ra. Tan ra Pedro catyí ra tsihin ra: —Nyehe tsi ndi —catyí ra.

⁵ Tacan tan quitsaha nyehe ra coxo can tsi ra naha. Cuñi maa ra tyin iyó tsa cua cuhva ra naha tsi ra.

⁶ Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan caca —catyí ra Pedro tsihin ra.

⁷ Tacan tan tñin ra Pedro ndaha cuaha ra tan cañihí ra tsi ra. Tan juvin ñi cuhva can naco tunyee ñi nduvi taahan tsaha ra tan jucun tsaha ra.

⁸ Tacan tan ra coxo can ndava ra, tan nduvita ra tsinyaá nyityi ra. Tan quitsaha tsicá ra. Tan quihvi ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo.

⁹ Tandihí nyivi nyehe ñi tsi ra tyin tsicá ra tan jacahnú ra tsi Nyoo.

¹⁰ Tan iyo xaan cuñi ñi tan yuuhvi ñi tsa cuenda tsa nduvaha ra can. Tyin nacotó ñi tsi ra. Tyin juvin ra cuví ra tsa tuhvá tsinyaá Yuhu Cora Si Caá can tsicán ra xuhun tsi nyivi.

Nu caahán ra Pedro tuhun ra Cristo tsihin nyivi nu cuví corredor cuenda ra Salomón

¹¹ Ra coxo tsa nduvaha can, ña jaña maa ra tsi ra Pedro tan ra Juan. Tan tandihí nyivi iyo cuñi ñi, tan tsinú xaan ñi tsaá ñi nu cuví corredor cuenda ra Salomón tyin cua nyehe ñi tsi ra coxo can tyin tsa nduvaha ra.

¹² Tsa nyehe ra Pedro yacan, tan catyí ra tsihin nyivi can:

—Nyooho ra Israel, ¿nacuenta iyo xaan cuñi ndo? Tan ¿nacuenta nyehe xaan ndo tsi nyuhu? ¿A cuñi maa ndo tyin tsihin tunyee ñi maa ndi, a tsa cuenda tsa catsi iyó ndi nuu Nyoo, tan cuví janduvaha ndi tsi ra coxo ihya?

¹³ Ñavin maa nyuhu janduvaha tsi ra. Nyoo ra cuví Nyoo tsi tsaañu yo, ra Abraham, ra Isaac tan ra Jacob, ra ican jacahnú tsi Sehe ra tan tsaha ra tunyee ñi tsi ra, ra tsa tsaha cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsaha ndo.

¹⁴ Tahán tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsahñi ndiyi.

¹⁵ Tan nyooho tsahñi ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndoq ra nu yucú aña nyivi tsa tsihi. Tan nyuhu cuví ndi tsandaa tsa cuenda tsa nandoto ra.

¹⁶ Tan juvin ra Jesús cuví ra tsa tsaha tunyee ñi tsi ra coxo ihya tan nduvaha tsaha ra, tyin tsinú ñi ndi tyin iyó tunyee ñi tsi ra Jesús. Yacan cuenda nduvaha tsaha ra ihya, tan nacotó vaha ndo tsi ra. Tan tandihí nyooho nyehe ndo tyin nduvaha ra tsa cuenda tsa tsinú ñi ndi.

¹⁷ Tsitó yu, —catyí ra Pedro— tyin quivi tsa tsahñi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha.

¹⁸ Maa tyin tacan jacuvi ndo tan cundaá tsa cahan ra cuví ndusu yuhu Nyoo tahán tsanaha, tyin catyí ra naha tyin ra Cristo cua nyehe ra tundoho.

¹⁹ Yacan cuenda ndu uvi ñi ndo cuatyí ndo, tan nacuhva cuenda ndo aña ndo tsi Nyoo, na ndatsi cuatyí ndo. Tacan tan sñi xaan cua cuñi aña ndo jaha tunyee ñi Jutu Mañi yo.

²⁰ Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quívi jihna ñi tyaa Nyoo cuhva tyin quitsi ra tsa cuenda yo.

²¹ Taahán tsi tsa ndoó ra Jesucristo gloria tsa vityin nda cuanda quívi cua jandutsaa Nyoo tandihí maa tsa iyó. Tumaa cuhva catyí ra cuví ndusu yuhu Nyoo tahán tsanaha.

²² Tyin tacan catyí ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juven ñi nyívi yo cua cuví ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihí tsa cua cahan ra tsihin ndo.

²³ Tyin tandihí nyívi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyívi tsa nacatsi Nyoo”, catyí ra Moisés.

²⁴ “Tan tacan tucu tandihí ra cuví ndusu yuhu Nyoo nda quívi tsicoo ra Samuel tan nda cuanda vityin, jacoto ra naha tsa cuví vityin.

²⁵ Tandihí tsa catyí Nyoo tyin cuhva ra tsi yo, cahan ra cuví ndusu yuhu Nyoo tahán tsanaha. Tandihí can tsii maa ndo cuví can. Tan tyiñu tsa ndoo Nyoo tsihin ra Abraham tsii tsaahnu yo, juven ñi tsa cuenda maa ndo cuví yacan. Tyin catyí Nyoo tsihin ra Abraham: “Tandihí nyívi tsa iyó nu ñuhu ñayívi cua nasoco yu tsi ñi tsa cuenda nyívi tata un.”

²⁶ Tan yacan cuenda quívi janandoto Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó ndo —catyí ra Pedro tsihin ñi.

4

Nu tñn ra cuví ityi nuu vehe ñuhu cahnu naha ra tsi ra Pedro tan ra Juan

¹ Ndi caahán ca ra Pedro tan ra Juan tsihin nyívi, tan tsaá ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra.

² Nduxaan xaan ra naha tyin ra Pedro tan ra Juan jacuahá ra naha tsi nyívi tan catyí ra naha tyin nditsa tsa cua nandoto nyívi tsa tsa tsihí, tyin ra Jesús nandoto ra.

³ Tacan tan tñn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuanda inga quívi tyin tsa cueñi cuví cuhva can.

⁴ Maa tyin cuaha ñi tsa tsiñí tuhun caahán ra Pedro quitsahá tsinú iñi ñi. Tan ndu iin ñi tsihin nyívi yihí cuenda ra Jesús. Tan tsa tandihí ñi quitá maa uhun mil cuví tsa maa ñi maa rayí naha ra.

⁵ Tsa tuvi inga quívi, nda ñuu Jerusalén ndu iin tandihí ra cumí tyiñu cuenda nyívi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés.

⁶ Tan nyíi tucu ra Anás ra jutu tsaahnu cuví ityi nuu. Tan nyíi tucu ra Caifás, tan ra Juan, tan ra Alejandro. Tan yucú ndihí tucu tandihí rayí tsa cuví nyívi ra jutu tsaahnu cuví ityi nuu.

⁷ Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindacá ra naha tsi ra naha nda mahñu nu yucú ra naha. Tan tsicá tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvaha ndo tsi ra can? ¿Yóo tsahá tunyee iñi tsi ndo tsa javaha ndo tyehen? —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí Ii Nyoo. Tan nacahan ra tsihin ra naha: —Nyooho ra ndacá ñaha Israel ñuu yo ihya, tan nyooho ra tsahnu.

⁹ Vityin tsicá tuhun ndo tsi ndi tsa cuenda tsa vaha tsa cuvı tsi ra coxo ihya, tyin cuñı ndo coto ndo nácaa nduvahá ra.

¹⁰ Yacan cuenda cua catyi tuhun ndi tsihin ndo na coto tandihı nyıvi Israel. Tyin ra ihya nyaá ra nuu tandihı ndo, tyin nduvahá ra tsihin tunyee iñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandoto ra tsi ra.

¹¹ Tan juvin ra Jesús cuvı yuu tsa tsiñı ñuhu ca tsa ña cuñı ra javahá vehe cuatyıñu ra, tumaa kuhva catyi nuu tutu Nyoo. Tan nyooho cuvı ra javahá vehe tan ña cuñı ndo yuu tsa tsiñı ñuhu ca can.

¹² Yoñi inga ra cuvı jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyi ra Pedro tsihin ra can naha ra.

¹³ Tan ra cumı tyiñu can naha ra iyo xaan cuñı ra naha tsiñı ra naha tsa caahán ra Pedro tan ra Juan tyin nü xaan iñi ra naha caahán ra naha, tan ñavin ra cahvı scuela cuvı ra naha. Tacan tan nacoto ra naha tsi ra naha tyin ra ican naha ra cuvı ra tsa tsicá tsihin ra Jesús quıvi can.

¹⁴ Tan ra tsa nduvahá can, nyaá nyityi ra tsihin ra naha. Yacan cuenda ña cuvı cahan ra cumı tyiñu can naha ra tsa ndavaha ñi siqui ra Pedro tan ra Juan.

¹⁵ Tacan tan catyi ra cumı tyiñu naha ra tsihin ra naha:

—Quıta nduñi taahan nyooho tsata vehe.

Tan quitá ra naha. Tan ndoo ra cumı tyiñu can naha ra natuhún tahan ra naha.

¹⁶ Tan catyi ra naha:

—¿Náa javaha yo tsihin ra ihya naha ra? Tyin tandihı maa nyıvi Jerusalén tsıtó ñi tsa iyo tsa javahá ra naha. Tan ña cua cuvı catyi yo tyin ña nditsa.

¹⁷ Maa tyin ña cuñı yo tsa cuaha ca nyıvi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyıvi —catyi ra cumı tyiñu naha ra.

¹⁸ Tacan tan caná ra cumı tyiñu tsi ra Pedro tan ra Juan. Tan catyi ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyıvi.

¹⁹ Maa tyin ra Pedro tan ra Juan nacahan ra naha tan catyi ra naha:

—Tyihı tuñi ndo iñi ndo tan nyehı ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo.

²⁰ Tyin nyuhu ña cuvı tsa jandihı ndi tsa nacatyı tuhun ndi tsa nyehı ndi tan tsa tsiñı ndi —catyi ra naha.

²¹ Tacan tan tyasi nyico ra cumı tyiñu naha ra tsi ra Pedro tan ra Juan. Tan jañá ra naha tsi ra naha tyin ña ñihı ra naha nácaa tatsı tuñi ra naha tsi ra naha. Tyin tandihı nyıvi tan jacahnú ñi tsi Nyoo tsa cuenda tsa cuvı can.

²² Tyin rayı tsa nduvahá can, tsa yahá uvı xico cuiya ra, tan tacan cuiya tahan ra tundoho tan nduvahá ra jahá Nyoo.

Nu tsicān nyıvi yihı cuenda ra Cristo tunyee iñi Nyoo

²³ Tan tsa quitá ra Pedro tan ra Juan, cuahán ra naha nu yucú nyıvi yihı cuenda ra Jesús. Tan nacatyı tuhun ra naha tandihı tsa cahan ra tsahnu naha ra tan ra jutu tsa cuvı ityi nuu naha ra tsihin ra naha.

²⁴ Cuhva tsa tsiñı tandihı ñi, tan iin caa ñi quıtsahá tsicán tahvi ñi tsi Nyoo. Tan catyi ñi:

—Jutu Mañi yu, yooho javahá un andıvi tan ñuhu ñayıvi. Javahá un ndutya ñuhu. Tan tandihı ca tsa iyó, maa un javahá.

25 Tan yooho tsihin Tatyí Ii un jacahan un tsi ra David tahan tsanaha. Tan catyí ra:

¿Nacuenda tsa nduxaán nyívi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

26 Rey naha ra tan tsihin ra tsa ndacá ñaha nu ñuhu ñayívi ihya nduvitá ra naha siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

27 Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsí vaha maa un.

28 Tan tacan javahá ra naha, tumaa cuhva tsa catyí maa un tahan tsanaha tyin cua cuví.

29 Tan vityin, Jutu Mañi yu, nyehe tyin cuñí ra naha casi ra naha tsi ndi. Tan cuhva tsa ñi coo iñi ndi tyin tyiñu maa un javahá ndi, Jutu Mañi yu. Tan na ña nayuhví ndi cahan ndi tuhun maa un.

30 Tan tsihin tunyee iñi maa un tan cua nduvaha nyívi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

31 Tan cuhva tsa ndihí tsican tahvi ñi tsi Nyoo tan taan nu yucú ñi. Tan tandihí ñi tsitú ñi tsihin Tatyí Ii Nyoo tan cahan ñi tuhun Nyoo tsihin tsa ña yuuhví ñi.

Nduve tsa cumañi tsi nyívi yihí cuenda ra Cristo

32 Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can.

33 Tan tsihin tunyee iñi cahnu, caahán ra tavá tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha.

34 Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can

35 tsi ra tavá tyiñu ra Jesús. Tan maa ra naha natsatsá xuhun can tsi intuhun intuhun nyívi cuhva tsa tsiní ñuhu tsi ñi.

36 Tacan javahá iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyí mahñu ndutya ñuhu. Tan ra tavá tyiñu ra Jesús jacunañi ra naha tsi ra Bernabé. Tan sívi can cuñí tsi catyí: ra jandu iin iñi nyívi.

37 Tan ra Bernabé can xico ra ñuhu ra. Tan tsahá ra xuhun can tsi ra tavá tyiñu ra Jesús.

5

Cuatyi ra Ananías tsihin ña Safira

1 Maa tyin iin ra tsa nañi Ananías tsihin ña Safira, ñasihi ra, xico ñi iin ñuhu.

2 Tan tyihí xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tavá tyiñu ra Jesús. Tan catyí ra tyin tandihí xuhun tsa cuyahví ñuhu cuví can.

3 Tacan tan catyí ra Pedro tsihin ra:

—Yooho Ananías, ¿nacuenta tsa tsahá un tsa quihví nu ña vaha añima un? Tyin cuñi un jandavi ñaha un tsi Tatyí Ii Nyoo, tan catyí un tyin tandihí xuhun

tsa cuyahv̄i ñuhu can cuv̄i tsehe, tan ña nditsa un tyin ndoo juhva xuhun can tsi un.

⁴ Tsi un cuv̄i ñuhu can, tan tsi un cuv̄i xuhun tsa ñih̄i un cuenda ñuhu can. ¿Nacuenda tsa cuñi un jandavi ñaha un tsi Nyoo tan catyí un tyin tandih̄i xuhun can tsaḥa un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyí ra Pedro tsihin ra Ananías.

⁵ Tsa tsiñi ra Ananías tuhun tsa caḥan ra Pedro, nduv̄a ra tan tsihi ra. Tan tsa tsito nyivi tuhun ihya tan nayuhv̄i xaan ñi.

⁶ Tacan tan tsaḥa ra cuatyí naha ra tan cav̄a nuu ra naha jahma cuñu ñuhu ra Ananías. Tan tsaḥan ra naha tsindac̄a ra naha tsi ra nu ndaa cumi santu.

⁷ Yaha uñi hora tan tsaḥa ñasihi ra Ananías tan quihv̄i ña nu yucú ra tav̄a tyiñu ra Jesús, tyin ña tsitó ña tsa cuv̄i.

⁸ Tan quitsah̄a tsicá tuhun ra Pedro tsi ña tan catyí ra tsihin ña:

—¿A tyehen ñi cuv̄i xuhun tsa cuyahv̄i ñuhu ndo? —catyí ra Pedro tsihin ña.

Tacan tan nacah̄an ña tan catyí ña tsihin ra:

—Tacan ñi cuv̄i xuhun tsa cuyahv̄i tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsi ra tsa tsaḥan tsindac̄a tsi yii un nu ndaa cumi santu. Tan vityin cua cundaca ndih̄i ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduv̄a ña tsaha ra Pedro, tan cueta tsihi ña. Tan quihv̄i ra cuatyí can naha ra, tan nyehe ra naha tyin canyii ña tsihi ña. Tan cañih̄i ra naha tsi ña, tan tsindac̄a ra naha tsi ña nu ndaa cumi sandu. Tan tinyii ra naha tsi ña xiin yii ña.

¹¹ Tan tandih̄i nyivi yih̄i cuenda ra Cristo, tan tandih̄i nyivi tsa tsito tuhun can, nayuhv̄i xaan ñi.

Cuaha xaan tsa iyo tan seña javah̄a ra tav̄a tyiñu ra Jesús

¹² Cuaha seña tan tsa iyo javah̄a ra tav̄a tyiñu ra Jesús nu yucú nyivi. Tan tandih̄i ñi yih̄i cuenda ra Cristo ndu iin ñi nu cuv̄i corredor cuenda ra Salomón.

¹³ Tan nyivi tsa inga cuenda ña caná iñi ñi cutahan ñi tsihin ñi yih̄i cuenda ra Cristo. Maa tyin nyivi can vaha caahán ñi siqui ñi yih̄i cuenda ra Cristo.

¹⁴ Tan cuaha xaan nyivi quitsah̄a tsinú iñi tsi Jutu Mañi yo Jesús, tahan ñi rayii tan ñaha.

¹⁵ Tan nda cuanda tavá ñi tsi nyivi cuuhv̄i ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixah̄nu ra siqui ñi cua nduvaha ñi.

¹⁶ Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhv̄i tan nyivi tsa yih̄i tatyí ña vaha. Tan nduvah̄a tandih̄i ñi.

Nu nyehé ra Pedro tan ra Juan tundoḥo

¹⁷ Tacan tan ra jutu tsaahnu tsa cuv̄i ityi nuu, tan ra yih̄i cuenda ra cuv̄i saduceo naha ra, ndasi cuñi ra naha nyehé ra naha tsi ra tav̄a tyiñu ra Jesús tsa cuenda tsa vaha tsa javah̄a ra naha tsihin tunyee iñi tsa tsaḥa Nyoo tsi ra naha.

¹⁸ Tacan tan tñin ra naha tsi ra naha. Tan tyih̄i ra naha tsi ra naha vehe caa.

¹⁹ Maa tyin tsa cuaa can quitsi iin ángel tsa jaquitsi Jutu Mañi yo, tan nuñā ra yuvehe caa can. Tan tav̄a ra tsi ra naha. Tan catyí ra tsihin ra naha:

20 —Cuaahan ndo tan cunyacu nyityi ndo vehe ñuhu cahnu. Tan ñacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

21 Tsa tsiñi ra naha tsa cahān ra ángel can, tan cuahán ra naha. Tan tsa tui inga quivi can nañihí nyivi tsi ra naha vehe ñuhu cahnu. Tan quitsahā jacuahá ra naha tsi ñi.

Tan tsitsi tsa jacuahá ra naha tsi ñi, tan ndu ijn ra jutu tsaahnu tsa cuví ityi nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tavā tyiñu ra naha na cuquihin ra naha tsi ra tavā tyiñu ra Jesús nu yucú ra naha vehe caa can.

22 Maa tyin cuhva tsa tsaā ra vitya naha ra tsitsi vehe caa can, ña nañihí ra naha tsi ra naha. Tan cuanuhū ra naha cua nacatyí tuhun ra naha tsihin ra jutu tsaahnu tsa cuví ityi nuu.

23 Tan catyí ra naha tsihin ra:

—Ndasí yuvehe caa can tan tsaā ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñā ndi yuvehe can, yofi maa nañihí ndi —catyí ra naha tsihin ra jutu tsaahnu tsa cuví ityi nuu.

24 Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahān ra vitya naha ra tsihin ra naha tan iyo xaan cuñí ra naha. Tan natuhun tahan ra naha nácaa javaha ra naha tan cundihí tuhun can.

25 Tacan tan tsaā iin ra tan catyí ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

26 Tacan tan ra yihí ndaha tsi ra jahá cuenda vehe ñuhu can, tsaahān ra tsihin ra vitya naha ra, tan tsiquihin ra naha tsi ra tavā tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

27 Tsindacā ra naha tsi ra tavā tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tavā tyiñu ra Jesús:

28 —Nyuhu tsa cahān vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaa soho ndo tsa cahān ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñí ndo tyaa ndo cuatyí can siqui ndi tyin tsihí ra —catyí ra jutu tsaahnu tsa cuví ityi nuu tsihin ra naha.

29 Tacan tan nacahān ra Pedro tan inga ra tavā tyiñu ra Jesús, tan catyí ra naha:

—Taahán tsi tyaa yahvi jihna ndi tsi Nyoo tan ñavin ca tsi nyooho.

30 Nyoo cuenda tsi tsaahnu yo juven ra janandotó tsi ra Jesús, ra tsa ticaā ndo nu cruu tan tsaññi ndo.

31 Tan ra Jesús cuví ra tsa jacahnū xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo.

32 Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí Ii Nyoo tsa tsahā Nyoo cunyaa añima nyivi tyaa yahvi tsi ra —catyí ra Pedro tsihin ra naha.

33 Tan tsa tsiñi ra naha tsa cahān ra Pedro, nduxaān xaan ra naha. Tan cuñi ra naha cahñi ra naha tsi ra naha.

³⁴ Maa tyin tsihin ra cumi tyiñu can naha ra nyíi iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaa ra Moisés. Tan nyívi tyaa yahvi xaan ñi tsi ra. Tan ra Gamaliel can, nduvita nyityi ra. Tan caahán ra na quita ra tava tyiñu ra Jesús tañi ñi. Tacan tan quita ra naha.

³⁵ Tan quitsaha caahán ra Gamaliel can tsihin tandihi ca ra cumi tyiñu naha ra, tan catyí ra:

—Yoo, ra tsa ndaca ñaha tsi nyívi Israel, jaha yo cuenda tsi yo tsihin tsa cua javaha yo tsi ra ican naha ra.

³⁶ Nducuhun iñi ndo tyin tsa iyó juhva quívi nduvita iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yaha can tsahñi nyívi tsi ra. Tan tandihi ra tsa tsinyicun tsi ra cuanuhu ñi ñuu ñi. Tan tsindihí tuhun can.

³⁷ Yaha can tan nu cuahán ca tsi ityi nuu, quívi nacahvi ra gobiernu tsi nyívi, tan nduvita ra Judas ra ityi Galilea. Tan cuaha xaan nyívi tsinyicun tucu tsi ra can. Maa tyin juvin ñi tsahñi nyívi tsi ra. Tan tandihi ñi tsa tsinyicun tsi ra cuanuhu ñi ñuu ñi.

³⁸ Yacan cuenda jaña yo tsi ra ihya naha ra. Tan ña cua tyihi yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihí tuhun can.

³⁹ Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

⁴⁰ Tandihí ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyí ra cumi tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha.

⁴¹ Tan quita ra naha nuu ra cumi tyiñu. Tan shi xaan cuñi ra naha tyin tsaha Nyoo ndatu tyin nyehé ra naha tundo ho tsa cuenda ra Jesús.

⁴² Tan ña jandihí ra naha tsa caahán ra naha. Tan tandihí quívi jacuahá ra naha tuhun ra Jesucristo vehe ñuhu tan vehe nyívi.

6

Nu nacatsí nyívi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

¹ Tan nu cuahán ca tsi quívi cuaha xaan nyívi yihí cuenda ra Cristo cuví. Tacan tan nyívi tsa caahán yuhu griego quitsaha caahán ñi siqui nyívi tsa caahán yuhu hebreo tan catyí ñi tyin kuhva tsa tsatsá ra naha tsa catsi ñi tandihí quívi ña jahá vaha ra naha cuenda tsi ñi ndaahvi grecia tsa tsihi yí.

² Tacan tan tandihí tsa utsi uvi taahan ra tava tyiñu ra Jesús jandu iin ra naha tsi tandihí nyívi yihí cuenda ra Cristo. Tan catyí ra naha tsihin nyívi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo.

³ Yacan cuenda, nyooho yañi, nducuhun ndo utsa taahan ra nu yucu yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí Ii Nyoo. Tan kuhva yo tyiñu ihya tsi ra naha.

⁴ Tan nyuhu cua jañihí ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

⁵ Tandihí ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsí tucu ñi tsi ra

Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel.

⁶Tacan tan tsindacá ñi tsi ra naha nu nyecú ra tava tyíñu ra Jesús. Tan tyiso ndaha ra naha jiñi intuhun intuhun ra naha tan tsicān tahvi ra naha tsi Nyoo tsa cuenda ra can naha ra.

⁷Tan tsityá ca tuhun Nyoo. Tan nducuahá ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinū ndihí iñi ra naha tuhun ra Cristo.

Nu tyihí ra naha tsi ra Esteban vehe caa

⁸Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú añima ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi.

⁹Tacan tan juhva ra tsa tsicá vehe ñuhu ñuu Israel tsa nañí Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandria naha ra, tan ra ityi Cilicia naha ra, tan ra ityi Asia naha ra. Tan quitsahá caahán yuhu tahan ra naha tsihin ra Esteban.

¹⁰Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahá Tatyí li Nyoo tsi ra.

¹¹Tacan tan tyahví ra can naha ra tsi juhva ra na cahan ra naha cuendu siqui ra Esteban tan catyi ra naha tyin ra Esteban caahán ra ndavaha ñi siqui ra Moisés, tan siqui Nyoo.

¹²Yacan cuenda tandihí nyivi can quitsahá cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindacá ra naha tsi ra nu ndu iín ra cumí tyíñu cuenda vehe ñuhu nyivi Israel.

¹³Tan nducú ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaa ra Moisés.

¹⁴Tan tsiñi ndi tsa caahán ra tyin ra Jesús, ra Nazaret can, cua cani ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

¹⁵Tacan tan ra cumí tyíñu naha ra tan ra nyecú ican nyehe ra naha tsi ra Esteban tyin tumaa caá nuu iín ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

²Tacan tan nacahan ra Esteban tan catyí ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsi tsaahnu yo, ra Abraham, quivi nyii ra ityi Mesopotamia tsa ndi cumañi ca cahun ra coo ra nda ñuu Harán.

³Tan catyí ra tsihin ra: “Nacoo ñuu un, tan tsi tandihí nyivi un. Tan cūhun cun inga ñuu tsa cua janaha yu tsi un” catyí Nyoo tsihin ra Abraham.

4 Tacan tan ra Abraham quitā ra nu iyó nyiví Caldea ityi Mesopotamia, tan cuahán ra nda ñuu Harán. Tan ndacan cuví nu tsihí jutu ra. Yaha can jaquitsi Nyoo tsi ra ñuhu nu iyó yo ihya vityin.

5 Maa tyin nduve ñuhu tsahā Nyoo tsi ra quiví can. Ndi luxu maa nu cuañi ra tan ña tsahā Nyoo. Maa tyin catyí ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan चाहण Nyoo tsihin ra Abraham, vasu tsa ñaha ca coo sehe ra quiví can.

6 Tan inga tucu tuhun चाहण Nyoo tsihin ra tyin nyiví tata ra cua coo ñi inga ñuu. Tan cua cuví ñi musu nyiví ñuu can. Tan maa nyiví ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya.

7 Maa tyin चाहण tucu Nyoo tsihin ra tyehe: “Nyiví tata un cua nyehe ñi tundoho jaha nyiví ñuu can. Yacan cuenda yuhu cua tatsi tuñi yu tsi nyiví ñuu can. Tan tsa cua yaha yacan tan cua quita nyiví cuví tata un ñuu can tan cua quitsi ñi ihya. Tan cua jacahnu ñi tsi yu” catyí Nyoo tsihin ra Abraham.

8 Tacan natuhun Nyoo tsihin ra. Tan ndoo ra tuhun tsihin ra. Tan Nyoo tsahā ra iin cuhva tsa cua javaha ñi coto naa ñi ñi tsa चाहण ra. Tsahā cuenda ra tyin tandihí ñi sehe yí ñi tsa cua coo tan cuñí tsi cunyya tuñi ra itsi naha tsi. Tan tsa yaha una quiví tsa cacú ra Isaac, sehe ra Abraham, tacan javahā ra tsi ra. Tan juven ñi tacan javahā ndihí tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaa ra tuñi can tsi intuhun intuhun sehe yí ra. Tan ra ican naha ra cuví tsi saahnu yo.

9 Tan tsa utsi iin taahan ca sehe ra Jacob ndasi cuñí ra naha nyehe ra naha tsi ra José yañi ra naha, tsa cuenda tyin cuñí ca jutu ra naha tsi ra can. Yacan cuenda xico ra naha tsi ra José na cuví ra iin musu nda Egipto. Maa tyin ra José, ña nacoq Nyoo tsi ra.

10 Tan jacacú ra tsi ra nu nyehé ra tundoho. Tan tsahā ra tsa nyityi jiñi ra tsi ra José. Tan tsahā ra tsa vaha coo ra nuu ra Faraón, ra cuví rey Egipto. Tan rey can tsahā ra tsa cuví ra José na cumí tyiñu ñuu tsa cayucú Egipto can. Tan tsindacā ñaha ndihí tucu ra vehe maa rey.

11 Tacan tan tsicoq tama naní cahnu ityi Egipto tan ityi Canaán. Tan nyehe xaan nyiví tundoho. Tan tandihí tsi saahnu yo ña ñihí ra naha tsa catsi ra naha.

12 Maa tyin quiví tsitō ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahan ra naha iin tsaha.

13 Tan tsa tsinu uvi tsaha tsa tsahan ra naha, ra José jacotō ra tsi ra naha tyin yañi ra naha cuví tsi ra. Tacan tan tsitō ra Faraón yoo tata cuví ra José.

14 Tacan tan tava tyiñu ra José na quitsi ra Jacob jutu ra, tsihin tandihí nyiví ra. Tan cuví ñi uñi xico tsahun taahan nyiví.

15 Tan tacan cuví tsa cuahán ra Jacob cua coo ra ñuhu Egipto can. Yaha can tan tsihí ra ndacan. Tan tsihí ndihí tucu tandihí sehe ra, ra cuví tsi saahnu yo naha ra.

16 Tacan tan tsaq quiví tsa tsindacā ñi yiqui ra Jacob tan yiqui sehe ra nda Siquem. Tan ican quihví yiqui tandihí ra naha tsitsi ñuhu nu jatā ra Abraham iin ñaña tsi sehe ra Hamor fahan tsanaha.

17 Maa tyin tsa ndi cumañi ca quita nyiví Egipto, nyiví ra Abraham tsa iyó Egipto can cuaha xaan ñi cuví. Tan tsa nyanaa yatyin quiví tsa cua cuhva Nyoo ñuhu tsi ñi tumaa tsa चाहण catsi ra tsihin ra Abraham.

18 Tacan tan quitsahā ndacá ñaha iin rey tsa ña nacotō tsi ra José.

19 Rey can jandaví ñaha ra nyiví yo. Tan janyehe xaan ra tundoho tsi ñi, tan jañiñí ra tsi ñi na nacoq ñi tsi sehe ñi tsa ndi cacú tyin na cúu tsi.

²⁰ Tan juvin ñi quivi can cacu ra Moisés. Tan tahañ xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña.

²¹ Yaha can ña cuvi ca tyihi xeehe sihi ra tsi ra. Tan nacoq ña tsi ra tsitsi iin tyica yuhu yutya. Tacan tan sehe sihi ra rey Egipto can nañihj ña tsi ra. Tan naquihñ ña tsi ra. Tan jacuahnu ña tsi ra, tumaa tsa sehe maa ña cuvi tsi ra.

²² Yacan cutuhva ra Moisés tandihj tsa tsitó ñi Egipto. Tan vaha xaan cahañ ra tan vaha javaha ra jaha tunyee iñi tsa tsañ Nyoo tsi ra.

²³ Tan tsa quitaj uvi xico cuiya ra Moisés cuñj ra cahun ra cunyehe ra nu iyó nyivi Israel, nyivi ra.

²⁴ Tacan tan iin quivi nyehe ra nu cañi iin ra Egipto can tsi iin ra Israel. Tacan tan tsañhñ ra Moisés tsi ra Egipto can tyin cañi xaan ra tsi ra Israel, ra ñuu ra.

²⁵ Cuñi maa ra Moisés can tyin nyivi Israel can cutuñi iñi ñi tyin Nyoo jaquitsj tsi ra tyin jacacu ra tsi ñi. Maa tyin ña tuvj iñi ñi tsa tacan cua cuvi.

²⁶ Tacan tan tsa inga quivi can nyehe ra Moisés tsi uvi taahan ra Israel, cañi tahañ ra naha. Tan ra Moisés, cuñi ra tsa ña cañi tahañ ca ra naha, tan quitsaha catyí ra: “Ña vaha tsa cañi un tsi ra yañi un” catyí ra tsihin ra naha.

²⁷ Tacan tan ra tsa cañi tsi inga ra can tindahñj ra tsi ra Moisés, tan catyí ra tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndí?”

²⁸ ¿A cuñi un cahañi un tsi yu tumaa tsa tsañhñ un tsi ra Egipto icu?” catyí ra tsihin ra Moisés.

²⁹ Cuhva tsa tsiñj ra Moisés tsa cahañ ra can, tsinu ra. Tan cuahán ra nda ñuu Madián. Ndacan ñihj ra ñasihj ra. Tan ndacan tsicoq uvi taahan sehe ra.

³⁰ Yahaj uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañi Sinaí. Tan nyehe ra cayú iin yutun iñu. Tacan tan quituvj iin ángel tsitsi ñuhu tsa cayú can.

³¹ Iyo xaan cuñj ra Moisés tsa nyehé ra yacan. Tan natuhva ra nu cayú iñu can tyin nyehe vaha ra, tan tsiñj ra ndusu Jutu Mañi yo. Tan catyí ndusu can tyehen:

³² “Yuhu cuvi Nyoo cuenda tsi tsaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsaha nihí ra tsihin tsa yuuhví ra. Tan ña canaj iñi ra nanyehe ra.

³³ Tan quitsaha catyí tucu Jutu Mañi yo tsihin ra: “Tava nditsan tsaha un tyin ñuhu nu tsañi un, ñuhu ii cuvi tsi.

³⁴ Yuhu nyehé yu tandihj tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacuhun yu tsi un nda Egipto” catyí Nyoo tsihin ra Moisés.

³⁵ Quivi can ña cuñj nyivi Israel tsi ra Moisés tsa cundaca ñaha ra tsi ñi, tan catyí ñi tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndí?”, catyí ñi tsihin ra. Vasu ña cuñj ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituvj nuu ra nu iñu tsa cayú can.

³⁶ Tan ra Moisés can tava tsi nyivi Israel ñuhu Egipto can tsihin tsa javaha ra tsa iyo tan seña ñuu can, tan nu yahaj ñi nda nu Nduhya Ñuhu Cuaaha, tan nu tsicá nuu ñi nu tsiqui tsitsi tsa uvi xico cuiya.

³⁷ Tan juvin ñi maa ra Moisés can cuvi ra tsa cahañ tsihin nyivi Israel tan catyí ra tyehen: “Nyoo cua jaquitsi ra tsi iin ra cuvi ndusu yuhu ra tumaa jaquitsj ra tsi maa yu. Tan cua cuvi ra iin ra Israel tumaa maa yo. Tan taahán tsi tyaa yahvi yo tsi ra” catyí ra Moisés.

38 Tan maa ra Moisés can cuahán ra tshin nyívi tsii tsaahnu yo nu tsicá nuu ñi nu tsiqui can. Tan ra ican cuví ra tsa cahán ángel tshin nda yucu Sinaí. Tan ra ican naquihín cuenda ra tuhun Nyoo nácaa coo nyívi, tan tyaa ra tuhun can nu tutu tyin tacan tan coto yo.

39 Maa tyin nyívi tsii tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto.

40 Yacan cuenda cuhva tsa nyii ra Moisés yucu Sinaí, tan cahán nyívi tshin ra Aarón tan catyi ñi: “Javaha taahan nyoo cuhun ityi nuu ndi. Tyin ña tsitó yo náa taha ra Moisés, ra tsa tava tsi yo Egipto” catyi ñi.

41 Tacan tan javaha ñi iin indiqui xuhun cuaan. Tan tsahñi ñi quití tyin cuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javaha ñi tshin ndaha ñi.

42 Tacan tan Nyoo jatsiyó ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihí tiñuu tsa iyó ityi andivi. Tyin tyehen tyaa ra cuví ndusu yuhu Nyoo nu libru tahañ tsanaha:

Nyooho nyívi Israel, ¿A tsahñi ndo quití tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiqui? Ñavin.

43 Tyin jacahnú ndo tsi nyoo tsa nañi Moloc,

tan jacahnú ndihí tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javaha tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacahun yu tsi ndo iin nu cañi ca ityi nuu ñuu Babilonia, catyi Nyoo tshin ñi.

44 Nu tsicá nuu tsii tsaahnu yo nu tsiqui can, tsicumj ra naha iin vehe ñuhu tsa tsinú tshin ñi quití. Tan tsitsi vehe can tsicumj ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janaha maa Nyoo tsi ra.

45 Yaha can tan ra Josué cuví ra ityi nuu tshin ñi. Tacan tan quihín ñi vehe ñuhu can tan vatsi ñi tshin tsi nu iyó yo ihya vityin. Tyin Nyoo tava ra tsi nyívi tsicoo ñuhu ihya tan nacuhva cuenda ra ñuhu ihya tsi ñi Israel, nyívi yo. Tan tsatyíñu ñi vehe ñuhu can nda cuanda quivi tsicoo ra rey David.

46 Tan ra rey David ñihí ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnú ra Jacob tahañ tsanaha.

47 Maa tyin ra Salomón javaha ra vehe Nyoo.

48 Vasu ña iyó Nyoo tsitsi vehe ñuhu tsa javaha nyívi. Tumaa cahán ra cuví ndusu yuhu Nyoo tahañ tsanaha tyehen:

49 Andivi cuví tyayu nu nyaá yu ndacá ñaha yu.

Tan ñuhu ñayivi, yacan cuví nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

50 ¿A ña tsitó ndo tyin maa yu javaha andivi tan ñuhu ñayivi? catyi ra cuví ndusu yuhu Nyoo jahá Nyoo.

51 Maa tyin nyooho —catyi ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihín ndo tuhun caahán Nyoo. Tacan ñi ña tyaa yahvi ndo tsi Tatyí li Nyoo. Inducu ñi caá ndo tshin tsii tsaahnu yo.

52 Tsii tsaahnu yo cuxaán ra naha tan tsahñi ra naha tsi tandihí ra cuví ndusu yuhu Nyoo tahañ tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra.

⁵³ Nyooho naquih̄in cuenda ndo ley Nyoo tsa tsaḥā ángel tsi ndo, maa tyin ña cuñí ndo tyaa yahvi ndo tsa caahán ley can —catyí ra Esteban.

Nu tsih̄i ra Esteban

⁵⁴ Tsa tsiñ̄i ra cumí tyiñ̄u vehe ñuhu cahnu naha ra tuhun ihya, xaan xaan cuñ̄i ra naha, ndacua jachahȳu nuhu ra naha nyehé ra naha tsi ra Esteban.

⁵⁵ Maa tyin ra Esteban tsitú ra tsihin Tatyí Ii Nyoo tan nanyeh̄e ra ityi andiv̄i. Tan nyeh̄e ra tsa cahnu cuví Nyoo. Tan nyeh̄e tucu ra tsi ra Jesús nyaá nyityi ra xiin cuaha Nyoo.

⁵⁶ Tacan tan catyí ra Esteban:

—j̄ihna ndo! Nyehé yu andiv̄i tan ticoḥó tsi. Tan nyehé yu tsi ra Jesús, Raȳi tsa quēe nda gloria, nyaá nyityi ra xiin cuaha Nyoo —catyí ra Esteban.

⁵⁷ Maa tyin ra can naha ra tyaṣ̄i ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi canā tsa ra naha. Tan tandih̄i ra naha cuahán ra naha siqui ra Esteban.

⁵⁸ Tacan tan tav̄a ra naha tsi ra yuhu ñuu. Tan tsañ̄i ra naha tsi ra tsihin yuu. Tan ra tsa javahá tsa ña vaha can naha ra, nacoḡ ra naha jahma tsa nyaá tsata ra naha tyin jaha cuenda iin ra tyuvaa tsa nañí Saulo.

⁵⁹ Tan tsitsi tsa cañí ra naha yuu tsi ra Esteban, quitsah̄a tsicán tahvi ra Esteban tsi Nyoo, tyin tuv̄i iñi ra tyin tsa cua cúu ra. Tan catyí ra tyehen:

—Jutu Mañi yu Jesús, naquihin añima yu —catyí ra.

⁶⁰ Yahā can, tan tsicuiñ̄i tsiti ra, tan tsa canā tsa ra tan catyí ra:

—Jutu Mañi yu, ña t̄in cuenda un cuatyí tsa javahá ra naha —catyí ra. Tsa yahā caḥan ra tacan, tan tsih̄i ra.

8

Nu tsinyaḡ ndaha ra Saulo tsi nyiv̄i yih̄i cuenda ra Cristo

¹ Tan ra Saulo ña tsinú iñi ra tsi ra Jesús, tan ndooḡ ra vaha tsa tsañ̄i ra naha tsi ra Esteban.

Tan juvin ñi quiv̄i can quitsah̄a nducú xaan nyiv̄i tsi ñi yih̄i cuenda ra Cristo ñuu Jerusalén tyin cañ̄i ñi tsi ñi. Tan tandih̄i ñi yih̄i cuenda ra Cristo tsinu ñi, cuahán ñi cua coo ñi tandih̄i ñuu tsa cayucú Samaria, tan tandih̄i ñuu tsa cayucú Judea. Maa tyin ra tav̄a tyiñ̄u ra Jesús ña quit̄a ra naha. Ndoḡ ra naha Jerusalén.

² Tan juhva ra tsa nyicún vaha tsi Nyoo ñuu Jerusalén can, tsaḥan ra naha tsicuts̄i ra naha cuñ̄u ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsih̄i ra.

³ Tan ra Saulo can quitsah̄a nyaá ndaha ra tsi nyiv̄i yih̄i cuenda ra Cristo. Tan tsaḥan ra tan iin tan iin vehe ñi. Tan ix̄ta caa ra tsi ñi, tan tsaḥa cuenda ra tsi ñi tyin cuhun ñi vehe caa, tahan ñi raȳi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandih̄i ñi tsa quit̄a ñuu Jerusalén can, caahán ñi tuhun Nyoo nácaa jacacú ra Cristo tsi yo, tandih̄i ñi ityi nu cuahán ñi.

⁵ Iin ra tsa nañí Felipe tsaḡ ra iin ñuu canyí Samaria. Tan quitsah̄a caahán ra tuhun ra Cristo tsihin nyiv̄i iyó ican.

⁶ Tan tandih̄i ñi n̄i cuñí ñi tan tyaá soho ñi tsa caahán ra. Tyin nyehé ñi tsa iyo tsa javahá ra.

⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan cana tsa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi.

⁸ Yacan cuenda nyivi ñuu can, sii xaan cuñi ñi.

⁹ Tan Samaria can iyó iin ra tasi nañi Simón. Tuhvá ra jandaví ñaha tsi nyivi. Catyí ra tyin cahnu xaan cuví ra.

¹⁰ Tandihí maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tshin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tshin tsa tasi.

¹² Tacan tan quitsj ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú iñi ñi tsi ra Cristo, rayi tan ñaha. Tan tsicoondutyá ñi.

¹³ Nda cuanda ra Simón can, tan natsinu iñi ra tsi ra Cristo, tan tsicoondutyá ra. Tan quitsaha tsicá nuu ra tshin ra Felipe. Tan iyo xaan cuñi ra nyehé ra tsa iyo tan seña tsa javahá ra Felipe.

¹⁴ Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria.

¹⁵ Tan tsa saa ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo.

¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyá ñi ñi tshin sivi Jutu Mañi yo Jesús.

¹⁷ Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo.

¹⁸ Tan ra Simón can nyehé ra nu tyiso ndaha ra tava tyiñu ra Jesús jiñi ñi, tan naquihin ñi Tatyí Ii Nyoo.

¹⁹ Tan quitsaha caahán ra Simón tan catyí ra:

—¿Najava xuhun cuñi ndo tan cuhva ndo tunyee iñi tsi yu, cuví tyiso ndaha yu jiñi nyivi, tan naquihin ñi Tatyí Ii Nyoo? —catyí ra Simón tshin ra naha.

²⁰ Tacan tan nacahan ra Pedro tan catyí ra:

—Jaha cuenda coto cunaa un tshin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví.

²¹ Yooho, ña taahán tsi tyihí un tsi un tshin tyiñu ihya. Tyin añima un ña vaha nuu Nyoo.

²² Ndu uví iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un.

²³ Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tshin ra Simón.

²⁴ Tacan tan nacahan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihí tsa caahán un tshin yu siqui yu —catyí ra Simón tshin ra Pedro.

²⁵ Tsa yaha can tan ra tava tyiñu ra Jesús tsaha cuenda ra naha tandihí tsa nyehé ra naha tsa javahá ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihí ñuu tsa cayucú Samaria nu yaha ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

²⁶ Tsa yaha yacan tan cahan iin ángel Nyoo tsihin ra Felipe, tan catyí ra:

—Nduvita tan cuhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiqui.

²⁷ Tacan tan ra Felipe nduvitá ra tan cuahán ra. Tan ityi cuahán ra ñihí tuhun ra tsihin iin ra ñuu Etiopía. Tan cuví ra can eunuco [tyin ña cuví coo ñasihí ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén.

²⁸ Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaá ra Isaías, ra cuví ndusu yuhu Nyoo tahan tsanaha.

²⁹ Tacan tan Tatyí li Nyoo cahan tsihin ra Felipe:

—Ñatuhva nu carreta can.

³⁰ Tan cuhva tsa natuhvá ra Felipe nu carreta can, tsiñi ra tyin cahví ra Etiopía can nu libru tsa tyaá ra Isaías. Tan tsicá tuhun ra Felipe tsi ra tan catyí ra:

—¿A cutuñi ñi un tsa caahán tsi? —catyí ra.

³¹ Tacan tan nacahan ra Etiopía can tan catyí ra:

—¿Nacaa cutuñi ñi yu tan yoñi jacuahá tsi yu? —catyí ra tsihin ra Felipe.

Tan tsicá ra tsi ra Felipe na ndaa ra tan cunyaa ra tsihin ra.

³² Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehé ra tundoho tan nduve náa cahan ra.

³³ Janduluhlu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

³⁴ Tacan tan ra Etiopía quitsahá tsicá tuhun ra tsi ra Felipe, tan catyí ra:

—Jaha tumañi ñi tsi yu, tan catyí tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

³⁵ Tacan tan ra Felipe quitsahá caahán ra siqui tuhun tsa tsa yaha cahví ra can, tan tsahá cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahá cuenda ra tyin ra Jesús cuví ra jacacú tsi yo.

³⁶ Tacan tan tsa cua yaha ra naha nu yihí ndutya. Tan ra Etiopía can quitsahá caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷ Tacan tan nacahan ra Felipe tsihin ra Etiopía, tan catyí ra:

—Tatun tsinú ñi un tsihin tsa ñi añima un, cuví coondutya un —catyí ra tsihin ra.

Tacan tan nacahan ra can, tan catyí ra:

—Tsinú ñi yu tyin Sehe Nyoo cuví tsi ra Jesucristo —catyí ra.

³⁸ Tacan tan ra can caahán ra tsihin musu ra na jacuñi ra carreta can. Tan nduvi taahan ra naha nuu ra naha. Tan quihvi ra naha tsitsi ndutya. Tacan tan jacoondutya ra Felipe tsi ra Etiopía.

³⁹ Tan cuhva tsa quitã ra naha tsitsi ndutya can, tan Tatyí Ii Jutu Mañi yo naquihin ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñi ra, cuanuhú ra.

⁴⁰ Tan ra Felipe tsaã ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tshin nyivi nda cuanda tsa tsaã ra ñuu Cesarea.

9

Nu natsinu iñi ra Saulo tsi ra Cristo (Hechos 22.6-16; 26.12-18)

¹ Tan tsicá ra Felipe caahán ra tuhun ra Cristo tshin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tshahan ra nu nyaá ra jutu tsaahnu cuví ityi nuu,

² tsendacã ra iin tutu tsi ra jutu, tyin nacuhva ra ndatu tsa cahun ra vehe ñuhu ñuu Damasco, tan tiin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Ñihí ra Saulo tutu can tan cuahán ra.

³ Tan tsa cua tsaã ra ñuu Damasco, sana iñi ra, tan quitsi ñuhú ityi andivi, jandunditsin tsi tanii cahnu maa nu cuahán ra.

⁴ Tacan tan ra Saulo nduvã ra nu ñuhu. Tan tsiñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tshin ra.

⁵ Tacan tan nacahan ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahan ndusu can tshin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicueehé un, tumaa jañicueehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tshin ra.

⁶ Tacan tan quitsahã nihí ra Saulo tshin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tshin ra tan catyí ra:

—Nduvita tan cahun un tsitsi ñuu Damasco. Tan ican cua cahan iin ra tsa cua cahan tshin un náa taahán tsi javaha un —catyí ra Jesús tshin ra Saulo.

⁷ Tan ra tsa cuahán tshin ra Saulo, nayuhvi xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

⁸ Tacan tan ra Saulo nduvita ra. Tan tsa nuña ra tinuu ra, ña cuví maa nanyehé ra tyin cuaã ra jaha Nyoo. Yacan cuenda, ra tsa cuahán tshin ra tiin ra naha ndaha ra tan tsindaca ra naha tsi ra ñuu Damasco.

⁹ Ican tsinyij ra uñi quivi. Tan ña cuví maa nanyehé ra. Tan ña tsatsj ra, tan nduve maa náa tshij ra.

¹⁰ Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahan Jutu Mañi yo tshin ra tan catyí ra:

—¡Ananías! —catyí Jutu Mañi yo tshin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tshin ra.

¹¹ Tacan tan Jutu Mañi yo catyí ra:

—Nduvita, tan cahun cun ityi cahnu tsa nañi Ndoó ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu.

12 Tan nyehe ra iin tsa nyehe ra, tan nyehe ra tsi yooho, Ananías, tyin tsaag un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

13 Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi.

14 Tan vityin vatsí ra ihya tyin tsaha ra jutu tsaahnu tsa cuví ityi nuu ndatu tsi ra tsa tyihí ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

15 Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsj vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan ndihí ra tuhun yu tsihin nyivi Israel.

16 Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

17 Tacan tan cuahán ra Ananías vehe nu nyii ra Saulo. Tsaag ra yuvehe can tan quihvi ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituvj nuu un ityi vatsí un, ra ican jaquitsj tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

18 Tan juvin ñi cuhva can tan coyo tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahá can tan tsicoondutyá ra.

19 Yahá can tan nacatsj ra, tan ndunyeeg cuñu ñuhu ra inga tsaha. Tan ndoo ra juhva quivi tsihin nyivi tsa yihí cuenda ra Cristo ñuu Damasco.

Nu quitsaha caahán ra Saulo tuhun ra Cristo tsihin nyivi ñuu Damasco

20 Tacan tan numi ñi quitsaha caahán ra Saulo tuhun ra Cristo tsihin nyivi tandihí vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra.

21 Tandihí maa nyivi tsa tsiñi tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaag ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsí tñi tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

22 Maa tyin ra Saulo ñihi ca caahán ra tuhun ra Cristo tsihin tsa ñi ñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinu xeehe ra Saulo nuu ra Israel naha ra

23 Tsa yahá juhva quivi, tan ra Israel tsa ña tsinú ñi tsi ra Cristo natuhún tahan ra naha tyin cua cahñi ra naha tsi ra Saulo.

24 Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can.

25 Tacan tan nyivi tsa tsinú ñi tsi ra Cristo ñuu can tyihj ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinu ra cuahán ra.

Nu nyii ra Saulo ñuu Jerusalén

²⁶ Quiví tsa tsaq̄ ra Saulo ñuu Jerusalén, cuñí ra ndu iin ra tsihin nyívi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús.

²⁷ Maa tyin iin ra tsa nañi Bernabé, quih̄in ra tsi ra. Tan tsaḥa cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyeḥe ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa caḥan Jutu Mañi yo tsihin ra. Tan nácaa caḥan ra tuhun ra Cristo tsihin tsa ña yuuhví ra nda ñuu Damasco.

²⁸ Tacan tan ndoo ra Saulo ñuu Jerusalén tsihin nyívi tsa yihí cuenda ra Cristo.

²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cañi ra naha tsi ra.

³⁰ Maa tyin tsiṭo ra hermano can naha ra tyin tacan tsicá iñi ra can naha ra. Yacan cuenda tsindac̄a ra hermano naha ra tsi ra Saulo nda ñuu Cesarea. Tacan tan jacuh̄un ra naha tsi ra nda Tarso, ñuu ra.

³¹ Tacan tan nyívi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, si xaan cuñí ñi tyin ña cuxaán ca nyívi tsi ñi. Tan ndunyeḥe ca iñi ñi tsihin tunyee iñi tsi Nyoo tyin tyaḥv yahvi vaha ñi cuhva caḥan ra, tyin yuuhví ñi coto ña cua javaha ñi cuhva cuñí ra. Iyó ñi tsihin tsa jatyinyeé Tatyí li Nyoo tsi ñi. Tan nducuahá ca ñi tan iin tan iin quiví.

Nu nduvah̄a ra Eneas

³² Tacan cuv̄i tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsaḥan tucu ra tsinyeḥe ra nu iyó nyívi yihí cuenda ra Jesucristo ñuu Lida.

³³ Ican nañih̄i ra tsi iin ra cuuhví, nañi ra Eneas. Tan tsa una cuiya canyíi ra tan ña cuv̄i maa nacandá ra tyin naxij̄i cuñu ñuhu ra.

³⁴ Tan ra Pedro catyí ra tsihin ra:

—Yooho Eneas, ra Jesucristo janduvah̄a ra tsi un. Nduvita tan naṭuvi yuvi un —catyí ra tsihin ra.

Tan juvin ñi cuhva can tan nduvita ra Eneas.

³⁵ Tan nyeḥe tandihí nyívi ñuu Lida can tyin tsa nduvah̄a ra. Tan nyeḥe tucu nyívi ñuu Sarón. Tacan tan ñi can, natsinú iñi ñi tsi Jutu Mañi yo. Tan nacoṭ ñi tuhun tsañu tsa tsinú iñi ñi nda ndí cumañi ca coto ñi tuhun ra Cristo.

Nu nandotoṭ ña Dorcas

³⁶ Quiví can tsicoṭ iin ñaha tsinú iñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvá ña javahá tsa vaha tsihin nyívi, jatyinyeé ña tsi nyívi ndaahvi.

³⁷ Tan quiví can ña Dorcas quih̄in cuehe tsi ña tan tsih̄i ña. Tan tsa yaha jacutyí ñi tsi ña, tsic̄aquin̄ ñi tsi ña tsitsi cuarto nu tsinu uvi pisu.

³⁸ Yatyin ñi canyíi ñuu Jope tsihin ñuu Lida, nu nyíi ra Pedro. Tan nyívi tsa yihí cuenda ra Cristo ñuu Jope can tsiṭo ñi tyin nyíi ra Pedro ñuu Lida. Tacan tan jacuh̄un ñi tsi uvi taḥan ra na cucana ra naha tsi ra Pedro tyin na cahun ra ñuu Jope tsa numi ñi. Tan tsaq̄ ra naha nu nyíi ra tan catyí ra naha tsihin ra:

—Janumi ñi tan cahun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvita ra tan cuahán ra tsihin ra naha. Tan cuhva tsa tsaq̄ ra naha, tsindac̄a ra naha tsi ra nda cuarto nu canyíi ndiyi can. Tan

tandihí maa ñiñaha tsa tsihi yíi natuhva ñi tsata ra, tan tsacú tsaa ñi. Tan janahá ñi jahma tsa quicu ña Dorcas tsa tsicoo ña.

⁴⁰ Tacan tan ra Pedro tava ra tsi tandihí nyivi cuarto can. Tan tsicuiñi tsiti ra tan quitsaha tsicán tahvi ra tsi Nyoo. Tacan tan nanyehé ra tsi ñaha tsa tsihi can canyii ña. Tan quitsaha catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehé ña. Tan tsa nyehé ña tsi ra Pedro, tsinyaá ña.

⁴¹ Tacan tan ra Pedro tijn ra ndaha ña tan janduvita ra tsi ña. Tacan tan cana ra tsi ra hermano naha ra, tan tsihin ñiñaha tsa tsihi yíi. Tan nacuhva cuenda ra tsi ña tsi ñi tyin tsa nandoto ña.

⁴² Yaha can tan tandihí maa nyivi ñuu Jope tsito ñi tyin nandoto ña can. Tan cuaha xaan ñi natsinu ifi tsi Jutu Mañi yo.

⁴³ Tan ra Pedro ndoo ra juhva quivi ñuu can, nyii ra yuvehe iin ra tsa janduvita ñi quití, nañi ra Simón.

10

Ra Pedro tsihin ra Cornelio

¹ Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano.

² Tan ra Cornelio can yuuhví ra tsi Nyoo. Maa ra tan tsihin tandihí nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyivi ndaahvi ñuu Israel, tan tandihí quivi tsicán tahvi ra tsi Nyoo.

³ Tan iin quivi cuhva caa uñi tsa tseñi, nyehé ra iin tsa nyehé ra. Tan ican cuví nu catsi xaan nyehé ra iin ángel tsa jacuhun Nyoo nu nyii ra, tan catyí tsi tsihin ra:

—¡Yooho Cornelio! —catyí ángel can tsihin ra.

⁴ Tacan tan nanyehé ra Cornelio tsi ángel can. Tan nayuhvi xaan ra. Tan quitsaha tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsaha caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán ifi ra tyin jatyinyeé xaan un tsi nyivi ndaahvi.

⁵ Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope.

⁶ Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvita ñi quití. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

⁷ Tsa yaha cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

⁸ Tandihí maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

⁹ Tuvj inga quivi tan cuahán ra can naha ra. Tan tsa ndi cumañi ca tsaa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can.

¹⁰ Tan tsaa soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsaha nyehé ra iin tsa janahá Nyoo tsi ra.

¹¹ Tan nyehé ra tyin tichó andivi. Tan nyehé ra andivi tyin vatsi nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi.

12 Tan tsitsi jahma can yihí tandihí maa nuu quití tsa cumi taahan tsaha, tan tandihí nuu coo, tan saa.

13 Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quití ihya, tan catsi un —catyí ndusu can tsihin ra.

14 Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quití tsa catyí ley tyin ña vaha catsi ndi —catyí ra Pedro.

15 Tacan tan quitsahá caahán nyico ndusu can tsihin ra inga tsaha:

—Ña catyí un tyin ña catsi un tsa tsa janduvahá yu —catyí ndusu can tsihin ra.

16 Uñi taahan tsaha nyehe ra yacan jahá Nyoo. Tacan tan jahma cahnu can nandaá nyico can ityi andívi.

17 Tan tsitsi tsa tsicá iñi ra Pedro náa cuñi tsi catyí tsa nyehe ra can, tsaá musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón.

18 Tan tsa tsaá ra naha ityi yuvehe tsicá tuhun ra naha tatun ican iyó iin ra tsa nañi Simón Pedro.

19 Tan ra Pedro tsicá xaan iñi ra náa cuñi tsi catyí tsa nyehe ra. Tacan tan Tatyí Ii Nyoo quitsahá caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un.

20 Ndúvita tan cuhun cun tsihin ra naha, tan ña çaca iñi un tyin maa yu jaquitsi tsi ra ihya naha ra —catyí Tatyí Ii Nyoo tsihin ra Pedro.

21 Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

22 Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

23 Tacan tan tsahá ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

24 Tsa inga quivi tsaá ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra.

25 Cuhva tsa tsaá ra Pedro yuvehe ra Cornelio, quitá ra Cornelio tan caahán ra tsihin ra. Tan tsicuiñi tsi ra nuu ra Pedro tan quitsahá jacahnú ra tsi ra.

26 Maa tyin ra Pedro cañihí ra tsi ra, tan catyí ra tsihin ra:

—Ndúvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

27 Tan tsitsi tsa caahán ra Pedro tsihin ra, tan quihvi ra tsitsi vehe tan nanyehé ra tyin cuaha xaan nyivi ndu iin tsitsi vehe can.

28 Tacan tan catyí ra Pedro tsihin ñi:

—Nyooho tsitó ndo tyin ley nyuhu tsa cuví ndi nyivi Israel, catyí tsi tyin ña taahán tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janahá ra tsi yu, tan catyí ra:

“Yooho, ña catyi un tsihin nyivi tyin ndi intuhun ñi tan ña vaha ñi” catyi Nyoo tsihin yu.

²⁹ Yacan cuenda quivi tsa cana ndo tsi yu, numi ñi vatsi yu. Tan vityin cuñi yu coto yu nacuenta cana ndo tsi yu —catyi ra Pedro.

³⁰ Tacan tan nacahan ra Cornelio, tan catyi ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituvi iin rayi nuu yu. Nditsi ra jahma xiñu.

³¹ Tan catyi ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyeeé xaan un tsi nyivi ndaahvi.

³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyi ra yuvehe ra tsa nañi Simón, iin ra tsa janduvitá ñi quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyi ángel can tsihin yu.

³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsi un. Tan vityin tandihi yo ndu iin yo nuu Nyoo. Tan cuñi ndi tyaa soho ndi tandihi tsa catyi Jutu Mañi yo tsihin un tyin cuhva cuenda un tsi ndi —catyi ra Cornelio tsihin ra Pedro.

Nu caahan ra Pedro tuhun ra Cristo yuvehe ra Cornelio

³⁴ Tacan tan quitsaha caahan ra Pedro tan catyi ra:

—Vityin cutuñi iñi yu tyin Nyoo cuñi ra tsi tandihi nyivi, tahañ ñi nyivi Israel, tan nyivi tsa ñavin nyivi Israel cuvi. Ña tava tsiyo ra tsi ndi intuhun maa yo.

³⁵ Tyin naquihin ra tsi yo tatun tyaá yahvi yo tsi ra, tan javahá yo tsa vaha.

³⁶ Nyoo cahan ra tsihin nyuhu tsa cuvi ndi tata ra Israel, tan jacoto ra tyin cuvi coo vaha yo tsihin ra tsa cuenda ra Jesucristo. Tan maa ra ndaca ñaha tsi tandihi maa yo.

³⁷ Nyooho tsitó vaha ndo tandihi tsa cuvi ñuu nyivi Israel ñuu yu, nácaa quitsaha tsi nu cuvi Galilea tsa yaha tsa cahan ra Juan tuhun Nyoo tsihin nyivi, tan jacoondutya ra tsi ñi.

³⁸ Tsitó ndo nácaa tsaha Nyoo tunyee iñi Tatyí Ii ra tsi ra Jesús, ra ñuu Nazaret. Tan tsicá ra javahá ra tsa vaha, janduvaha ra tsi tandihi nyivi tsa nyehé tundoho jahá nu ña vaha. Tyehen javaha ra Jesús tyin Nyoo nyaá ra tsihin ra.

³⁹ Nyuhu cuvi ndi tsandaa tsa cuenda tandihi tsa javaha ra Jesús ñuu Jerusalén tsihin tandihi ca ñuu tsa cayucú Judea. Yaha can tan ticaa ra naha tsi ra nu cruu tan tsahñi ra naha tsi ra.

⁴⁰ Maa tyin tsa tsinu uñi quivi janandoto Nyoo tsi ra. Tan quituvi ra nuu ndi.

⁴¹ Ña quituvi ra nuu tandihi nyivi. Maa tyin quituvi ra nuu nyuhu tyin nacatsi ra tsi ndi nda tsanaha tyin cuvi ndi tsandaa cuenda ra. Nyuhu tsatsi ndi tan tsihi ndi tsihin ra tsa yaha tsa nandoto ra.

⁴² Tan tava tyiñu ra tsi ndi tyin cahan ndi tuhun ra tsihin nyivi. Tan cuvi ndi tsandaa tyin Nyoo tava tyiñu ra tsi ra Jesús tyin cuvi ra juez tsi nyivi tsa nyito tan nyivi tsa tsihi.

⁴³ Tan tacan tucu nda tsanaha, cahan tandihi ra cuvi ndusu yuhu Nyoo tuhun ra Jesús. Tan catyi ra naha tyin tandihi nyivi tsa tsinú iñi tsi ra Jesús, cua jaha Nyoo tucachu iñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

⁴⁴ Ndi caahán ca ra Pedro tan nuu Tatyí Ii Nyoo siqui tandihi ñi tsa tyaá soho tsa caahán ra.

⁴⁵ Tan ra Israel tsa yihí cuenda ra Jesús tsa tsaq tsihin ra Pedro iyo xaan cuñi ra naha tyin tsaha ndihi tucu Nyoo Tatyí Ii ra tsi nyívi tsa ñavin nyívi Israel cuví.

⁴⁶ Tyin tsiñi ra naha caahán ñi inga yuhu tan jacahnú ñi tsi Nyoo.

⁴⁷ Tacan tan quitsaha caahán ra Pedro tsihin ra tsa tsaq tsihin ra:

—Ña cuvi casi yo nu coodutya nyívi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

⁴⁸ Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coodutya ñi tsihin sivi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

11

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

¹ Ra tava tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuanda nyívi tsa ñavin nyívi Israel cuví tan naquihín ñi tuhun Nyoo.

² Tacan tan tsaq nyico ra Pedro ñuu Jerusalén. Tan ra tsa catyí tyin tsiñi ñuhu tsa cunyaa tuñi Nyoo tsi tandihi rayii, xaan xaan cuñi ra naha nyehé ra naha tsi ra Pedro.

³ Tan catyí ra naha tsihin ra:

—¿Nacuenda tsahan un yuvehe nyívi tsa ñavin nyívi Israel cuví tan tsatsi un tsihin ñi? —catyí ra naha.

⁴ Tacan tan ra Pedro nacatyí tuhun ra nda nu quitsaha tandihi tsa cuví tsi ra, tan catyí ra:

⁵ —Yuhu nyii yu ñuu Jope. Tan tsa tsicán tahvi yu tsi Nyoo tan nyehe yu iin tsa janaha Nyoo tsi yu tyin iin jahma cahnu quee ityi andívi. Tan tandihi tsa cumi tutun tsi nuuhñi nuuhñi ñi tan vatsi nuú tsi ityi nu ñuhu nu nyii yu.

⁶ Tan nyehe vaha yu tsa yihí tsitsi jahma can. Tan nyehe yu quiti tsa cumi tsaha, quiti cuuhu, coo, tan saa.

⁷ Tan tsiñi yu iin ndusu tsa caahán tsihin yu: “Nduvita Pedro. Cahñi quiti ihya tan catsi un” catyí ndusu can tsihin yu.

⁸ Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.”

⁹ Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yaha janduvaha yu” catyí ndusu can tsihin yu.

¹⁰ Uñi tsaha cuví yacan. Yaha can tan nandaq nyico tandihi quiti can tsihin jahma can ityi andívi.

¹¹ Tan juvin ñi cuhva can tsaq uñi taahan ra naha yuvehe nu nyii yu, quee ra naha ñuu Cesarea tan nanducú ra naha tsi yu.

¹² Tan Tatyí Ii Nyoo cahan tsihin yu na cahun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihi iñu taahan ra yañi yo ihya naha ra tsihin yu. Tan tsa tsaq ndi nda ñuu Cesarea, quihvi ndi tsitsi vehe iin ra tsa nañi Cornelio.

13 Tan nacatyi tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catyi ra tsihin ra tyin na jacuhun ra musu ra ñuu Joje na cucana ra naha tsi yu.

14 Tyin yuhu cua cuhva cuenda yu tsi ra nácaa cuvi cacu ra tsihin tandihi nyivi ra, catyi ángel can tsihin ra, catyi ra tsihin ndi.

15 Tan javahá ra can tumaa cuhva catyi ángel can tsihin ra. Tan tsa tsaá yu yuvehe ra quitsahá caahán yu tsihin nyivi tsa ndu iin yuvehe ra. Tan quitsi Tatyí li Nyoo siqui ñi tumaa tsa nuu tsi siqui yo tsa jihna ñi.

16 Tacan tan nducuhun iñi yu tsa catyi Jutu Mañi yo quivi can. Tan catyi ra tyehen: “Nditsa tyin ra Juan jacoondutya ra tsi nyivi tsihin ndutya. Maa tyin nyoo cua coondutya ndo tsihin Tatyí li Nyoo”, catyi ra.

17 Nyoo tsaá ndihi tucu ra Tatyí li ra tsi ñi can tumaa tsa tsaá ra Tatyí li ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan iyoo ra cuvi yuhu tan casi yu tsa javahá Nyoo? —catyi ra Pedro tsihin ra hermano can naha ra.

18 Tacan tan tsa tsiñi ra ñuu Jerusalén tuhun can, ña cahan ca ra naha. Tan jacahnú ra naha tsi Nyoo, tan catyi ra naha:

—Tun tacan cuvi, cuñi tsi catyi tyin Nyoo tsaá ndihi tucu ra ndatu tsi nyivi tsa ñavin nyivi Israel cuvi tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyi ra naha.

Nyivi yihí cuenda ra Cristo ñuu Antioquía

19 Quivi tsa tsañi ra naha tsi ra Esteban, quitsahá nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyií mahñu ndutya ñuhu. Tan yihí ñi tsaá ñi ñuu Antioquía. Tan tandihi ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel.

20 Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsaá ñi ñuu Antioquía, tan quitsahá caahán ñi can tuhun ra Cristo tsihin nyivi tsa ñavin nyivi Israel cuvi. Tan jacoto ñi tuhun vaha Jutu Mañi yo ra Jesús.

21 Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoq ñi tuhun tsañu. Tan quitsahá tsinu iñi ñi tsi Jutu Mañi yo.

22 Tacan tan tsaá tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía.

23 Tan tsa tsaá ra Bernabé Antioquía can, nyehe ra nácaa nasoco Nyoo tsi ñi. Tan sii xaan cuñi ra. Tan catyi ra tsihin ñi na cunyiñu ñi tsi Jutu Mañi yo tsihin tsa ñi iñi ñi.

24 Tan javahá ra Bernabé tyin cuvi ra iin ra vaha. Tsiñu ra tsihin Tatyí li Nyoo, tan tsinu xaan iñi ra tsi Nyoo. Yacan cuenda cuaha xaan nyivi quihvi cuenda Jutu Mañi yo.

25 Tsa yahá can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía.

26 Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahá ra naha tuhun Nyoo. Tan juvin ñi ñuu Antioquía can cuvi nu quitsahá catyi nyivi tyin nyivi Cristiano cuvi ñi, o ñi yihí cuenda ra Cristo.

27 Tan quivi can tsaá taahan ra cuvi ndusu yuhu Nyoo. Queq ra naha ñuu Jerusalén tan tsaá ra naha ñuu Antioquía.

²⁸ Tan iin ra can nañi ra Agabo tsicunyaq nyityi ra tyañu nyivi yihí cuenda ra Cristo tan cahān ra tsa tsaḥa Tatyí li Nyoo tsi ra. Tan catyí ra tyin cua quitsi iin tama nīi cahnu nu ñuhu ñayivi. Tan tacan cuvī quivi tsa cuvī ra Claudio rey cahnu.

²⁹ Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatyinyee ñi tsi nyivi yihí cuenda ra Cristo tsa iyó ñuu tsa cayucú Judea.

³⁰ Tacan javaha ñi tan jacuhun ñi juhva xuhun tsi ra tsa cuvī ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindaca ra naha xuhun can.

12

Nu tsihi ra Jacobo tan nu quihvi ra Pedro vehe caa

¹ Tan quivi can quitsaha nyaá ndaha ra cuvī rey Herodes tsi juhva nyivi yihí cuenda ra Cristo.

² Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi.

³ Tan nyehe ra Herodes tyin tahañ xaan iñi nyivi Israel tsa javaha ra tacan, tan tava tyiñu ra tyin tiin ndihi ra naha tsi ra Pedro. Tan cuvī tsi quivi vico pascua nu tuhvá nyivi tsatsi paan tsa nduve yutsan iya yihí.

⁴ Tsa yaha tsa tiin ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihvi tucu inga cumi taahan andaru. Tan tyaq ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua.

⁵ Tan tacan nyii ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyii ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa nīi iñi ñi.

Nu jacacu Nyoo tsi ra Pedro vehe caa

⁶ Tan tyaq ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixi xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe.

⁷ Tan sana iñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tiin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra.

⁸ Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javaha ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹ Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuvī can, tan cuñi maa ra tyin iyó iin tsa janaha Nyoo tsi ra.

¹⁰ Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha

can tacan tan tsaꞗ ra naha yuvehe caa cahnu nu quitá nyívi. Tan yuvehe can nuñá maa tsi. Tan quitá ra naha. Tan tsa yahá yahá ra naha iin ityi, tan nacoo ángel can tsi ra.

¹¹ Tacan tan nacotoꞗ ra Pedro tyin nditsa, tan quitsahá tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacú ra tsi yu ndaha ra Herodes tan ndaha ra ñuu Israel naha ra —cuñi ra Pedro.

¹² Tsicá iñi ra yacan ityi cuahán ra, tan tsaꞗ ra yuvehe ña María sihi ra Juan Marcos. Tan cuaha xaan nyívi yucú ican tsicán tahvi ñi tsi Nyoo.

¹³ Tan tsa cañi ndaha ra Pedro yuvehe nuquehe, tan quitá iin ñaha tyuvaa tsa nañi Rode, tsinyehé ña yóo cañi ndaha yuvehe can.

¹⁴ Maa tyin cuhva tsa tsiñi ña ndusu ra Pedro, sii xaan cuñi ña, tan naꞗ iñi ña nuña ña yuvehe can, tyin tsinú ña cuahán ña cua cahan ña tsihin nyívi tsa yucú tsitsi vehe can. Tan catyi ña tyin ra Pedro nyaá ra yuvehe.

¹⁵ Tacan tan quitsahá catyi ñi tsihin ña:

—Iñi yooho ña vaha cuñi —catyi ñi tsihin ña.

Tan catyi ña tyin nditsa tsa caahán ña. Maa tyin ñi can catyi ñi tyin ñavin ra Pedro cuví ra, iin ángel cuenda ra cuví, catyi ñi tsihin ña.

¹⁶ Tan ra Pedro jañihí ca ra cañi ndaha ra yuvehe. Tan cuhva tsa nuñá ñi yuvehe tan nyehé ñi tsi ra, iyo xaan cuñi ñi tan nayuhvi ñi.

¹⁷ Maa tyin javahá ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tavá Jutu Mañi yo tsi ra vehe caa. Tan catyi ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyi ra Pedro.

Tan quitá ra tan cuahán ra.

¹⁸ Cuhva tsa cunditsin, iyo xaan cuñi ra andaru tsa jahá cuenda tsitsi vehe caa can naha ra, tyin ña tsitó ra naha nácaa quitá ra Pedro.

¹⁹ Tacan tan tavá tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tavá tyiñu ra tsi ra naha na cahñi ra naha tsi ra jahá cuenda vehe caa can naha ra. Yahá can tan quitá ra Herodes Judea can tan cuahán ra cua coo ra ñuu Cesarea.

Nu tsihi ra Herodes

²⁰ Tan ra Herodes cuxaán xaan ra tsihin nyívi ñuu Tiro tan nyívi ñuu Sidón. Maa tyin cuñi ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañi Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes.

²¹ Tacan tan catyi ra Herodes tyin cuhun ñi nu nyaá ra iin quívi. Tan tsaꞗ quívi can tan tsicunditsi ra jahma si caá ra tsa jahá tyiñu ra. Tan tsicunyaa ra nu tyayu ra. Tan cahan ra tsihin ñi.

²² Tacan tan quitsahá caná tsaá ñi, tan catyi ñi:

—Ra tsa caahán ihya ñavin rayi cuví ra, tyin Nyoo cuví ra —catyi ñi.

²³ Tan juven ñi cuhva can tan tiin cuehe tsi ra Herodes jahá ángel Jutu Mañi yo tyin tsahá ra tsa catyi nyívi tyin Nyoo cuví ra. Tan quihvi tindacu tsi ra, tan tsihi ra.

²⁴ Maa tyin tuhun Nyoo nducuahá ca tsi. Tan jañihí ca nyívi caahán ñi tuhun Nyoo tandihí ñi ityi.

²⁵ Quívi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

13

Nu quitsaha tsicá ra Saulo tan ra Bernabé tyiñu Nyoo

¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahnü iin nducu ñi tsihin ra Herodes tsa cuví rey ity Galilea, tan ra Saulo.

² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahān Tatyí Ii Nyoo tsihin ra naha:

—Tava šiin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

³ Tacan tan tsa ndihí tsicoq nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahān tsihin tahan ra naha, tsahan cuahán ra naha.

Nu caahán ra tavq tyiñu ra Jesús tuhun Nyoo ñuhu Chipre

⁴ Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutyá ñuhu.

⁵ Tacan tan tsaq ra naha ñuu Salamina tsa canyí yuhu ndutyá ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha.

⁶ Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaq ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra.

⁷ Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan canā ra tsi ra Bernabé tsihin ra Saulo, tyin cuñi ra tyaa soho ra tuhun Nyoo tsa caahán ra can naha ra.

⁸ Tan ra tasi can nañi tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo.

⁹ Tacan tan ra Saulo tsa nañi tucu Pablo, tsitú ra tsihin Tatyí Ii Nyoo. Tan ñihi xaan nanyehé ra tsi ra Elimas can.

¹⁰ Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñi un jativi un tandihí tsa vaha. Tan tacan ñi tyasí un ityi vaha Jutu Mañi yo.

¹¹ Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehé un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi cuhva can cuaq ra. Tan ndoo ra nu naa. Tan nducy ra iin ra tiin ndaha ra tyin ña nditsin nyehé ra.

¹² Tsa nyehé ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñi ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquía tsa canyí Pisidia

¹³ Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyí Panfilia. Maa tyin ra Juan Marcos nacoq ihñi ra tsi ra naha tan cuanuhü ra nda ñuu Jerusalén.

¹⁴ Yaha can tan queq ra naha Perge can, tan cuahán ra naha ñuu Antioquía tsa canyí Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha.

15 Tacan tan quitsahā cahví nyívi nu libru ley Nyoo tsa tyaā ra Moisés. Tan cahví tucu ñi libru tsa tyaā ra cuví ndusu yuhu Nyoo taħan tsanaha. Yaha can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cufí ra naha cahan ra naha tsihin nyívi, cuví cahan ra naha.

16 Tacan tan nduvitā ra Pablo tan javahā ra iin seña tsihin ndaha ra tyin na cutaxin ñi. Tan catyí ra:

—Tya soho nyooho, ra ñuu Israel, tan nyooho nyívi tsa tyaá yahvi tsi Nyoo.

17 Nyoo cuenda yo, tsa cuví yo nyívi Israel, nacatsj vaha ra tsi tsii tsaahnu yo. Tan quívi tsa iyó ca ra naha Egipto, javahā ra iin ñuu cahnu tsi ra naha. Vasu ñavin nyívi ñuu can cuví ra naha, maa tyin janducuahā ra tsi ra naha. Yaha can tan tava ra tsi ra naha ityi can tsihin tunyee iñi tsa iyó tsi ra.

18 Tan cunyeē iñi Nyoo tandihi cuhva tsicoo ra naha nu tsicā nuu ra naha nu tsiqui tsitsi tsa uvi xico cuiya.

19 Tan janaā ra utsa taahan ñuu nahnu tsa cayucú ñi cahnu Canaán, tyin tsaha ra ñuhu can tsi tsii tsaahnu yo.

20 Yaha can tan quitsahā ndacá ñaha juez tsi nyívi can jahā Nyoo. Tumaa cumi cientu sasava cuiya tsindacā ñaha juez tsi ñi, nda cuando quívi tsindacā ñaha ra Samuel ra cuví ndusu yuhu Nyoo tsi ñi.

21 Tacan tan maa ñi tsicān ñi iin rey tsa cundaca ñaha tsi ñi. Tan Nyoo tsaha ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacā ñaha ra tsi ñi.

22 Yaha can tan Nyoo tava ra tsi ra Saúl tsa cuví ra rey. Tan tsaha ra tyiñu can tsi ra David. Tan catyí ra: “Nyehé yu tyin ra David, sehe ra Isaí, cuví ra iin rayi tsa taahán iñi yu cuhva iyó. Tan cua javaha ra tandihi tsa cuñi yu” catyí Nyoo tuhun ra David.

23 Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsj tsi ra tyin jacacu ra tsi yo tsa cuví yo nyívi Israel, tumaa catyí ra tsihin tsii tsaahnu yo taħan tsanaha.

24 Tan ndi cumañi ca quitsi ra Jesús, ra Juan, ra jacoondutyā tsi nyívi, caħan ra tsihin tandihi nyívi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutyā ñi.

25 Tan tsa cua ndihi tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

26 Tan caahán ca ra Pablo tan catyí ra:

—Yañi, nyooho nyívi tata ra Abraham tan tandihi inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo náca cacu yo.

27 Nyívi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñi iñi ñi tuhun tsa tyaā ra cuví ndusu yuhu Nyoo taħan tsanaha, vasu jacuahá xaan ñi tuhun can tandihi quívi tsa quitatu ñi, maa tyin ña cutuñi iñi ñi. Tan quívi tsahñi ñi tsi ra Jesús cuví tsi tumaa cuhva catyí ra cuví ndusu yuhu Nyoo.

28 Tyin vasu nduve cuatyí ra Jesús nañihí ñi, maa tyin tsicān ñi tsi ra Pilato na tyihí ra tyiñu tyin caħni ra naha tsi ra Jesús.

29 Tan tsa yaha janyehe ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsj ñi tsi ra.

30 Maa tyin Nyoo janandotoꝝ ra tsi ra inga tsaha.

31 Tan tsitsi tsa cuaha quivi tan quituviꝝ ra nuu ra tsa caahán tsihin ra quivi quitaꝝ ra ityi Galilea, tan tsaꝝ ra Jerusalén. Tan ra ican naha ra cuví ra tsa caahán tuhun ra tsihin nyivi vityin.

32 Tan yacan cuenda nyuhu caahán ndi tuhun vaha tsa catyiꝝ Nyoo tsihin tsi tsaahnu yo tyin cuhva ra tsi yo.

33 Tyin tsa cuenda tsa vaha tsi maa yo tsa cuví yo nyivi tata ñi, javahꝝ maa Nyoo tsa catyiꝝ ra. Tyin janandotoꝝ ra tsi ra Jesús tumaa cuhva nyaá nu tsinu uvi salmo nu catyiꝝ ra tyehen: “Sehe yu cuví tsi un, tan yuhu tsahá yu ñayivi coo un vityin” catyiꝝ Nyoo tsihin ra.

34 Nyoo tyaꝝ ra cuhva tyin janandotoꝝ ra tsi ra, tyin tacan tan ña cua tyahyu cuñu ñuhu ra. Tyin catyiꝝ nu tutu Nyoo: “Tsi nyooho cua cuhva yu tsa vaha tsa cahꝝn yu tsihin ra David tyin cua cuhva yu tsi ndo.”

35 Yacan cuenda catyiꝝ tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyiꝝ tsi.

36 Ra David jahꝝ tyiñu ra tsa cuenda nyivi tsa tsicoꝝ quivi tsicoꝝ ra, tandihꝝ tsa catyiꝝ Nyoo tsihin ra tyin javaha ra, javahꝝ ra. Yahꝝ can tan tsihiꝝ ra tan tsicutsi ñi tsi ra tumaa tsicutsi ñi tsi jutu ra. Tan tyahyu cuñu ñuhu ra.

37 Maa tyin ra tsa janandotoꝝ Nyoo, ña tyahyu cuñu ñuhu ra.

38 Yañi, cuñi tsi tsa coto ndo tyin tsa cuenda cuatyꝝ yo tan quitsiꝝ ra Jesús tan tsihiꝝ ra tyin jahá ra tucahnu iñi cuatyꝝ yo.

39 Tan tsa cuenda ra Jesús jahá Nyoo tucahnu iñi tsi tandihꝝ ñi tsa tsinú iñi tsi ra, tyin ley Nyoo tsa tyaꝝ ra Moisés ña cuví janduvaha tsi tsi yo nuu Nyoo.

40 Jahꝝ ndo cuenda coto ndoo tsa tyaꝝ ra cuví ndusu yuhu Nyoo siquiꝝ ndo. Tyin catyiꝝ ra naha tyehen:

41 Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihꝝ tsa javahá yuhu vasu nacatyꝝ tuhun nyivi tsihin ndo, catyiꝝ Nyoo.

42 Ndihiꝝ cahꝝn ra Pablo tan quitaꝝ ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsahꝝ catyiꝝ ñi tsihin ra, tyin na cahꝝn nyico ra tuhun can tsihin ñi inga vitya quivi tsa quitatú ñi.

43 Cuhva tsa ndihꝝ ndu iin ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyiꝝ ra naha tsihin ñi tyin na cahun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

44 Tsa inga vitya quivi quitatú ñi, ndu iin nyico ñi. Tan tsa yatyin tandihꝝ ña maa nyivi ñuu can ndu iin tsihin ñi tan tyaá soho ñi tuhun Nyoo.

45 Maa tyin cuhva tsa nyeheꝝ ra Israel naha ra, cuxaán ra naha tyin nyehé ra naha tyin cuaha nyivi nyicun tsi ra hermano can naha ra. Tan quitsahꝝ caahán ra naha tsi ra Pablo, tan cahꝝn ra naha ndavaha ñi siquiꝝ ra.

46 Maa tyin ra Pablo tan tsihin ra Bernabé ña yuuhví maa ra naha tan quitsahꝝ caahán ñihi ra naha tsihin ra Israel can naha ra. Tan catyiꝝ ra naha: —Cuñi tsi tsa cahꝝn jihna ndi tuhun Nyoo tsihin nyooho tsa cuví ndo nyivi Israel. Maa tyin ña cuñi ndo naquihin ndo tsa caahán ndi. Tan nyooho ña cuñi ndo tsa coo ñayivi nyito tsa ña cua naa maa tsi ndo. Yacan cuenda ña cahun ndi cucahan ndi tsihin nyivi tsa ñavin nyivi Israel cuví.

47 Tyin tacan catyiꝝ Jutu Mañi yo tsihin ndi tan catyiꝝ ra tyehen:

Tyaā yu tsi un tumaa iin ñuhu tsa jandunditsin nu iyó nyivi nanñ cahnu nu ñuhu ñayivi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñi ra tsa ñavin ra Israel cuví naha ra, si xaan cuñí ra naha. Tan quitsaha catyí ra naha tyin tuhun Nyoo vaha xaan tsi. Tan natsinu iñi tandihi nyivi tsa nacatsi maa Nyoo, tyin coo ñi ñayivi nyito tsa ña cua naa maa.

⁴⁹ Tacan tan nducuahā ca tuhun Nyoo tandihi ityi ñuu can.

⁵⁰ Maa tyin ra Israel cahan ra naha tsihin juhva ñaha cuca tsa nyicún ley Nyoo tsa tyaā ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsaha nyaá ndaha nyivi tsi ra Pablo tan ra Bernabé, nda cuanda tsa tava ñi tsi ra naha ñuu can.

⁵¹ Tacan tan naquisi ra naha nyaca tsaha ra naha tumaa iin seña tyin ndoo cuatyí nyivi can siqui maa ñi. Tan cuahán ra naha ñuu Iconio.

⁵² Maa tyin ñi yihí cuenda ra Cristo ñuu Antioquía can si xaan cuñí ñi. Tan tsitú ñi tsihin Tatyí Ii Nyoo.

14

Nu nyii ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihvi ra naha tsitsi vehe ñuhu nyivi Israel. Tan vaha xaan cahan ra naha tuhun Nyoo tsihin nyivi can. Tan cuaha xaan ñi natsinu iñi ñi tsi ra Cristo, nyivi Israel tan nyivi tsa ñavin nyivi Israel cuví.

² Maa tyin ra Israel tsa ña tsinú iñi tsi ra Cristo natyuhu ra naha tsi nyivi tsa ñavin nyivi Israel cuví tyin na caca ña vaha iñi ñi nyehe ñi tsi ra yihí cuenda ra Cristo.

³ Yacan cuenda ra Pablo tan ra Bernabé ndoo ra naha ican cuaha quivi. Tan tsihin tsa nñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsaha Jutu Mañi yo tunyee iñi tsi ra naha tyin javaha ra naha seña tan tsa iyo na coto nyivi tyin nditsa tsa caahán ra naha.

⁴ Maa tyin nyivi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tava tyiñu ra Jesús.

⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tava tyiñu ra Jesús, tan cua cañi ra naha yuu tsi ra naha.

⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Lистра, tan nda ñuu Derbe ityi Licaonia. Tan tsicā nuu ra naha ityi ñuu can.

⁷ Tan cahan nyico tucu ra naha tuhun Nyoo nácaa jacacú ra tsi yo.

Nu cañi nyivi yuu tsi ra Pablo nda ñuu Lистра

⁸ Nda Lистра iyó iin rayñi tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra.

⁹ Tan ra pehe tsaha can tyaá soho ra tsa caahán ra Pablo. Tan ra Pablo, tuiñi ra tyin tsinú iñi ra can tyin cuví nduvaha ra.

¹⁰ Tacan tan ra Pablo caahán ra tsihin tsa ñihi ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndavaḡ ra, tan tsinyaḡ nyityi ra. Tan quitsahaḡ tsicá ra.

¹¹ Tsa nyehé nyivi tyin javahaḡ ra Pablo tacan, quitsahaḡ caná tsaá ñi tshin yuhu Licaonia, tan catyí ñi:

—Ra tsa tsaḡ nu yucú yo ihya, nyoo cuví ra naha, maa tyin tumaa caá rayii, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañí Júpiter, tan ra Pablo cuví nyoo tsa nañí Mercurio, tyin ra ican cuví ra tsa caahán.

¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsiho Júpiter. Tan quitsi ndaca ra indiqui tan ita tyin maa ra tan nyivi cuñí ñi jacahnu ñi tsi ra Pablo tshin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha.

¹⁴ Maa tyin cuhva tsa tuví iñi ra naha tsa tsicá iñi ñi, quitsahaḡ tsaahnyá ra naha jahma ra naha. Tan javahaḡ ra naha tacan tumaa iin seña tyin ña ndoó ra naha vaha. Tan quihvi ra naha tyañu nu tuví nyivi, tan caná tsaá ra naha,

¹⁵ Tan catyí ra naha:

—Nyooho tata, ¿nácaa tsa javahá ndo tyehen? Nyuhu juvin ñi rayii ñuu ñayivi ihya cuví ndi. Tumaa cuví nyooho cuví tucu nyuhu. Tan vatsí cahan ndi tshin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunyicun ndo tsi Nyoo nyito. Juvin ra tsa javahaḡ andivi tan ñuhu ñayivi. Tan javahaḡ ra ndutya ñuhu tan tandihí maa tsa iyó tsitsi ndutya ñuhu can.

¹⁶ Tan tahān tsanaha nda cuanda vityin, Nyoo jañā ndaha ra tsi nyivi na javaha maa ñi cuhva cuñí ñi,

¹⁷ vasu tandihí quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tсахá ra tsa coo vaha tsa tatsí yo quivi taahán tsi. Tan tsahá ra tsa catsi yo. Tan tsahá ra tsa cusii cuñí yo —catyí ra naha tshin nyivi can.

¹⁸ Maa tyin vasu catyí ra naha tacan, yii xaan tan tyasi ra naha tsa cahñi ñi indiqui can, tyin cuñí ñi jacahnu ñi tsi ra naha tshin can.

¹⁹ Tacan tan tsaḡ juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhḡ ra naha tsi nyivi, na cañi ñi yuu tsi ra Pablo. Tan tacan javahaḡ ñi, tan cuñí maa ñi tyin tsa tsiñi ra. Tacan tan ixtā caa ñi tsi ra tan tsindaçā ñi tsi ra nda yuhu ñuu.

²⁰ Maa tyin ndu iin ra yihí cuenda ra Cristo nu canyí ra Pablo. Tan nduvitā nyico ra. Tan quihvi nyico ra inga tsaha tsitsi ñuu can. Tan tsa inga quivi can cuahán ra ñuu tsa nañí Derbe tan cuahán ra Bernabé tshin ra.

²¹ Tan cahān tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhvā ñi tsi ñi tsi Nyoo. Yaha can tan cuanuhḡ ra naha ityi quitsi ra naha. Tan yahaḡ nyico ra naha ñuu Listra tan ñuu Iconio inga tsaha, tan tsaḡ nyico ra naha nda ñuu Antioquía.

²² Tan tandihí ñuu can jandu iin ra naha iñi nyivi tsa yihí cuenda ra Cristo. Tan catyí ra naha tshin ñi na cuhun ñi ityi nuu ca tshin tsa tsinú iñi ñi tsi Nyoo. Tan catyí tucu ra naha tshin ñi tyin tatun cuñí yo tsa cundaca ñaha Nyoo tsi yo, cuñí tsi tsa nyehe yo tundoho.

²³ Tan natyiso ra naha tsi ra cua cuví ityi nuu tshin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuví ityi nuu tshin nyivi vehe ñuhu can

naha ra. Yahā can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhŷ nyico ra Pablo tan ra Bernabé ñuu Antioquía ityi Siria

²⁴ Yahā can tan yahā ra Pablo tsihin ra Bernabé ñuu tsa cayucú Pisidia, tan tsaā ra naha nda cuanda Panfilia.

²⁵ Cahān ra naha tuhun Nyoo ñuu Perge. Yahā can tan tsahān ra naha ñuu Atalia.

²⁶ Ican quihvī ra naha tsitsi iin yutun ndoo tan cuanuhŷ ra naha nda ñuu Antioquía. Ican cuví ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaā nuhu ra naha.

²⁷ Tsa tsaā nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tsihin ñi tandihí tsa javahā Nyoo tsihin ra naha, tan nácaa nuñā Jutu Mañi yo ityi tyin tsinú tucu iñi ñi tsa ñavin nyivi Israel cuví.

²⁸ Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

15

Nu jandaq ra tavā tyiñu ra Jesús tyiñu nda ñuu Jerusalén

¹ Ndi nyii ca ra Pablo tan ra Bernabé ñuu Antioquía, tan tsaā taahan ra naha quee ra naha nda Judea. Tan quitsahā jacuahá ra naha tsi ra yihí cuenda ra Cristo. Tan catyí ra naha tyin cuñí tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha.

²⁻³ Tan ñihi xaan cahān yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cuhun ra naha ñuu Jerusalén, cujandaa ra tyiñu can tsihin ra tavā tyiñu ra Jesús tan tsihin ra cuví ityi nuu tsihin nyivi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yahā ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo nácaa jañá nyivi tsa ñavin nyivi Israel cuví tuhun tsahnu tsa tsinu iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano sī xaan cuñí ra naha tsa tsito ra naha yacan.

⁴ Quivi tsaā ra Pablo tan ra Bernabé ñuu Jerusalén, cuahán ra naha nu ndu iin nyivi yihí cuenda ra Cristo. Tan tandihí ñi tan ra cuví ityi nuu tsihin ñi, tan tsihin ra tavā tyiñu ra Jesús, tsahā ñi yaha ra naha tyin nacatyí tuhun ra naha tsa javahā Nyoo tsihin ra naha.

⁵ Maa tyin juhva ra fariseo tsa tsinú iñi tsi ra Cristo, nduvitā ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaā ra Moisés —catyí ra naha.

⁶ Tacan tan ndu iin ra cuví ityi nuu tsihin ñi yihí cuenda ra Cristo tan ra tavā tyiñu ra Jesús tyin natuhun tahan ra naha tuhun can.

⁷ Tsa yahā tsa cahān yuhu xaan ra naha, tan nduvitā ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsj Nyoo tsi yuhu ra ndaahvi quiví can, tyin cahan yu tuhun ra tsa jacacú tsi yo tshih nyívi tsa ñavin nyívi Israel cuví, tan na tsinu iñi ñi tsi Jutu Mañi yo.

⁸ Tan Nyoo, ra tsitó añima tandihí nyívi, janaha ra tsi yo tyin cuñí ra tsi ñi ican. Yacan cuenda tsaha ra Tatyí li ra tsi ñi, tumaa tsa naquihín tucu maa yo Tatyí li ra tahañ tsanaha.

⁹ Nyoo inducu ñi cuñí ra tsi nyívi. Yacan cuenda ña tyaá tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo.

¹⁰ Vityin ¿nacuenta ña tsinú iñi ndo tsa javaha Nyoo tshih ñi can? Tyin ña vaha tsa tsiyo yo ley Nyoo tsa tyaá ra Moisés siqui ñi. Tyin ndi maa tsi saahnu yo tan ndi maa yo tan ña cuví naquihín vaha yo ley can.

¹¹ Ñavin tacan cacú yo. Yoo tsitó yo tyin cacú yo tshih tumañi iñi tsa javahá Jutu Mañi yo ra Jesús tshih yo. Tan tacan tucu ñi can —catyí ra Pedro tshih tandihí ra can naha ra.

¹² Tacan tan taxin ñi cuví tandihí ra naha. Tan tyaá soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javaha Nyoo nu cahan ra naha tuhun ra nu yucú nyívi tsa ñavin nyívi Israel cuví.

¹³ Tsa ndihí cahan ra naha, quitsaha caahán ra Jacobo, tan catyí ra: —Nyooho yañi, tyaá soho ndo tsa cua cahan yu tshih ndo.

¹⁴ Tsa catyí tuhun ra Simón Pedro tshih yo nácaa quitsaha tsahá Nyoo tumañi iñi tsi ñi tsa ñavin nyívi Israel cuví. Tyin nacatsj tucu ra tsi juhva ñi tyin cuví ñi nyívi cuenda ra.

¹⁵ Tan ndu iñi tuhun ihya tshih tuhun tsa cahan ra cuví ndusu yuhu Nyoo tahañ tsanaha, tumaa cuhva nyaá maa nu tutu Nyoo nu catyí ra:

¹⁶ Yaha tandihí tuhun ihya tan cua quitsi nyico yu nu yucú ndo. Quiví tsa tsicoo ra David, vaha xaan jacahnú nyívi tsi yu.

Maa tyin vaha can jandihí nyívi tsa jacahnú ñi tsi yu. Maa tyin cua quitsi nyico yu inga tsaha tan cua cañihi yu vehe ñuhu ra David. Tyin cua jacahnu nyívi tsi yu.

¹⁷ Tyin tacan tan cuví nanducu tandihí inga ca nyívi tsi yu, tandihí ñi tsa ñavin nyívi Israel cuví tan tsinú iñi tsi yu.

¹⁸ Tacan catyí Jutu Mañi yo, tan jacuahá ra tuhun ihya tsi nyívi tsicoo tahañ tsanaha tan tshih nyívi tsa iyó vityin.

¹⁹ Yacan cuenda catyí yu tyin ña vaha tsa jatyañu yo tsi nyívi tsa ñavin nyívi Israel cuví, ñi tsa nacoo tuhun tsahnu ñi tan quihví ñi cuenda ra Cristo. Ña vaha catyí yo tyin cuñí tsi tsa tyaá yahví ñi ley tsahnu yo.

²⁰ Vaha ñi maa tshih tsa jacahun yo carta tsi ñi. Tan catyí yo tshih ñi tyin ña cua catsi ñi cuñu tsa tsaha cuenda nyívi tsi tsitoho. Tan ña cuví coo rayíi tshih ñaha tun ña tindaha ra. Tan ndi ñiñaha ña cuví coo ñi tshih rayíi tun ña tindaha ñi. Rayíi tsa iyó ñasiñi ña cuví coo ra tshih inga ñaha, tacan tucu ñiñaha tsa iyó yíi, ña cuví coo ñi tshih inga rayíi. Tan catyí tucu yo tshih ñi quihví cuenda ra Cristo tan ñavin nyívi Israel cuví ñi tyin ña cua catsi ñi cuñu quiti tsa tshij tsa cavá ñi jucun tatun ña tsatí ñiñi ti. Tan ña cua catsi ñi ñiñi quiti.

²¹ Tyin nda tyembu tsahnu tan nda cuenda vityin iyó maa ra jacuahá ley Nyoo tsa tyaá ra Moisés vehe ñuhu nyívi Israel. Tan jacuahá ra naha tuhun can tan iin tan iin ñuu, tan tahañ tahañ una quiví, quiví tsa quitatú ñi —catyí ra Jacobo tshih ra naha.

²² Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsi ñi tsi taahan ra naha. Tan yaha can tan jacuhun ñi tsi ra naha tyin cahun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañi Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén.

²³ Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumi tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyivi Israel cuví ndo. Tandihí nyooho tsa iyó ndo ñuu Antioquía, tan nyooho nyivi Siria, tan tsihin nyooho nyivi Cilicia, jaquitsí ndi carta ihya tsi tandihí ñi ndo.

²⁴ Tsitó ndi tyin quita taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyí nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahan tsihin ra naha tyin quitsi cahan ra naha yacan tsihin ndo.

²⁵ Yacan cuenda ndu iin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo.

²⁶ Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo.

²⁷ Yacan cuenda jaquitsi ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaa ndi nu tutu ihya.

²⁸ Tyin ndi Tatyí li Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya:

²⁹ Ña cua catsi ndo cuñu tsa tsaha cuenda nyivi tsi tsitoho. Tan ña cua catsi ndo niñi quiti, ndi cuñu quiti tsa tsihi tsa cava ñi jucun tan ña tsatí niñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayii. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nu carta can.

³⁰ Tan cuahán ra tsa jacuhun ra naha, tan tsaá ra naha ñuu Antioquía. Tan jandu iin ra naha tsi tandihí nyivi yihí cuenda ra Cristo tan nacuhva cuenda ra naha carta can.

³¹ Tsa cahvǵ ñi carta can, sii xaan cuñí ñi tyin vaha xaan caahán tsi.

³² Tan ra Judas tsihin ra Silas cuví tucu ra naha ndusu yuhu Nyoo. Tan jandu iin ra naha iñi nyivi can tsihin tsa cahan ra naha.

³³ Tan tsa yaha tsiyucu ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyí ñi tyin na cahun vaha ra naha.

³⁴ Maa tyin ra Silas catyí ra tyin cua ndoo ra.

³⁵ Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahan ra naha tuhun Jutu Mañi yo tsihin nyivi can tan jacuahá ra naha tsi ñi.

Nu sinu uvi tsaha cuahán ra Pablo tuhun Nyoo, tan nu quita tsiyo ra nuu ra Bernabé

³⁶ Tan tsa yahā juhva quiví, tan caḥan ra Pablo tsihin ra Bernabé:

—Cohon inga tsaha cunyehe yo nu yucú nyiví yihí cuenda Jutu Mañi yo ra Cristo tandihí ñuu nu caḥan yo tuhun ra, tyin nyehe yo nácaa yucú ñi —catyí ra Pablo tsihin ra.

³⁷ Tan ra Bernabé cuñí ra tsa cahun nyico ra Juan Marcos tsihin ra naha.

³⁸ Maa tyin ra Pablo ña taahán iñi ra tsa cahun ra Juan tsihin ra naha, tyin nacoq ihñi ra tsi ra naha nda Panfilia quiví tsa tsahān ra tsihin ra naha. Tan ña tsahān ca ra tsijahā tyiñu ra tsihin ra naha.

³⁹ Tan caḥan yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvı́ ra naha tsitsi iin yutun ndoo tan cuahán ra naha ñuhu Chipre.

⁴⁰ Tan ra Pablo nacatsj ra tsi ra Silas. Tan tsa yahā tsican tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha.

⁴¹ Tan yahā ra naha ñuu tsa cayucú Siria tan Cilicia, tan jandu iin ra naha iñi nyiví tsa yihí cuenda ra Cristo tan iin tan iin ñuu.

16

Nu cuahán ra Timoteo tsihin ra Pablo tan ra Silas

¹ Ra Pablo tsihin ra Silas tsaq ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuvı́ ña iin ñaha Israel. Tan yihí ndihí ña cuenda ra Cristo. Maa tyin jutu ra, ra Grecia cuvı́ ra.

² Tan ra Timoteo vaha xaan tsicá ra tuhun Nyoo, catyí nyiví yihí cuenda ra Cristo ñuu Listra tan ñuu Iconio.

³ Tan ra Pablo cuñí ra tsa cahun ra Timoteo tsihin ra. Tan tyaq ra naha tuñi Nyoo tsi ra Timoteo jahā ra Pablo. Tyin coto ndasi cuñi nyiví Israel nyehe ñi tsi ra. Tyin tandihí ñi tsitó ñi tyin jutu ra cuvı́ ra ra Grecia.

⁴ Tacan tan cuahán ra naha tan iin tan iin ñuu. Tan caahán ra naha tsihin nyiví yihí cuenda ra Cristo tsahá cuenda ra naha tuhun tsa tsahā ra tavā tyiñu ra Jesús tan tsihin ra cuvı́ ityi nuu tsihin nyiví vehe ñuhu Jerusalén tsi ra naha.

⁵ Tacan tan ndu iin iñi nyiví yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quiví tan cuahán nducuahá ca ñi.

Nu janahā Nyoo iin tsa janahā ra tsi ra Pablo cuenda iin ra Macedonia

⁶ Ña tsahā Tatyí Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yahā sava ra naha ñuhu cuenda Frigia tan Galacia.

⁷ Tan tsaq ra naha Misia. Tan cuñí ra naha cahun ra naha Bitinia, maa tyin Tatyí Ii ra Jesucristo ña tsahā cahun ra naha.

⁸ Tacan tan nda sava ñi yahā ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu.

⁹ Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayií tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatyinyee un tsi ndi” catyí ra.

¹⁰ Tan tsa nyehe ra Pablo can, yuhu ra Lucas tsihin ra Pablo tan inga ra janduvahā ndi tsi ndi tan cuahán ndi nda Macedonia can. Tyin tsitó vaha ndi tyin Nyoo canā ra tsi ndi, tyin cahan ndi tuhun ra nácaa jacacú ra tsi yo tsihin nyiví ityi can.

Nu nyií ra Pablo tsihin ra Silas ñuu Filipos

11 Quihvī ndi iin yutun ndoo ñuu Troas. Tan cuahán ndoo ityī ñī ndi nda Samotracia, iin ñuhu luhlu tsa canyī mahñu ndutya ñuhu. Tan tsa inga quīvī tsaq̄ ndi ñuu Neápolis.

12 Tan ican queē ndi tan cuahán ndi ñuu Filipos tsa cuvī iin ñuu cuenda nyīvī Roma. Tan cuvī tsi iin ñuu cahnu ca tsa nuu tandih̄ī ñuu tsa cayucú Macedonia. Tan ican tsiyucú ndi taahan quīvī.

13 Iin quīvī tsa quitatú nyīvī, tan quitá ndi ityī tsata ñuu, yatyin iin yutya nu tuhvá nyīvī tsicán tahvī tsi Nyoo. Tsinyecū ndi, tacan tan cahan̄ ndi tuhun Nyoo tshin̄ ñiñaha tsa ndu iin ican.

14 Iin ñaha nañī ña Lidia. Tan ñuu ña cuvī Tiatira. Tan tuhvá ña xicó jahma vaha, tsa tunduuhva. Yacan cuvī tyiñu jahá ña. Tan jacahnú ña tsi Nyoo tumaa jacahnú nyīvī Israel. Tan tsiñī ña tsa caahán ra Pablo. Tan Nyoo nuña ra añima ña na tyaa yahvī ña tsa caahán ra.

15 Tan tsicoondutyā ña tshin̄ nyīvī ña. Tan yahá can tan cahan̄ ndaahvī ña tshin̄ ndi, tan catyī ña:

—Tatun nyehé ndo tyin nditsa tsa tsinú iñī yu tsi Jutu Mañī yo, cohon ndo, ndo ndo yuvehe yu —catyī ña tshin̄ ndi.

Tan jañiñj̄ xaan ña tsi ndi na ndoo ndi yuvehe ña.

16 Tan cuvī iin tsaha tsa cuahán ndi nu tsicán tahvī ndi. Tan tsitsi tsa cuahán ndi, tahán ndi tsi iin ñaha tyuvaa tsa yih̄ī tatyí ña vaha tsi. Yacan cuenda cuvī nacoto ña náa ndih̄ī tsa cua cuvī ityī nuu. Tan iyó ra cuvī tsitoho ña. Tan cuaha xaan xuhun jahá canaa ña tsa cuenda ra naha, tyin cuvī nacotó ña.

17 Tan ñaha tyuvaa can quitsahā nyicún ña tsi ndi, nyuhu tshin̄ ra Pablo. Tan caná tsa ña tan catyī ña:

—Rayī ihya ra jahá tyiñu tyiñu Nyoo cahnu, cuvī ra naha. Tan caahán ra naha tuhun nácaa cuvī cacu yo —catyī ña.

18 Cuaha quīvī javahā ñaha tyuvaa can tacan. Tacan tan ra Pablo ña cunyeec̄ ca iñī ra, tan nanyicó coo ra tan catyī ra tshin̄ tatyí ña vaha tsa yih̄ī tsi ña:

—Tshin̄ sivī ra Jesucristo, catyī yu tshin̄ un tyin quita un tsi ñaha tyuvaa ihya —catyī ra.

Tan nu tatyí ña vaha can quitá nu tsi ña juven̄ ñī cuhva can.

19 Maa tyin tsa nyehé ra cuvī tsitoho ña tyin ña cua cuvī ca jaha canaa ra naha xuhun tshin̄ ña, tñin ra naha tsi ra Pablo tshin̄ ra Silas tan tsindacá ra naha tsi ra naha nda vehe tyiñu.

20 Tan tsicán ra naha cuatyí tsaha ra naha nuu ra cumí tyiñu naha ra. Tan catyī ra naha:

—Ra Israel ihya cuaha xaan tsa caahán ra naha tshin̄ nyīvī ñuu yo tan jativī ra naha ñuu yo.

21 Tyin jacuahá ra naha iin cuhva tsa ña cuvī coo yo, ndi ña cuvī javahá yo tyin nyīvī cuenda ñuu Roma cuvī yo —catyī ra naha.

22 Tacan tan nduxaḡn nyīvī tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tavā tyiñu ra cumí tyiñu na cañī ra vitya tsi ra Pablo naha ra tshin̄ yutun.

23 Tsa yahá tsa cañī xaan ra naha tsi ra Pablo tan ra Silas, tan tsindacá ra vitya can tsi ra naha vehe caa. Tan tavā tyiñu ra vitya tsi ra jaha cuenda tsi ra naha na jaha vaha ra cuenda tsi ra naha.

24 Quih̄in ra cua jaha cuenda can tyiñu tan tyih̄ī ra tsi ra naha nda tsitsi cuii vehe caa. Tan tyih̄ī vaha ra tsaha ra naha tyañu vitu.

²⁵ Yahā can tan maa ñuu ra Pablo tan ra Silas quitsahā tsicán tahvi ra naha tsi Nyoo. Tan quitsahā tsitá xaan ra naha cantu Nyoo. Tan ra yucú vehe caa can naha ra tyaá soho ra naha.

²⁶ Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñā tandihi yuvehe, tan ndatsi cadena tsa yihí tsi tandihi ra tsa yucú vehe caa can naha ra.

²⁷ Tan tsa ndoto ra tsa jahá cuenda vehe caa can, nyehe ra tyin ticohó tandihi maa yuvehe can. Tacan tan tava ra mityi ra tyin cua cahñi ra tsi ra. Tyin tsicā iñi maa ra tyin tandihi ra tsa yucú vehe caa can quita.

²⁸ Maa tyin ra Pablo canā tsa ra tsi ra, tan catyí ra:

—Ña cahñi un tsi un, tyin tandihi ndi tan yucú ndi ihya —catyí ra tsihin ra.

²⁹ Tacan tan ra jahá cuenda vehe caa can tsican ra ñuhū. Tan tsinu ra quihvi ra nu yucú ra naha. Tan nihí ra tsihin tsa yuuhví ra. Tan tsicuiñi tsiti ra nuu ra Pablo tan ra Silas.

³⁰ Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihi nyivi un —catyí ra naha tsihin ra jahá cuenda vehe caa can.

³² Tan cahan ra naha tuhun Jutu Mañi yo tsihin ra tan tsihin tandihi nyivi tsa yucú yuvehe ra.

³³ Tan juvin ñi maa tsacuaa can ra jahá cuenda vehe caa can nacatyā ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutyā ra tsihin tandihi nyivi ra.

³⁴ Tacan tan tsindaca ra tsi ra naha nda vehe ra. Tan tsaha ra tsa catsi ra naha. Tan maa ra tsihin nyivi ra sñi xaan cuñi ñi tyin tsinú iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvī inga quivi tan tava tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas.

³⁶ Tacan tan ra jahá cuenda vehe caa can catyí ra tsihin ra Pablo:

—Tsa tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihí ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhvi xaan ra naha tsa tsito ra naha tyin ra cuenda ñuu Roma cuví ra Pablo.

³⁹ Tan tsahan ra cumí tyiñu naha ra tsindacan ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can.

⁴⁰ Tan tsa quita ra naha vehe caa can, tsahan ra naha vehe ña Lidia. Tan yahā can tan tsinyehe ra naha tsi ra hermano naha ra tan jandu iin ra naha iñi ra naha tan cuahán ra naha.

17

Nu quitsahā caahán yuhu tahan nyivi űuu Tesalónica

¹ Nu cuahán ra Pablo tsihin ra Silas, yahā ra naha űuu Anfípolis, tan űuu Apolonia. Yahā can tan tsaā ra naha űuu Tesalónica nu nyaá iin vehe űuhu nyivi Israel.

² Tan tsaḥan ra Pablo vehe űuhu can, tumaa cuhva tuhvá maa ra tsaahán tan iin tan iin űuu. Tan caḥan ra tuhun Nyoo tsihin nyivi tsicá vehe űuhu can uñi taahan quivi quitatú űi.

³ Tan cahvi ra nu libru Nyoo tan tsaḥā cuenda ra tuhun ra Cristo tsi űi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin űi:

—Ra Jesús tsa caahán yu tuhun tsihin ndo juvin ra cuví ra Cristo.

⁴ Tan juhva nyivi Israel can tsinu iñi űi tsa caahán ra. Tan ndu iin űi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinu ndihi iñi űi. Tan cuaha űiñaha cuca tsa iyó űuu can natsinu ndihi iñi űi tsa caahán ra tuhun ra Cristo.

⁵ Maa tyin ra űuu Israel tsa űa tsinú iñi, ndasi cuñi ra naha nyehé ra naha tyin cuaha xaan nyivi nyicún tsi ra Pablo. Tan jandu iin ra naha tsi taahan ra caquiñi tsa tsicá nuu jutsan űi maa. Tan quitsahā caahán yuhu tahan nyivi űuu can jahā ra naha. Tan quihvi ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñi ra naha tsa quita ra Pablo naha ra. Tyin ra caquiñi can cuñi ra naha nacuhva cuenda ra naha tsi ra Pablo naha ra tsi nyivi.

⁶ Maa tyin tsa űa nañihí ra naha tsi ra Pablo tan ra Silas ican, quihín ra naha tsi ra Jasón. Tan ixtā caa ra naha tsi ra. Tan quihín ndihi ra naha tsi taahan ca ra hermano tan cuahán ra naha nuu ra cumí tyiñu űuu can. Tan canā tsaā ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihí nyivi nanii cahnu űuhu ñayivi. Tan vityin tsaā ndihi tucu ra naha ihya.

⁷ Tan ra Jasón can tsaḥā ra yuvehe ra na cuyucu ra naha. Tan tandihí maa ra naha tan űa tyaá yahvi ra naha tsi ra cuví rey cahnu nda űuu Roma. Tyin catyí ra naha tyin iyó inga rey tsa nañi Jesús —catyí ra naha.

⁸ Tsa tsiñi nyivi tan ra cumí tyiñu tsa caahán ra caquiñi can naha ra quitsahā caahán yuhu tahan űi.

⁹ Maa tyin ra Jasón tan inga ra naha tsaḥā ra naha xuhun tan jañā ra cumí tyiñu tsi ra naha.

Nu cuahán ra Pablo tsihin ra Silas űuu Berea

¹⁰ Tan juvin űi tsacuaa can jacuhun ra hermano naha ra tsi ra Pablo tsihin ra Silas űuu Berea. Tan tsa tsaā ra naha, tsaḥan ra naha vehe űuhu nyivi Israel.

¹¹ Tan nyivi Israel tsa iyó űuu Berea can vaha ca nyivi cuví űi tan ñavin ca nyivi űuu Tesalónica tyin tsihin tsa ñi iñi űi tan naquihín űi tuhun Nyoo. Tan tandihí quivi nanducú űi nuu tutu Nyoo, nyehé űi tatun nditsa tsa caahán ra Pablo.

¹² Yacan cuenda cuaha xaan űi natsinu iñi űi tsi ra Cristo tsihin tucu nyivi Grecia tahan űi űiñaha cuca tan rayi naha ra.

¹³ Maa tyin tsa tsitō ra Israel tsa iyó űuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhū ra naha tsi nyivi Berea can.

¹⁴ Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoo ra naha ñuu Berea.

¹⁵ Tan ra tsa cuahán tsihin ra Pablo tsindacá ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cuhun ra naha nu nyii ra.

Nu nyii ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can.

¹⁷ Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihi quivi caahán ra tsihin nyivi tsa cuahán nuyahvi.

¹⁸ Tan ñihí tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihí tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi.

¹⁹ Tacan tan tsindacá ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un.

²⁰ Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihi tuhun ihya —catyí ra naha tsihin ra.

²¹ Tyin tandihi nyivi Atenas tan nyivi inga ñuu tsa iyó ican taahán xaan iñi ñi tyaa soho ñi tan nacatyí tuhun ñi náa ndihi tuhun tsa.

²² Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo.

²³ Tyin tsañan yu tsinyehé yu nu tuhvá ndo ndu iin. Tan nyehe yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo.

²⁴ Nyoo tsa javahá ñuhu ñayivi tan tandihi tsa iyó nu ñuhu ñayivi ihya, tsi maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi.

²⁵ Tan ña nyitá iñi ra tsa jatyinyeé nyivi tsi ra. Tyin maa ra tsañá ñayivi coo tandihi yo. Tan tsañá ra tatyí tsa ixtá tatyí yo. Tan maa ra tsañá tandihi tsa tsiñi ñuhu tsi yo.

²⁶ Javahá Nyoo tsi intuhun rayii. Tan tsa yahá can tsicoo cuaha nyivi tata ra. Tan maa ra naha cuví tsi tsaahnu tandihi yo. Yacan cuenda intuhun ñi niñi nyisó tandihi yo. Tan tsañá Nyoo tsa coo yo nani cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo.

²⁷ Tacan javahá ra tyin na quitsaha nanducu yo tsi ra. Tumaa iin ra caa nanducú tsihin ndaha ra tsa nanducú ra, tacan cua nanducu yo tsi ra tan cua

nañihi yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo.

²⁸ Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra.

²⁹ Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinü tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinü tsihin tsa tsiñituñi iñi nyívi cuví ra.

³⁰ Tahán tsanaha Nyoo ña cuxaḡn ra tsi nyívi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyívi tandíhi ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

³¹ Tyin tsa tyaa ra cuhva tyin cua coo iin quívi tsa cua tatsi tuñi ra tsi nyívi iyó nu ñuhu ñayívi. Tan tsa cua tsa quívi can, ra tsa nacatsj vaha maa ra cua tatsi tuñi tsi ñi jaha ra. Tan tsa janahḡ ra tsi yo tyin nditsa tsa ra ihya cua tatsi tuñi tsi nyívi, tyin janandotḡ ra tsi ra can nu tsihḡ ra —catyí ra Pablo.

³² Tsa tsiñi nyívi tuhun tsa nandotó nyívi tsa tsihḡ, yihí ñi tsacú nducu ñi, tan yihí tucu nyívi catyí ñi:

—Quitsi un inga tsaha tan caḡan un tuhun ihya tsihin ndi —catyí ñi.

³³ Tacan tan cuahán ra Pablo.

³⁴ Maa tyin yihí ñi ndu iin ñi tsihin ra, tan natsinü iñi ñi tsi ra Cristo. Tan iin ra tsa natsinü iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinü ndihi tucu iñi ña, tan tsihin inga ca ñi.

18

Nu nyí ra Pablo ñuu Corinto

¹ Yahḡ can tan quitḡ ra Pablo ñuu Atenas tan cuahán ra ñuu Corinto.

² Tan ican nañihḡ ra tsi iin ra Israel tsa nañi Aquila. Tan ñuu Ponto cacu ra. Tan maa ra tsihin ñasihi ra, ña Priscila, quitḡ ñi Italia nu tsicoḡ ñi, tyin ra Claudio, ra cuví rey cahnu ñuhu can, tava ra tsi tandíhi nyívi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto.

³ Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi.

⁴ Tan quívi quitatú nyívi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyívi Israel tan tsihin nyívi tsa ñavin nyívi Israel cuví. Tyin nducú ra cuhva tsa tsinu iñi ñi tsi ra Jesucristo.

⁵ Tan quívi tsaḡ ra Silas tan ra Timoteo tsa queḡ ra naha Macedonia, ra Pablo nacoḡ ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyívi Israel tyin ra Cristo, tsa ndatú xaan ñi, juvin ra cuví ra Jesús.

⁶ Maa tyin ñi ican xaan cuñi ñi. Tan quitsahḡ caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa caḡan yu tsihin ndo tan maa ndo ña tsiñu iñi. Vityin tan ityi nuu ca cua cuhan yu cahan yu tuhun ihya tsihin nyívi tsa ñavin nyívi Israel cuví —catyí ra tsihin ñi.

⁷ Tan quitḡ ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra.

⁸ Tan iin ra tsa nañí Crispo, ra cuví ityi nu vehe ñuhu can, natsinū iñi ra tsi Jutu Mañi yo tan tacan tucu tandihí nyivi ra. Tan cuaha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinū iñi ñi tsi ra Jesús, tan tsicoondutya ñi.

⁹ Tacan tan iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyi ra:

—Ña nayuhvi un. Jañihi ca cahan un tuhun yu tan ña jandihí un tsa cahan un.

¹⁰ Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyi Jutu Mañi yo tsihin ra Pablo.

¹¹ Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

¹² Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsicān ra naha cuatyí tsaha ra nuu ra Galión.

¹³ Tan catyi ra naha tsihin ra Galión can:

—Ra ihya natyuhví ra tsi nyivi na jacahnu ñi tsi Nyoo iin cuhva tsa ñavin cuhva catyi ley —catyi ra naha.

¹⁴ Tacan tan cuhva tsa cua nacahan ra Pablo, tan nacahan ñi ra Galión, tan catyi ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyi cuví.

¹⁵ Maa tyin maa ñi maa tuhun caahán cuví tuhun ihya. Tan yuhu ña cuñí yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñí yu cuví yu juez tsa cuenda tuhun ihya —catyi ra Galión can tsihin ra naha.

¹⁶ Tan tava ra tsi ra Israel naha ra nu cuví vehe tyiñu ra.

¹⁷ Tacan tan tandihí ra Grecia tiin ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahan maa ra.

Nu cuanuhú ra Pablo ñuu Antioquia tan cuahán ra tsa tsinu uñi tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cuaha quivi. Yaha can tan catyi ra tsihin ra hermano naha ra tyin tsa cua cahun ra. Tan cuahán ra Aquila tan ña Priscila tsihin ra. Tacan tan tsaá ñi ñuu Cencrea. Tan ra Pablo xatya ndi ra jiñi ra tumaa iin seña tyin tsa yaha javaha ra tsa catyi ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

¹⁹ Tan tsa tsaá yutun ndoo can nda ñuu Éfeso, quitā ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin ican.

²⁰ Tan cahan ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñí ra.

²¹ Tan catyi ra tsihin ñi tyin tsa cuahán ra, tan catyi tucu ra tyehen:

—Cuñí tsi tsa cahun yu ñuu Jerusalén tyin jacahnu yu vico tsa vatsí tahanan. Maa tyin tatun Nyoo cuñí, cua quitsi yu inga tsaha nu yucú ndo —catyi ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria.

²² Quivi tsa tsaꝯ nyico ra ñuu Cesarea cuenda Siria, tsaḥan ra ñuu Jerusalén tsiuhva ra nacumi tsi nyivi yihí cuenda ra Cristo tsa iyó ican. Yaha can tan cuahán nyico ra ñuu Antioquia.

²³ Tan tsa yaha tsinyi ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyivi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quivi can tsaꝯ iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsaḥnu tsa nyaá nu libru.

²⁵ Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyꝯ ra Juan ñi tsitó ra.

²⁶ Tan quitsaha caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava siin ñi tsi ra tan tsaḥa cuenda vaha ca ñi tuhun Nyoo tsi ra.

²⁷ Tacan tan quitsaha cuñi ra Apolos cuhun ra ityi Acaya. Tan ra hermano jatinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsa ra. Tacan tan cuahán ra. Tan cuhva tsa tsaꝯ ra Acaya can, jatinyee xaan ra tsi nyivi yihí cuenda ra Cristo, ñi tsa natsinu iñi tsa cuenda tumañi iñi tsa javaha Nyoo tsi ñi.

²⁸ Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinu iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

19

Nu cuahán nyico ra Pablo ñuu Éfeso

¹ Tsitsi tsa nyi ra Apolos ñuu Corinto, ra Pablo yaha ra ityi yucu tan tsaꝯ ra nda ñuu Éfeso. Tan ican nañihí ra tsi taahan ra yihí cuenda ra Cristo.

² Tan tsica tuhun ra tsi ra naha:

—¿A naquihin ndo Tatyí Ii Nyoo quivi tsa natsinu iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

³ Tacan tan ra Pablo tsica tuhun ra tsi ra naha:

—¿Nacaa tsicoondutyꝯ ndo? —catyí ra.

Tan nacahan ra naha tan catyí ra naha:

—Cuhva tsa jacoondutyꝯ ra Juan, tacan tsicoondutyꝯ ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutyꝯ ra tsi nyivi tsa ndu uvi iñi cuatyí. Maa tyin catyí tucu ra tsihin ñi tyin cuñi tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutyꝯ ra naha inga tsaḥa tsihin sivi Jutu Mañi yo Jesús.

⁶ Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsaha caahán ra naha inga yuhu. Tan tsaḥa cuenda ra naha tuhun tsa tsaḥa Tatyí Ii Nyoo tsi ra naha tsi nyivi.

7 Tan tsa tandihí ra naha quitá maa utsi uvi taahan ra naha.

8 Tan tsitsi tsa uñi yoo tsicá ra Pablo vehe ñuhu nyívi Israel ñuu Éfeso, tan caahán ra tuhun ra Cristo tsihin tsa ñi ñi ra. Tan jacuaha ra tsi ñi na nacuhva ñi tsi ñi tsi Nyoo na cundaca ñaha ra tsi ñi.

9 Maa tyin yihí ñi jandava ñi añima ñi, tan ña cuñi ñi tsinu ñi ñi. Tan caahán ñi ndavaha ñi siqui tuhun ra Cristo nuu nyívi, tan catyí ñi tyin ña vaha ityi ra Jesús. Tacan tan ra Pablo catsiyo nyaha ra nu yucú ñi. Tan tsindaca ra tsi ñi tsinú ñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyívi tandihí quívi.

10 Tan tacan ñi tsicá ra tsitsi tsa uvi cuiya. Tan tandihí nyívi tsa iyó ñuu tsa cayucú Asia, tsifiñi ñi tuhun Jutu Mañi yo ra Jesús, tahan ñi nyívi Israel tan nyívi tsa ñavin nyívi Israel cuví.

11 Tan nahnu tsa iyo javaha ra Pablo jahá Nyoo.

12 Tyin nda cuanda jahma tsa tiñn ra Pablo tan tsindacá ñi tsi nyívi tan quitá cuehe tsi ñi, tan quitá ndihí tucu tatyí ña vaha tsi ñi.

13 Tan iyó juhva ra Israel tsa tsicá nuu tan iin tan iin ñuu tava ra naha tatyí ña vaha tsi nyívi. Tan cuñi ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

14 Tacan javaha tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu.

15 Tan tsa cahan ra can naha ra tsihin nu tatyí ña vaha, nacahan nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan iyóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

16 Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tuneey ñi nu tatyí ña vaha can tan cuví cunyeey ra tiñn tahan ra tsihin tandihí ra can naha ra. Tan tsahnya cuatyí ra jahma ra naha. Tan jañicueehé ra tsi ra naha. Tan jacuhun tandiñ ra tsi ra naha jahá nu tatyí can.

17 Tacan tan tandihí nyívi Éfeso, tahan ñi nyívi Israel, tan nyívi tsa ñavin nyívi Israel cuví, tsitó ñi tuhun can. Tan yuuhví xaan ñi cuví. Tan jacahnú ñi sivi Jutu Mañi yo Jesús.

18 Tan cuaha xaan nyívi tsa natsinu ñi tsi ra Jesús cuahán ñi cuanahmá ñi cuatyí ñi nuu ra tan nuu nyívi, tandihí maa tsa ña vaha tsa icá ñi tahan tsanaha.

19 Tan cuaha ñi tsa cahvi tuhun tasi, tsindaca ñi libru ñi. Tan tsahmiñ ñi libru can nuu tandihí nyívi. Tan tava cuenda ñi nácaa yahvi libru can. Tan yahvi tsa tandihí libru can quitá tsi uvi xico utsi mil xuhun cuitsin.

20 Tan tacan ñi tan cuahán nducuahá ca nyívi tsa yihí cuenda Jutu Mañi yo. Tan tacan nyehé nyívi tyin cahnu xaan tuneey ñi iyó tsi ra.

21 Tan tsa yahá tuhun ihya, ra Pablo tyaá ra cuhva tsa cahun ra ñuu tsa cayucú Macedonia tan Acaya. Yahá can tan cua cunuhu ra nda ñuu Jerusalén, tyaá ra cuhva. Tan catyí ra tyin yahá can tan cuñi tsi tsa cahun ra nda ñuu Roma.

22 Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quívi Asia can.

Nu quitsahq cuvaá nyivi Éfeso

²³ Tan juvin ñi quivi can quitsahq cuvaá nyivi ñuu Éfeso tsa cuenda tuhun Nyoo,

²⁴ tyin iin ra tsa nañi Demetrio natyuhq ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra.

²⁵ Tan cana ra Demetrio can tsi ra tsa jahá tyiñu tsihin ra. Tan cana tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo.

²⁶ Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihi ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu.

²⁷ Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihi nyivi nñi cahnu Asia tsihin nyivi naniñi cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

²⁸ Tan cuhva tsa tsiñi ra naha tsa cahan ra, xaan xaan cuñi ra naha. Tan quitsahq caná tsaa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

²⁹ Tan cuvaq tandihi nyivi ñuu can. Tan tñin ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihi ñi can ixta caa ñi tsi ra naha nda cuanda nu tuhvá ñi ndu iin.

³⁰ Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsahq ra naha tsa cuhun ra.

³¹ Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tava tyiñu ra naha tsi ra tyin ña taahán tsi tyihi ra tsi ra ican.

³² Tan nu ndu iin nyivi ican, juhva ñi caná tsaa iin tuhun, tan inga ñi caná tsaa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican.

³³ Tacan tan nyivi Israel tava tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucú ican, tsahq cuenda ñi tsi ra nácaa cua cahan ra. Tacan tan javahq ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel.

³⁴ Maa tyin cuhva tsa tsitó nyivi tyin ra Israel cuví ra, tandihi maa ñi cana tsaa ñi. Tan tsitsi tsa uvi hora caná tsaa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsaa ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihi nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacava nu ñuhu ihya.

³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo.

³⁷ Tyin ra tsa tsindacaḡ ndo ihya nduve náa tsa suhḡ ra naha vehe ñuhu yo. Tan ndi ña caahán ra naha ndavaha ñi siqui nyoo yo.

³⁸ Tatun ra Demetrio tan ra tsa jahá tyiñu tshin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can.

³⁹ Tan tatun inga tuhun tsicán ndo, cuñí tsi tsa ndaca ndo can tsi ra cumí tyiñu, tumaa cuhva catyí ley.

⁴⁰ Tyin tatun coto ra ndacá ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenta cuvaá yo —catyí ra cuví secretario can.

⁴¹ Tan tsa yahá cahán ra, tacan tan catyí ra tyin na cunuhu ñi nda yuvehe ñi.

20

Nu yahá ra Pablo Macedonia tan cuahán nyico ra nda Grecia

¹ Tsa yahá tsa cuvaá nyivi ñuu Éfeso can, caná ra Pablo tsi tandihi nyivi tsa yihí cuenda ra Cristo, tyin cahan ra juhva tshin ñi tan cuhva ra tunyee iñi tsi ñi, tyin tsa tsaá quivi tsa cua cuhun ra inga ñuu. Tan cahán ra tshin ñi. Tacan tan cuahán ra Macedonia.

² Tan tsahan ra tandihi ityi can tan tshin tuhun caahán ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsaá ra ityi Grecia.

³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaá iñi ra tsa cua cuhun ra tshin tsaha ra ityi nu ñuhu, tan cua yaha nyico ra inga tsaha ityi Macedonia.

⁴ Tan cuahán ra Sópater, ra ñuu Berea tshin ra. Tan cuahán ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo.

⁵ Ra hermano ihya yahá ra naha ityi nuu tan ndatú ra naha tsi ndi nda ñuu Troas.

⁶ Tan nyuhu ndatú ndi nda tsa yahá vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filipos tshin yutun ndoo. Tan nu tsinu uhun quivi tan titahan ndi tshin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

⁷ Tan tsa cuví tumbingu can ndu iin ndi tshin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tshihí ra Cristo tsa cuenda cuatyí yo. Tan ra Pablo caahán ra tshin ñi, tan tahanan ñuu, tyin tsa nyaá tsa cuhun ndi inga quivi can.

⁸ Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhḡ candili cayú.

⁹ Tan iin ra tyuvaa tsa nañí Eutico nyaá ra ventana tyaá soho ra, maa tyin ña cunyeé iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tshihí ra.

¹⁰ Tacan tan ra Pablo nuu ra tan tsaꝯ ra nu canyíi ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihí ra hermano naha ra:

—Ña ngayuhvi ndo, tyin ra ihya nyito ra —catyí ra.

¹¹ Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra.

¹² Tan ra tyuvaa can nandoto ra tan cuanuhu ra nda yuvehe ra. Tan sii xaan cuñí ñi cuví.

Nu quita ra Pablo ñuu Troas tan cuahán ra nda ñuu Mileto

¹³ Nyuhu yahꝯ ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaꝯ maa ndi tyiñu tsihin ra, tyin maa ra cuñí ra cuhun ra ityi nu ñuhu tsihin tsaha ra.

¹⁴ Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene.

¹⁵ Tsa quita ndi ñuu can tacan tan yahꝯ ndi ityi nuu iin ñuhu luhlu tsa nañí Quío, canyíi tsi mahñu ndutya ñuhu. Tan tsa inga quivi can tsaꝯ ndi inga ñuhu luhlu tsa nañí Samos. Yahꝯ ndi ican tan tsaꝯ ndi ñuu Trogilio nu quitatu ndi. Tan tsa inga quivi tsaꝯ ndi nda ñuu Mileto.

¹⁶ Tacan cuví tyin ra Pablo ña cuñí ra tsa cunyi naha ra ityi Asia. Tan ña cuñí ra cuhun ra ñuu Éfeso tyin numi ñi cuñí ra tsaꝯ ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

¹⁷ Tan tsa yucú ndi ñuu Mileto, canꝯ ra Pablo tsi ra cuví ityi nuu tsihin nyivi yihí cuenda Nyoo ñuu Éfeso.

¹⁸ Tan tsa tsaꝯ ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaꝯ nuu yu Asia ihya.

¹⁹ Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundo ho tan tucuihya iñi nyehe yu. Tan cuaha tundo ho quitsi siqui yu jahꝯ nyivi Israel.

²⁰ Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñí ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iin ndo tan nda yuvehe ndo.

²¹ Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo.

²² Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan.

²³ Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundo ho cua nyehe yu.

²⁴ Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa sii cuñí yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuahá yu tuhun vaha nácaa cuñí maa Nyoo tsi yo.

²⁵ Tan vityin tsitó vaha yu tyin tandihí nyoo ho tsa cahan yu tuhun Nyoo tsihin ndo, ña cua nyehe ca ndo tsi yu.

²⁶ Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo.

²⁷ Tyin ñiñi cuñi yu tan cahan yu tandihí tuhun Nyoo tsihin ndo tan nduve náa tsa tyihí xeehe yu.

²⁸ Yacan cuenda jaha cuenda ndo tsi ndo. Tan jaha cuenda ndihí ndo tsi tandihí nyivi yihí cuenda Nyoo. Tyin maa Tatyí li Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jatá ra tsi ñi tsihin ñiñi ra.

²⁹ Tan tsitó yu tyin quivi cahun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tuma lobo xaan tsa tsahñi tsi mbee, tacan cua quitsi ra can naha ra.

³⁰ Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunyicun ndo tsi ra naha.

³¹ Yacan cuenda jaha vaha ndo cuenda. Ndūcuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoo ihñi ndo tuhun Nyoo.

³² Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihí tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihí inga nyivi tsa nacuhva cuenda tsi ñi tsi ra.

³³ Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo.

³⁴ Nyooho tsitó vaha ndo tyin jaha tyiñu xaan yu tsihin ndaha yu tan ñihí yu tsa tsíñi ñuhu tsi yu tsihin ra tsicá tsihin yu naha ra.

³⁵ Tacan ñi janahá yu tsi ndo tyin cuñi tsi tsa jaha tyiñu ndo tan jatinyee ndo tsi nyivi iyó náa tsa tsíñi ñuhu tsi ñi. Tan ndūcuhun iñi ndo tsa caahán Jutu Mañi yo Jesús, nu catyí ra tyehen: “Si ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

³⁶ Tsa yaha tsa cahan ra Pablo tuhun ihya, tsicuiñi tsiti ra. Tan tsicān tahvi ra tsihin tandihí ra naha.

³⁷ Tan tandihí ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra.

³⁸ Tyin ra Pablo catyí ra tyin cua cahun ra inga ñuu tan ña cua cahun ca ra nu yucú ra naha. Tacan tan tsindacá ra naha tsi ra nda nu quihvi ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoq ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyí mahñu ndutya ñuhu. Tan tsa inga quivi tsaq ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara.

² Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi.

³ Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsaq ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can.

⁴ Tan tsa nañihĩ ndi tsi nyivĩ yihĩ cuenda Nyoo ñuu can, ndoo ndi tsihin ñi utsa quivĩ. Tan catyĩ ñi tsihin ra Pablo tyin ña taahán tsi tsa cuhun ra ñuu Jerusalén tyin tacan cahān Tatyĩ li Nyoo tsihin ñi.

⁵ Maa tyin tsa quita utsa quivĩ can, quita ndi ñuu can. Tan nu cua quita ndi tandihĩ ra hermano naha ra tsihin ñasihi ra naha tan tsihin sehe ra naha tsindaçā ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñĩ tsiti ndi, tan tsican tahvi ndi tsi Nyoo.

⁶ Tacan tan tsinumĩ nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhu ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsaha ndi nacumi tsi nyivĩ yihĩ cuenda ra Cristo. Tan ndoo ndi tsihin ñi iin quivĩ.

⁸ Tan tsa inga quivĩ quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivĩ nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra.

⁹ Ra Felipe, iyó cumi taahan ñi cuatyĩ sehe ra tsa ñaha ca tandaha. Tan ndusu yuhu Nyoo cuví ñi.

¹⁰ Tan tsa cuaha ñi quivĩ tsa yucú ndi ican, tan tsaā iin ndusu yuhu nyoo tsa quee nda Judea. Nañĩ ra Agabo.

¹¹ Quitsj nyehē ra nu yucú ndi. Tan quihĩn ra cinturón ra Pablo, tsáhñĩ ra tsaha ra tan ndaha ra, tan catyĩ ra:

—Tatyĩ li Nyoo catyĩ tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivĩ Israel tsi ra tsi ra inga ñuu naha ra —catyĩ ra Agabo.

¹² Tsa tsiñĩ ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cuhun ra ñuu Jerusalén.

¹³ Maa tyin ra Pablo catyĩ ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cuhun yu tyiñu tsa cuenda Jutu Mañi yo Jesús —catyĩ ra tsihin ndi.

¹⁴ Tan tsa nyehē ndi tyin ña cuvĩ tsa jahā ndi tsi ra, jañā ndi. Tan catyĩ ndi: —Na cuvĩ maa cuhva cuñĩ Jutu Mañi yo.

¹⁵ Tsa yahā yacan na ica vahā ndi tsi ndi tan cuahán ndi nda ñuu Jerusalén.

¹⁶ Tan cuahán taahan ra ñuu Cesarea ra yihĩ cuenda ra Cristo, tsihin ndi. Tan cuahán tucu iin ra ñuhu Chipre. Nañĩ ra Mnasón. Cuaha xaan cuiya tsinú iñi ra tsi ra Cristo. Tan tsindaçā ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehē ra Pablo nu nyiĩ ra Jacobo

¹⁷ Tsa tsaā ndi ñuu Jerusalén, nyivĩ yihĩ cuenda ra Cristo si xaan cuñĩ ñi caahán ñi tsihin ndi.

¹⁸ Tan inga quivĩ can cuahán ndi tsihin ra Pablo cua nyehē ndi nu nyiĩ ra Jacobo. Tan ican yucú tucu tandihĩ ra cuvĩ ityĩ nuu tsihin nyivĩ vehe ñuhu.

¹⁹ Tsahā ra Pablo nacumi tsi ra naha. Yahā can tan nacatyĩ tuhun ra tandihĩ nácaa tsatyñũ Nyoo tsi ra nu cahān ra tuhun Nyoo tsihin nyivĩ tsa ñavin nyivĩ Israel cuvĩ.

²⁰ Tsa tsiñĩ ra naha tuhun ihya, jacahnũ ra naha tsi Nyoo, tan catyĩ ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaá ra Moisés.

²¹ Tan ñihí tuhun ñi tyin yooho jacuahá un tsi tandihí nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñí ca tsi tsa cunyaa tuñi Nyoo tsi sehe yá ñi, tan ndi ña cua javaha ca ñi tuhun tsahnu cuhva tsa iyó maa yo taħan tsanaha.

²² ¿Nacaa javaha yo vityin? Tyin nyivi cua ñihí tuhun ñi tyin tsaá un ihya.

²³ Vaha taxin ca tsa javaha un tsa cua cahan ndi tsihin un. Ihya iyó cumi taahan rayi tsa nyaá javaha tsa catyí ra tsihin Nyoo tyin cua javaha ra naha.

²⁴ Cuaahan tsihin ra naha na nduvaha un nuu Nyoo tsihin ra naha. Tan tyahví un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyí ley. Tan tsa javaha un tacan, tan coto tandihí nyivi tyin ña nditsa tsa caahán ñi siqui un, tyin cua nyehe ñi tyin ña nacoq un ley tsa tyaá ra Moisés.

²⁵ Tan tsa cuenda nyivi tsa ñavin nyivi Israel cuví, tan tsinu iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quiti, tan ndi cuñu quiti tsa cavá ñi jucun tan ña tsati niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayi —catyí ra tsahnu vehe ñuhu can naha ra tsihin ra Pablo.

Nu quitsaha caahán yuhu tahan nyivi Israel siqui ra Pablo

²⁶ Tacan tan tsa tuví inga quivi tan cuahán ra Pablo tsihin tandihí tsa cumi taahan ra can naha ra. Tan janduvaha ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihí tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo.

²⁷ Tacan tan tsa cuñí ndihí tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaá xaan tandihí nyivi jahá ra naha, tan tñin ra naha tsi ra Pablo.

²⁸ Tan caná tsaá ra naha tan catyí ra naha:

—Nyooho nyivi Israel, jatinyee ndo tsi ndi. Juvín ra ihya cuví ra tsa tsicá nuu tandihí ñi ityi. Tan jacuahá ra tsi tandihí nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaá ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatíví ra naha —catyí ra naha caná tsaá ra naha.

²⁹ Tacan catyí ra naha tyin nda nu quitsí tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófito. Tan cuñí maa ra naha tyin ra Pablo tsindaca tsi ra tsitsi vehe ñuhu.

³⁰ Tan tandihí nyivi ñuu quitsaha cuvaá ñi. Tan tsinú xaan ñi tsaá ñi. Tacan tan tñin ñi tsi ra Pablo. Tan ixtá caa ñi tsi ra cua ndaca ñi ityi tsata vehe ñuhu, tan numi ñi nacasí ñi yuvehe ñuhu can.

³¹ Tsa cuñí cahñi ñi tsi ra, tan ñihí tuhun ra comandante cuenda andaru tyin tandihí nyivi ñuu Jerusalén iyo xaan caahán yuhu tahan ñi.

³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jañá ñi tsa cañí ñi tsi ra Pablo.

³³ Tacan tan natuhva ra comandante can nu nyii ra Pablo. Tan tava tyiñu ra tsi andaru naha ra tyin na tiin ra naha tsi ra, tan na cuhñi ra naha tsi ra tshin uvi taahan cadena. Yahā can tan tsicā tuhun ra comandante can tsi ra yóo ra cuví ra, tan náa javahā ra.

³⁴ Maa tyin nyivi siin siin tuhun caná tsaā ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru.

³⁵ Cuhva tsa tsaā ra naha nu cuayi vehe can, tan quitsahā nducañá nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra.

³⁶ Tyin tandihi ñi nyicún ñi tsi ra naha, tan caná tsaā ñi tan catyí ñi:
—¡Na cúu ra! —catyí ñi.

Nu juvin ñi maa ra Pablo jacacú tsi ra nuu nyivi

³⁷ Cuhva tsa cua tyihi ra naha tsi ra Pablo tsitsi vehe can, tan quitsahā caahán ra tshin ra comandante:

—¿A cuhva un tsa cahan yu tshin un? —catyí ra tshin ra.

Tan ra comandante can catyí ra tshin ra:

—¿A cuví caahán un yuhu griego?

³⁸ Tun tacan caa, ñavin yooho cuví ra ñuu Egipto tsa quitsi quivi can tan jacañi tahan ra tsi nyivi siqui ra ndacá ñaha tan tava ra cumi mil ra tsahñi ndiyi tsindaca ra tsi ra naha ityi ñuhu ityi —catyí ra comandante can tshin ra Pablo.

³⁹ Tacan tan ra Pablo catyí ra tshin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cuhva un ndatu cahan yu luxu tshin nyivi —catyí ra Pablo tshin ra comandante.

⁴⁰ Tacan tan tsa tsahā ra comandante can ndatu tsi ra, nduvita nyityi ra nu cuayi can tan javahā ra iin seña tyin na cutaxin ñi. Tan tsa cutaxin nyivi quitsahā caahán ra tshin yuhu hebreo, tan catyí ra:

22

¹ —Nyooho tata, tan nyooho yañi, tyāa soho ndo tsa cua cahan yu tshin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tshin nyivi can.

² Tsa tsñi ñi tsa caahán ra tshin ñi tshin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacu yu ñuu Tarso tsa canyí Cilicia. Maa tyin Jerusalén ihya tsahnu yu. Tan ra Gamaliel jacuahā ra tsi yu nácaa tyaa yahvi yu ley tsii tsahnu yo. Tan tacan ñi nducú yu cuhva javahā yu tyiñu nuu Nyoo tshin tsa ñi iñi yu, tumaa tsa javahá ndo vityin ihya.

⁴ Yuhu, nu quitsi tsi tsinyaa ndaha yu tsi nyivi yihí cuenda ra Cristo. Tan tsindaca yu tsi ñi tsa cúu ñi. Tan cuaha ñi rayiñ tan ñaha tiñ yu tsa cahun ñi tsitsi vehe caa.

⁵ Ra jutu tsahnu tsa cuví ityi nuu tshin ra cuví mandoñi naha ra, cuví ra naha tsandaa tyin ra ican naha ra tsahā tutu tsi yu tyin cuví tiñ yu tsi ra yañi yo, ra yihí cuenda ra Cristo ñuu Damasco. Tsahān yu ican tsinanducú yu tsi nyivi tsinú iñi tsi ra Cristo, tyin cua cunuhñi ñi tshin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

*Nu nacatyí tuhun ra Pablo nácaa natsinuñ iñi ra tsi ra Cristo
(Hechos 9.1-19; 26.12-18)*

⁶ Maa tyin cuhva tsa cuahán yu ityi tsa cua tsaá yu ñuu Damasco, maa ora cuví tsi. Tan sana iñi yu tan ndunditsin tanñi cahnu nu cuahán yu jahá iin ñuhu tsa quitsi ityi andivi.

⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenda nyaá ndaha un tsi yu?” catyí ndusu can tsihin yu.

⁸ Tacan tan tsicá tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra.

⁹ Tandihí ra tsa cuahán tsihin yu nyehé ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahan tsihin yu.

¹⁰ Tacan tan quitsahá caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu.

¹¹ Tan cuaá yu jahá ñuhu can, yacan cuenda ra tsa cuahán tsihin yu tñin ra naha ndaha yu tan cuahán ndi nda ñuu Damasco.

¹² Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaá ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan iñi ra.

¹³ Tsañan ra can tsinyehé ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehe inga tsañan” catyí ra tsihin yu. Tan juvin ñi cuhva can tan nanyehe yu. Tan cuví nyehé yu tsi ra.

¹⁴ Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra.

¹⁵ Tyin yooho cua cahan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un.

¹⁶ Tan vityin, ña cuatu ca un. Nduvita tan coondutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

*Nu nacatyí tuhun ra Pablo nácaa tsañan Nyoo tyiñu tsi ra tyin cuhun ra inga
ñuu cucahan ra tuhun ra Cristo*

¹⁷ Yahá can tan vatsi nuhu yu ñuu Jerusalén ihya tan cuhva tsa tsaá yu, tsañan yu vehe ñuhu cahnu tsindacan tahvi yu tsi Jutu Mañi yo. Tan janahá ra iin tsa nyehe yu.

¹⁸ Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu.

¹⁹ Tacan tan quitsahá caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsañan yu tandihí vehe ñuhu. Tan tñin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi.

²⁰ Tan quivi tsa tsiñi ra Esteban ra tsa cahan cuenda un, yuhu nyií ndihí yu ican. Tan ndoo yu vaha tsa tsañiñi ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo.

²¹ Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²² Tyaá soho ñi yacan ña tan quitsahá caná tsaá ñi tan catyí ñi:

—¡Cahñi ndo tsi ra! Tyin ña taahán ca tsi tsa coo ra ñayivi —catyí ñi.

²³ Tan caná tsaá ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñí ñi.

²⁴ Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaá nyivi tsata ra.

²⁵ Maa tyin tsa yaha tsahñi ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñí ndo cañi ndo tsi yu —catyí ra Pablo tsihin ra.

²⁶ Tsa tsiñi ra capitán tsa caahán ra Pablo, tsahán ra tsijacoto ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷ Tacan tan ra comandante can cuahán ra nu nyí ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸ Tacan tan catyí ra comandante can tsihin ra:

—Yuhu cuaha xaan xuhun tyahvi yu tan cuví cuu yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹ Tacan tan andaru tsa cua cañi tsi ra jatsiyó nyaha ra naha tsi ra naha nu nyí ra Pablo. Tan nda cuanda ra comandante tan nayuhvi ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsahán ra Pablo nu ndu iin ra ñuu Israel naha ra

³⁰ Tan tsa tuví inga quivi can tan ra comandante can cuñí ra coto ra náa cuatyí tyaá nyivi Israel tsi ra Pablo. Tan jaña ra tsi ra Pablo. Tan tava tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumí tyiñu cuenda nyivi Israel. Tacan tan tava tyiñu ra na quita ra Pablo vehe caa tan cahun ra nu iyó junta can.

23

¹ Tan ra Pablo nyehe ra tsi tandihi ra tsa ndu iin can naha ra, tan catyí ra tsihin ra naha:

—Nyooho yañi, tandihi quivi nda cuanda vityin nducú yu cuhva javaha yu cuhva cuñí Nyoo. Yacan cuenda vaha cuñí yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra.

³ Tan ra Pablo nacahan ra tan catyí ra:

—Jihna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

⁴ Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

⁵ Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

⁶ Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñi ndo tsi yu tsatyin tsinú iñi yu tyin nyivi tsa tsihí nandoto ñi —catyí ra Pablo.

⁷ Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsahá caahán yuhu tahan ra naha tan natahví sava ra naha.

⁸ Tyin ra saduceo catyí ra naha tyin ña cua nandoto nyivi tsa tsihí. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihí tuhun ihya.

⁹ Tandihí ra naha quitsahá caná tsaa ra naha. Tan nduvitá juhva ra cuví maestro cuenda ley tsa tyaá ra Moisés tsa cutahán tsihin ra fariseo naha ra, tan catyí ra naha:

—Nyēhe ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

¹⁰ Tsa tsiñi tandihí ra naha yacan, quitsahá nduvaá nyico ra naha. Nda cua nayuhví ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru.

¹¹ Tan tsacuaa can quituví Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoq ra Israel naha ra tyiñu tyin cua cahñi ra naha tsi ra Pablo

¹² Tsa inga quivi, juhva ra Israel natuhun tahan ra naha tan ndoq ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha.

¹³ Yaha uvi xico ra naha ndoq ra naha tyiñu ihya.

¹⁴ Tsañan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha: —Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi.

¹⁵ Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsaa ra ihya, cua cahñi ndi tsi ra —catyí ra naha tsihin ra jutu naha ra.

¹⁶ Maa tyin sehe cuhva ra Pablo tsiñi ra tsa natuhún tahan ra naha. Tan tsañan ra vehe andaru nu nyii ra Pablo tsicatyí tuhun ra tsihin ra.

¹⁷ Tacan tan ra Pablo caná ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

18 Tacan tan tsindacá ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa caná ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

19 Tacan tan ra comandante tñin ra ndaha ra luhlu can tan tavá sñin ra tsi ra tan catyí ra tsihin ra:

—¿Náa cuñi un cahan un tsihin yu?

20 Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo.

21 Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihi maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

22 Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhú ra tsi ra luhlu can.

Nu cacú ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

23 Tacan tan ra comandante caná ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cahun ndo ñuu Cesarea cuhva caa iin tsa tsacuaa. Cua cahun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

24 Janduvaha ndo cuayu coso ra Pablo. Tan jaha cuenda vaha ndo tsi ra ityi cahun ndo na tsaá vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

25-26 Tacan tan javahá ra iin carta cundaha ra naha nacuhva ra naha tsi ra Félix. Tan tuhun tsa tyaa ra nu carta, cuvi tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuvi un. Ihya vatsí nacumi tsi un.

27 “Ra Pablo ihya, tñin ra Israel naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuvi ra, tsahan yu tsihin andaru tan jacacú yu tsi ra.

28 Tan cuñi yu coto yu náa cuatyí tyaá nyivi tsi ra, tsindacá yu tsi ra nu iyó junta tandihi ra cuvi mandoñi nyivi Israel.

29 Tan nyehe yu tyin xaan xaan cuñi nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa.

30 Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yoocho. Tan catyí tucu yu tsihin ra tsa xico ñaha tsi ra, na quitsi ndihi ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahá ra.

31 Tacan tan quihñin ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa can tsindacá ra naha tsi ra nda ñuu Antípatris.

32-33 Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaá nuhu ra nda vehe nu yucú ra naha. Tan ra tsa yosó cuayu can naha

ra cuahán ra can naha ra tsihin ra Pablo nda ñuu Cesarea. Tan cuhva tsa tsaá ra naha, nacuhva ra naha carta can tsi ra Félix, tan tsaḥa cuenda ndihí ra naha tsi ra Pablo tsi ra.

³⁴ Tsa yaha tsa cahví ra Félix carta can, quitsaha tsicá tuhun ra tsi ra Pablo nu maa cuví ñuu ra. Tan tsa tsitó ra tyin ra Cilicia cuví ra.

³⁵ Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javaha ra Herodes tahañ tsanaha.

24

Nu cutuñi ra Pablo nuu ra Félix

¹ Yaha uhun quivi tan ra Ananías, ra jutu tsaahnu tsa yihí ndaha inga ca ra jutu, tsaá ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyivi cuví ra. Tsaá ra can naha ra nuu ra Félix tyin cua ndacan ra naha cuatyí tsaha ra Pablo.

² Tacan tan tava tyiñu ra Félix na quitsi ndaca andaru tsi ra Pablo. Tacan tan quitsaha tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi.

³ Nacuhvá xaan ndi tyahvi nyoo tsi yooḥo tata Félix, tyin vaha xaan iñi un.

⁴ Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu.

⁵ Tyin tsitó ndi tyin rayi ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juvin ra cuví ityi nuu tsihin nyivi tsa nyicún tsi ra Jesús ra ñuu Nazaret.

⁶ Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tñi ndi tsi ra, tyin tatsi tuñi ndi tsi ra tumaa cuhva catyi ley maa ndi.

⁷ Maa tyin ra Licias, ra cuví comandante ñihi xaan tyasi ra tan quihñ nyaa ra tsi ra tsi ndi.

⁸ Tan catyí ra tyin tun cuñi ndi ndacan ndi cuatyí tsaha ra, cuñi tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ícan, catyí ra naha tyin tandihí maa tsa caahán ra Tértulo tan nditsa.

¹⁰ Tacan tan ra Félix janaha ndaha ra nu nyaá ra Pablo tyin nacahan ra. Tan ra Pablo quitsaha caahán ra tan catyí ra:

—Si xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya.

¹¹ Tatun cua nducu tuhun un, cua coto un tyin tsa iyó ñi utsi uvi quivi tsa tsaḥan yu ñuu Jerusalén tsijacahnú yu tsi Nyoo.

¹² Tan ña cahañ yuhu tahan yu tsihin ndi intuhun nyivi. Tan ndi ña jacuvaá yu tsi ñi tsitsi vehe ñuhu cahnu. Nduve maa náa javaha yu tandihí ca vehe ñuhu, tan ndi inga ca ityi tsitsi ñuu.

¹³ Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi.

¹⁴ Maa tyin tsa cua catyí yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsii tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa.

Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaá ra Moisés, tan tsinú íñi yu. Tan tandihí tsa tyaá ra cuví ndusu yuhu Nyoo tan tsinú íñi yu.

¹⁵ Tan tsinú íñi yu tumaa tsa tsinú íñi ra ihya naha ra tyin nyívi tsa tsihí cua nandoto ñi inga tsaha, tahan ñi nyívi vaha tan nyívi caquiñi.

¹⁶ Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyívi.

¹⁷ Tan tsa yaha juhva cuiya tsa tsica yu tandihí ñi ityi, tsahan tsaá nuhu yu nda Israel ñuu yu tyin nacuhva cuenda yu xuhun tsa tsaha nyívi tsi yu tsi nyívi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo.

¹⁸ Yacan javahá yu tsitsi vehe ñuhu cahnu. Tan tsa yaha tsa janduvahá yu tsi yu tumaa catyi ley ndi, tan juhva ra Israel ra tsa quee ityi Asia, nyehé ra naha tsi yu ndacan. Maa tyin nduve nyívi cuaha yucú, tan nduve náa javahá ñi.

¹⁹ Tan ra tsa nyehé tsi yu ndacan naha ra, taahán tsi tsa quitsi maa ra naha cahan ra naha náa cuví tsa javahá yu o náa cuatyí tyaá ra naha síqui yu.

²⁰ Tatun ña tacan, na catyi tuhun ra tsa nyecú ihya naha ra tatun náa iin cuatyí yu nañihí ra naha quívi janahma ra cuví ityi nuu tsihin nyívi Israel naha ra tsi yu.

²¹ ¿A ñavin cuenda tsatyin cahán yu iin tuhun tsihin ra tsa yucú junta can? Tan catyi yu: “¿A tatsí tuñi ndo tsi yu tsa cuenda tyin tsinú íñi yu tsa nandoto nyívi tsa tsihí?” —catyi ra Pablo.

²² Tan tsa tsiñi ra Félix tsa cahán ra tacan, tan catyi ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyi ra.

Cahán ra tacan tyin tsitó ra nácaa cuahán tuhun nyívi nyicún tsi ra Cristo.

²³ Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha íñi tsi ra nu nyíi ra, tan cahan ra naha tsihin ra.

²⁴ Tsa yaha juhva quívi tan tsaá nyico ra Félix inga tsaha tsihin ña Drusila ñasihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñi ñi tyaá soho ñi nácaa tuhun tsa tsinú íñi ra tsi ra Jesucristo.

²⁵ Tan ra Pablo quitsahá caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuví javaha yo tsa ña vaha tsa cuñi cuñu ñuhu yo. Tan coo quívi cua tatsi tuñi Nyoo tsi tandihí nyívi. Tan ra Félix nayuhvi xaan ra, tan catyi ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyi ra tsihin ra.

²⁶ Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra.

²⁷ Tan tsa yaha uvi cuiya, tacan tan nacosó tyiñu tsi ra Porcio Festo tyin cundaca ñaha ra. Tyin tsa quitá ra Félix. Tan ra Félix ña cuñi ra tsa cahan nyívi Israel tsi ra, yacan cuenda nacoó ra tsi ra Pablo vehe caa.

¹ Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén.

² Tan tsa tsaq ra ñuu Jerusalén, tacan tan tsaq ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo.

³ Tan tsican ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra.

⁴ Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu kuhva tsa yatyi ñi cua cunuhu nyico yu.

⁵ Yacan cuenda, nyooho tsa cuví ndo ra cumí tyiñu ñuu ihya, cuví cahun ndo tshin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tshin ra naha.

⁶ Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaq ra tsitsi vehe tyiñu ra tan tsinyaq ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra Pablo.

⁷ Kuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha.

⁸ Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

⁹ Maa tyin ra Festo cuñi ra coo vaha ra tshin ra Israel naha ra, yacan cuenda tsica tuhun ra tsi ra Pablo:

—¿A cuñi un cahun un ñuu Jerusalén tyin jandaa yu tyiñu un ndacan? —catyí ra tshin ra.

¹⁰ Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel.

¹¹ Tun tsatyin javaha yu iin cuatyí cahnu tsa taahán tsi cúu yu, ña cua nducu yu kuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tshin ra Festo.

¹² Tacan tan ra Festo, tsa yaha tsa natuhun tahan ra tshin ra jatyinyeé tsi ra tshin tyiñu, tan catyí ra tshin ra Pablo:

—Tsicán un tsa cutuñi un nuu rey cahnu. Vaha. Cua cahun un nuu maa ra —catyí ra tshin ra.

Nu nacatyí tuhun ra Festo tuhun ra Pablo tshin ra Agripa

¹³ Tsa yaha juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tshin ña Berenice nu nyii ra Festo tyin cua kuhva ñi nacami tsi ra.

¹⁴ Tan ndoo ñi ican juhva quivi, tan ra Festo catyí tuhun ra tshin ra cuví rey can tuhun ra Pablo. Tan catyí ra:

—Ra Félix nacoq ra tsi iin ra vehe caa ihya.

¹⁵ Tan tsa tsahān yu űuu Jerusalén, ra jutu tsa cuví ityi nuu, tan ra cuví mandoñi nyívi Israel, tsicān ra naha cuatyí tsaha ra can nuu yu tyin na cuhva yu ndatu tsa cúu ra.

¹⁶ Tan yuhu catyí yu tsihin tandihí ra naha tyin ña tuhvá ra cumí tyiñu cuenda űuu Roma cahñi tsi ndi intuhun nyívi tatun ñaha ca natuhun tahan ñi tsihin ra tsa tsicān cuatyí tsaha ñi, tan nducu ñi cuhva jacacu ñi tsi ñi.

¹⁷ Yacan cuenda, tsa quítsi ra cuví ityi nuu tsihin nyívi Israel can naha ra ihya, ña ndatu yu. Tan juvin ñi inga quívi can tan tsahān yu vehe tyiñu. Tan tsa yahā tsicunyaā yu tan canā yu tsi ra can.

¹⁸ Maa tyin ra tyaá cuatyí síqui ra, nduve náa tuhun ñiñi cahān ra naha. Tsa cuñí maa yu tyin cahnu cuatyí cua tyaa ra naha síqui ra.

¹⁹ Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañi Jesús. Tan catyí ra naha tyin tsa tsihí ra. Maa tyin ra Pablo catyí ra tyin nyito ra.

²⁰ Tan tsa ña ñihí yu nácaa tatsi tuñi yu tsi ra tsa cuenda tuhun can, tsica tuhun yu tsi ra tan catyí yu tsihin ra tatun cuñi ra cuhun ra cutuñi ra nda űuu Jerusalén.

²¹ Maa tyin catyí ra tyin vaha ca tatun cutuñi ra nuu ra Augusto nda űuu Roma. Yacan cuenda tava tyiñu yu na cunyi ra juhva ca quívi tsitsi vehe caa, nda cuanda cuví jacuhun yu tsi ra nuu ra Augusto —catyí ra Festo tsihin ra Agripa.

²² Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³ Tsa inga quívi can tan tsaā ra Agripa tsihin ña Berenice. Iyo xaan caá ñi quihví ñi tsitsi vehe, tyin rey cuví ñi. Tan quihví ndihí tucu ra comandante tan ra cumí tyiñu űuu can naha ra. Tacan tan ra Festo tava tyiñu ra na cuquihin ra naha tsi ra Pablo.

²⁴ Tacan tan quítsahā catyí ra Festo:

—Yooho Rey Agripa, tan nyooho tata, tsa yucú ndo ihya. Nyēhe ndo tsi ra ihya. Tandihí ra Israel űuu Jerusalén tan űuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra.

²⁵ Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicān tsa cutuñi ra nuu ra Augusto. Yacan cuenda cua jacuhun yu tsi ra ndacan.

²⁶ Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nū carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu.

²⁷ Tyin ña vaha tsa jacuhún yu tsi ra tatun nduve náa tuhun caahán yu náa cuatyí javahā ra.

26

Nu quítsahā caahán ra Pablo nuu ra rey Agripa

¹ Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaā ra ndaha ra tan catyí ra tyehen:

2—Si xaan cuñi yu tyin cuví cahan yu nuu yooho, rey Agripa, tan cuví catyi yu tsihin un nácaa tandihi cuatyí tsa tyaá ra Israel naha ra siqui yu.

3 Tyin yooho tsitó un tandihi tuhun tsa iyó yo tsa cuví yo nyívi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyi tuhun ra Pablo tsihin ra Agripa nácaa ñayívi tsicoo ra tsa ndi cumañi ca quihvi ra cuenda ra Cristo

4 Tandihi nyívi Israel tsitó ñi nácaa tsicoo yu nda ñuu yu quívi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén.

5 Cuaha xaan cuiya nacotó ñi tsi yu. Tatun cua cuhva cuenda ñi cua catyi ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihi nyívi.

6 Tan vityin cuñi nyívi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyívi tsa tsihi, tumaa catyi ra tsihin tsii tsaahnu yo naha ra tahañ tsanaha.

7 Tandihi nyívi tsa cuví tata tsa utsi uvi taahan sehe ra Israel ndatú tucu ñi nyehé ñi nu cua janandoto Nyoo tsi nyívi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí siqui yu vityin, yooho rey Agripa.

8 ¿A ña tsinú iñi nyooho tyin Nyoo cua janandoto ra tsi nyívi tsa tsa tsihi?

Nu tsahaq cuenda ra Pablo tsi ra Agripa cuhva tsinyaq ndaha ra tsi nyívi yihí cuenda ra Cristo

9 Tahañ tsanaha juven ñi maa yu tsicá iñi yu tyin vaha tsa tatsi tuñi yu tsi nyívi tsinú iñi tsi ra Jesús, ra ñuu Nazaret.

10 Tan tacan javahá yu nda ñuu Jerusalén tsihin ndatu tsa tsahaq ra jutu tsa cuví ityi nuu naha ra. Tan cuaha nyívi tsa tsinú iñi tsi ra Cristo tyihí yu vehe caa. Tan tatun tsahñi ra naha tsi ñi, vaha xaan cuñi yu.

11 Tan cuaha xaan tundoho nyehé ñi jahá yu. Tan nducu yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javahá yu tandihi maa vehe ñuhu nyívi Israel. Javahá yu tacan tsa cuenda tsa xaan cuñi yu nyehé yu tsi ñi. Tan tandihi inga ñuu tsahañ yu tsinyaq ndaha yu tsi ñi.

Nu nacatyí tuhun nyico ra Pablo nácaa nanduvi ra, ra yihí cuenda ra Cristo (Hechos 9.1-19; 22.6-16)

12 Tan tsa cuenda yacan cuahán yu nda ñuu Damasco quívi can tyin tsahaq ra jutu tsa cuví ityi nuu naha ra ndatu tsi yu.

13 Maa tyin ityi cuahán yu cuhva ora cuví tsi, yooho Rey. Tan quítsi ñuhu ityi siqui. Tan jandunditsin tsi nu cuahán yu tsihin tandihi ra tsa cuahán tsihin yu. Maa tyin yaha ca nditsin tsi tan ñavin ca ñuhu ñicanyii.

14 Tacan tan tandihi ndi nduvá ndi nu ñuhu. Tan tsifi yu iin ndusu tsa caahán tsihin yu, tsihin yuhu yo, tan catyi tsi tsihin yu: “Saulo, Saulo, ¿nacuenta nyaá ndaha un tsi yu? Tumaa iin quiti tsañi nyaá ti tsata tsa xaan tsa jaquihín ityi ra tsi ti, tacan javahá un tyin juven ñi tsi maa un jañicuehé un”, catyi ndusu can tsihin yu.

15 Tacan tan catyi yu: “¿Yóo yooho cuví un taa?” Tan Jutu Mañi yo catyi ra tsihin yu: “Yuhu cuví ra Jesús, juven ra tsa nyaá ndaha un.

¹⁶ Nduvita nyityi. Tyin quituvj̄ yu nuu un ihya tyin tacan tan cua jaha tyiñu un nuu yu, tan cua cuvi un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca.

¹⁷ Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juven ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví.

¹⁸ Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihi tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu.

¹⁹ Yacan cuenda yoohe rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu.

²⁰ Tacan tan tsa jihna ñi quitsahá caahán yu tuhun ra nda ñuu Damasco. Yahá can tan cahán yu tsihin nyivi ñuu Jerusalén tan tandihi ca ñuu tsa cayucú Judea. Tan caahán ndihi yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo.

²¹ Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahni ra naha tsi yu.

²² Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihi nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuvi nu cuahán ca tsi, yacan caahán yu.

²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yahá tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyivi tyin cua jacoto ra nácaa cua cacu ñi, tahan ñi nyivi Israel tan nyivi tsa ñavin nyivi Israel cuví —catyí ra Pablo.

Nu nducú ra Pablo cuhva tsa tsinu iñi ra rey Agripa tsi ra Cristo

²⁴ Cuhva tsa catyí ra Pablo tuhun ihya, ra Festo caná tsaa ra, tan catyí ra: —¡iñi yoohe ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin iñi yu ña vaha cuñi, yoohe tata Festo. Tyin tsa caahán yu, maa ñi tsa nditsa tan tsa vaha cuví tsi.

²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yii caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi.

²⁷ Yoohe rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahán tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñi yoohe tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yoohe ñi, tyin na tsinu ndihi tucu iñi tandihi nyivi tsa yucú tyaa soho tsa caahán yu ihya. Intuhun ñi tsa ña cuñi yu, tsa quihí cadena ndaha ndo tumaa maa yu vityin —catyí ra Pablo.

³⁰ Tsa yaha tsa cahan ra Pablo tuhun ihya, nduvita rey tan ra ndaca ñaha tan ña Berenice, tan tandihi ra yucu ican naha ra.

³¹ Tan tsa yaha quita ñi, tan quitsaha natuhun tahan ñi:

—Nduve cuatyí ra ihya tsa ñihi xaan. Ña taahan tsi cúu ra. Tan ndi ña taahan tsi cunyií ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

27

Nu jacuhun ra Festo tsi ra Pablo nda ñuu Roma

¹ Quivi tsa tyaa ra Festo tan ra Agripa cuhva tyin jacuhun ra naha tsi ndi nda ñuu Roma tsa canyií Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto.

² Tan cuahan ndihi tucu ra Aristarco tsihin ndi. Ra tsa quee ñuu Tesalónica tsa canyií ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuii cuhun nyico tsi ñuu tsa cayucú Asia yatyin ñi yuhu ndutya ñuhu.

³ Tsa inga quivi tsaq ndi puerto Sidón. Tan ra Julio vaha nyivi cuví ra tsihin ra Pablo. Tan tsaahá ra tsa cuhun ra Pablo nu iyó ra vaha iñi tsi ra ñuu can tan jatinyee ra naha tsi ra.

⁴ Yaha can tan quita ndi ñuu Sidón tan jandaq ra naha jahma tsa nyisó yutun ndoo can tan tsihin tsa tandahñi tatyí jahma can tan cuahan ndi. Tan ñihi xaan yihí tatyí ityi nu cuahan ndi. Yacan cuenda yaha tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can.

⁵ Tacan tan yaha sava ndi nu ndutya ñuhu ityi nuu Cilicia tan Panflia, tan tsaq ndi iin ñuu tsa nañi Mira tsa canyií Licia. Tan quita ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahan ndi.

⁷ Cuaha quivi tsica ndi tyin cuee ñi cuahan ndi. Tsihin tundoho tan tsaq ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaahá tsi tsa cuhun ca ndi ityi nuu, tan yaha ndi yatyin ñi ñuu Salmón tsa canyií ñuhu Creta. Tan navico ndi ityi yuhu ñuhu Creta.

⁸ Nducú ndi cuhva tsa cuhun ndi yuhu ndutya ñuhu, maa tyin tsihin tundoho tan tsaq ndi nu nañi Buenos Puertos yatyin ñi ñuu Lasea.

⁹ Tsa cuaha xaan quivi yaha tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yaha quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsaahá cuenda ra tsi ra jacacá yutun ndoo can naha ra,

¹⁰ tan catyí ra:

—Tandihí nyooho ra yucu ihya, tya soho ndo tuhun tsa cua cahan yu. Nyehé yu tyin ica xaan cuhva cuahan yo. Tan tuví iñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

11 Maa tyin ra capitán cuenda andaru can tyaa yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo.

12 Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cahun yo nda ñuu Fenice tsa canyíi juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyíi tsi tyo cana ñicanyii —catyí ra naha.

Nu ñihi xaan yihí tatyí nu ndutya ñuhu

13 Tacan tan quitsaha yihí luxu tatyí tsa quitsi ityi sur. Tan cuñi maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cahun ndi tshin yutun ndoo yatyin ñi yuhu ñuhu Creta can.

14 Ña cuaha ñi tsicá ndi tan quitsaha yihí tatyí xaan tsa quitsi ityi norte. Tan tandahá tsi yutun ndoo inga ityi.

15 Tan ña cuví ca cahun ndi ityi nuu ca tsa cuenda tatyí can. Tan jañá ndaha ndi na cahun maa yutun ndoo tshin tatyí ndáa ityi cuñi maa tsi.

16 Tan yahá ndi ityi tsata iin ñuhu luhlu tsa nañi Claudia tyin ña ñihi xaan yihí tatyí ityi can. Tan tshin tundoho naquihin ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya.

17 Tan tsa yahá natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsahñi ra naha yutun ndoo can tshin taahan yoho tyin coo tunyee ifni itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañi tsi Sirte. Yacan cuenda januu ra naha jahma yutun ndoo can tan tsahá ra naha tsa cahun tsi cuhva tandahá tatyí.

18 Tan tsa inga quivi juvin ñi ñihi xaan yihí tatyí. Yacan cuenda quitsaha tyihí ra naha carga tsa yihí tsitsi yutun ndoo can nuu ndutya ñuhu.

19 Tan tsa tsinu uñi quivi quihin ndi ndaha tyiñu yutun ndoo can tan tyihí ndi nu ndutya ñuhu.

20 Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaa ca ndi cuhva tsa cua cacu ndi.

21 Cuaha quivi yahá tan ña tsatsí ndi. Tacan tan catyí ra Pablo tshin tandihí ra naha:

—Nyehe ndo, vaha ca tun tsatyin tyaa yahvi ndo tuhun tsa cahan yu quivi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo.

22 Tan cua cunaa ndihí yutun ndoo ihya, maa tyin ña caca ifni ndo tyin ndi intuhun yo tan ña cua cúu yo.

23 Tyin Nyoo cuví ra yihí ndaha tsi yu, tan jahatyinú yu tyiñu ra, juvin ra janahá ra iin tsa janahá tsi yu cuñi. Tan quituví iin ángel nuu yu.

24 Tan catyí ángel can tshin yu: “Ña nayuhvi un, Pablo. Tyin cuñi tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tshin un tsitsi yutun ndoo”, catyí ángel can tshin yu.

25 Yacan cuenda nyooho tsa yucú tsitsi yutun ndoo ihya jandu iin ndo ifni ndo. Tyin yuhu tsinú ifni yu tsi Nyoo. Tan tsitó vaha yu tyin cua cuví tumaa cuhva catyí ángel can tshin yu.

26 Vasu cua nyee yutun ndoo ihya, maa tyin cua tsaa yo iin ñuhu luhlu —catyí ra Pablo tshihin tandihí ndi.

27 Tan tsa ndihí tsahun quiví tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaa ndi iin ñuhu.

28 Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru.

29 Tan yuuhví ra naha coto nañi yutun ndoo can tsata yuu. Yacan cuenda januy ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñí ra naha tsa cunditsin.

30 Tan ra jacacá yutun ndoo can naha ra tyaá ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha.

31 Maa tyin ra Pablo jacoto ra tsi ra capitán tan tsi andaru tan catyí ra: —Tatun ña cua ndoo ra can naha ra tsitsi yutun ndoo, nyooho ña cua cuví cacu ndo —catyí ra tshihin ra naha.

32 Tacan tan andaru tsahnyá ra naha yoho yutun ndoo luhlu can. Tan jacanacava ra naha can nu ndutya.

33 Tan tsa naa ca ra Pablo catyí ra tshihin tandihí ra naha:

—Tsa iyó utsi cumi quiví tsa ña tsatsí ndo tan ña quixí ndo.

34 Catyí yu tshihin ndo, çatsi ndo vityin. Ñiñi xaan cuñí tsi tsa catsi yo tyin tacan tan ndunyeec cuñu ñuhu yo. Tyin cua cacu yo tan ndi intuhun ixi jiñi yo tan ña cua cunaa.

35 Tan tsa catyí ra Pablo tuhun ihya, quihín ra iin paan tan nacuhva ra tyahvi nyoo tsi Nyoo nuu tandihí ra naha. Tacan tan tahví ra tan quitsahá tsatsí ra.

36 Tacan tan tandihí ra naha ndu iin ca iñi ra naha tan tsatsj ndihí ra naha. 37 Tan tsa tandihí ndi tsa yucú ndi tsitsi yutun ndoo can, quitá uvi cientu uñi xico tsahun iin ndi.

38 Cuhva tsa ndihí tsatsj ra naha cuhva cuñí ra naha tan jacuhún ra naha yitín tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaa tsi yatyin ñi yuhu ndutya.

Nu nyee yutun ndoo

39 Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaá ra naha cuhva nyehe ra naha tatun cuví jacuhun ra naha yutun ndoo ícan.

40 Tsahnyá ra naha yoho tsa nuuhñi caa vee can. Tan nacoq ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsahá quihín tatyí jahma can, tan jacuhún tsi yutun ndoo nda nu iyó nyiti can.

41 Tan tsaá tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsahá tahví cuatyí can tsa cuenda tsa ñiñi xaan cañi ndutya ñuhu can.

42 Tacan tan andaru cuñí ra naha cahñi ra naha tsi ra cuahán cua cutuñi naha ra tyin coto cunu ra naha.

⁴³ Maa tyin capitán andaru cuñi ra jacacu ra tsi ra Pablo. Yacan cuenda ña tsaha ra tsa cahñi ra naha tsi ra can naha ra. Tan catyi ra tyin ndaa ra tsitó sutya, na cahun cuee ñi ra naha nu ndutya tan quita ra naha nda ñuhu ityi.

⁴⁴ Tan tandihí ca ra tsa ña cuví sutya, na cahun ra naha nu vitu tsa nyisó yutun ndoo, tan juhva ra naha na cahun ra naha tsihin vitu tsa tahvi cuatyí jahá ndutya ñuhu. Tan tacan cacu tandihí ndi tan quita ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yahá cacu ndi tan catyi nyivi iyó ñuhu can tyin nu yucú ndi can nañi tsi Malta, o Melita.

² Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyi ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi.

³ Tacan tan ra Pablo naquihín ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsj yihí ti ndaha ra, tan ticaá tsico ti ndaha ra.

⁴ Cuhva tsa nyehe nyivi ñuhu can tyin ticaá coo can ndaha ra, quitsaha natuhún tahan ñi tan catyi ñi:

—Ra ihya nyivi tsahñi ra, tun cuví, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyi ñi.

⁵ Maa tyin ra Pablo naquisi ra tsi coo can, tan canacava ti nu ñuhu, tan nduve náa tahan ra.

⁶ Tandihí ñi ndatú ñi náa kuhva ndaa nu tyaa ti, a náa kuhva cua cúu ra. Maa tyin tsa yahá ndatu xaan ñi, tan nyehe ñi tyin nduve maa náa tahan ra. Tacan tan nasama ñi kuhva tsicá iñi ñi, tan quitsaha catyi ñi:

—Ra ihya cuví iin nyoo —catyi ñi.

⁷ Yatyin ñi can canyií ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra.

⁸ Tan jutu ra ñihi xaan cuuhví ra tsihin cahñi tan tsa tsiyó ra. Tan tsahan ra Pablo tsinyehe ra nu canyií ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvaha ra.

⁹ Yahá can tan quitsaha tsaa cuaha nyivi cuuhví tsa iyó ñuu can. Tan nduvaha ndihí ñi.

¹⁰ Tan tandihí ñi vaha xaan tyanuú ñi tsi ndi. Tan quivi quihvi ndi tsitsi iin yutun ndoo tsa cua cahun ndi, tsahá ñi tandihí tsa cua cutyiñu ndi ityi cahun ndi.

Nu tsaq ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandria tsa canyií nu cuví Egipto. Tan ndoo tsi Malta nda yahá yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux.

¹² Tan tsaq ndi ñuu Siracusa. Tan ican ndoo ndi uñi quivi.

¹³ Tacan tan quita ndi tan cuahán ndi ityi yuhu ndutya ñuhu nda cuanda tsaq ndi ñuu Regio. Tan tsa inga quivi can ñihi xaan yihí tatyí tsa quitsj ityi sur tan tsicá ndi uvi quivi tan tsaq ndi ñuu Puteoli.

¹⁴ Ican ñihí tahan ndi tsihin juhva ra hermano naha ra. Tan catyi ra naha tsihin ndi tyin ndoo ndi iin vitya tsihin ra naha. Yahá can tan cuahán ndi nda ñuu Roma.

¹⁵ Tan nyiví yihí cuenda ra Cristo ñuu Roma can ñihí tuhun ñi tyin cua tsa ndi. Tan tsahan ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihí tahan ñi tshin ndi nda nu naní Tres Tabernas. Tan tsa nyehe ra Pablo tsi ñi, nacuhva ra tyahví nyoo tsi Nyoo. Tan ndu iin ca iñi ra.

¹⁶ Cuhva tsa tsaá ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaha ra can tsa coo sñn ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quiví tsa tsaá ndi ican, tacan tan tava ra Pablo tyiñu na quitsi ra cuví ityi nuu tshin nyiví Israel tsa iyó ñuu Roma can naha ra. Tan cuhva tsa ndu iin ra naha, quitsaha catyí ra tshin ra naha:

—Nyooho yañi, vasu nduve náa javaha yu tsi nyiví Israel tahan yo, tan ndi nduve náa javaha yu siqui tuhun tsahnu cuhva iyó yo, maa tyin tsaha cuenda ra Israel naha ra tsi yu tsi ra ñuu Roma naha ra. Tan tsinyi yu vehe caa ñuu Jerusalén ndaha ra ñuu Roma naha ra.

¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javaha yu.

¹⁹ Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsicay yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha.

²⁰ Yacan cuenda caná yu tsi nyooho tyin nacoto yu tsi ndo, tan catyí tuhun yu tshin ndo tyin nuuhñi yu tshin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyiví Israel —catyí ra Pablo.

²¹ Tacan tan catyí ra Israel naha ra tshin ra Pablo:

—Ña tsitó ndi tuhun yooho. Tan yofñi jacoto tsi ndi, ndi tshin carta, tan ndi ra ñuu yo tsa quee nda Judea ña cahayn ra naha tuhun yooho, tan nduve náa cahayn ra naha siqui un.

²² Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandihí ñi ityi tan caahán nyiví siqui tuhun tsa ihya —catyí ra Israel naha ra tshin ra Pablo.

²³ Tacan tan natuhun tahan ra naha ndaa quiví cua cuhun ra naha inga tsaha. Tsa tsaá quiví can, tsaá cuaha nyiví nu iyó ra Pablo. Tan quitsaha caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tshin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javaha ra Pablo tyin cuñi ra tsa tsinu iñi ñi tsi ra Jesús.

²⁴ Yihí ñi tsinú iñi ñi tsa caahán ra. Tan inga ñi ña tsinú iñi ñi.

²⁵ Tan ña iin tsicá iñi ñi, sñn sñn tuhun caahán ñi. Tan quitsaha tsinuhú ñi. Tan ra Pablo catyí ra tshin ñi:

—Nditsa tsa cahayn Tatyí Ii Nyoo tshin ra Isaías ra cuví ndusu yuhu ra tahan tsanaha, tyin na cahayn ra tshin tsi tsaahnu yo. Tan catyí ra:

²⁶ Cuaahan tan cahayn un tyehen tshin nyiví ihya: Nyooho cua cuñi ndo tuhun Nyoo, maa tyin ña cua cutuñi iñi ndo. Cua nyehe ndo tshin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

²⁷ Tyin añima ñi tsa ndundava xaan tsi.

Tsiñi ñi, maa tyin ña tyaa yahví ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tshin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyi ra Isaías jahā Tatyí li Nyoo tahañ tsanaha.

²⁸ Coto vaha nyooho tyin vityin tan ityi nuu ca cahun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyi ra Pablo tsihin ñi.

²⁹ Cuhva tsa catyi ra Pablo tyehen, ra Israel cuahán ra naha juvin ñi caahán yuhu tahañ ra naha tsa cuenda tuhun tsa cahañ ra Pablo tsihin ra naha.

³⁰ Uvi cuiya ndoq ra Pablo vehe nu nyí ra cuenda yoo ñuu Roma can. Tan vaha caahán ra tsihin tandihí nyivi cuahán vehe ra.

³¹ Tan tsihin tsa nñi iñi ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasí nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsaha tyaá ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Cana Nyoo tsi yu, tan nacatsí ra tsi yu tyin caca yu jacoto yu tuhun tsa jacacú ra tsi yo tsi nyivi.

² Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaá ra naha nu tutu ra.

³ Juvín tuhun ihya caahán tyin Jutu Mañi yo Jesucristo, Sehe Nyoo, quitsí ra nu ñuhu ñayivi tan nanduví ra tumaa maa yo. Tan cuví ra tata ra rey David.

⁴ Tan Nyoo jacoto ra tsi yo tsihin Tatyí lí ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra.

⁵ Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nani cahnu nu ñuhu ñayivi tsi ra tan na tyaá yahvi ñi tsi ra.

⁶ Tan juhva ñi ícan cuví tucu nyoocho tyin tsa nacatsí ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyoocho tsa iyó ñuu Roma. Nyoo cuñí xaan ra tsi ndo tan cana ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñí ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyoocho tyin tandihí ñi ityi caahán nyivi tyin tsinú xaan iñi ndo tsi ra Jesucristo.

⁹ Jahá tyiñu yu tyiñu Nyoo tsihin tsa ñi iñi añima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo.

¹⁰ Tan tsicán yu tsi ra na cuví cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu.

¹¹ Tyin cuñí yu jatyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihí ca ndo tsi ra.

¹² Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñi yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quitsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javaha yu tsihin nyivi inga ca ñuu.

¹⁴ Tyin tsa ñiñi cuñi tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho.

¹⁵ Yacan cuenda, cuñi yu cahan yu tuhun ra Cristo tsihin nyoocho tsa iyó ndo Roma ihya.

Tuhun Nyoo iyó xaan tunyee iñi itsi

16 Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyívi tsa tsinú iñi tsi ra Cristo. Tsa jihna ñi maa ñi maa tsihin nyívi Israel cahán ndi tuhun ra Cristo, maa tyin vityin caahán ndihí tucu ndi tsihin nyívi tsa ñavin nyívi Israel cuví.

17 Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juven ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyívi tsa janduvahá Nyoo añima, iyó ñi ñayívi tsa tsihin tsa tsinú iñi ñi tsi ra.”

Tandihí nyívi tan iyó cuatyí ñi

18 Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyívi tsa nditsa.

19 Tsitó ñi tsa iyó Nyoo tyin juven ñi maa ra janahá can tsi ñi.

20 Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee iñi tsi ra. Nyívi tsa ña cuñí coto tsi Nyoo ña cua coo tucahnu iñi tsi ñi.

21 Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahví nyoo tsi Nyoo tyin maa ñi maa tsa iyó nu ñuhu ñayívi tyaá jiñi ñi. Tan tsa cuenda yacan ndusohó ñi.

22 Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi.

23 Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyívi tuhvá tsihi, tan nda cuenda tsitoho tsa caá tumaa caá saa, tan coo, tan quití iyó cumi tsaha.

24 Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu.

25 Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahví ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuví tsi tacan.

26 Yacan cuenda jañá ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyi, tan ña vaha tacan.

27 Tan juven ñi tacan javahá tucu rayi, nacoó ra naha tsa iyó ra naha tsihin ñasihí ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

28 Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi.

29 Tyin tandihí nuu tsa ña vaha javahá ñi. Ñiñaha tsicoó ñi tsihin rayi tan ña tindahá ñi. Rayi tsicoó ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñí ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyívi. Tsahñí ñi nyívi. Cañí tahan ñi tsihin nyívi ñi. Jandaví ñaha ñi. Quiñí iyó ñi tan caahán ñi cuendu.

30 Caahán ñi ndavaha ñi siqui inga nyívi. Ndasí cuñí ñi nyehe ñi tsi Nyoo. Caahán nyaá ñi tsi nyívi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahví ñi tsi jutu ñi, tan ndi tsi sihi ñi.

31 Ña cuñí ñi cutuñi iñi ñi. Ña javahá ñi tsa catyí ñi tyin cua javaha ñi. Ña cuñí maa ñi tsi ndi intuhun nyívi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyívi.

32 Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyívi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyívi javahá tacan, sñi xaan cuñí ñi.

2

Tatsi tuñi Nyoo tsi nyívi maa tyin tshin tsa nditsa

1 Nyooho tsa nyehé cuatyí tsa javahá inga nyívi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihí ndo cuatyí tsa javahá ñi.

2 Tsitó yo tyin Nyoo tatsi tuñi ra tsi nyívi tsa javahá tacan, maa tyin tshin tsa ndaa tan tsa nditsa cua tatsi tuñi ra.

3 Nyooho tsa jacutuñi tsi nyívi tan javahá ndo juvin ñi tsa javahá ñi, cua tatsi tuñi Nyoo tsi ndo.

4 ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñí ra tsa nasama ndo cuhva iyó ndo.

5 Maa tyin nyooho jandavá xaan ndo añima ndo. Tan ña cuñí ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihí ca cua tatsi tuñi ra tsi ndo tsa cuenda can quívi cua tatsi tuñi ra tsi nyívi tshin tsa ndaa tan tsa nditsa.

6 Tan cua tyahví ra tsi intuhun intuhun yo nácaa taahán maa tsi tsi yo tsa cuenda tsa javahá yo.

7 Nyoo cua cuhva ra ñayívi tsa ña cua naa maa coo nyívi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñí ñi coo cuiñi ñi tshin ra. Cua ñihí ñi tandihí yacan tyin nanducú ñi can.

8 Maa tyin cuaha ca tsa uhví cua janyehe ra tsi nyívi tsa javahá tsa cuñí maa ñi, ñi tsa ña tyaá yahvi tuhun nditsa, tan javahá ñi tsa ña vaha.

9 Cuaha xaan tundoho tan tsa uhví cua nyehe tandihí nyívi tsa javahá tsa ña vaha. Tsa jihna ñi cua tatsi tuñi ra tsi nyívi Israel, nyívi cuenda ra. Tan tsa tsinu uvi cua tatsi tuñi ndihí ra tsi nyívi tsa ñavin ñi Israel cuví.

10 Maa tyin tandihí nyívi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añima ñi. Jihna ca nyívi Israel cua ñihí tandihí tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihí ndihí ñi tandihí can.

11 Tyin Nyoo inducu ñi cuñí ra nyehé ra tsi iin yo tan tsi inga yo. Ña tavá tsíyo ra ndi intuhun yo.

12 Tyin nyívi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahví ñi ley can. Tan nyívi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.

13 Tyin nyívi tsa javahá cuhva catyí ley Nyoo, ñi ican cuví nyívi vaha nuu ra. Maa tyin nyívi tsa tsitó ñi maa ley tan ña javahá ñi tsa catyí ley can, ña cua cacu ñi.

14 Nyívi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi.

15 Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi.

16 Tacan cua cuví quiví cua jacutuñi ra Jesucristo cuatyí tandihí nyívi jaha Nyoo. Cua cutuñi tandihí maa nyívi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyívi Israel nyicún ñi ley Nyoo tsa tyaá ra Moisés

17 Maa tyin nyooho nyívi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyívi Nyoo cuví ndo.

18 Tan tsitó ndo cuhva cuñi Nyoo tan ley can janahá tsi tsi ndo tsa nacatsí ndo tsa vaha.

19 Tan cuñi tucu ndo tyin vaha jaquihín ityi ndo tsi nyívi cuaa, ñi tsa ña tsitó ley. Jandunditsín ndo nu yucú nyívi nu naa, cuñi maa ndo.

20 Tan cuñi tucu ndo tyin tsitó ndo tandihí ley Nyoo tan jaquihín ityi ndo tsi nyívi tsa ña tsitó, ñi tsa ñaha ca caca vaha tsihin Nyoo.

21 Tatun tsitó ndo jacuahá ndo tsi inga nyívi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo?

22 Juvín ñi catyí ndo tyin ña vaha coo inga ñaha tsi iin rayí, o inga rayí tsi iin ñaha, ¿nacuenda tyin maa ndo javahá ndo tacan? Ndasi cuñi ndo nyehe ndo tsitoho, ¿nacuenda tyin suhú ndo ndaha tyiñu tsa iyó tsitsi vehe ñuhu can?

23 Nduyaá ndo tsihin tsa tsitó ndo ley Nyoo, tan tshá ndo ticanuu tsi ra tyin ña tyaá yahvi ndo ley ra.

24 Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi siqui Nyoo tsacatyí nyooho.”

25 Nditsa tyin circunción tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can.

26 Maa tyin rayí tsa nduve tuñi Nyoo nyisó, tan javahá ra cuhva catyí ley can, cua naquihín Nyoo tsi ra tumaa tsatyin nyisó ra tuñi can.

27 Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo.

28 Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo.

29 Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí Ii Nyoo tyaá tuñi ra añima ñi, tan ñavin cuñu ñuhu ñi. Tatyí Ii Nyoo javahá can, ñavin ley tsa tyaá ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

3

1 ¿Nacaa jatyinyee tsa cuví yo nyívi Israel tsi yo? ¿O nácaa jatyinyee tuñi Nyoo tsi yo?

2 Cuaaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tshahá ra ley maa ra tsi yo tsa cuví yo nyívi Israel.

3 ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra?

⁴ ¡Ñã cua jandihî ra! Na cutuñi iñi yo tyin Nyoo ñã vatya ra. Vasu ndi maa tandihî nyivî vatya ñi, ra ican javahá ra tandihî tsa caahán ra. Tyin catyî nu tutu ra tyehen:

Jutu Mañi yu, cua nyehe nyivî tyin ñã vatya un.

Tan cua coto ñi tyin nditsa tsa caahán un.

⁵ Tsa caquiñi tsa javahá tandihî yoo, tsa iyó nu ñuhu ñayivî ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ñã nyahyu tsi. Tacan cuvî yo tsihin Nyoo.] Tun tacan çã cua catyî yo tumaa catyî nyivî tyin ñã vaha tsa tatsi tuñi Nyoo tsi yo tyin janahá yo tyin vaha ra?

⁶ Nyivî catyî ñi tyin ñã vaha tatsi tuñi Nyoo tsi yo. Maa tyin ñã nditsa ñi tyin Nyoo iyó ndatu tsi ra tsa tatsi tuñi ra tsi tandihî yo.

⁷ Tatum javahá nyivî tsa ñã vaha tan yacan janahá tyin Nyoo vaha ra, çã taahán tsi tatsi tuñi ra tsi ñi? Catyî ñi tyin ñã taahán tsi, maa tyin ñã nditsa.

⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyivî tyin Nyoo vaha ra. Yihî ñi catyî ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyî tsa caahán ñi cuendu siqui ndi.

Tandihî yo tan iyó cuatyî yo

⁹ Tan nácaa çã vaha ca yoo tsa cuvî yo nyivî Israel tan ñavin ca inga nyivî? Ñã vaha ca yo. Tyin tsa yahã janahã yu tsi ndo tyin tandihî yo tan iyó cuatyî yo. An cuvî yo nyivî Israel, o ñã cuvî yo nyivî Israel, maa tyin ndacá ñaha cuatyî tsi yo.

¹⁰ Tacan catyî nu tutu Nyoo, nu catyî tsi tyehen:

Ndi intuhun nyivî vaha nduve iyó.

¹¹ Nduve nyivî cuñî cutuñi iñi tuhun Nyoo.

Yofñi cuñî nanducu tsi ra.

¹² Tandihî ñi nacoq ñi tsi Nyoo, tan tandihî ñi tan cuanaq ñi.

Ndi intuhun ñi tan ñã javahá ñi tsa vaha.

¹³ Jucun ñi cuvî tsi tumaa iin ñaña ndiyî tsa tichó.

Tan tsihin yaa ñi caahán ñi cuendu.

Yihî venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyî xaan tsahñî ñi tsi tahan ñi.

¹⁶ Janyehé ñi tundoho tan tucuihya iñi tsi nyivî tsihin cuhva iyó ñi.

¹⁷ Tan ñã tsitó ñi nácaa coo taxin ñi tsihin Nyoo, tan ndi tsihin nyivî.

¹⁸ Ndi ñã tsicá iñi ñi tatun coo iin quivî cua tatsi tuñi Nyoo tsi ñi, catyî tuhun Nyoo nu tutu ra.

¹⁹ Tsitó yo tyin tandihî tsa caahán ley Nyoo tsa tyaa ra Moisés, cuvî tsi tsa cuenda nyivî tsa yihî ndaha ley can, tyin tacan tan ñã cuvî catyî ñi tyin nduve cuatyî ñi iyó. Maa tyin coto tandihî nyivî iyó nu ñuhu ñayivî tyin cua tatsi tuñi Nyoo tsi ñi tsa cuenda cuatyî ñi.

²⁰ Ley can ñã cuvî janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyî yo.

Tsa cuenda tsa tsinú iñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuvî ndusu yuhu Nyoo janahá nácaa coo vaha yo tsihin Nyoo.

²² Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin.

²³ Tandíhi yo tan iyó cuatyí yo, tan tsa cuenda yacan ña cuví quihvi yo nu ndacá ñaha Nyoo.

²⁴ Maa tyin tsahá maa ra tsa vaha ra tsi yo, tan yacan jahá tsa naquihín cuenda ra tsi yo tumaa tsatyin vaha yo, tyin tsa yahá tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahví tsi yo.

²⁵ Nyoo jaquitsí ra tsi ra Cristo tyin cúu ra nu cruu tan cati ra niñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahan tsanaha, Nyoo ña tiñ cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi.

²⁶ Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihín ra tsi tandíhi yo tsa tsinú iñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandíhi tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.

²⁸ Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvín ñi cuví tucu ra Nyoo ñi can.

³⁰ Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve.

³¹ Tatun tacan, ¿a cuñi tsi catyí tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoo ra Abraham janahá tsi tsi yo nácaa nduvahá yo nuu Nyoo

¹ ¿Náa catyí yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra?

² Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo.

³ ¿Náa catyí nu tutu Nyoo? Catyí tsi tyin ra Abraham tsinu iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra.

⁴ Vaha, vityin cua huhva yu iin huhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyívi huhva maa xuhun tsi ra tun ña jahá tyiñu ra.

⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyívi iyó cuatyí tsa ña nducú cacu tsihin tsa javahá ñi huhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra.

⁶ Ra David cahán ra siqui tsa sii cuví tsi nyívi tsa naquihín cuenda Nyoo tumaa tsatyin vaha ñi tan ña tiñ cuenda ra cuatyí tsa javahá ñi.

⁷ Tyehen catyí ra David:

Sii xaan cuví tsi nyívi tsa jahá Nyoo tucahnu iñi tsi tan ña jahá ra cuenda cuatyí ñi.

8 Sii xaan cuví tsi ñi tsa ña tñin cuenda Nyoo cuatyí.

9 ¿A cuñí maa ndo tyin tsa cuenda nyívi nyisó tuñi Nyoo ñi cuví tusii ñi ihya, o cuví tucu tsi tsa cuenda nyívi ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinú ñi ra tsi ra.

10 ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca.

11 Yahá tsa naquihin Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú ñi ra tsi ra. Tan tsa cuenda yacan cuví ra Abraham tumaa jutu tandihi yoo tsa tsinú ñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.

12 Nditsa tyin ra Abraham cuví tucu ra jutu nyívi Israel, tandihi ñi tsa nyisó tuñi Nyoo tan tsinú tucu ñi tsi Nyoo tumaa tsa tsinú ñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

Tsihin tsa tsinú ñi yo ñihí yo tsa tsahá Nyoo tsi yo

13 Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahán Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú ñi ra tsi Nyoo, tan Nyoo naquihin ra tsi ra tumaa tsatyin vaha ra.

14 Tun tsatyin maa ñi maa nyívi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú ñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú ñi yo tsi ra.

15 Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

16 Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú ñi yo tsi ra, tyin tacan tan cuví tsi tumañi ñi tsa tsahá ra tsi tandihi yoo tsa cuví tata ra Abraham. Ñavin maa ñi nyívi tsinú ñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihi tucu nyívi tsa ña nyitá ñi ley, tatun tsinú ñi ñi tsi ra tumaa tsa tsinú ñi ra Abraham. Ra ihya cuví jutu tandihi nyívi tsa tsinú ñi tsi Nyoo.

17 Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú ñi ra tsi Nyoo, tyin Nyoo janandotó ra ndiyí tan caahán ra tuhun tsa ñaha ca coo tumaa tsatyin tsa iyó tsi.

18 Ra Abraham tsa tsahnu xaan ra quívi tsa catyí Nyoo tyin cua coo sehe ñasíhi ra, tan tsitó ra tyin ña cuví ca coo sehe ñi. Maa tyin tsinú ñi ra tan ñihí ra tsa cahán Nyoo tsihin ra. Tan cuví ra jutu nyívi cuaha, tumaa cahán maa Nyoo tsihin ra: “Tyehen cua nducuaha nyívi tata un”.

19 Vasu ndi maa tsa yatyin ña iin cientu cuiya ra Abraham, ña jandihí ra tsa tsinú ñi ra. Tahan ñi maa ra tan ña Sara ñasíhi ra, ña cuví ca coo sehe ñi, tyin tsa cuyatyin cuii cúu ñi tyin tsahnu xaan ñi.

20 Maa tyin ña ndu uvj ñi ra tsa cua ñihi ra tsa catyí Nyoo tyin cuhva ra tsi ra. Tsinú ñi ra tsihin tsa ñi ñi añima ra. Tan ña jandihí ra tsa nyitá ñi ra tsi Nyoo. Tan jacahnú ra tsi Nyoo,

21 tsa cuenda tyin tsitó vaha ra tyin Nyoo iyó tunyee ñi tsi ra tsa javaha ra tsa catyí ra tsihin ra.

²² Yacan cuenda Nyoo naquih̄in ra tsi ra tsa cuenda tsa tsin̄u iñi ra tsi ra.

²³ Tuhun tsa nyaá nu tutu Nyoo tsa catyí tyin naquih̄in Nyoo tsi ra Abraham tsa cuenda tsa tsin̄u iñi ra tsi ra, ñavin tsa cuenda ra Abraham ñi cuví tsi,

²⁴ tyin tsinyaa tucu tsi tsa cuenda yoo. Tyin naquih̄in Nyoo tsi yo tsa cuenda tsa tsin̄u iñi yo tsi ra, tyin juvin ra janandotó tsi ra Jesús, Jutu Mañi yo.

²⁵ Ra Jesús quits̄i ra quits̄i cúu ra tsa cuenda cuatyí yo, tan nandotó ra tyin tacan tan cuví nduvaha yo nuu Nyoo.

5

Tsa cua ñihi yo tsa cuenda tsa nacoq vaha yo tsihin Nyoo

¹ Tsa yaha nduvaha yo nuu Nyoo tsa cuenda tsa tsin̄u iñi yo tsi ra. Tan vityin iyó vaha yo tsihin ra jaha Jutu Mañi yo Jesucristo.

² Tyin tsa cuenda ra Cristo ñihí yo tsa vaha Nyoo tyin tsin̄u iñi yo tsi ra. Tan iin cuñí yo tyin tsa naquih̄in yo can. Tan siñ cuñí yo tyin cua cuhva ra tsa cahnu cuví yo tan javaha yo tsa cuñí maa ra tyin javaha yo.

³ Tan ñavin tsa cuenda yacan ñi taahán tsi cus̄i iñi yo, tyin taahán tucu tsi cus̄i iñi yo tun nyehé yo tundoho. Tyin tsitó yo tyin tun cunyeé iñi yo nyehé yo tundoho, tacan cua cunyeé iñi yo cuatu yo nda cuanda ñihi yo tsa cua cuhva Nyoo tsi yo.

⁴ Tatun cunyeé iñi yo yaha yo tandih̄i tundoho, siñ cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra.

⁵ Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí Ii ra tsa tsaha ra coo aña yo janahá tsi tsi yo tyin cuñí xaan ra tsi yo.

⁶ Tsanaha yoo ña ñih̄i yo cuhva jacacu maa yo tsi yo. Tacan tan quivi tahañ maa tsi quits̄i ra Cristo, quits̄i cúu ra tsa cuenda cuatyí yo.

⁷ Tsitó yo tyin ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiq̄i cahnya iñi iin yo cúu yo tsa cuenda ñi.

⁸ Maa tyin Nyoo jaquits̄i ra tsi ra Cristo, tan yacan janahá tsi yo tyin cuñí xaan ra tsi yo. Quits̄i ra quits̄i cúu ra tsa cuenda yo vasu ndi maa iyó xaan cuatyí yo.

⁹ Tan tsa cuenda tsa tsih̄i ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsin̄u iñi tsi ra.

¹⁰ Tahañ tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsih̄i ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra.

¹¹ Tan ñavin yacan ñi, taahán tucu tsi cus̄i iñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi raȳi tsicoq cuatyí, tan tsa cuenda intuhun ñi ra can tsaa cuatyí naniñ ñuhu ñayivi tan tsicoq tuhun tsihi. Tan tuhun tsihi can nacuñ̄a can tyin tandih̄i nyivi tan tsicoq cuatyí ñi.

¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña t̄in cuenda Nyoo cuatyí ñi tsa cuenda tyin nduve ley iyó.

14 Maa tyin nda cuanda quivi tsicoo ra Adán tan nda cuanda quivi tsicoo ra Moisés, tsindaca ñaha tuhun tsihi tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javaha ra Adán tsa ña tyaá yahvi ra tsa cahán Nyoo tsihin ra. Ra Adán quitsi ra tsihin cuatyí, maa tyin ra Cristo quitsi ra jacacu ra tsi yo.

15 Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacú ra tsi yo tsa cuenda intuhun rayi, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi.

16 Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñi ra yahvi tan jacacú ra tsi yo. Naquihin ra tsi yo tumaa tsatyn vaha yo, vasu ndi maa cuaha cuatyí yo tsicoo.

17 Nditza tyin quitsaha ndaca ñaha tuhun tsihi tsi tandihi nyivi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihin tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayi, ra Jesucristo.

18 Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo.

19 Cuñi tsi catyí tyehen: Tsa cuenda tsa ña tyaá yahvi iin rayi tsa cahán Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaá yahvi inga ra tsa cahán Nyoo. Tan ra ican cuví ra Cristo.

20 Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo.

21 Tahan tsanaha, cuatyí yo quitsi ndaca tuhun tsihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

1 ¿Naa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo?

2 Ña vaha. Tyin yoo tsa tsa ndu uvj iñi cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin.

3 ¿A ña tsitó ndo tyin tsa tsicoondutyá yo janahá tsi tyin ndu ijin yo tsihin ra Cristo Jesús? Yacan cuñi tsi catyí tyin tsa yahá tsihi yo tsihin ra.

4 Tsa quihvi yo tsitsi ndutyá tsa tsicoo ndutyá yo cuví tsi tumaa tsa tsihi yo tan quihvi ñuhu yo tsihin ra Cristo tsa tsihi ra. Tan tumaa tsa nandoto ra Cristo jahá Nyoo tsihin tunyee iñi ra, tacan nandoto tucu yo tsa quitá yo tsitsi ndutyá tsa tsicoondutyá yo. Tan vityin iyó yo ñayivi tsa tsihin ra.

5 Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan can nandoto tucu yo tumaa nandoto ra.

⁶ Tan tsító yo tyin tandihí cuhva tsicoo yo tahañ tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí.

⁷ Tyin nyívi tsa tsa yaha tsihi, ña cuví ca javaha ñi tsa caquiñi.

⁸ Tan yoo tsa tsa tsihi tsihin ra Cristo, nyítá iñi yo tyin cua coo yo tsihin ra.

⁹ Tsító yo tyin ra Cristo nandoto ra tsa yaha tsihi ra, tan vityin ña cúu ca ra tyin nduve ca tunyee iñi iyó tsi tuhun tsihi tsa cahñi can tsi ra.

¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo.

¹¹ Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi.

¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha.

¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin.

¹⁶ Nyooho tsító vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyívi vaha nuu ra.

¹⁷ Tyahvi nyoo tsi Nyoo, tyin vasu ndi maa nu quitsj tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhva ndo tsihin tsa ñi iñi añima ndo.

¹⁸ Tsa yaha ndatsj cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo.

¹⁹ (Caahán yu tsihin ndo cuhva tsa ña yñi ñi cutuñi iñi ndo tyin nyooho ñaha ca cutuñi vaha iñi ndo tuhun Nyoo.) Tumaa tsa tsaha cuenda ndo cuñu ñuhu ndo tsi tsa caquiñi tahañ tsanaha tan javaha ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayívi cuiti, tan javaha ndo maa ñi maa tsa vaha nuu ra.

²⁰ Quiví tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo.

²¹ Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo tsanaha, tyin maa ñi tuhun tsihi tsahá can.

²² Maa tyin vityin ña ndacá ñaha ca cuatyí tsi ndo tyin tsa tsaha cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndihí tuhun cua coo cuí ndo tsihin Nyoo.

²³ Nyiví tsa javahá tsa caquiñi, cua cúu ñi. Maa tyin Nyoo tsahá maa ra ñayiví tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyiví yihí cuenda ra Cristo

¹ Yañi, nyooho tsa tsitó ley, tsitó ndo tyin tsitsi tsa ndi nyito nyiví yihí ndaha ley tsi ñi.

²⁻³ Tumaa iin ñaha tsa iyó yíi, catyí ley tyin coo ña tsihin yíi ña nda cuenda cúu ra. Maa tyin juvin ñi catyí tucu ley tun cúu yíi ña tan nandoo ndaahvi ña, ña cua quihí ndaha ca ley can tsi ña. Tan cuví tindaha ña tsihin inga rayíi tan ña cua coo cuatyí ña. Maa tyin tsitsi tsa ndi iyó yíi ña, ña cuví coo ña tsihin inga rayíi, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tسانaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayíi tsi ñasihi ra. Maa tyin vityin tsa yaha tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayíi tsi ndo tan juvin ra cuví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo.

⁵ Tahan tsanaha tsicoq yo cuhva cuñi cuñu ñuhu yo tan ley tsahnu tsa tyaá ra Moisés catyí tsi tyin ña vaha ña tacan, cua caahán tsi tacan, yoo quitsahá cuñi ca yo javaha yo tsa caquiñi tsa cuñi cuñu ñuhu yo. Tan yacan tsahá tuhun tsihi tsi yo.

⁶ Maa tyin vityin ña ndacá ñaha ca ley tsahnu can tsi yo, tyin tsa yaha tsihí cuñu ñuhu cuatyí yo tsihin ra Cristo. Tan vityin tsa iyó yo ñayiví nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javahá yo quiví yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yo náa cuví cuatyí. Tan ndi ña cua coto yo tyin ña vaha nyiyo iñi yu tsa tsii inga nyiví, tun tsatyin ña catyí ley can tyin ña vaha nyiyo iñi yo.

⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quiví tsa tsitó yu ley Nyoo, quiví can quitsahá tsicá iñi yu javahá yu tsa ña vaha. Nu nduve ley iyó, ña tsitó nyiví náa cuví tsa ña vaha.

⁹ Quiví tsa ña tsitó yu náa cuñi tsi catyí ley Nyoo tsa tyaá ra Moisés, nyito yu. Maa tyin quiví cutuñi iñi yu tsa caahán ley can, cutuñi iñi yu tyin nuu Nyoo tsa tsihí yu jahá cuatyí yu.

¹⁰ Catyí ley can tyin tatun tyaá yahvi nyiví itsi, cua coo cuii ñi ñayiví nyito. Maa tyin yuhu tsihí yu nuu Nyoo jahá ley can tyin ña tyaá yahvi yu itsi. Tyin catyí tsi tyin nyiví tsa ña tyaá yahvi itsi, taahán tsi cunaa ñi nuu Nyoo.

¹¹ Cuatyí yu tsatyíñu can ley can, tan jandaví ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsahá maa Nyoo cuví tsi, tan tandihi tsa catyí ra tyin javaha yo, vaha tsi, tan cuii xaan tsi.

¹³ Tan ñavin ley vaha ihya jacunaa tsi yu. Tyin tsa ña vaha tsa javahá yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi yo tyin yaha xaan ña vaha cuví cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

14 Tan tsitó yo tyin maa Tatyí li Nyoo tsahá ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu.

15 Ña cutuñi iñi yu náa taahán yu, tyin tsa vaha tsa cuñí yu javaha yu, ña javahá yu can. Maa tyin javahá yu tsa ña vaha tsa ña cuñí yu javaha yu.

16 Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi.

17 Yacan cuñí tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha.

18 Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñí yu javaha yu tsa vaha, ña cuví javaha yu can.

19 Ña javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu.

20 Tan tatun javahá yu tsa ña cuñí yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

21 Nacotó yu tsa taahán yu: tun cuñí yu javaha yu tsa vaha, yatyi xaan ca javahá yu tsa ña vaha.

22 Tsitsi añima yu taahán xaan iñi yu ley Nyoo.

23 Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihí yihí ndaha can tsi yu tumaa yihí ndaha ra vitya tsi iin ra nyii vehe caa.

24 ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cuhun yu anyaya?

25 Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñi iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

8

Tatyí li Nyoo jatyinyeé tsi tsi yo tan cuví coo yo ñayivi tsa

1 Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí li ra.

2 Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí li Nyoo tsi yo. Tan juven tsi tsahá ñayivi tsa coo yo tsa cuenda tsa iin ñi cuví yo tsihin ra Cristo Jesús.

3 Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsi ra tsi Sehe ra. Cuví ra tumaa rayii ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo.

4 Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí li Nyoo.

5 Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyivi tsa iyó cuhva cuñí Tatyí li Nyoo tsicá iñi ñi cuhva cuñí Tatyí li Nyoo.

⁶ Nyivi tsa tsicá ifni maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá ifni kuhva cuñí Tatyí Ii ra, cua coo yo ñayivi tsa, tan cua coo tsa taxin añima yo.

⁷ Nyivi tsa tsicá ifni kuhva cuñí cuñu ñuhu ñi, ñi xaan ifni tsi Nyoo cuví ñi can, tyin ña cuñí ñi javahá ñi kuhva catyí ley ra tan ndi ña cuví javaha ñi can.

⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi kuhva taahán ifni Nyoo.

⁹ Maa tyin nyooho ña iyó ca ndo kuhva cuñí cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo añima ndo. Nyivi tsa nduve Tatyí Ii ra Cristo iyó añima, ñavin nyivi cuenda ra Cristo cuví ñi.

¹⁰ Maa tyin tun iyó ra Cristo añima ndo, nyitó añima ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí.

¹¹ Nyoo janandoto ra tsi ra Jesús tsa yaha tsihi ra. Tan tacan tucu nyooho, tatun iyó Tatyí Ii ra añima ndo, cua janandoto ra cuñu ñuhu ndo tsihin Tatyí Ii ra tsa iyó añima ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo kuhva cuñí cuñu ñuhu yo.

¹³ Tyin tatun maa ñi maa kuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

¹⁴ Tyin tandihí yoo tsa javahá kuhva jaquihín ityí Tatyí Ii Nyoo, sehe Nyoo cuví tsi yo.

¹⁵ Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá tsa cuví ndo sehe Nyoo. Tan juvin ñi Tatyí Ii Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo.

¹⁶ Tan Tatyí Ii ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo.

¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin kuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehe ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa si caá tsa cua nyehe yo quivi tahan tsi.

¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehe tsi naha tsi tsi nyivi cuví sehe ra.

²⁰ Tandihí tsa javahá ra, tsa iyó nu ñuhu ñayivi tan andivi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyivi. Maa tyin catyí ra tyin coo quivi cua ndutsaa nyico tsi.

²¹ Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo kuhva caá tsi vityin. Tan si xaan cua cuñí tsi iin caa ñi tsihin tandihí sehe Nyoo tyin ña cua tiví ca tsi.

²² Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña.

²³ Tacan tucu yoo tsa naquihín cuenda Tatyí Ii tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quivi tsa nasama Nyoo kuhva iyó cuñu ñuhu yo tan nyehe tandihí tsa javahá ra tyin cuví yo sehe ra.

²⁴ Vasu ndi maa ñaha ca ñihi yo tandihi can maa tyin tsitó yo tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatú yo, nduve yahví nyaá cuatu ca yo can tyin tsa iyó maa can tsi yo.

²⁵ Maa tyin ndita iñi yo tsa cua ñihi yo tsa ña nyehe yo, cuñí tsi tsa cunyeé iñi yo cuatu yo can.

²⁶ Tan juvin ñi tacan jatyinyeé Tatyí Ii Nyoo tsi yo tun nduve tunyee iñi iyó tsi yo tan ña tsitó yo nácaa ndacan tahví yo tsi Nyoo cuhva taahán maa tsi. Tatyí Ii tsa iyó añima yo tsicán tahví tsi tsi Nyoo tsa cuenda yo tsihin tuhun tsa ña cutuñí iñi yo.

²⁷ Tsitó maa Nyoo náa iyó añima yo, tan tsitó ra náa tsicán Tatyí Ii ra, tsa cuenda yoo tsa cuví yo nyívi ra tyin tsicán tsi cuhva cuñí maa ra ndacan yo tsi ra.

Tsa cuenda ra Cristo tan cuví jaha canaa yo siqui tundoho

²⁸ Tsitó yo tyin tandihi tundoho tsa nyehé nyívi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsí tsi ñi, tumaa cuhva tyaá maa ra cuhva.

²⁹ Tyin nda quívi jihna ñi, tan tsa tsitó Nyoo yóo nyívi cua cunyícun tsi ra. Tan tyaá ra cuhva tyin cuví ñi sehe ra tan coo ñi cuhva cuñí ra. Maa tyin ra Jesucristo cuví ra cua cuví ra tsitsa tsa nuu tandihi ca yañi ra. Tan yañi ra cuví ñi yíhi tuhun Nyoo.

³⁰ Tan ñi tsa tyaá Nyoo cuhva tyin cuví ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsaha ra tsa cahnú cuví ñi tsihin ra.

³¹ Yacan cuenda, ¿náa cua catyi yo? Tatun Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi.

³² Nyoo ña catyi ra tsa ña cua cuhva cuenda ra Sehe ra, tyin tsaha cuenda ra tsi ra tyin cúu ra tsa cuenda tandihi yo. Tun tacan tsaha ra Sehe ra tsa cuenda yo, ¿a ña cua cuhva ra tandihi ca tsa tsiñí ñuhu tsi yo? Cuhva ra.

³³ ¿Yóo cuví xico ñaha tsi yo tsa cuví yo nyívi nacatsí Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo.

³⁴ ¿Yóo cuví catyi tyin cahun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandotó ra tan vityin nyaá ra xiin cuaha Nyoo, tan tsicán tahví ra tsi Nyoo tsa cuenda yo.

³⁵ Nduve náa cuví quihin nyaá tsa cuñí xaan ra Cristo tsi yo. ¿A cuví quihin nyaá tundoho itsi, a tsihi, a tsa caahán nyívi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuví quihin nyaá can tsa cuñí ra Cristo tsi yo.

³⁶ Tumaa catyi nu tutu Nyoo tyehen:

Jutu Mañi yu, tandihi ñi quívi tan cuñí nyívi cahñi ñi tsi ndi tsa cuenda un. Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihi ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatyinyeé tsi yo.

³⁸ Yacan cuenda tsitó vaha yo tyin nduve maa náa cuví quihin nyaá tsa cuñí xaan Nyoo tsi yo. Ndi tuhun tsihi, ndi ñayívi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityi nuu ca, ndi intuhun can tan ña cuví jandusín can tsi yo tsihin Nyoo.

³⁹ Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusín can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

9

Nyoo nacatsí ra tsi nyívi Israel

¹ Yuhu tsinú ñni yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí li Nyoo jaquihín ityi tsa tsicá ñni yu. Yacan cuenda tsitó vaha yu tyin tsa nditsa caahán yu tun catyí yu

² cuiihya xaan cuñí yu tan uhvi xaan cuñí añima yu

³ tsa cuenda nyívi ñuu yu, ñi Israel. Cuñí xaan yu tsi ñi. Tan nda cuenda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can.

⁴ Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuví ra tsi ñi, tyin tsinyaá ra tsihin ñi. Tan ndoo ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñí ra tsa jacahnu ñi tsi ra. Tan catyí ra tsihin ñi nácaa cua javaha ra tsa vaha tsihin ñi nu cuahán ca tsi.

⁵ Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihí tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

⁶ ¿A catyí yu tyin ña javahá Nyoo tumaa cuhva catyí ra tsihin nyívi Israel tahán tsanaha? Ñavin. Cuñí tsi coto yo tyin ña tandihí nyívi Israel tan cuví ñi nyívi Israel tsa nditsa.

⁷ Tan tacan tucu ña tandihí tata ra Abraham tan cuví ñi tata ra tsa nditsa. Tyin tsa cahán Nyoo tsihin ra, cahán tsi tuhun intuhun ñi sehe ra. Tyin catyí Nyoo tsihin ra tyehen: “Tsa cuenda ra Isaac sehe un tan cua coo nyívi tata un.”

⁸ Tsehe janahá tsi yo tyin ñavin tsa cuenda tsa cuví ñi nyívi tata ra Israel tan cuví ñi nyívi Nyoo. Tyin nyívi tsa tsinú ñni tsa cahán Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú ñni ra tsa cahán Nyoo tsihin ra

⁹ Tan tyehen cahán Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

¹⁰ Tan ñavin yacan ñi. Tyin cahán ndihí tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsi tsaahnu yo, ra Isaac.

¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uvi. Javahá Nyoo tacan tyin nacatsí ra tsi nyívi tsa cuñí maa ra nacatsi ra, tan ñavin tsa cuenda tsa javahá ñi.

¹³ Tumaa catyí ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyi yo? ¿A catyi yo tyin ña vaha tsa javahá Nyoo? ¡Ña cuví!

¹⁵ Tyin catyí ra tsihin ra Moisés: “Cua cundaahvi ñni yu yóo nyívi cuñí maa yu cundaahvi ñni yu.”

¹⁶ Tacan javahá ra; cundaahvi ñni ra tsi nyívi tsa cuñí maa ra cundaahvi ñni ra. Tan ña cundaahvi ñni ra tsi ñi tsa cuenda tsa javahá ñi tan ndi ñavin tsa

cuenda tsa nducú ñi cuhva. Tyin maa ra cuví ra cundaahvi iñi yóo cuñí maa ra.

¹⁷ Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaḥa yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihí nyívi yóo ra cuví yuhu”, catyí Nyoo.

¹⁸ Tan tsihin tsehe tsitó yo tyin Nyoo cundaahví iñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

¹⁹ Tan vasiqui yooho cua catyí un: “Yoñi cuví javaha tsa cuñí maa ñi javaha ñi tun ña tsaḥa Nyoo tyin javaha ñi can.” ¿Nacuenda tyin tyaa Nyoo cuatyí siqui ñi?

²⁰ Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyí iin quisí tsihin ra javahá itsi: “Ña taahán iñi yu cuhva javahá un tsi yu”? Ña cuví.

²¹ Tyin nyívi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisí can. Tan iin ñi ñuhu quisí can tsatyíñu ñi juven ñi tsihin can javaha ñi quisí vaha tan quisí peehe.

²² Ña cuví catyí yo tyin ña vaha Nyoo tsa cuenda tsa tsatyíñu ra tsi nyívi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyívi caquiñi.

²³ Javahá ra tacan tyin tacan tan coto yoo tsa cuví yo nyívi tsa cundaahvi iñi ra tyin nda tsanaha tan tsa nacatsí maa ra tsi yo tyin cuhva ra tsa cahnu cuví ra tsi yo.

²⁴ Yacan cuenda nacatsí ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví.

²⁵ Tumaa catyí Nyoo nu tutu tsa tyaa ra Oseas: Nyívi tsa ñavin nyívi ñuu yu cuví cua catyí yu tyin nyívi yu cuví ñi. Ñi tsa ña cuñí yu, cua cuñí yu tsi ñi, catyí Nyoo.

²⁶ Tan nu catyí Nyoo: “Nyooḥo ñavin nyívi yu cuví ndo.” Juvin ñi ican cua catyí ra tsihin ñi: “Yuhu cuví Nyoo nyito, tan nyooḥo cuví sehe yu.”

²⁷ Maa tyin ra Isaías catyí ra tyehen tsa cuenda nyívi Israel: “Vasu ndi maa cuaha xaan nyívi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu.

²⁸ Tan tsa yatyin cuii cua jandaa Jutu Mañi yo tandihí tsa caḥan ra tan cua tatsi tuñi ra tsi tandihí nyívi iyó nu ñuhu ñayívi.”

²⁹ Tumaa catyí tucu ra Isaías taḥan tsanaha: Tun tsatyin Jutu Mañi yo, ra ndacá ñaha tandihí tsa iyó andívi, tan ña jacacu ra tsi juhva yo, tsa naq tandihí yo, Tumaa naq nyívi ñuu Sodoma tan ñuu Gomorra taḥan tsanaha.

Nyívi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducu ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra.

³¹ Tan nyívi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra.

³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaḥa ñi yuu tan nduva ñi cuví can.

³³ Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

10

¹ Yañi, tsihin tsa nñi iñi aña yu tan tsicán tahvi yu tsa cuenda nyívi Israel tyin cuñí yu tsa cacu ñi.

² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can.

³ Tyin ña tsitó ñi tyin juven ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi.

⁴ Tyin ra Cristo tsa quítsi ra tan javahá ra tandihi tsa catyí ley, tyin tacan tan tandihi nyívi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihi tsa catyí ley, tyin tyaá ra tyehen: “Nyívi tsa tyaá yahvi tandihi tsa catyí ley, cua coo ñi ñayívi tsa ña cua naa maa.”

⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyí un: ¿Yóo cundaa andívi? tyin tun cahan un tacan cuñí tsi catyí tyin januu un tsi ra Cristo nda nu ñuhu ñayívi tan jacacu ra tsi yo.” Ña cahan un tacan tyin ra Cristo tsa yahá quítsi ra.

⁷ Tan ndi ña catyí un: “Cuñí tsi tsa nuu iin ra nda nu yucú ndívi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra.

⁸ Ña catyí un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi aña ndo.” Tuhun ihya taahán tsi tsinu iñi ndo tyin juven ñi tsi jacuahá tucu nyuhu.

⁹ Tatun catyí un tsihin yuhu un tyin ra Jesús cuví Jutu Mañi yo, tan tsinu iñi un tsihin aña un tyin Nyoo janandoto tsi ra tsa yahá tsihi ra, cua cacu un.

¹⁰ Tyin tsihin aña yo cuñí tsi tsinu iñi yo tsi ra Cristo tan cuví nduvaha yo nuu Nyoo, tan tsihin yuhu yo cuñí tsi catyí yo tyin tsinú iñi yo, tyin tacan tan cacu yo.

¹¹ Tuhun Nyoo catyí tsi tyehen: “Ndi intuhun nyívi tsa tsinú iñi tsi ra tan ña cua tahan ñi ticanuu.”

¹² Tyin Nyoo inducu ñi cuñí ra nyehé ra tsi nyívi Israel tan nyívi inga ñuu. Tyin intuhun ñi maa ra ndacá ñaha tsi tandihi yo. Tan nasocó ra tsi tandihi nyívi tsa tsicán tahvi tsi ra.

¹³ Tyin tyehen catyí tuhun Nyoo: “Tandihí nyívi tsa tsicán tahvi tsi Jutu Mañi yo cua cacu ñi.”

¹⁴ Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi?

¹⁵ Tan ¿nácaa cuhun nyívi cahan ñi nácaa coo taxin nyívi, tatun yoñi jacuhun tsi ñi? Tumaa catyí nu tutu Nyoo: “Sií xaan cuví nu tsa ñi caahán tuhun vaha.”

¹⁶ Maa tyin ña tandihí nyívi tan tyaá yahvi ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñí tsinu iñi tuhun caahán ndi”, catyí ra.

17 Yacan cuenda cuñi tsi tsa tyaa soho jihna yo tuhun ra Cristo, tacan tan tsinu iñi yo tsi ra.

18 Maa tyin tsicá tucu iñi yu: ¿A ña tsiñi nyivi Israel tuhun Nyoo? ¡Tsiñi ñi! Tumaa catyi nu tutu Nyoo:

Jutu Mañi yu, nyivi tsa jacotó tuhun un tsa jacotó ñi tuhun un nani cahnu nu ñuhu ñayivi,

tan ña nacoq ihñi ñi ndi intuhun ñuu luhlu, catyi tsi nu tutu Nyoo.

19 Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¡Cutuñi iñi ñi! Tyin tsa jihna ñi ra Moisés tyaa ra tuhun cahñ Nyoo tshin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cúu ndo tsihi nyehé ndo tsi ñi, catyi Nyoo.

20 Tan ra Isaías cana iñi ra cahñ ra:

“Nyivi tsa ña nanducu tsi Nyoo, nañihj ñi tsi ra.

Tan janaha ra tsi ra tsi ñi tsa ña tsica tuhun tuhun ra.”

21 Tan tyaa tucu ra Isaías tuhun cahñ Nyoo tshin ñi Israel tyehen: “Tandihj ñi quivi cana yu tsi nyivi yu, na nacuhva cuenda ñi tsi ñi tsi yu, maa tyin ña tyaa yahvi ñi. Tan jandava xaan ñi iñi ñi”, catyi Nyoo.

11

Nyivi Israel tsa ñihí cuhva cacu

1 ¿A ña cuñi ca Nyoo tsi nyivi Israel? Ñavin tsa ña cuñi ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu.

2 Tahañ tsanaha nacatsj Nyoo tsi ñi Israel tyin cuví ñi nyivi ra. Tan vityin ñavin tsa jatsiyó cuñi ra tsi ñi. ¿A ña ñuhú iñi ndo tyin catyi nu tutu Nyoo tyin ra Elías, ra cuví ndusu yuhu Nyoo, catyi ra tyin ña vaha nyivi Israel tan tsicán tahvi ra tsi Nyoo tyehen?

3 “Jutu Mañi yu, nyivi Israel tsañi ñi tsi ra cuví ndusu yuhu maa un naha ra, tan tsani ñi nu jacahnú nyivi tsi un. Tan intuhun ña maa yu ndoq, tan cuñi ndihj ñi cahñi ñi tsi yu”, catyi ra.

4 Maa tyin nacahñ Nyoo tan catyi ra tshin ra Elías: “Ñavin maa ñi maa un ndoq. Tyin utsa mil ca nyivi naquihjñ vaha yu, ñi tsa ña jacahnú maa tsitoho Baal”, catyi Nyoo tshin ra.

5 Tan juvin ñi tacan vityin, ndoq juhva nyivi jacahnú tsi Nyoo. Tan tsa cuenda tsa vaha Nyoo nacatsj ra tsi ñi tyin jaha ra tucahnu iñi tsi ñi.

6 Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñi tsi catyi tyin ña jacacú ra tsi yo tshin tsa vaha ra.

7 Tan ¿nácaa? Nyivi Israel nducu ñi cuhva nduvaha ñi nuu Nyoo, maa tyin ña ñihj ñi cuhva. Juhva ñi ñihj ñi cuhva. Tan ñi tsa ñihj cuhva can cuví ñi tsa nacatsj maa Nyoo. Tan ñi tsa ña ñihj cuhva cacu, ndundava añima ñi.

8 Tumaa catyi nu tutu Nyoo tyehen: “Nyoo tsañá ra tsa ña cutuñi iñi ñi. Tan vasu ndi maa iyó tinuu ñi, ña tsañá ra tsa nyehé ñi. Iyó soho ñi, maa tyin ña cutuñi iñi ñi tsa tsiñi ñi. Tacan iyó ñi nda cuanda vityin.”

9 Tan juvin ñi catyi tucu ra David tyehen:

Javahá ñi vico tan cusñi iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

10 Tan cua cuaa ñi na ña nyehe ca ñi tsa nditsa.

Tan nacoso tsa vee siqui ñi, catyí ra David tuhun nyívi Israel tsa ña tsínú íñi tsi Nyoo.

Nacaa nduvahá nyívi tsa ñavin ñi Israel cuví nuu Nyoo

11 Tan vityin tsicá tuhun yu: ¿A tsa cuenda tsa ña tyaá yahvi nyívi Israel tsa cahān Nyoo, tan ndoo cuií ñi tsa ña cua cacu ñi? Ñavin tsa ndoo cuií ñi. Ndoó nuu ñi maa ñi, tyin jacacú jihna Nyoo tsi nyívi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndíhi íñi ñi tsi Nyoo.

12 Tatun cuaha nyívi tsa ñavin ñi Israel cuví tan natsinu íñi ñi tsi Nyoo tsa cuenda cuatyí tsa javaha ñi Israel, cuaha ca ñi cua natsinu íñi quívi tsa cua cuví nyico tandíhi nyívi Israel nyívi Nyoo.

13 Cuñi yu cahan yu juhva tsihin nyooho tsa ñavin ñi Israel cuví. Ra Jesús tava tyíñu ra tsi yu tsa quitsi yu nu iyó ndo. Tan tsitó yu tyin cuñi tsi tsa javaha yu tyíñu ihya tyin cahnu xaan cuví tsi. Cahnu jahá yu itsi

14 tan caahán yu tuhun Nyoo tsihin ndo tyin na nyehe nyívi ñuu yu, ñi Israel, nácaa tsínú íñi ndo tsi Nyoo, tyin vasiqui tacan tan natsinu ndíhi íñi ñi tan cacu ñi.

15 Tyin tun tsa cuenda tsa ña natíin cuenda Nyoo tsi nyívi Israel tan nduvahá iyó nyívi inga ñuu tsihin Nyoo, quívi cua naquihín cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsínú íñi tan ñavin ca tsa jihna ñi.

16 Ín cuhva tatun vaha quitá paan tsa javaha yo tsa jihna ñi tsihin yutsan paan, vaha tandíhi ca yutsan can. Tan tatun íin yoho yutun tan vaha tun, vaha tandíhi ca soco tun. Tacan tucu nyívi Israel nyaá yahvi ñi nuu Nyoo tyin tsií tsaahnu ñi yihí ra naha cuenda ra.

17 Tan nyívi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyívi tsaahnya íin soco yutun tan natyaá ñi inga soco yutun, tacan javaha Nyoo tyin jatsiyó ra tsi nyívi Israel tan tyaá ra tsi nyooho tsa cuví ndo nyívi inga ñuu. Tacan cuví tan tsaá ndo cuví ndo nyívi cuenda Nyoo tan naquihín ndo tandíhi tsa vaha tsa iyó tsi ra.

18 Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá íñi ndo tacan nducuhun íñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

19 Vasiqui cua catyí ndo: “Juvín, maa tyin Nyoo tsaahnya ra soco yutun can tan natyaa ra tsi nyuhu.”

20 Nditsa. Maa tyin jatsiyó nuu ñi ra tsi nyívi Israel tsa cuenda tsa ña tsínú íñi ñi tsi ra. Tan tyacú ra tsi nyooho tsa cuenda tsa tsínú íñi ndo tsi ra. Yacan jaha ndo cuenda tsa ña nduyaa ndo tsihin can.

21 Tyin tatun ña jahá Nyoo tucahnu íñi tsi ñi tsa cuví soco vaha can, ndi nyooho tan ña cua jaha ra tucahnu íñi tatun ña tsínú vaha íñi ndo tsi ra.

22 Nyehe ndo tyin vaha xaan íñi Nyoo, maa tyin xaan tucu ra tsihin nyívi tsa ña naquihín cuenda tumañi íñi tsa tsahá ra tsi ñi. Vaha íñi ra tsihin nyooho yacan tyaá yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyó nyico ra tsi ndo tsaha yutun olivo ra.

23 Tyin tatun natsinu nyico íñi nyívi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee íñi tsi ra tsa natyaa tahan nyico ra tsi ñi inga tsaha.

²⁴ Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaá tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaá tahan nyico ra soco yutun vaha nu tsinyaá jihna maa tsi.

Nyivi Israel cua cacu nda nu ndihi

²⁵ Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaaha xaan nyivi Israel ndundavañ añima ñi, nda cuanda cacu tandihi nyivi inga ñuu tsa nyaa tyin cacu.

²⁶ Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra.
Tan cua quihin nyaa ra cuatyí nyivi ra Jacob.

²⁷ Tuhun ihya cuví tsa cua ndoo yu tsihin ñi quivi cua quihin nyaa yu cuatyí ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahan tsanaha nacatsí Nyoo tsi ra Abraham, tan ra Isaac, tan ra Jacob tyin tsinú iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi.

²⁹ Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo.

³⁰ Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaá yahvi nyivi Israel tsi ra.

³¹ Nyivi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahan tsanaha. Maa tyin cua cundaahví iñi ra nyehe ra tsi ñi tumaa tsa cundaahví iñi ra nyehé ra tsi nyooho.

³² Yihí tsaha tandihi nyivi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahví iñi ra tsi tandihi yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñi tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quivi ña cua cutuñi iñi yo tandihi cuhva javahá ra.

³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi.

³⁵ Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihín ñi yahvi cuenda can.

³⁶ Tyin tandihi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahví yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra.

² Ña cõo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuiti.

³ Nyoo, tsa cuenda tsa vaha iñi ra, tan tavañ tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihi nyooho tyin ndi

intuhun ndo tan ña çaca iñi ndo tyin vaha xaan ndo. Maa tyin çaca iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra.

⁴ Tumaa soho yo tan tinuu yo iin ñi cuví tsi tsihin tandihí ca tahan tsi tsa iyó iin cuñu ñuhu. Tan tsa intuhun intuhun tsi sñn sñn tyiñu javahá tsi.

⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Sñn sñn ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñi maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi.

⁷ Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa nñi iñi añima yo. Tatun tsi inga yo tsahá ra tsa jacuahá yo tsi nyívi, na jacuahá yo tsi ñi tsihin tsa nñi iñi yo.

⁸ Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa nñi iñi añima yo. Tatun inga yo ñihí tsa jatyinyee yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyívi yihí cuenda Nyoo tsihin yo, na jaha yo cuenda cuhva jaquihín ityi yo tsi ñi. Tatun inga yo ñihí tsa jatyinyee yo tsi nyívi tsa iyó tsa tsiñi ñuhu, na jatyinyee yo tsi ñi tsihin tsa sñi cuñi yo.

Náa taahán tsi javaha nyívi yihí cuenda ra Cristo

⁹ Cuñi tahan ndo tsi ndo tsihin tsa nñi iñi añima ndo. Ndasi cuñi ndo nyehé ndo tsa ña vaha. Tan cüanyicun ndo tsa vaha.

¹⁰ Cuñi tsi tsa cuñi tahan yo tsi yo tumaa tsa cuñi yo tsi nyívi yo. Tan tyaa yahvi tahan ndo tsi ndo tan jaha tahan ndo tsa ñayívi tsi ndo.

¹¹ Ndücu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa nñi iñi añima ndo.

¹² Çoo ndo ñayívi ihya tsihin tsa sñi, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndaçan tahvi ndo tsi Nyoo iin nyíta ñi.

¹³ Cuhva ndo tsa tsiñi ñuhu tsi nyívi yihí cuenda Nyoo tsihin ndo. Vaha tyanuu ndo tsi nyívi tsaá vehe ndo.

¹⁴ Tatun caahán nyívi ndavaha ñi tsi ndo, vaha çahan ndo tsihin ñi, tan ña çahan ndasi ndo tsi ñi. Ndaçan tahvi ndo tsi Nyoo tsa cuenda ñi, na nasoco ra tsi ñi.

¹⁵ Sñi cuñi ndo tsihin nyívi sñi cuñi. Vaçu ndo tsihin nyívi tsa tsacú jahá tucuihaya iñi.

¹⁶ Ña çañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo; jãndundaahvi ndo tsi ndo tumaa iyó nyívi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyívi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyívi.

¹⁸ Ndücu ndo cuhva coo taxin ndo tsihin tandihí nyívi.

¹⁹ Yañi, cuñi yu tsi ndo. Tatun javahá nyívi tsa ña vaha tsihin ndo, ña tañi tuñi ndo tsi ñi; na tyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyi tsi tyehen: “Yuhu taahán tsi tatsi tuñi tsi nyívi tan tyahvi tsi ñi”, catyi Jutu Mañi yo.

²⁰ Tan juven ñi catyí tucu ra: “Tatun nyívi xaan iñi tsi ndo tan tsisocó ñi, cūhva ndo tsa catsi ñi, tan tatun na ityi iñi ñi, cūhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.”

²¹ Ña cūhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsí tsa ña vaha tsihin can.

13

¹ Tandihí nyívi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumí tyiñu tan Nyoo tsaḥ tyiñu can tsi ra naha. Ra cumí tyiñu tsa iyó, maa Nyoo tsaḥ tsi ra naha tsa cuví ra naha tyiñu.

² Yacan cuenda, nyívi tsa ña tyaá yahvi tsi ra naha, cuñí tsi catyi tyin ña tyaá yahvi ñi tsa caahán Nyoo. Ñi tsa javahá tacan, tsicoḡ cuatyí ñi tsa cuenda can, tan cua cutuñi ñi.

³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyívi tsa javahá tsa vaha. Nyisó tyiñu ra naha tsa tatsi tuñi ra naha tsi nyívi tsa javahá tsa ña vaha. Tun ña cuñí un tsa jayuhvi ra cumi tyiñu naha ra tsi un, çoo vaha, tyin tacan tan cua nyehe ra naha tyin vaha iyó un tan vaha nyívi cuví un.

⁴ Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyívi javahá tsa ña vaha, tyin tyiñu can tyaḡ Nyoo tsi ra naha.

⁵ Yacan cuenda ñiñi cuñí tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo.

⁶ Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷ Cūhva ndo tsa taahán tsi tsi intuhun intuhun nyívi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyívi tsa taahán tsi tyaa yahvi ndo. Jaha ndo tsa ñayivi tsi nyívi tsa taahán tsi jaha ndo tsa ñayivi tsi.

⁸ Ña cunyaa cuenda ndo tsi ndi intuhun nyívi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihí tsa catyí ley Nyoo tsa tyaḡ ra Moisés tyin javaha yo.

⁹ Catyí ley Nyoo tyehen: “Tun iyó ñasiñi ndo o yñi ndo ña çoo inga ñaha o rayñi tsi ndo. Ña çahñi ndo. Ña sūhu ndo. Ña çahan ndo cuendu siqui ndi intuhun nyívi. Ña nyjyo iñi ndo tsa tsii inga nyívi.” Tandihí tsehe tan inga ca ley javahá ndo itsi tatun cuñí ndo tsi tahan ndo tumaa tsa cuñí ndo tsi maa ndo.

¹⁰ Tatun cuñí ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaḡ ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa taḥan tsi cūhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra.

¹² Tsa yaha tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsaha Nyoo tsi ndo; javaha ndo cuhva javahá nyivi iyó nu nditsin.

¹³ Cuñi tsi cuñi coo yo tyin nu nditsin Nyoo iyó yo. Tan ña cõho ndo nyixi, ña javaha ndo vico tan coho ndo nyixi. Nyooho rayii, ña caca nuu ndo tsihin ñaha. Tan nyooho ñaha ña caca nuu ndo tsihin rayii. Ña cõo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi.

¹⁴ Maa tyin cõo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra. Tan ña caca iñi ndo javaha ndo cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi.

² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo.

³ Maa tyin ñi tsa tsatsi tandihí can, taahán tsi naquihin cuenda ñi tsi ñi tsa tsatsi yucu ñi. Tan ñi tsa tsatsi yucu, na ña cahan nyaa ñi tsi inga ñi can. Tyin Nyoo naquihin cuenda ra tsi ñi can.

⁴ Tan ¿yóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihi tuñi vaha iñi yo.

⁶ Ñi tsa naquihin vaha quivi, naquihin vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihin vaha can, juven ñi jacahnú tucu ñi tsi Nyoo tyin ña naquihin vaha ñi can. Tan ñi tsa tsatsi tandihí can, juven ñi tsatsi tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsaha ra tsa catsi ñi. Tan ñi tsa ña tsatsi tandihí, ña tsatsi ñi tsa cuenda tsa jacahnú ñi tsi Jutu Mañi yo tan juven ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihi yo.

⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihi yo, tsihi yo tsa cuenda Jutu Mañi yo tan naquihin ra añima yo. Yacan cuenda tsi maa Jutu Mañi yo cuví tsi yo vasu ndi maa nyito yo o tsihi yo.

⁹ Tyin ra Cristo tsihi ra tan nandoto ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihin cuenda un tsi ra?, tan tsitó vaha un tyin tandihí yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo.

¹¹ Tumaa tsa catyi Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuiñi tsiti tandihí nyívi nuu yu.

Tandihí ñi tan cua nacoto ñi tsi yu tsa cuví yu Nyoo.

Tan nuu tandihí nyívi cua jacahnu ñi tsi yu, catyí Nyoo.

¹²Yacan cuenda intuhun intuhun yo tan cua nacuhva cuenda yo tyiñu javaha yo tsi Nyoo.

Ña janacava ndo tsi yañi ndo nu cuatyí

¹³Yacan cuenda, ña taahán tsi cahan nyaa ca ndo tsi nyívi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo.

¹⁴Yuhu tsító yu tyin cuví catsi yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can.

¹⁵Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihi ra tsa cuenda ra.

¹⁶Ña cuhva ndo tsa cahan nyívi ndavaha ñi siqui tsa tsahá Nyoo ndatu tyin catsi yo.

¹⁷Tatun ndacá ñaha Nyoo tsi yo ña ñiñi xaan náa tsatsí yo o náa tsihi yo. Tsa ñiñi ca cuví tsa vaha iyó yo nuu ra, tan tsihin tsa si cuñi yo, tan taxin iyó añima yo jahá Tatyí li ra.

¹⁸Nyívi jahá tyiñu tyiñu ra Cristo tacan, si cuñi Nyoo nyehé ra tsi ñi, tan tacan tucu nyívi si cuñi ñi nyehé ñi tsi ñi.

¹⁹Yacan cuenda cuñi tsi jañiñi yo tsi yo tan coo vaha yo tsihin nyívi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo.

²⁰Ndi intuhun ndo tan ña jatívi ndo tyiñu jahá Nyoo tsitsi añima inga nyívi tsihin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyívi nu cuatyí.

²¹Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo.

²²Cuhva tsa tsinú iñi yo tsa cuenda tandihí yacan ña cahan yo tuhun can tsihin inga nyívi. Na coto intuhun ñi maa yo can tsihin Nyoo. Si xaan cuñi yo tatun ña uvi tsicá iñi yo javahá yo tsa tsahá Nyoo ndatu tyin javahá yo.

²³Maa tyin nyívi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihí tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyívi yihí tuhun Nyoo tsihin yo, tan ñavin tsa taahán iñi ñi maa yo

¹Yoo tsa vaha cuanyicún tsi Nyoo, cuñi tsi tsa jatyinyee yo tsi nyívi tsa ñaha ca tsinú vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo.

²Intuhun intuhun yo cuñi tsi tsa javaha yo cuhva taahán iñi inga nyívi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo.

³ Tyin ndi ra Cristo tan ña javahā ra cuhva taahán iñi maa ra, maa tyin tahañ ra tumaa catyí nu tutu Nyoo tyehen: “Tandihí tsa ndavaha ñi tsa cahān nyivi siqui Nyoo, siqui ra Cristo ndoo can”, catyí tsi.

⁴ Tyin tandihí tsa tsinyaā nu tutu Nyoo tahañ tsanaha, tsinyaā tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeē iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo.

⁵ Tan juvin ñi maa ra tsahá tsa cunyeē iñi yo cuatu yo, tan tsahá ra tsa vaha cuñi añima yo. Na jatyinyee ca ra tsi yo coo vaha yo tan iin ñi cuvi yo tumaa taahán iñi ra Cristo Jesús.

⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuvi, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo.

⁸ Tan catyí yu tsihin ndo: ra Cristo quitsi ra quitsi jatyinyee ra tsi nyuhu tsa cuvi nyivi Israel, tyin tacan catyí Nyoo tsihin tsi tsaahnu ndi tyin cua javaha ra. Tan tacan janahā ra Cristo tyin tandihí tsa catyí Nyoo tyin cua javaha ra, javahá ra itsi.

⁹ Quitsi ra Cristo tyin tacan tan jacahnu tucu nyivi tsa ñavin ñi Israel cuvi tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihí nyivi tsa ñavin ñi Israel cuvi.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen:

Nyooho tsa ñavin ñi Israel cuvi, si cuñi ndo tsihin ñi Israel, nyivi Nyoo.

¹¹ Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyivi tsa ñavin ñi Israel cuvi.

Čata tandihí ndo yaa tan jacahnu ndo tsi ra.

¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuvi tata ra Isaí.

Cua quitsi ra cua cundaca ñaha ra tsi nyivi tsa ñavin ñi Israel cuvi.

Tan cua cuita iñi ñi tyin cua jacacu ra tsi ñi.

¹³ Juvin ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusi iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí li ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyooho vaha iñi ndo tan cutuñi vaha iñi ndo, tan tsitó vaha ndo cuhva cuhva cuenda tahan ndo tsi ndo.

¹⁵ Maa tyin nu carta ihya ñihi xaan caahán yu siqui juhva tsa tyaa yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahā ra tsa vaha ra tsi yo

¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuvi. Tan tyiñu tsa javahá yu cuvi tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuvi cuhva cuenda yu tsi ñi tsi Nyoo tan cuvi ñi iin ofrenda tsa taahán iñi ra, tyin tsa nduvahā ñi nuu ra jahā Tatyí li ra.

¹⁷ Yuhu tsa tsinú iñi yu tsi ra Cristo Jesús, si cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu.

18 Yuhu ña caná iñi yu cahan yu tsa ña javaha ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuvi, tsinú iñi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahān yu tan nyehe ñi tsa javaha yu

19 tsihin tunyee iñi seña tan tsa iyo tsa javaha yu jaha Tatyí Ii Nyoo. Tsihin tandihí yacan cunyeē cahān yu tuhun ra Cristo tan nácaa jacacú ra tsi yo tsihin nyivi. Quitsaha yu nda Jerusalén tan inga ca ñuu nda cuanda tsaā yu ñuu tsa cayucú Ilírico.

20 Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñí yu jaha tyíñu yu nu tsa yaha cahān inga ra tuhun ra Cristo.

21 Tumaa catyí nu tutu Nyoo tyehen:
Nu nduve maa tuhun Nyoo iyó, cua tsaā tuhun Nyoo tan cua cutuñi iñi nyivi iyó can itsi, catyí tsi.

Nu tyaá ra Pablo cuhva tyin cuhun ra ñuu Roma

22 Yacan cuenda ña cuvi quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu.

23 Maa tyin vityin tsa ndihí jaha tyíñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo.

24 Nyehe jihna yo tatun cuvi yaha yu nu yucú ndo quivi cua cuhun yu España. Tsa yaha tsa cunyi yu juhva quivi tsihin ndo, nyehe yo tatun cuvi jatyinyee ndo tsi yu tan tsaā yu nu cuhun yu.

25 Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan.

26 Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo.

27 Tyehen cuñi ñi javaha ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsaha ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi.

28 Yacan cuenda, tatun tsa yaha jandaa yu tyíñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo.

29 Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

30 Yañi, Tatyí Ii Nyoo tsaha tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyíñu jaha yu.

31 Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tñin cuenda vaha ñi ofrenda tsa ndahá yu.

32 Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa sñi cuñi yu tan cuvi quitatu vaha yu.

33 Tan Nyoo, ra tsahá tsa taxin coo añima yo, na cunyaa ra tsihin tandihí ndo. Tan na cuvi tsi tacan.

1 Jacotó yu tsi ndo tyin ña hermana Febe jatyinyeé xaan ña tsi nyivi yihí cuenda Nyoo ñuu Cencrea.

2 Naquihin vaha ndo tsi ña tumaa naquihin Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihí tsa tsiniñ ñuhu tsi ña, tyin maa ña cuaha xaan nyivi jatyinyeé ña, tan nda cuanda maa yu.

3 Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús.

4 Tshanya iñi ñi ñayivi ñi quivi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi.

5 Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinú jihna iñi tsi ra Cristo ityi Acaya.

6 Cuhva ndo nacumi tsi ña María. Jahá tyiñu xaan ña nu yucú ndo.

7 Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucú tsihin yu vehe caa. Cahnu tyiñu jahá tyiñú ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsinú iñi tsi ra Cristo tan ñavin ca yuhu.

8 Cuhva ndo nacumi tsi ra Amplias ra vaha iñi tsi yu cuenda Jutu Mañi yo.

9 Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu.

10 Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyivi ra Aristóbulo.

11 Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo.

12 Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo.

13 Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu.

14 Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha.

15 Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpás tan tsi tandihí ñi yihí cuenda Nyoo tsa yucú tsihin ñi.

16 Cuhva tahan ndo nacumi tsi ndo. Tandihí nyivi yihí cuenda ra Cristo tsa iyó ityi ihya jaquitsj ñi nacumi tsi ndo.

17 Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñí jasín tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can.

18 Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñí maa ñi javahá ñi. Tan jandahví ñaha ñi añima nyivi ndaahvi tsihin tsa vita caahán ñi.

19 Tandihí nyivi tsitó ñi tyin tyaá yahvi ndo tsi Nyoo. Yacan cuenda si xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha.

²⁰ Nyoo ra iyó tandihi tsa taxin añima, na cuhva ra tsa jaha canaa ndo tsi nu ña vaha tsa yatyí, tan na cuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihi ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvín ñi ihya ndú iin tandihi ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihi ndo. Tan na cuví tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhú xeehe tahán tsanaha nda ndi cumañi ca tsinú ñuhu ñayivi.

²⁶ Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsahá cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihi nyivi tyin tacan tan tsinu iñi ñi tsi ra tan tyaa yahvi ñi tsa caahán ra.

²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo,

² Jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuvi ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihi nyivi tsa jacahnú tsi Jutu Mañi yo Jesucristo tandihi ñi ityi. Tyin cuvi ra Nyoo cuenda ñi tan cuenda tucu maa yo.

³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añima ndo.

Nacaa nasocó Nyoo tsi nyivi yihí cuenda ra

⁴ Tandihi ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús.

⁵ Tan tsa iin ñi cuvi ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihi tucu ra tsa coto xaan ndo.

⁶ Tan tandihi tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo.

⁷ Tan yacan cuenda nduve tsa cumañi tsi ndo tyin iyó tandihi tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo.

⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuvi tyaa cuatyí tsi ndo quivi cua quitsi Jutu Mañi yo Jesucristo.

⁹ Nyoo tacan ñi maa javahá ra cuhva catyí ra. Tan maa ra cuvi ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita siin ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuvi ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo.

¹¹ Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo.

¹² Tyin nyooho siin siin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.”

¹³ ¿A cuñi ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin.

¹⁴ Tyahvi nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho,

¹⁵ yacan ña cuvi cahan ndo tyin tsicoondutyá ndo tsihin sivi yu.

¹⁶ Aan, jacoondutyá tucu yu tsi nyivi ra Estefanas, maa tyin ña nducuhún iñi yu tun jacoondutyá yu tsi inga ndo.

¹⁷ Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó

nu ñuhu ñayivi ihya caahán yu, tyin coto catyi nyivi tyin nduve yahvi nyaá tsa tsih̄i ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cuhan anyaya tsiñi ñi tuhun tsa tsih̄i ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsih̄i ra. Tan tsa cuenda yoo tsa cua cacu, tunyee iñi Nyoo cuví tsa tsih̄i ra.

¹⁹ Tyin tacan catyi maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyi Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihi tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduv̄i can jahá Nyoo.

²¹ Nyoo tsihin tsa tsiñi tuñi tsa iyó tsi ra tyaá ra cuhva tyin ña cuvi nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaá tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi.

²³ Maa tyin nyuhu jacotó ndi tuhun ra Cristo, ra tsa tsih̄i nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi.

²⁴ Maa tyin tsa cuenda nyivi tsa nacats̄i Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandih̄i tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo.

²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya.

²⁶ Yañi, cuñi tsi tsa cutuñi iñi ndo tyin Nyoo nacats̄i ra tsi ndo vasu ndi maa ña cuaaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya.

²⁷ Nacats̄i ra tsi nyivi tsa catyi nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacats̄i ra tsi nyivi nduve tunyee iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi.

²⁸ Tan nacats̄i ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlú ra tsi nyivi jahá tyin cahnu cuví ñi.

²⁹ Javahá ra tacan tyin tacan tan yoñi cuvi nduyaa nuu ra.

³⁰ Tan juvin ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin ñiñi ra, quih̄in nyaá ra tsi yo ndaha nu ña vaha tan cacu yo tan nduvahá yo jahá ra tan jacu íi ra tsi yo.

³¹ Yacan cuenda na javaha yo cuhva catyi tuhun Nyoo nu catyi tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsih̄i nu cruu

¹ Maa tyin yañi, quivi tsa quitsj yu cahan yu tuhun Nyoo tshin ndo, ña cahan yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra.

² Tyin maa ñi maa tuhun ra Jesucristo, nácaa tsihi ra nu cruu tsa cuenda catyí yo tyaá iñi yu tan cahan yu tshin ndo.

³ Tan tsa tsaá yu nu yucú ndo ñihi ñihí yu jahá tsa yuuhví yu.

⁴ Tan tsa cahan yu tshin ndo, ña cahan yu tshin tuhun sñi caa tumaa caahán ra tsitó xaan naha ra. Maa tyin tshin tunyee iñi Tatyí Ii Nyoo cahan yu tshin ndo.

⁵ Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tuhun tsa tsiñi tuñi tshin nyivi tsa ñihi nyaá tshin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo

⁷ tsa tsicumj xeehe ra tsa ndi cumañi ca javaha ra ñuhu ñayivi ihya. Tyaá ra cuhva tsa jacacu ra tsi yo tan cunyecu cuii yo tshin ra nda gloria.

⁸ Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaá ra naha tsi Jutu Mañi yo, ra ndacá ñaha gloria, nu cruu.

⁹ Maa tyin cuví tsi tumaa catyí maa tuhun Nyoo:

Yoñi nyehé tan yoñi tsiñi tan tsicá iñi tuhun vaha tsa javahá Nyoo tsa cuenda nyivi cuñi tsi ra, catyí tsi.

¹⁰ Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihí ca tuhun xeehe tsa tsicá iñi Nyoo tsi yo.

¹¹ Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo.

¹² Yoo ñavin tsa tsiñi tuñi tsa iyó nu ñuhu ñayivi naquihin yo, tyin naquihin yo Tatyí Ii Nyoo, tan juvin ra jacotó tandihí tsa ñihí yo jahá Nyoo.

¹³ Tan tsa caahán ndi tshin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhvá maa ndi tshin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

¹⁴ Maa tyin nyivi tsa nduve Tatyí Ii Nyoo iyó tshin, ña naquihin vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tshin ñi.

¹⁵ Maa tyin nyivi yihí Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyí inga nyivi tatun vaha a ña vaha tsa iyó añima ñi.

¹⁶ Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

3

Ña taahán tsi cunyicun yo tsi iin ra yihí tuhun Nyoo tshin yo, na cunyicun yo tsi Nyoo

1 Yañi, quivi tsa quitsj yu nu yucú ndo ña cuvĭ cahān yu tsihin ndo tumaa caahán yu tsihin nyivi jaquihín ityi Tatyí Ii Nyoo. Cahān yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo.

2 Cahān yu tsihin ndo tsihin tuhun tsa ña yĭi ñi cutuñi iñi ndo. Tumaa tsahá yo letsí coho lee tsa ñaha ca cuvĭ catsi nyayu, tacan javahā yu tsihin ndo, tyin nyooho ñaha ca cuvĭ cutuñi vaha iñi ndo. ¡Tan ndi vityin tan ña cutuñi iñi ndo!

3 Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusín ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo.

4 Tyin yĭhí ndo catyí ndo: “Cuenda ra Pablo yĭhí yu.” Tan inga ndo catyí ndo: “Cuenda ra Apolos yĭhí yu.” Yacan cuñi tsi catyí tyin javahá ndo tumaa javahá nyivi iyó ityi tsata.

5 Tyin zyóo ra cuvĭ yuhu, ra Pablo? Tan zyóo ra cuvĭ ra Apolos? tyin cañí tahan ndo tsaha ndi. ¿A ñavin musu Nyoo ñi cuvĭ ndi? Juvín. Tan cahān ndi tuhun Nyoo tsihin ndo tan natsinū iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyĭ maa Nyoo tyin javaha ndi.

6 Yuhu tatsĭ tuhun Nyoo añima ndo, tan ra Apolos tyosó. Maa tyin Nyoo jacuahñu ra tuhun ra añima ndo.

7 Tan yacan cuenda ndi ra tsa tatsí tan ndi ra tsa tyosó, nduve ra cuvĭ ra. Maa tyin Nyoo cuvĭ ra tandĭhi tyin maa ra jacuahnú tuhun ra añima yo.

8 Ra tsa tatsí tan ra tsa tyosó, iin ñi ra cuvĭ ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha.

9 Tan nyuhu, cuvĭ ndi musu tan jahá tyiñu ndi tyiñu Nyoo. Tan nyooho cuvĭ ndo tumaa ñuhu nu jahá tyiñu Nyoo.

Cuvĭ tucu ndo tumaa iin vehe tsa javahá Nyoo.

10 Tsahā Nyoo tsa vaha tsi yu tyin yuhu cuvĭ yu tumaa iin ra cuvĭ ityi nuu tsa samá vehe. Tyin tsaquin yu cuhva vehe can tan tyihĭ yu tsaha tsi tsitsi ñuhu. Tan inga ra tsa cua sama ityi siqui cuvĭ ra jacuahá, tan cuñi tsi jahá ra cuenda nácaa jacuahá ra tuhun Nyoo.

11 Tan yoñi cuvĭ caquin inga cuhva tyin tsa canyĭ cuhva can. Tan yacan cuvĭ ra Jesucristo.

12 Tan siqui cuhva can cuvĭ sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuvĭ tucu javaha ra vehe tsihin yutun, tsihin vitsin, a tsihin tiyama.

13 Maa tyin quivi nacuhva cuenda ra jacuahá tsa cuvĭ tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahā ra naha.

14 Tan vehe tsa ña cua cayu, cua ndoo tsi. Tan ra tsa javahā vehe can cua naquihin ra yahvi tsa taahán tsi tsi ra.

15 Maa tyin tun ndĭhi tyiñu javahā ra naha cayu, nduve náa cua ñihi ra naha. Vasu cua cacu maa ra naha tumaa cacū iin ra tsa cuñi cayu tan tsinū ra nu cayú ñuhu.

16 ¿A ña tsitó ndo tyin vehe ñuhu Nyoo cuvĭ ndo, tan iyó Tatyí Ii Nyoo tsitsi añima ndo?

17 Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuvĭ maa yo.

18 Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa

jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo.

¹⁹ Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvin ñi maa nu tsa nyityi javahá ra.”

²⁰ Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahvi nyaá can.”

²¹ Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsahá tsi ra naha tsa jacuahá ra naha tuhun vaha tsi ndo tan tsahá ndihí ra tandihí tsa iyó tsi ndo.

²² Yuhu ra Pablo, ra Apolos, ra Pedro, maa Nyoo tsahá tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihihí, tan tsa cuví vityin, tan tsa cua cuví nu cuahán ca tsi, tandihí maa tuhun ihya tsahá Nyoo tsi ndo.

²³ Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

4

Ña jacahnu yo tsi yo tan ndi tsi yañi yo

¹ Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tavá tyiñu Nyoo tsi ndi tsa jacuaha ndi tuhun xeehe ra.

² Tan ra tsa tavá tyiñu Nyoo cuñí tsi tsa tyaá yahvi ra tandihí tsa caahán ra tsihin ra.

³ Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu.

⁴ Vasu ndi maa tuví iñi yu tyin nduve cuatyí yu, maa tyin ña cuñí tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve.

⁵ Yacan cuenda, ña cahan ndo tsi yu. Cúatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶ Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi.

⁷ Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

⁸ Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu.

⁹ Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi.

¹⁰ Nyivi tsicá iñi maa ñi tyin tsa cuenda ra Cristo tan ndusoho ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo.

Nyuhu nduve maa tunyee iñi iyó tsi ndi tan nyooho iyo xaan cuñí ndo tyin iyó tunyee iñi tsi ndo. Tun ndasi cuñí nyivi nyehé ñi tsi nyuhu, jaha xaan ca ñi tsa ñayivi tsi nyooho.

¹¹ Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi.

¹² Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi.

¹³ Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

¹⁴ Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu.

¹⁵ Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juven yu cahán tuhun ra Cristo Jesús tsihin ndo nda jihna ñi tan natsinü iñi ndo tsi ra.

¹⁶ Tan tsa cuenda tsehe tsiacán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu.

¹⁸ Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo.

¹⁹ Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha.

²⁰ Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahán ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha.

²¹ ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahán vii yu tsihin ndo?

5

Nu tavá tyiñu ra Pablo tyin cutuñi iin ra tsicoq tsihin sihi quiin

¹ Ñihí tuhun yu tyin iin ra nyii tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha.

² Taahán tsi cuiihyá cuñi ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo.

³⁻⁴ Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú iñi yu tsi ndo, tan tsihin sivi Jutu Mañi yo Jesucristo jandaa yu tyiñu ra tsa javahá cuatyí can. Yacan cuñi tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee iñi Jutu Mañi yo Jesús tsihin ndo.

⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiquí tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

6 Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihi yutsan paan? Tan tacan ñi cuñí yo cuví tucu yacan.

7 Tava ndo yutsan iya tsahnu tsa jatívi tsi ndo. Tacan tan cuvi ndo tumaa paan tsa tuhvá nyívi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyi luhlu tsa tsihí tsa cuenda cuatyi yo.

8 Yacan cuenda taahán tsi catsi coo yo tyin tsihí ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi iñi yo tyin cuví tsi tumaa paan tsa nduve yutsan iya yihí.

9 Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha.

10 Tan tsa caahán yu tyehen tsihin ndo, ñavin tsa cunu ndo nu nyívi tsa iyó ityi tsata, ñi tsa iyó tsihin rayii a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayívi ihya.

11 Maa tyin tsa cuñí yu catyi yu tsihin ndo ña cunyaa naa ndo tsi nyívi tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó iñi ñi, o jacahnú ñi tsitoho, o caahán ñi cuendu, o tsihí ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi.

12-13 Tyin yoo ña taahán tsi tatsi tuñi yo tsi nyívi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyívi yihí cuenda Nyoo. Yacan cuenda tavá ndo tsi ra iyó cuatyi nu yucú ndo.

6

Ña cua ndacan yo cuatyi tsaha iin yañi yo cuenda Nyoo nuu ra cumí tyiñu

1 ¿Nacuenda tyin tsicán ndo cuatyi tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyi?

2 ¿A ña tsitó ndo tyin juvin ñi maa yo cua jandaa cuatyi tandihi nyívi iyó nu ñuhu ñayívi ihya nu cuahán ca tsi? Tan tatun maa yo cua jandaa cuatyi can, ¿nacuvi tyin ña cuví jandaa ndo cuatyi nyihí ihya?

3 ¿A ña tsitó ndo tyin cua jandaa yo cuatyi nda cuanda ángel? Tun tacan, ¿a yii jandaa yo cuatyi nyihí tsa iyó nu ñuhu ñayívi? ¡Ña yii jandaa yo can!

4 Yacan cuenda tatun iyó tsihí nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo?

5 Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuatyi yañi ndo nu yucú ndo?

6 Tyin cuahán ndo cua ndacan ndo cuatyi tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

7 Ña vaha tsa iyó tsihí nu yucú ndo. Vaha taxin ca cunyeé iñi ndo tatun javaha nyívi tsa ña vaha tsi ndo. Tan jaña ndo na suhu maa ñi tsa tsii ndo.

8 ¡Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

9-10 ¿A ña tsitó ndo tyin nyívi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha

tsa tsicá nuu tsihin rayii, ndi ñi jacahnú tsitoho, ndi ra iyó ñasiihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusiihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandaví ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi.

¹¹ Tyin tacan javahá juhva nyooho. Maa tyin tsa ndatsj cuatyí ndo tan ndu ii ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

Cuñu ñuhu yo cuví vehe ñuhu Nyoo

¹² Catyí tsi tyin nuña maa javaha yo tandihí náa cuñí maa yo. Tan nditsa tucu maa, maa tyin ña tandihí tan vaha. Cuví javaha yo náa cuñí maa yo, maa tyin cuñí tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo.

¹³ Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo.

¹⁴ Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

¹⁵ ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jatívi yu tsihin iin ñaha tsicá nuu? Ña taahán tsi javaha yu tacan.

¹⁶ ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduvj ra tsihin ña? Tyin nu tutu Nyoo catyí tsi tyeheh: “Tsa nduvi ñi, iin ña nyivi cuví ñi.”

¹⁷ Maa tyin tatun iin nyivi tan nacuhva ñi aña ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra aña ñi.

¹⁸ Jandihí ndo tsa iyó ndo tsihin ñaha a tsihin rayii tun ñavin ñasiihi ndo a ñavin yii ndo cuví. Tyin tandihí inga nu cuatyí tsa javahá nyivi ña jatívi can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jatívi can cuñu ñuhu ñi.

¹⁹ ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo.

²⁰ Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

7

Nu tsahá cuenda ra Pablo nácaa taahán tsi coo nyivi tindahá

¹ Tan vityin cua cahan yu tsa tsicá tuhun ndo tsi yu nu carta tsa jaquitsj ndo tsi yo. Nditsa tyin vaha tsa ña tindaha yo.

² Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda cuñí tsi tsa coo ñasiihi tsa intuhun intuhun ra naha, tacan tucu ñiñaha taahán tsi coo yii tsa intuhun intuhun ñi.

³ Na javaha rayi cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yí ña.

⁴ Ñiñaha ña cuvi cundaca ñaha ñi maa ña cuñu ñuhu ña, tyin tsii yí ña cuvi cuñu ñuhu ña. Tacan tucu maa yí ña, ña cuvi cundaca ñaha ñi maa ra cuñu ñuhu ra tyin tsii ñasihi ra cuvi cuñu ñuhu ra.

⁵ Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayi inga ñaha o ñaha nducu ña inga rayi tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuvi tindaha ndo tatun cuñi ndo.

⁷ Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihi nyooho tsa ñaha ca tindaha tan nyooho ñi tsihi yí tyin vaha ca cuvi tsi ndo tun ña tindaha ndo tumaa maa yu.

⁹ Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ñiñaha tsa tsa tindaha: ña naco ndo yí ndo tyin tuhun caahán yu ihya, ñavin tsa cuñi maa yu cuvi, tyin maa Jutu Mañi yo tsahá itsi tyin cuhva cuenda yu tsi ndo.

¹¹ Maa tyin tatun iin ñaha tan naco ña yí ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yí ña. Tan tacan tucu rayi, ña taahán tsi naco ra ñasihi ra.

¹² Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoó ña vaha tsa cunyaa ña tsihin ra, nduve ndatu tsa naco ra tsi ña.

¹³ Tan tatun iin ña hermana, tan ña tsinú iñi yí ña tsi Nyoo, ndoó ra vaha tsa cunyaa ra tsihin ña, nduve ndatu tsa naco ña tsi ra.

¹⁴ Tyin tsa yahá nasoco Nyoo tsi rayi tsa ña tsinú iñi can tsa cuenda tsa iin ñi cuvi ra tsihin ñaha tsa tsinú iñi. Tan tsa yahá nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuvi ña tsihin ra tsinú iñi. Yacan cuenda sehe ñi ña cuvi tsi naha tsi tumaa cuvi sehe nyivi tsa ña tsinú iñi tsi Nyoo, tyin tsa nasoco ndihi Nyoo itsi naha tsi.

¹⁵ Maa tyin tatun rayi an ñaha tsa ña tsinú iñi tsi Nyoo, tan cuñi ñi naco ñi tsi tahan ñi tsa tsinú iñi tsi Nyoo, na naco maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi.

¹⁶ Tyin ña tsitó iin ñaha tatun cacu yí ña. Tan ndi rayi ña tsitó ra tatun cacu ñasihi ra.

¹⁷ Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuvi tsa jacuahá yu tandihi vehe ñuhu tan iin tan iin ñuu.

¹⁸ Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña çaça iñi ndo tsa cuenda yacan. Maa tyin tun ña tyaá ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can.

¹⁹ Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuvi tsa tyaá yahvi yo tuhun caahán Nyoo.

20 Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quiví tsa caná Nyoo tsi ndo.

21 Tyin tatun musu cuví ndo quiví tsa caná Nyoo tsi ndo, ña çaça iñi ndo. Maa tyin tatun tsahá tsi cuhva tsa ndoó nuña ndo, nducu ndo cuhva.

22 Iin ra tsa cuví musu tan quihví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihví ra cuenda Jutu Mañi yo, vityin cuví ra musu tsa cuenda ra.

23 Nyoo yahvi xaan jata ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo.

24 Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quiví caná Nyoo tsi ndo.

25 Tan tsa cuenda nyivi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu.

26 Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó.

27 Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo.

28 Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñí yu tsa nyehé ndo tundoho.

29 Yañi, cuñí yu cahan yu tuhun ihya tsihin ndo: Juhva cuii ña quiví iyó yo. Yacan vityin tan ityi nuu tandihi ra tsa iyó ñasihi cuñí tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó.

30 Tan nyooho tsa iyó tucuihya iñi, ña tyaa yahvi ndo tucuihya iñi can. Tan nyooho tsa sii cuñi, ña tyaa yahvi ndo tusii iñi can. Tan nyooho tsa jata ndaha tyiñu taahán tsi coo ndo tumaa tsa nduve ndaha tyiñu ndo.

31 Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

32 Cuñí yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñí maa Jutu Mañi yo.

33 Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra.

34 Tan tacan tucu ñiñaha, siin siin cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yí, maa ñi cuhva coo vaha ña tsihin yí ña nducú ña.

35 Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñí yu tsi ndo. Maa tyin coo ndo iin ñayivi cuiti tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

36 Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can.

37 Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa.

38 Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

39 Maa tyin ley Nyoo catyi tsi na cundacá ñaha rayii tsi ñasihi ra tsitsi tsa ndi iyó ra. Tatun tsa tsihi ra, tacan tan cuvi ndoo nuña ña tan tindaha ña yó tsihin cuñi maa ña. Maa tyin tun cua tindaha ña, na tindaha ña tsihin ra yihí tuhun Nyoo.

40 Maa tyin sii xaan ca cua cuvi tsi ña tun ña tindaha ña inga tsaha. Tsehe cuvi tsa tsicá iñi maa yu. Tan cuñi yu tyin maa Tatyí Ii Nyoo, tsahá tuhun ihya tsi yu, tan tsahá cuenda yu tsi ndo.

8

Nu jacuahá ra Pablo tyin ña vaha janacava yo tsi nyivi nu cuatyí

1 Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñi yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñi yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñi tahan yo tsi yo jacuahnú tsi tsi yo tsihin Nyoo.

2 Ra tsa cuñi tyin tsitó xaan ra, nduve náa tsitó ra.

3 Maa tyin Nyoo tsitó ra ndáa nyivi cuñi tsi ra tsihin tsa ñi iñi añima ñi.

4 Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó.

5 Vasu ndi maa juhva nyivi catyi ñi tyin iyó cuaha nyoo tsa ndacá ñaha nu ñuhu ñayivi ihya tan andivi,

6 maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuenda tsi maa yo.

7 Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñi ñi tyin nyayu, tsa jamañi nyivi tsi tsitoho can, ica tsi. Tan cuñi ñi tyin tun catsi ñi nyayu can cua coo cuatyí ñi nu Nyoo.

8 Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo.

9 Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo.

10 Tyin tatun yooho tsa tsitó un tuhun ihya, tan cunyata un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsi un tsa jamañi nyivi nu tsitoho, cua cuñi ndihí ra catsi ra.

11 Tan cua tivi añima ra tyin cuñi maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siqui un cua cahun cuatyí can.

12 Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo.

13 Yacan cuenda tatun janacava yu tsi iin yañi yo nuu cuatyí tsihin tsa tsatsi yu nyayu, vaha ca tsa ña cua catsi ca yu nyayu ndi sava ca quivi, tyin ña cuñi yu tsa janacava yu tsi yañi yo nuu cuatyí.

9

Tsa taahán tsi javahá iin ra tava tyiñu ra Jesucristo

¹ Nditsa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacotó yu tsi ndo.

² Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juvin yu cahan tuhun ra tsihin ndo tan natsinú iñi ndo tsi ra. Yacan cuenda juvin ndo cuví tsandaa.

³ Tyehen cuví tsa cua cahan yu tsihin nyivi tsa caahán nyaa tsi yu.

⁴ Iyó ndatu tsa quihín yu tandihi tsa tsahá ñi catsi yu tan tsa tsahá ñi coho yu.

⁵ Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihi ca ra tava tyiñu ra Jesucristo.

⁶ ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo?

⁷ Ra tsa cuví andaru iyó yahví ra naha. Tan ra tsa tatsí yava nducuaa tsatsi ra tucuaa tsa quee nu nducuaa ra. Tan ra tsa jahá cuenda indiqui tsihi ra letsí ti.

⁸ Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaa ra Moisés catyí tsi tyehen:

⁹ “Ra tsa tatsí trigu ña taahán tsi tyihi ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi.

¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha.

¹¹ Tan tacan cuví tucu nyuhu, quitsí cahan ndi tuhun Nyoo tsihin ndo, tumaa tsa quitsí tatsí ndi tsiti tsitsi añima ndo cuvi can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo.

¹² Tatun jatyinyeé ndo tsi inga ra tsa ña quitsí tyihi tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsiñi ñuhu tsi ndi tsi ndo tyin coto jandihí ndo tsa tyaa yahvi ndo tuhun ra Cristo tsa jacuahá ndi.

¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tava sñin ra naha juhva cuñu quiti tyin catsi ra naha. Tan tandihi ca cuñu can cua cahmí ra naha tumaa catyí maa Nyoo tsihin ra naha.

¹⁴ Tan juvin ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi.

¹⁵ Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaa yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nactu maa yu jaha soco tan ñavin ca tsa ndihí tsa sñi cuñi yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

16 Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya.

17 Yacan cuenda tatun cahan yu tsihin tsa n# iñi yu, cua ñihi yu yahvi yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsaha maa Nyoo tsi yu cuví tsi.

18 Tan tsa s# cuñi yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

19 Vasu ñavin musu cuví yu, maa tyin nanduví yu musu tandihí nyivi tyin tacan tan cuví jaha canaa yu cuaha ca nyivi cuenda ra Cristo.

20 Tatun nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu.

21 Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahvi yu ley Nyoo tyin tyaá yahvi yu ley ra Cristo.

22 Tatun nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi.

23 Javahá yu tacan tyin tacan tan cacu nyivi tan nasoco ndihí tucu maa Nyoo tsi yu.

24 Tsitó ndo tyin tatun cua cunu suuhva nyivi, tandihí ñi tsinú, maa tyin intuhun ñi ñi jaha canaa. Tacan tucu maa yo, cuñi tsi tsa ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo.

25 Tandihí nyivi tsa tsinú suuhva, nacoó ñi tandihí tsa jatyañú tsi ñi tyin cuñi ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tivi maa.

26 Tsa cuenda yuhu ña tsinú soho ñi yu, tan ndi ña cañi tahan soho ñi yu.

27 Maa tyin ñihi ndacá ñaha yu tsi cuñu ñuhu yu. Tan jañiñi yu tyaá yahvi yu tsi Nyoo, coto juven ñi maa yu tsa yaha jacuahá yu tsi inga nyivi, tan ndoo yu.

10

Nu jacuahá ra Pablo tyin ña vaha jacahnú yo tsitoho

1-2 Yañi, ña cuñi yu tsa naa iñi ndo tsa cuví tsi tsii tsaahnu yo tahan tsanaha. Nyoo jacuhun ra iin vico ityi nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityi nuu tsihin ñi. Tan tsa tacan, tumaa tsa tsicoondutya ñi tsihin vico tañ tsihin ndutya ñuhu tan ndu iin ñi tsihin ra Moisés.

3 Tan Nyoo tsaha ra iin ñi tsa tsatsj tandihí ñi.

4 Tan tsihi ñi ndutya tsa quitá tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihi ñi.

5 Maa tyin vasu cuaha tsa iyo javaha Nyoo nyehe ñi, cuaha ñi ña tyaá yahvi ñi tuhun cahan ra tsihin ñi. Tan tsihi ñi nu tsiqui can.

6 Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can.

7 Yacan cuenda ña jachanu ndo tsitoho, tumaa javahá juhva ñi can, tyin catyí nu tutu Nyoo tyehen: “Tsinyecu ñi, tsatsí ñi, tan tsihí ñi. Yahá can tan nduvitá ñi, tsahan quitsahá tsañi ñi [jachnú ñi indiqui xuhun cuaan tsa javahá ñi].”

8 Ña coo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javahá nyivi can. Tan tsihi oco uñi mil ñi tsa iin quivi.

9 Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihi ñi tsa caan coo tsi ñi.

10 Tan ña cahan ndo ndavaha ñi siqui Nyoo, tumaa tsa cahán juhva ñi can. Tan jaquitsi ra ángel ra tsahñi tsi ñi.

11 Tandihí yacan tahañ tsi tsaahnu yo tsa tsicoo tahañ tsanaha. Tan tsinyaa tsi nu libro Nyoo tyin tacan tan yoo tsa iyó yo nu cua ndihí ñuu ñayivi ihya vityin coto yo tyin ña taahán tsi javaha yo tandihí tsa javahá ñi can.

12 Tan nyooho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha].

13 Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyee iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

14 Yacan cuenda yañi, ña jachanu ndo tsitoho.

15 Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu.

16 Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuví yo tsihin ra Cristo tsa cuenda ñiñi ra. Tan paan can cuñi tsi catyi tyin iin ñi cuví yo tsihin ra tsa cuenda cuñu ñuhu ra.

17 Tyin vasu cuaha yo, maa tyin tandihí yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

18 Tyihí tuñi iñi ndo cuhva iyó nyivi Israel. Tsatsí ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra.

19 Ñavin caahán yu tyin iyó yahvi nyaá tsitoho tsa jachnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can.

20 Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha.

21 Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha.

22 Ña cuhva yo tsihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyivi

²³ Nditsa tsa caahán nyivi: “Cuví javaha yo náa cuñí maa yo.” maa tyin ña tandihí can tan jacuahnú can tsi yo tsihin Nyoo tan ndi ña cuví can tsa vaha tsi yo.

²⁴ Ña cuví caca iñi yo tsa cuenda maa ñi maa yo, tyin cuñí tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Catsby nyooho tandihí cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo.

²⁶ Tyin ñuhu ñayivi tan tandihí tsa iyó nuu tsi, tsii maa Nyoo cuví.

²⁷ Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñí ndo cuhun ndo, vaha maa cuhun ndo, catsby nyooho tandihí tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

²⁸⁻²⁹ Maa tyin tatun ndáa nyivi caahán tyehehen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña catsby ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñí tsi tsa jahá yu cuenda tsi yu tsa catyi tsa tsicá iñi inga ca nyivi?”

³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyi ndo.

³¹ Vaha maa, tun tsatsí ndo, tan tsihí ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo.

³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo.

³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

11

¹ Nyhe ndo tumaa javahá yu cuhva javahá ra Cristo, tacan taahán tucu tsi javaha nyooho cuhva javahá yuhu.

Nacaa taahán tsi javaha ñiñaha nu iyó culto

² Yañi, s# xaan cuñí yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo.

³ Maa tyin cuñí yu tsa coto ndo tyin ra Cristo cuví jiñi tsihin intuhun intuhun ray# tyin juvin ra cuví ityi nuu tsihin ra, tan ray# cuví jiñi tsihin ñas#hi ra, tumaa cuví Nyoo jiñi tsihin ra Cristo.

⁴ Tatun iin ray# tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra.

⁵ Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya nd# jiñi ña cuví can. Tan tsahá ña ticanuu tsi y# ña tyin juvin ra cuví jiñi tsihin ña.

⁶ Tatun iin ñaha tan ña tyasí ña jiñi ña, vaha taxin ca xatya ña tandihí ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña.

⁷ Ña taahán tsi tsa casi ray# jiñi ra. Tyin cuhva caá Nyoo caá ra, tyin ndacá ñaha ra tsi ñas#hi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi y# ña tsihin tsa tsahá ña tsa cundaca ñaha ra tsi ña.

⁸ Tyin quivi javahá Nyoo tsi ray#, ña javahá ra tsi ra tsihin yiqui naha ñaha. Tyin tsihin yiqui naha ray# javahá ra tsi ña.

⁹ Tan tsacatyí ray#, tan tsinú ñaha, tan ñavin tsacatyí ñaha tan tsinú ray#.

10 Yacan cuenda ñiñaha cuñí tsi tsa cundasí jiñi ñi. Tyin cuñi tsi catyi tyin ndacá ñaha yí ñi tsi ñi. Tan cuví tsi tsa vaha tsi ra ángel naha ra.

11 Maa tyin tyaq Nyoo cuhva tyin tsiñí ñuhu rayí tsi ñaha. Tan tsiñí ñuhu ñaha tsi rayí.

12 Nditsa tyin ñaha tsinú ña tsihin yíqui naha rayí jahá Nyoo. Maa tyin nda cuanda quívi can tan quítsahá tsahá Nyoo tsa coo sehe yí ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayí tan ñaha.

13 Tyíhi tuñi jihna íñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu?

14 Tsitó yo tyin ticanuu cuví tsi tsa cuenda rayí tatun nañi jiñi ra.

15 Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi.

16 Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyívi Corinto tyin ña vaha cuhva tsatsí ñi Santa Cena

17 Yañi, inga tuhun cua cahan yu tsihin ndo tyin ña sñi cuñi yu tsihin ndo; tyin tsa javahá ndo nu ndu íin ndo, ña tsahá tsi tsa vaha tsi ndo, tan jatívi tsi tsi ndo.

18 Tyin catyi nyívi tsihin yu tyin cuhva tsa ndu íin ndo tsa cua coo ndo culto, tan natahví sava ndo. Tan tsicá tucu íñi yu tyin vasiquí nditsa tsa caahán ñi.

19 ¿Vasiquí cuñi maa ndo tyin tsihin tsa natahví sava ndo tan quituvi ndáa nyooho tsinú vaha íñi tsi Nyoo!

20 Maa tyin tatun tacan ñi iyó tsíhi nu yucú ndo, ñavin Santa Cena cuví can.

21 Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu íin tandíhi nyívi. Tan yíhi ndo cuaha tsatsí ndo, tan nda cuanda tsiñi ndo tsihin vinu. Tan yíhi nyívi ña ñihí ñi tsa catsi ñi jahá ndo.

22 ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyívi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

23 Tyin Jutu Mañi yo jacuahá tuhun ihya tsi yu. Tan juvin yacan tsa yaha jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan íñi tsi ra, quihñ ra íin paan.

24 Tan tsa yaha nacuhvá ra tyahvi nyoo tsi Nyoo tan tsahnú ra paan can. Tan catyi ra: “Çatsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun íñi ndo tsi yu”, catyi ra Jesús.

25 Tan tsa yaha tsa cuxiñi ra naha tan quihñ ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yíhi tsitsi vasu ihya, ñiñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun íñi ndo tsi yu”, catyi ra Jesús tsacuaa can.

26 Tan tahan ñi tsa ndu íin yo tan tsatsí yo paan tan tsíhi yo vinu jacotó yo tsi nyívi tyin tsacatyí cuatyí yo tsihi Jutu Mañi yo. Tan tacan jacotó yo tsi nyívi nda cuanda quívi quítsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Tatum tsatsí yo paan tan tsihí yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihí ra Cristo nu cruu tan tsa tsatí niñi ra.

²⁸ Yacan cuenda cuñí tsi jaha yo cuenda tatum vaha cuahán yo tsihin Nyoo tsa ndi cumañi ca catsi yo paan tan coho yo vinu.

²⁹ Tyin Nyoo tatsí tuñi ra tsi yo tun tsatsí yo tan tsihí yo tan ña tsicá iñi yo tsa cuenda tsa tsihí ra Cristo.

³⁰ Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyívi tahan ndo tsa yahá tsihí ñi.

³¹ Maa tyin tatum jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo.

³² Maa tyin tatum tatsí tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyívi iyó cuenda nu ñuhu ñayívi ihya.

³³ Tan tacan nyooho yañi, tatum cua ndu iin ndo tsa cua catsi ndo Santa Cena, cuatu tahan ndo tsi ndo tan catsi ndo tan coho ndo iin caa ñi.

³⁴ Maa tyin tatum ndáa nyooho tsiisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quívi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñí yu tsa coto ndo náa ndihí ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quívi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo.

³ Yacan cuenda cuñí yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo.

⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo.

⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihí yo tan javahá yo can.

⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihí ca nyívi yihí cuenda ra.

⁸ Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo.

⁹ Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyívi cuuhví.

¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyívi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyívi.

¹¹ Tan tandihí yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

Tandihí yo tan cuví yo intuhun ñi cuñu ñuhu tsihin ra Cristo

12 Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo.

13 Tan tacan tucu tandihi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutyá yo tan nanduví yo intuhun ña cuñu ñuhu ra Cristo tyin tsaha ra intuhun ñi maa Tatyí li ra coo tsihin tandihi yo.

14 Tyin cuñu ñuhu yo ña cuví tsi intuhun ñi maa tinuu tyin cuñí tsi tsa cunyecu tandihi ca tsa cutahan tsihin tsi tan cuví tsi cuñu ñuhu ñi.

15 Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can.

16 O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can.

17 Tun tsatyin nani cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin nani cuñu ñuhu yo cuví tsi soho, ¿nácaa cua tahñi yo?

18 Maa tyin Nyoo tyaá ra tan iin tan iin can nu cuñí maa ra.

19 Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can.

20 Maa tyin tsa ndu iin soho, tinuu, jiñi, ndaha, tan tandihi ca maa, tacan tan cuví tsi intuhun cuñu ñuhu.

21 Tinuu yo ña cuví catyí tsi tsihin ndaha yo: “Ña tsiñí ñuhu yooho tsi yu.” Tan ndi jiñi yo tan ña cuví catyí tsi tsihin tsaha yo: “Ña tsiñí ñuhu yooho tsi yu.”

22 Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca.

23 Tan nu cuñí yo tyin ña sii caá, tyasí yo. Tan nu ña taahán tsi nyehé nyivi, yacan tyasí vaha ca yo.

24 Tan nu sii caá, ña tyasí yo. Tacan javahá Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa.

25 Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusin tsi.

26 Tatun luxu cuñu ñuhu yo nyehé tundoho, nyehé ndihi tan ca cuñu ñuhu yo tundoho. Tan tatun sii cuñí luxu tsi, sii cuñí tan ca tsi.

27 Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo.

28 Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uví, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yahá can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra.

29 Ña tandihi yo tan tsicá yo tyiñu ra Cristo. Ña tandihi yo tan cuví yo ndusu yuhu ra. Ña tandihi yo tan cuví yo ra jacuahá. Ña tandihi yo tan javahá yo tsa iyo.

³⁰ Ña tandihí yo tan tsahá Nyoo tunyee iñi tsa janduvahá yo tsi nyívi cuuhví. Ña tandihí yo tan caahán yo inga yuhu tsa ña tsitó yo. Ña tandihí yo tan cuví nacotó yo tan nacatyí tuhun yo náa cuñí tsi catyí tsa caahán inga nyívi.

³¹ Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yo iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyívi

¹ Tatun yuhu tan cuví cahan yu cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyívi, cuví yu tumaa tyombo tsa nañí ñi maa o iin caa tsa tsacú ndaxin ñi maa.

² Tatun cuví cuhva cuenda yu tuhun caahán Nyoo, tan cuví coto yu tandihí tuhun xeehe, tan tsitó yu tandihí tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandihí yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñí yu tsi Nyoo tan ndi tsi nyívi, nduve náa ra cuví yu.

³ O tatun cuhva yu tandihí tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñí yu tsi Nyoo tan ndi tsi nyívi, nduve náa cua jatyinyee can tsi yu.

⁴ Tatun nditsa tsa cuñí yo tsi Nyoo tan tsi nyívi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo.

⁵ Tatun nditsa tsa cuñí yo tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoo tsihi tsitsi añima yo.

⁶ Tatun nditsa tsa cuñí yo tsi Nyoo tan tsi nyívi, ña sii cuñí yo náa ndihí tsa ña vaha javahá ñi, maa tyin cusii iñi yo tsihin tsa vaha tan tsa nditsa.

⁷ Tatun nditsa tsa cuñí yo tsi Nyoo tan tsi nyívi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

⁸ Tsa cuñí yo tsi Nyoo tan tsi nyívi ña cua cundihí maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo.

⁹ Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyívi,

¹⁰ maa tyin quívi quítsi nyico ra Cristo, cua cundihí tsa tsitó yo luxu ñi tyin cua coto yo tandihí maa.

¹¹ Quívi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quívi tsahnú yu nacoó yu tsa yu cuhva javahá ra nyihi.

¹² Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quívi cua quítsi ra Cristo, cua coto yo tandihí maa. Luxu ñi tsitó yo vityin, maa tyin quívi quítsi nyico ra, tandihí cuii maa tan cua coto yu, tumaa nacotó maa ra tsi yu vityin.

¹³ Iyó uñi taahan tsa ña cua ndihí maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihí tsa caahán Nyoo tyin cuhva ra tsi yo, tan tsa cuñí yo tsi Nyoo tan tsi nyívi. Tan tsitsi tsa nduñi taahan tsehe, tsa tsiñi ñuhu ca cuví tsa cuñí yo tsi Nyoo tan tsi nyívi.

14

Nu jacuahá ra Pablo nácaa cahan yo inga yuhu tsa ña tsitó yo

¹ Jañihi ca ndo cuñi ndo tsi Nyoo tan tsi nyivi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyivi.

² Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyí Ii Nyoo.

³ Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi.

⁴ Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyivi, tandihi ñi tsahnú.

⁵ Yuhu cuñi yu tsa cahan tandihi ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuvi nacoto ndo nácaa caahán inga ndo tsihin inga yuhu, ñacatyí tuhun ndo tsihin ñi. Tacan tan cuvi jatinyeé tsi tsi tandihi ñi.

⁶ Yacan cuenda yañi, tatun yuhu tan tsaa yu nu yucú ndo, tan cahan yu inga yuhu, ña cua jatinyeé tsi tsi ndo. Maa tyin tun cahan yu tsa janahá Nyoo tsi yu, o tsa jacoto ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatinyeé tsi tsi tandihi ndo.

⁷ Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo.

⁸ Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha.

⁹ Tan tacan tucu yoo, tatun caahán yo inga yuhu tsa ña cutuñi iñi nyivi, ña cua coto ñi náa caahán yo. Tan cua catyí ñi tyin jiñi yo ña vaha cuñi, yacan caahán maa yo.

¹⁰ Cuaha xaan yuhu caahán nyivi nu ñuhu ñayivi ihya. Tan intuhun intuhun nuu yuhu tan iyó iyó ñi tsa cuñi tsi catyí.

¹¹ Maa tyin tun ña cutuñi iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu.

¹² Yacan cuenda nyooho tsa cuñi xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuvi jatinyeé vaha ca tsi nyivi yucú vehe ñuhu.

¹³ Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyivi náa cuñi tsi catyí.

¹⁴ Tyin tatun tsicán tahvi yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñi iñi tsi.

¹⁵ Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan cata ndihi tucu yu yaa tsihin yuhu tsa cutuñi iñi yu.

¹⁶ Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyivi tsa ña tsitó náa cuvi yacan. Tan ña cua cuvi jacahnú ñi tsi Nyoo tsihin un.

¹⁷ Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyeé tsi tsi inga nyivi tyin ña cutuñí iñi ñi tsa caahán un.

¹⁸ Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihi nyooho.

¹⁹ Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñi iñi ndo.

²⁰ Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi.

²¹ Catyí Nyoo nu libru ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo.

²² Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú iñi tsi ra.

²³ Tyin tatun tandihi ndo caahán ndo inga yuhu nu ndu iin ndo, tan quihvi iin nyivi tsa ña yihí cuenda Nyoo, o ñi tsa ña cutuñí iñi tuhun Nyoo, cua catyi ñi tyin jiñi ndo ña vaha cuñi.

²⁴ Maa tyin tatun tandihi ndo tsahá cuenda ndo tsa caahán Nyoo tan quihví iin nyivi tsa ña yihí cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo.

²⁵ Tan tandihi tsa iyó tsitsi añima ñi cua nacoto ñi, tan cua cuiñi tsiti ñi jacahnu ñi tsi Nyoo. Tan cua catyi ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñi tsi catyí inga yuhu can. Maa tyin tandihi yacan taahán tsi cuví tsi iin tsa tsahá tunyee iñi maa Nyoo tsi tandihi ndo tsa yihí ndo cuenda ra.

²⁷ Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo çahan; ña çahan tandihi ndo juven ñi cuhva tsa caahán inga ndo. Tan inga tucu tuhun cuñi tsi tsa nacatyí tuhun inga ndo tsa caahán ndo.

²⁸ Maa tyin tun yoñi cuví nacatyí tuhun tsa caahán ndo, vaha taxin ca, ña çahan ndo tsihin inga yuhu nu ndu iin ndo. Çahan ndo tsihin Nyoo tsihin inga yuhu tun cuñi ndo, maa tyin ndihi cuhva tsiñi ñi maa ndo.

²⁹ Tacan tucu tatun tsahá cuenda yo tsa caahán Nyoo. Çahan uvi ndo, a uñi ñi ndo. Tan tandihi ca ndo jáha ndo cuenda tun vaha tsa caahán yañi ndo.

³⁰ Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñi tsi jandihi ra tsa caahán ra tan cahan inga ñi.

³¹ Tan tacan tandihi nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihi nyooho tsa ndu iin vehe ñuhu tan ndu iin ca iñi ndo.

³² Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihi cahan inga nyívi,

³³ tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iín nyívi yihí cuenda ra Cristo,

³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho.

³⁵ Tatun náa cuñí ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iín ndo.

³⁶ Tatun siin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsaha tuhun Nyoo. Tan ñavin nyooho ñi naquihín tuhun Nyoo.

³⁷ Tatun ndáa nyooho cuñí tyin ndusu yuhu Nyoo cuví ndo, o cuñí ndo tyin Tatyí li Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsaha maa Jutu Mañi yo tyin cuhva cuenda yu tsi ndo cuví.

³⁸ Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyívi. Tan ña çasi ndo nu cahan nyívi inga yuhu.

⁴⁰ Maa tyin javaha ndo tandihi tsihin tsa vii tan tsa catsi.

15

Nacaa nandoto ra Cristo

¹ Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quívi can. Tan naquihín ndo itsi tan ñi iñi añima ndo tsinú iñi ndo.

² Tan juven tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinú iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsihi ra tsacatyí cuatyí yo, tumaa catyí nu libru Nyoo tyin cua cuví.

⁴ Tan quihví cuñu ñuhu ra tsitsi ñuhu. Maa tyin tsinu uñi quívi nandoto ra tumaa catyí nu libru Nyoo.

⁵ Tan tsa yaha tan quituví ra nuu ra Pedro tan quituví ndihi ra nuu tandihi ra tsicá tyiñu ra.

⁶ Yaha can tan quituví ra nuu yaha ca uhun cientu nyívi yihí cuenda ra. Tan juhva ñi can tsa tsihi ñi, maa tyin ndi iyó cuaha ca ñi nda cuanda vityin.

⁷ Yaha can tan quituví ra nuu ra Jacobo. Tacan tan quituví ndihi ra nuu tandihi ra tsicá tyiñu ra.

⁸ Tan nu ndihi ña quituví ndihi ra nuu yuhu, tsa cuví yu tumaa iin lee tsa cacú yutya.

⁹ Tyin tsa nuu tandihi ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaá ndaha xaan yu tsi nyívi yihí cuenda ra.

¹⁰ Maa tyin Nyoo vaha iñi ra tsihin yu. Yacan cuenda tsaha ra ndatu tsa cuví yu ra tsicá tyiñu ra tan ña cuatu tsaha ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihi ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can.

¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú ifni ndo.

Nu jacuahá ra Pablo tyin nditsa tsa cua nandoto ndiyi

¹² Tsa caahán ndi tsihin ndo yacan cuví tsa nandoto ra Cristo tsa yaha tsihi ra tan ¿Nacuenda yihí ndo catyí ndo tyin ña nandoto ndiyi?

¹³ Tyin tatun ña cua nandoto ndiyi, ndi ra Cristo tan ña nandoto ra quivi can.

¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú ifni ndo tsi ra.

¹⁵ Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo.

¹⁶ Tyin tun ña cua nandoto ndiyi, ndi ra Cristo tan ña nandoto ra.

¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú ifni ndo tsa jahá ra tucahnu ifni cuatyí ndo.

¹⁸ Tan ndi nyivi tsa tsihi tsa yihí cuenda ra ña cacu ñi tun ña nditsa tsa nandoto ra.

¹⁹ O tun nu ñuhu ñayivi ihya ñi jatinyeé ra tsi yo, tan ña cua quitsi ra inga tsaha, nduve yahvi nyaá tsinú ifni yo tan cuví yo nyivi soho ca tsa nuu tandihi ca nyivi.

²⁰ Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandihi ca ndiyi tsa cua nandoto.

²¹ Tyin tsacatyí cuatyí ra Adán tan tsicoo tuhun tsihi. Tan yacan tsiihi nyivi nda cuenda vityin. Maa tyin tsa cuenda tsa nandoto ra Cristo cua nandoto tandihi nyivi yihí cuenda ra.

²² Tyin tumaa tsa tandihi yo tsihi tyin cuví yo tata ra Adán, tacan tucu cua nandoto tandihi yo tan coo yo ñayivi nyito tyin cuví yo nyivi ra Cristo.

²³ Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra.

²⁴ Yaha can tan cua naa ñuhu ñayivi ihya tan ña cua cundaca ñaha ca ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee ifni tsa iyó tsi tandihi nahnu, tan cua nacuhva cuenda ra can tsi Nyoo Jutu ra.

²⁵ Tyin ra Cristo cua cundaca ñaha ra nda cuanda quivi cuhva Nyoo tsa cuví jaha canaa ra tsi tandihi nu xaan ifni tsi ra nahnu.

²⁶ Tan nu tsa cua janaa ra nu ndihi ña, nu ican cuví tuhun tsihi.

²⁷ Tyin tsa tsahá Nyoo tsa quihí ndaha ra tandihi maa tsa iyó. Maa tyin nu catyí tyin tandihi nacuhva cuenda Nyoo tsi ra Cristo, ña cuí tsi catyí tyin quihí ndaha ndihi ra tsi maa Nyoo tyin maa Nyoo cuví ra tsahá tsa quihí ndaha ra tandihi maa tsa iyó.

²⁸ Maa tyin quivi jaha canaa ra Cristo tandihi can, tacan tan maa ra, tsa cuví ra Sehe Nyoo, cua nacuhva cuenda nyico ra tandihi tsa tsahá Nyoo tsi ra. Tyin tacan tan cundaca ñaha Nyoo tandihi maa tsa iyó.

²⁹ Tun tsatyin ña nandoto ndiyi, ¿nacuenda tyin juhva nyivi tsicoondutyá ñi tsa cuenda ndiyi? ¿Tan nacuenda javahá ñi tyehen tun ña tsinú ifni ñi tyin coo quivi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundo ho ndihi quivi ñi?

³¹ Tandihí ñi quívi nducú nyívi tsi yu cahñi ñi, tan tsa nditsa cuví tsi, yañi, tumaa tsa nditsa tsa sií cuñi yu tsihin ndo, tsa cuenda tsa tsinú ñi ndo tsi Jutu Mañi yo Jesucristo.

³² Nduve náa catyí tsa nyehe yu tundoho tsa cuñi cahñi nyívi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyívi: “Catsi yo, cõho yo tyin tyaan isa cua cúu yo”, catyí ñi tsa ña tsitó.

³³ Tan catyí tucu ñi tyin: “Tun cutahán yo tsihin nyívi caquiñi jatívi ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyívi tsi ndo.

³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyeheh tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quívi quítsi nyico ra Cristo

³⁵ Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?”

³⁶ ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñí tsi tsa tyahyu jihna tsi? Tacan tan cana nuu tsi.

³⁷ Tyin tsa tatsí yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñi tucu yo tsihin náa inga ca tsiti.

³⁸ Nyoo javahá ra nácaa cuñi maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduvi tsi inga ca tsiti.

³⁹ Tan tacan tandihí cuñu ñuhu, ña inducu caá tsi, tyin cuñu ñuhu nyívi, siin caá tsi, tan cuñu ñuhu quiti nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can.

⁴⁰ Tan tacan tucu tsa iyó andívi, siin caá tsi. Tan siin caá tucu tsa iyó nu ñuhu ñayívi ihya. Sií xaan caá tsa iyó nda andívi, tan siin tyaqui tucu tsa iyó nu ñuhu ñayívi ihya.

⁴¹ Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu.

⁴² Tan tacan tucu tuhun tsa cua nandoto ndiyi. Tuhvá yo tscutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo.

⁴³ Cuñu ñuhu tsa iyó tsi yo vityin nduve tunyee ñi iyó tsi can, nacuhví can, tan tsiihí can. Maa tyin cua nandoto iin tsa sií caá tan iyó ca tunyee ñi tan ña cua cúu ca can.

⁴⁴ Tsa tsiihí yo tscutsí yo cuñu ñuhu tsa naquihin yo nu ñuhu ñayívi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayívi. Tan iyó tucu cuñu ñuhu cuenda gloria.

⁴⁵ Catyí tutu Nyoo tyin ra Adán ra tsa tsicoõ tsa jihna ñi, tsahá Nyoo ñayívi coo ra. Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayívi nyito coo yo, tyin juvin ra cuví Tatyí li.

⁴⁶ Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí li Nyoo.

⁴⁷ Rayíi tsa tsinú tsa jihna ñi, tsihin nyaca ñuhu tsinú ra. Tan cuví ra cuenda ñuhu ñayívi. Maa tyin ra Cristo cuví ra tumaa rayíi tsa tsinu uvi tan cuví ra cuenda gloria.

48 Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinü tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi.

49 Tumaa ndacu yo tsi rayii, ra tsa tsinü tsihin nyaca ñuhu, tacan tucu cua ndacu yo tsi ra Cristo ra iyó nda gloria.

50 Tan cuñí yu cahan yu tsihin ndo, yañi, tyin cuñu ñuhu yo ña cuví quihvi tsi nu ndacá ñaha Nyoo, tyin iin tsa yatyi tiví ña cuví quihvi can nu yihí tsa ña tuhvá tiví.

51 Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo.

52 Tan nu cua ndihí tiví ángel trompeta, cua nandoto ndiyi iin yaha cuii ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihí tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo.

53 Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa.

54 Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsiihí.”

55 Yooho, Tuhun Tsiihí, ¿náa tunyee iñi tsa tsicoo tsi un tyin cahñi un tsi ndi? ¿Náa jahá canaa un, yooho Tuhun Tsiihí?

56 Tyin cuatyí yo tsahá can tsa cahñi tuhun tsiihí tsi yo, tyin ley tsahnu tsahá tunyee iñi tsa can.

57 Maa tyin tyahví nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsiihí can.

58 Yacan cuenda yañi, cunyaa naa vaha ndo tsi Nyoo tsihin tsa ñi iñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

16

Nu tsahá cuenda ra Pablo tsi nyivi nácaa taahán tsi jatyinyee ñi tsi inga ñi yihí cuenda Nyoo

1 Tan tuhun tsa jatyinyeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia.

2 Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu ndo nda tsaa yu.

3 Tan nacatsi ndo ndáa ra cuñí maa ndo tyin cundaca xuhun can. Tan tsa tsaa yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén.

4 Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndihí nu cua cahan ra tuhun ra Cristo

5 Tsa cua quitsi yu nu yucú ndo ñuu Corinto, cua yaha yu ityi Macedonia.

6 Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeé ndo luxu tsi yu tan cuhun yu inga ñuu.

7 Ña iin yaha ñi cua yaha yu nu yucú ndo tyin cuñí yu ndoo yu juhva quivi tsihin ndo tatun Jutu Mañi yo tan cuñí ra.

⁸ Maa tyin cua cunyii yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo.

⁹ Cua ndoo yu juhva quivi ihya tyin tsahá xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

¹⁰ Tatun tsa ra Timoteo nu yucú ndo, na cunyii ra tsihin ndo. Tan vaha tyannuu ndo tsi ra tyin juven ñi tyiñu Jutu Mañi yo jahá tyiñu ra tumaa maa yu.

¹¹ Tan vaha cuñi ndo nyehé ndo tsi ra. Tan jatyinyee ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

¹² Tan ra Apolos yañi yo, cahán ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandihi nyivi yihí cuenda Nyoo ñuu Corinto

¹³ Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo.

¹⁴ Tandihi tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

¹⁵ Yañi, tsitó ndo tyin jihna ca nyivi ra Estéfanas natsinu iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano.

¹⁶ Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanas, tan tsi tandihi ca ñi tsa jatyinyee tan jahá tyiñu cuenda Nyoo.

¹⁷ Tan sii xaan cuñi yu tyin quitsi ra Estéfanas, ra Fortunato, tan ra Acaico. Tan jatyinyee ra naha tsi yu tyin nyooho ña cuví quitsi ndo tyin cañi xaan ñuu ndo.

¹⁸ Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihi nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi.

²⁰ Vatsí nacumi tsi ndo jahá tandihi ra yañi yo, tan cuhva ndo nacumi tsi tsa intuhun intuhun ndo nu yucú ndo juven.

²¹ Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

²² Tatun ndáa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

²³ Tan na nasoco Jutu Mañi yo Jesucristo tsi tandihi ndo.

²⁴ Tan catyí yu tsihin ndo tyin yuhu cuñi yu tsi tandihi ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta cuenda nyivi yihí cuenda Nyoo ñuu Corinto

¹ Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsj tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú nani# cahnu Acaya.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu nyehé xaan ra Pablo tundoho nu tsicá ra caahán ra tuhun ra Cristo

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihí ñi tsaha.

⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuví jandusí ndi iñi nyivi nyehé tundoho tumaa jandusí maa ra iñi ndi.

⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi.

⁶ Yacan cuenda tatan nyehé ndi tundoho tsa cuenda tsa jacoto ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatan jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi.

⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñí ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihi xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican.

⁹ Tsa nyehé ndi tyin tsa cuñí cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñí tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi.

¹⁰ Nyoo jacacú tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi,

¹¹ tun nyooho tan ña jandihí ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatan cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahan ra ñuu Corinto

¹² Iyó iin tuhun tsa tsahá tsa sñi xaan cuñí ndi tan tuhun ihya cuví tsa cuiti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi.

13-14 Nu tutu tsa tsa yaha jaquitsi ndi tsi ndo, tyaq ndi maa ñi maa tuhun tsa cuvi cahvi ndo tan cuvi cutuñi iñi ndo. Vityin tsa tsa cutuñi iñi ndo juhva. Tan cuñi ndi tsa cutuñi vaha ca iñi ndo tandihi tuhun can tyin tacan tan sii cua cuñi ndo tsihin ndi quivi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

15-16 Tsa cuenda tsa tsitó vaha yu tyin tacan cua cuvi: tyaq yu kuhva tyin tsa cua kuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha kuhun yu Macedonia tyin tacan tan cuvi cusii iñi ndo. Tan tsica tucu iñi yu tyin yaha can tan cuvi jatyyinee ca ndo tsi yu tan kuhun yu Judea. Tyehen tyaq yu kuhva javaha yu, maa tyin ña cuvi.

17 ¿A cuñi maa ndo tyin ña tyaq yu kuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandavi ñaha. Catyi ñi tyin vaha, maa tyin tsitsi añaima ñi catyi ñi tyin ña vaha. Caahán ñi nduvi tuhun can tsa iin ñi kuhva.

18 Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandavi ñaha yu.

19 Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra.

20 Tan tsa cuenda ra ñihí yo tandihi tsa vaha tsa catyi Nyoo tyin kuhva ra tsi yo. Yacan cuenda tsa jacahnú yo tsi Nyoo, catyi yo tyehen: “Na cuvi tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo.

21 Nyoo cuvi ra tsahá tunyee iñi tsi nyuhu tsa cuenda ra Cristo, tan tsahá ndihi tucu ra tunyee iñi tsi nyooho. Nacatsi ra tsi yo,

22 tan tsahá ra Tatyí li ra coo añaima yo, tan cuvi tsi tumaa iin tuñi tsa tyaq ra tsi yo tan janahá tsi tsi yo tyin cua ñihí yo tsa cua kuhva ra tsi yo.

23 Ñaha ca maa quitsi nyico yu nu yucú ndo, tyin ña cuñi yu janducuiihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu.

24 Caahán ndi tandihi tuhun ihya tsihin ndo tsa cuenda tsa cuñi ndi jatyyinee tahan yo tsi yo tan coo ca tusii iñi Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

2

1 Yacan cuenda ña cuñi yu quitsi yu tyin tacan tan ña kuhva ca yu tucuiihya iñi tsi ndo.

2 Tyin tatun yuhu tan janducuiihya yu iñi ndo, yoñi cua jandusii iñi tsi maa yu. Tyin nyooho ña cuvi ca jandusii ndo iñi yu tun tsa yaha janducuiihya yu iñi ndo.

3 Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuiihya ndo iñi yu tsihin kuhva iyó ndo. Tyin taahán tsi jandusii ndo iñi yu. Tyin tatun sii cuñi yuhu, tsitó yu tyin tandihi yo tan sii cuñi yo.

4 Quivi tsa tyaq yu carta can tsa cuenda ndo, tsica xaan iñi yu. Cuiihya xaan cuñi yu tan nda cuanda tsacu yu. Jaquitsi yu carta can tsi ndo maa tyin ñavin tsa cuenda tsa janducuiihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyivi nácaa taahán tsi jaha ñi tucahnu iñi

5 Ra tsa tsahá tucuiihya iñi, ñavin yuhu ñi janducuiihya ra iñi. Tyin janducuiihya tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan.

⁶ Tsa iyó vaha ñi. Ña cahan ca ndo tsi ra can. Ña tãtsi tuñi ca ndo tsi ra.

⁷ Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuiihya xaan ca cuñi ra.

⁸ Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra.

⁹ Jaquitsj yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo.

¹⁰ Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo.

¹¹ Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

Ra Pablo ña ndoo ra ñuu Troas tyin ña nañihj ra tsi ra Tito

¹² Quivi tsaq yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo.

¹³ Maa tyin tuñu xaan cuñi yu, tyin ña nañihj yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa ñi iñi añima ra

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihj ñi ityi nu cuahán ndi.

¹⁵ Tyin nyuhu cuvi ndi tumaa xico tami ra Cristo tsa cuenda Nyoo. Tan tandihj ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu.

¹⁶ Maa tyin tsa cuenda nyivi tsa ña cua cacu, ndasi caná tsi, tan cuñi maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yóo cuvi jaha tyiñu tyiñu ihya?

¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñi ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añima ndi tyin iin ñi cuvi ndi tsihin ra tan maa Nyoo tavá tyiñu tsi ndi tsa cahan ndi tyin cuenda ra Cristo yihí ndi.

3

Tuhun tsa tsa ndoo ra Cristo tsihin yo

¹ Tsa caahán ndi tuhun ihya, ¿a cuñi maa ndo tyin caahán ndi tacan tsa cuñi ndi nduyaa ndi? Ñavin. ¿A cuñi tsi cuhva ndi iin carta tsa catyí tyin vaha nyivi cuvi ndi? ¿O cuñi tsi ndacan ndi carta tsi ndo tumaa javahá juhva nyivi?

² Ña cuñi tsi. Tyin tsa tyaa Nyoo tsi ndo añima ndi, tan maa ndo cuvi carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo.

³ Tan catsi nyehé ñi tyin cuvi ndo carta tsa tyaa ra Cristo tsa cuenda ñi, tan nyuhu nacuhvã cuenda ndi carta can tsi ñi. Tan ña tyaa ra Cristo itsi tsihin

tyinta maa tyin tyaq̄ ra itsi tsitsi añima ndo tsihin Tatyí Ii Nyoo nyito. Tan ñavin nu yuu tsinyaā tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyeé ra Cristo tsi ndi.

⁵ Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihí tsa javahá ndi tan maa Nyoo javahá can.

⁶ Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí Ii ra añima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

⁷ Ley tsahnu can tsinyaā nu yuu tsihin letra, tan cahnu xaan cuví tsi. Yacan cuenda tsa tsaq̄ ra Moisés tsihin tsi nu yucú nyivi Israel, nayuhvi xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatan tacan cuví quivi quitsí ley tsa tsahá tuhun tsihi,

⁸ iyaha ca cahnu cuví tuhun tsa ndoo Nyoo tsihin yo tsa tsahá Tatyí Ii ra tsi yo!

⁹ Tatan cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsa ndoo Nyoo tsihin yo tyin janduvahá tsi tsi yo nuu ra.

¹⁰ Nditza tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo.

¹¹ Tyin tatan cahnu cuví tsa tsicoo juhva ñi tyembu, yaha ca cahnu cuví tsa ña cua cundihí maa.

¹² Tsitó vaha ndi tyin ña cua cundihí tsi. Yacan cuenda caahán ndi tsihin tsa ñi iñi añima ndi. Ña cahan nuu ndi tan ña yuuhvi ndi caahán ndi.

¹³ Tan ña javahá ndi tumaa javahá ra Moisés. Tyin ra Moisés tyasi ra nuu ra tsihin jahma, tyin tacan tan ña nyehe nyivi Israel nu cua naa tsa xiñu nuu ra.

¹⁴ Quivi can ña cutuñi iñi ñi. Nda cuanda vityin tan ña cutuñi iñi ñi. Tyin tatan cahvi ñi ley tsahnu ña cutuñi iñi ñi itsi tyin ndasí tsa tsiñi tuñi jiñi ñi tumaa tsindasi nuu ra Moisés quivi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can.

¹⁵ Nda cuanda vityin tan ña cutuñi iñi ñi ley tsa tyaq̄ ra Moisés tun cahvi ñi itsi. Tyin ndasí tsa tsiñi tuñi iñi ñi.

¹⁶ Maa tyin tatan nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi iñi ñi.

¹⁷ Tyin Jutu Mañi yo, Tatyí Ii cuví ra. Tan tatan iyó Tatyí Ii Jutu Mañi yo añima yo, tsitó yo tyin ña yihí ndaha ca ley tsahnu tsi yo.

¹⁸ Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyivi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí Ii ra.

4

¹ Nyoo nyehe ndaahvi ra tsi ndi, tan tava tyiñu ra tsi ndi cahan ndi tuhun ra tsihin nyivi yacan cuenda ña ndu uvi iñi ndi.

² Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyivi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyivi, na jaha vaha ñi cuenda tyin

tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi.

³ Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyívi ndasí tsa tsiñi tuñi iñi, ñi tsa cua cunaa.

⁴ Nu ña vaha, nu ndacá ñaha tsi nyívi iyó nu ñuhu ñayívi ihya, juvin nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo.

⁵ Ñavin tuhun maa ndi caahán ndi. Tyin tuhun ra Jesucristo caahán ndi tsihin nyívi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra.

⁶ Nyoo catyí tyin ndunditsin nu naa quívi tsinu ñuhu ñayívi. Tan juvin ñi ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayívi tsa tsihin tsa tsinú iñi yo tsi Nyoo

⁷ Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihin yo itsi. Juvín tsi janahá tsi nyívi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi.

⁸ Yacan cuenda vasu ndi maa nyehé xaan ndi tundoho tandihí ñi nu cuahán ndi, ña ndu uví iñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá iñi ndi tyin cua quita vaha ndi.

⁹ Vasu ndi maa nyaá ndaha nyívi tsi ndi, maa tyin ña nacoó ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyívi, maa tyin ña tsihi ndi.

¹⁰ Tandihí ñi nu cuahán ndi tan nyicún tuhun tsihi tsi ndi tsa cuenda tsa caahán ndi tuhun ra Jesús. Tyin tacan tan nyehe nyívi tyin iyó ndi ñayívi ra.

¹¹ Tsitsi tsa ndi iyó ndi nu ñuhu ñayívi ihya tandihí ñi quívi tan ndatú ndi tuhun tsihi tyin tandihí ñi quívi tan nducú nyívi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayívi ra añima ndi.

¹² Yacan cuenda nyuhu tandihí ñi tsaha nyicún tuhun tsihi tsi ndi tyin caahán ndi tuhun ra Cristo tsihin nyívi. Maa tyin nyooho, iyó ndo ñayívi ra Cristo tsa cuenda tuhun ra tsa cahan ndi tsihin ndo.

¹³ Tsinú iñi ndi tsi Nyoo tumaa tsinu iñi ra David tsi ra. Tumaa catyí ra nu libro Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra.

¹⁴ Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria.

¹⁵ Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyívi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

¹⁶ Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayívi tsa tsa iyó ndi ndutsaá tsi tan iin tan iin quívi.

¹⁷ Tundoho tsa nyehé ndi nu ñuhu ñayívi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria.

¹⁸ Yacan cuenda ña tyaá iñi ndi tsa cuví nyehé yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihí maa tsa iyó tsi.

5

¹ Tsitó yo tyin quiví cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu aña yu yo. Iyó can nda gloria tan ñavin ra ñuhu ñayivi ihya javaha can.

² Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñí yo cahun yo coo yo tsitsi cuñu ñuhu vaha tsa cua cuhva Nyoo tsi yo.

³ Cahun aña yu yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandii aña yu yo.

⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyin ña ndaahvi cuñí yo tsa cuenda tsa cuñí yo quita aña yu yo tsitsi cuñu ñuhu yo tan cutandii tsi. Ndaahvi cuñí yo tsa cuenda tsa cuñí yo coo aña yu yo tsitsi tsa ña cua cundihi maa, tyin tacan tan coo cuui yo. Tan cua cundihi tsa tañi ñi tsicoó jaha tsa ña cua cundihi maa.

⁵ Tan Nyoo tyaa ra cuhva tyin tacan cua javaha ra tsihin yo. Tan tsahá jihna ñi ra Tatyí Ii ra tsi yo tyin tacan tan cuita iñi yo tyin cua cuhva ra tandihi ca tsa cua cuhva ra tsi yo.

⁶ Yacan cuenda nyitá iñi ndi tsi Nyoo tsihin tsa ñi iñi aña yu ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria.

⁷ Vasu ndi maa ña cuví nyehe yo tsi ra, maa tyin iyó yo nu ñuhu ñayivi ihya tsihin tsa tsinú iñi yo tsi ra.

⁸ Nyitá iñi ndi tsi ra tan cuñí ndi quita ndi tsitsi cuñu ñuhu ihya tan cahun ndi coo ndi tsihin Jutu Mañi yo.

⁹ Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria.

¹⁰ Tyin tandihi yo tan cua cahun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quiví tsicoó yo tsitsi cuñu ñuhu yo cuenda nu ñuhu ñayivi ihya.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñí ndi tsa coto tucu nyooho.

¹² Caahán ndi tyehen, maa tyin ñavin tsa cuñí ndi nduyaa ndi tyin caahán ndi tsa cuenda tsa cuñí ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaa naha ra. Catyí ra naha tyin vaha iyó ra naha tsihin Nyoo, maa tyin tsitsi aña yu ra naha maa ñi tsa ña nditsa iyó.

¹³ Tatun caahán ndi tuhun Nyoo, catyí juhva nyivi tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñí ndi, tsa cuenda nyooho vaha cuñí ndi.

¹⁴ Tan tsitó ndi tyin intuhun ñi ra Cristo tsihi tsa cuenda tandihi nyivi ñuu ñayivi. Tacan tan tsihi tandihi yo. [Tsa tsihi yo cuñí tsi catyí tyin nacoó yo tsa javahá yo cuhva cuñí maa yo.] Tan tsa tyehen tsitó yo tsa tsihi ra Cristo tsa cuenda tsa cuñí xaan ra tsi yo, jañiñí tsi tsi yo tsa cahan yo tuhun ra tsihin nyivi.

¹⁵ Ra Cristo tsihi ra tsa cuenda tandihi yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihi ra tan nandoto ra tsa cuenda tandihi yo.

¹⁶ Vityin tan ityi nuu, ña caca ca iñi yo nyehe yo cuhva iyó nyivi tumaa tsicá iñi nyivi ña tsitó tsi Nyoo. Tsicoo quivi tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan.

¹⁷ Tyin quivi nacuhva cuenda yo tsi yo tsi ra Cristo, jandutsaa ra ñima yo. Tan nanduvi yo nyivi tsa jahá ra. Tan tandihi tuhun tsa tsicá iñi yo nu quitsi ca tsi, ña tsicá ca iñi yo can vityin ihya tyin tsaá ra tsa tsiñi tuñi tsa tsi yo.

¹⁸ Maa Nyoo javahá tandihi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsaá cuenda ra tsi yo tyin cuñi tsi jacoto yo tsi nyivi nácaa javaha ñi tan cuví coo vaha ñi tsihin ra.

¹⁹ Tyin maa ra tsa yaha nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi.

²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo.

²¹ Ra Cristo ña javahá ra ndi intuhun cuatyí. Maa tyin Nyoo jaquitsi ra tsi ra nu ñuhu ñayivi ihya; quitsi cúu ra tsa cuenda tandihi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6

¹ Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihi tsa vaha tsa tsahá ra tsi intuhun intuhun ndo.

² Tyin catyí Nyoo nu tutu ra tyehen: Quivi tahán tsi tsa jacacu yu tsi un, tsiñi yu tsa cahan un tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi.

⁴ Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihi tsa taahán ndi, náa tundocho, tan náa tsihi.

⁵ Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuanda tsicoó nyito ndi, tan tsisoco ndi.

⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihi maa nuu tundocho tan ña tsihi ndi tsihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo ñima ndi.

⁷ Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi ña vaha.

⁸ Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi.

⁹ Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quiví tsa yatyin ña cúu ndi, maa tyin ña tsihí ndi tan ndi iyó ca ndi. Iyó quiví tatsí tuñi nyiví tsi ndi, maa tyin ña tsahñí tucu ñi tsi ndi.

¹⁰ Vasu ndi maa cuihya cuñi ndi iyó tsaha, maa tyin ña tsindihí tsa sii cuñí ndi. Iyó tsaha ndaahvi ndi, maa tyin cuaha nyiví janducucá ndi tsihin tuhun Nyoo. Vasu nduve náa iyó tsi ndi, maa tyin tandihí maa tsa iyó tan tsii maa ndi cuví.

¹¹ Nyooho nyiví ñuu Corinto; caahán catsi ndi tsihin ndo tsihin tsa ñi iñi añima ndi tyin nditsa tsa cuñí xaan ndi tsi ndo.

¹² Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñí nyehe tsi ndi.

¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñí ndi nyehé ndi tsi ndo.

Vehe Nyoo nyito cuví yo tyin iyó ra añima yo

¹⁴ Ña ndú iin ndo tsihin nyiví ña tsinú iñi tsi Nyoo tyin ña nacatsí tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa.

¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyiví ña tsinú iñi tsi ra. Tyin tun ndu iin yo tsihin ñi ña cua nacatsí tahan coo yo tsihin ñi.

¹⁶ Tyin ndi vehe Nyoo tan ña cuví nacatsí tahan tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahan tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi,
tan maa ñi cua cuví nyiví yu, catyí ra.

¹⁷ Yacan cuenda catyí ra:

Quita ndo mahñu nyiví ña tsinú iñi tsi yu.

Ña cütahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

¹⁸ Tan cuví yu jutu ndo.

Tan cuví ndo sehe yu,

catyí Jutu Mañi yo, ra iyó tandihí tunyee iñi tsi.

7

¹ Yañi, yacan cuví tsa tsahá Nyoo tsi yo, yacan cuenda cuñí tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cūiti coo yo tyin tyaá yahvi yo tsi Nyoo.

Nu nacatyí tuhun ra Pablo nácaa nasama cuhva iyó nyiví yihí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javahá ndi tsi ndi intuhun ndo. Tan ndi ña jatíví ndi tsi ndi intuhun ndo. Tan ña jandaví ñaha ndi tsi ndi intuhun ndo.

³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quítsí ca tsi, tyin nditsa tsa cuñí yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra; o tatun cúu yo, iin ñi cua cuví tucu yo tsihin ra.

⁴ Tsitó vaha yu tyin cua javaha ndo tsa vaha, yacan cuenda s̄i xaan cuñi yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan s̄i xaan ca cuñi ndi.

⁵ Nda quivi tsaā ndi Macedonia ihya, tan ñaha ca maa quitatu ndi. Tyin cuaha xaan tsihi tan tundoho nyehé ndi tandihi ñi ityi cuahán ndi. Cañi tahaan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi.

⁶ Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quivi tsaā ra Tito nu yucú ndi ihya.

⁷ Tan ñavin tsa cuenda tsa tsaā ñi ra, maa tyin s̄i cuñi tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñi xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñi ndo. Tan ñuhú xaan iñi ndo tsi yu. Tsa tsito yu yacan, s̄i xaan ca cuñi yu cuv̄i.

⁸ Quivi can tsicā xaan iñi yu tyin tsaḥā yu tucuiihya iñi tsi ndo tsihin carta tsa jaquitsi yu tsi ndo. Tan ndu uv̄i iñi yu tsa jaquitsi yu carta can tsi ndo. Maa tyin juhva ñi quivi nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsaḥā yu tsi ndo.

⁹ Tan vityin s̄i xaan cuñi yu. Ñavin tsa cuenda tsa tsicoḡ ndo tucuiihya iñi, tsa cuenda tsa ndu uv̄i iñi ndo cuatyí ndo jahā tucuiihya iñi can. Tan cunyeē xaan iñi ndo nyehe ndo tucuiihya iñi cuhva taahán maa iñi Nyoo. Yacan cuenda vaha javahā ndi tsa tsaḥā ndi tucuiihya iñi tsi ndo.

¹⁰ Tyin tun cunyeē iñi yo nyehe yo tucuiihya iñi cuhva cuñi maa Nyoo, cua nasama cuhva iyó yo tacan tan cua cacu yo. Yacan cuenda na s̄i cuñi yo tun nyehé yo tucuiihya iñi cuhva cuñi maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can.

¹¹ Nyooḡ cunyeē iñi ndo nyehe ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaḡ vaha ndo cuatyí ra can. Cuxaḡn ndo tsi ra. Tan nayuhvi tucu ndo tsi Nyoo. Tsaḥā cuenda vaha ndo nácaa cuahán tyiñu can. Yaha can tan nda cuanda cuñi ndo nyehe ndo tsi yu. Tan tatsj tuñi ndo tsi ra can. Tan tsa cuenda tsa javahā ndo tumaa cuñi maa Nyoo, cuñi tsi catyí tyin nduve cuatyí ndo tsa cuenda yacan.

¹² Yacan cuenda quivi jaquitsi yu carta can tsi ndo ña jaquitsi yu itsi tsa cuenda tsa tsicá xaan iñi yu cuenda ra tsa javahā cuatyí can. Tan ndi ñavin tsa cuenda ra tsa tahañ ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyinyeē ndo tsi ndi.

¹³ Yacan cuenda nduvahā cuñi añima ndi. Tan s̄i xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin s̄i xaan cuñi ra Tito, ndus̄i ca iñi ndi tyin tsaḥā xaan ndo tunyeē iñi tsi ra. Tan vaha xaan naquih̄in cuenda ndo tsi ra.

¹⁴ Catyí yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsi yu tsihin ra. Tan vityin s̄i cuñi yu tyin cundaḡ tsa caḡan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsa tsa caḡan yu tsihin ra.

¹⁵ Cuñi xaan ra tsi ndo tsa nducuhún iñi ra tyin javahā ndo tandihi cuii maa tsa caḡan ra tsihin ndo. Tan tsa tsaā ra nu yucú ndo, ndaahvi jahá ndo tsi ndo nuu ra. Tan vaha xaan caḡan ndo tsihin ra. Tan vaha xaan tyaa yahvi ndo tsi ra.

16 Tan s̄īi xaan cuñí yu tyin tsitó yu tyin tacan ñi javahá ndo tsa vaha.

8

Na jatyinyeé yo tsi nyivi yihí cuenda Nyoo tsihin tsa n̄ī iñi añima yo

1 Vityin yañi, cuñí ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya.

2 Vasu ndi maa cuaha xaan tundoho nyehé ñi, maa tyin s̄īi cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi.

3 Tan cuví yu tsandaa tyin nyehé yu tyin tsahá ñi cuaha tsa iyó tsi ñi tsihin tsa n̄ī iñi ñi tan nda cuanda yaha ca tsahá ñi.

4 Caahán ndaahvi xaan ñi tsihin ndi na cuhva ndi ndatu tsa jatyinyeé ndihi ñi tsi nyivi yihí cuenda Nyoo tsa iyó ñuu Jerusalén.

5 Cuaha ca javahá ñi tan ñavin ca tsa tsicá iñi maa ndi. Tyin tsa jihna ñi, nacuhva cuenda ñi tsi ñi tsi Nyoo tsihin tsa n̄ī iñi añima ñi. Tacan tan nacuhva cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñí maa Nyoo.

6 Tsa nyehe yu tyin tacan javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra.

7 Tyin nyooho vaha xaan javahá ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñí iñi ndo. Tan tsihin tsa n̄ī iñi añima ndo javahá ndo tyiñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

8 Ña jañiñí yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndihi ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo.

9 Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñí ra tsi yo tyin tacan tan cuví janducuca ra tsi yo.

10 Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsahá jandu iin jihna xuhun cuyava. Ñavin nyivi tava tyiñu tsi ndo javaha ndo tacan. Javahá ndo tacan tyin tacan tsicá iñi maa ndo.

11 Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo.

12 Tyin tatun iin nyivi tan cuñí ñi cuhva ñi tandihí cuhva iyó tsi ñi tan cuhva ñi can tsihin tsa n̄ī iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñí ra tsi yo cuhva yo tun nduve náa iyó tsi yo.

13 Caahán yu tyehen tsihin ndo, maa tyin ñavin tsa cuenda tsa cuñí yu tsa jatyinyeé ndo tsi nyivi tan ndoo ndaahvi ndo tan ñi ican coo tsa coo tsi ñi.

14 Tyin vityin tsa iyó luxu tsi ndo, taahán tsi jatyinyeé ndo tsi nyivi ndaahvi tsihin can. Tyin tacan tan inducu ñi coo tandihí yo. Tan inga tsaha, maa ñi cua jatyinyeé tucu tsi maa ndo tun cumañi tsa cumañi tsi ndo. Tyehen taahán tsi jatyinyeé tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho.

¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuhva cuhun ra naha ñuu Corinto

¹⁶ Tyahvi nyoo tsi Nyoo tyin tsaḥa ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo.

¹⁷ Tsa caḥan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

¹⁸ Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihí nyivi yihí cuenda Nyoo.

¹⁹ Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihí ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihí nyivi yihí cuenda Nyoo.

²⁰ Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi.

²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, si cuñi ra tyin tsitó ra tyin cua javaha ndo tsa vaha nuu Nyoo.

²³ Tatun yóo tsicá tuhun tuhun ra Tito, catyi ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyi ndo tyehen tsihin ñi:

—Maa nyivi yihí cuenda Nyoo jaquitsí tsi ra naha. Tan vaha xaan jahá tyiñu ra naha tyiñu ra Cristo —catyi ndo.

²⁴ Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihí nyivi yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

¹ Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo.

² Tyin tsitó yu tyin cuñi xaan ndo javaha ndo tsa vaha. Yacan cuenda si cuñi yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu Corinto tsa canyí Acaya, nda cuyava tan quitsahá cuñi ndo jatyinyee ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihí tucu maa ñi jatyinyee ñi tsi nyivi ndaahvi.

³ Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi

ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyi nyivi Macedonia tyin ña nditsa yu tsa caahán yu.

⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yaha catyí yu tyin cuñí xaan ndo jatyinyee ndo tsi nyivi ndaahvi.

⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quivi quitsi yu tandihi tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

⁶ Nducuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra.

⁷ Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañiñi nyivi tsi yo. Tyin Nyoo cuñí ra tsi nyivi tsahá tsihin tsa siñi cuñí ñi.

⁸ Nyoo cuví cuhva ra tandihi nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyivi.

⁹ Tumaa catyí tuhun Nyoo tyehen:

Iin ra vaha tsahá ra, tsihin tsa ñi iñi ra, tsa iyó tsi ra tsi nyivi ndaahvi. Tan tumañi iñi tsa javahá ra, ña tsinaá tsi nuu Nyoo, catyí tsi.

¹⁰ Nyoo, ra tsahá tsiti tatsí yo, tsahá tucu ra tandihi tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyivi.

¹¹ Tan coo ca tandihi nuu tsa cuca tsi ndo, tyin tacan tan cuví jatyinyee ca ndo tsi nyivi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

¹² Tyin tsa jatyinyee yo tsi nyivi yihí cuenda Nyoo tsihin tsa tsahá yo tsa tsifí ñuhu tsi ñi, tsahá tucu yo tsa nacuhva ñi tyahvi nyoo tsi Nyoo.

¹³ Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandihi ca nyivi.

¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo.

¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyivi tsa jacoto ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyíi yu tsihin ndo, ndaahvi xaan jahá yu tsi yu, catyí ndo.

² Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñí tsi tsa cuxaan ñihi yu

tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo.

³ Nditsa tyin ra ñuu ñayivi cuví ndi. Maa tyin ña cañí tahan ndi tumaa cañí tahan nyivi iyó nu ñuhu ñayivi ihya.

⁴ Tyin tsa xaan tsa tsatyíñu ndi tsa cañí tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha.

⁵ Tan tacan cuví jaha canaa ndi tsi tandihi tsa caahán ndasi nyivi siqui tuhun Nyoo, tan tandihi tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihi cuhva tsicá iñi ndi tyin tacan tan tyaa yahvi ca ndi tsi ra.

⁶ Quivi cutuhva tandihi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaa ndi cuhva tsa tatsi tuñi ndi tsi ndo.

⁷ Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihi tucu ndo tyin cuenda ra yihí tucu nyuhu.

⁸ Ña cahán nuu yu caahán yu tsa tsaha Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jativi yu tsi ndo.

⁹ Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo.

¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu.

¹¹ Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

¹² Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyivi.

¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo.

¹⁴ Tun tsatyin ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindacá tuhun ra Cristo nu yucú ndo.

¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihi ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi.

¹⁶ Tan tsicá iñi ndi cuhan ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñí nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo.

¹⁸ Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

11

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi

¹ Vaha xaan tun ña cundihi iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihi iñi ndo tsihin yu vasu ndi maa tuhun maa yu cuví tsi.

² Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahan tuhun ra Cristo tsihin ndo nda jihna. Tan cuñí yu tsa cuñi ndo tsi intuhun ñi maa ra tumaa cuñí iin ñaha yoco tsi ra tsa cua cuví yí ña. Tyin iin ñaha yoco cuñí ña tsi intuhun ñi maa ra tsa cua cuví yí ña.

³ Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñí yu tsa jandaví ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihí ndo tsa jacahnú ndo tsi intuhun ñi maa ra.

⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun siin cuhva caahán nyivi tuhun ra. Tyin ñavin tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí li Nyoo tsa naquihin ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahan ndi tsihin ndo.

⁵ Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicún ndo tsi ra naha.

⁶ Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihí cuhva javahá ndi.

⁷ ¿O cuñí maa ndo tyin ña vaha javahá yu tsa ña quihin yu yahvi quivi cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo.

⁸ Nyivi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyin yu can quivi quitsi yu quitsi cahan yu tuhun ra Cristo tsihin ndo.

⁹ Vasu ndi maa yihí tsaha cumañi tsa cumañi tsi yu tsa tsinyij yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihí tsa cumañi tsi yu. Tacan jahá cuenda yu tsi yu tyin ña cuñí yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu.

¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyivi iyó nani Acaya.

¹¹ ¿Nacuenda caahán yu tyehen cuñí maa ndo? ¿A tsa cuenda tsa ña cuñí yu tsi ndo? Ñavin. Tyin nda maa Nyoo tan tsitó ra tyin cuñí xaan yu tsi ndo.

12 Ña cua jandihí yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha.

13 Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha.

14 Tan tsa javahá ra ican naha ra ñavin tsa iyo cuñí yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu.

15 Yacan cuenda ña iyo cuñí yo tun ra nyicún tsi nu tan jahá ra naha tyin javahá ra naha tsa vaha. Coo quiví cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

16 Inga tsaha caahán yu tsihin ndo: Ndi intuhun ndo tan ña çaça iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu.

17 Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen.

18 Cuaha xaan ra naha catyí ra naha tyin cahnu cuví ra naha tan nduyaa ra naha tsihin tsa iyó nu ñuhu ñayiví ihya. Yacan cuenda cua jacahnu ndihí tucu yuhu tsi yu.

19 Nyooho catyí ndo tyin tsitó xaan ndo. Tun nditsa ndo, ¿nacuenta tyin yatyi xaan tyaá soho ndo tsa caahán ra sana iñi can naha ra?

20 Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñí ra naha tsi ndo tsa cuví ndo musu ra naha. Suhú ra naha tsa tsi ndo. Ndacá ñaha ra naha tsi ndo. Ndasi cuñí ra naha nyehé ra naha tsi ndo. Tan nda cuanda cañi ndaha ra naha nuu ndo.

21 ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu.

22 Catyí ra can naha ra tyin nyiví Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyiví Israel; juven ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu.

23 Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyiví tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñi cúu yu, maa tyin ña tsihi yu.

24 Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahan cumi tsaha tsata yu.

25 Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quiví tan iin tsa cuaa.

26 Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tañan yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juven ñi tacan javahá nyiví inga ñuu tsihin yu. Cuaha tsa tañan yu

tsitsi ñuu, nu tsiqui, nu ndutya ñuhu. Cuaha tsa tahañ yu jaha ra catyí tyin yañi yo cuví tsi ra naha tan ña nditsa ra naha.

²⁷ Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihí yu ndutya coho yu. Cuaha tsaha tsicoo nyitya yu. Cuaha tsaha yaha yu tsa vitsin tan cumañi jahma tsi yu.

²⁸ Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyivi yihí cuenda Nyoo, nyooho tan nyivi inga ñuu tucu.

²⁹ Tyin tun iin ndo tan vita cuñí ndo, tacan vita cuñí tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñí yu.

³⁰ Tatun cuñí tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu.

³¹ Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu.

³² Quivi tsinyij yu ñuu Damasco ra cumí tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tñin ra naha tsi yu tan cundaca ra naha tsi yu vehe caa.

³³ Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumí tyiñu ñuu can.

12

Tsa nyehe ra Pablo nda nu tsinu uñi gloria jaha Nyoo

¹ Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jaha ra.

² Nacotó yu iin ra yihí cuenda ra Cristo tsa tsahañ andivi. Tsa iyó utsi cumi cuiya tsa quihin Nyoo tsi ra tsahañ ra nda nu tsinu uñi andivi. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi maa Nyoo cuví ra tsitó.

³⁻⁴ Tsitó yu tyin tsindaca Nyoo tsi ra nda paraiso nu iyó nyivi tsihí tsa tsinu iñi tsi Nyoo. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahañ ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can.

⁵ Cuví nduyaa yu tsihin tsa janahá Nyoo tsi yu quivi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu.

⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñí yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñí ra tsa nduyaa yu tsihin tsa janahá ra tsi yu. Yacan cuenda tsaha ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu.

⁸ Tan tsican yu uñi tsaha tsi Jutu Mañi yo na quihin nyaa ra tundoho can siqui yu.

⁹ Maa tyin catyí Jutu Mañi yo tyehen tsihin yu: “Yuhu cuñí xaan yu tsi un, tan yacan ñi cuví tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sii

xaan cuñi yu tyin nyaá tunyee ifi ra Cristo tsihin yu tyin nduve tunyee ifi maa yu iyó tsihin yu.

¹⁰ Yacan cuenda sii xaan cuñi yu tsa nduve tunyee ifi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sii xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee ifi maa yu iyó tsi yu, nyaá tunyee ifi Nyoo tsihin yu.

Tsicá ifi ra Pablo tuhun nyivi yihí cuenda Nyoo ñuu Corinto

¹¹ Tsa caahán yu tuhun maa yu nanduví yu tumaa ra sana ifi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatan yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñi maa ra naha tyin vaha xaan ca ra naha tan ñavin ca inga ra tsicá tyiñu Nyoo.

¹² Yuhu cunyeé xaan ifi yu nyehe yu tandihi tundoho quivi tsinyii yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra.

¹³ ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihi ndo. Intuhun ñi tsa ña javahá yu tsihin ndo tsa tsinyii yu tsihin ndo cuví tsa ña tsican yu xuhun cuita catsi yu tsi ndo. Ña taahán tsi ndacan yu tucahnu ifi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandihi tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatinyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu.

¹⁵ Sii xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu ifi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

¹⁶ Tandihi ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda.

¹⁷ ¿O cuñi maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu?

¹⁸ ¿A jandaví ñaha ra Tito tan inga ra naha tsi ndo quivi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

¹⁹ Vasiqui tsicá ifi maa ndo tyin tandihi tsa caahán ndi, tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá ifi ndi. Tyin tandihi tsa caahán ndi tan tsa vaha tsi maa ndo cuví can tyin tacan tan cunycun vaha ca ndo tsi Nyoo. Nda nuu Nyoo tan tsihin tunyee ifi ra Cristo caahán ndi tyin nditsa tsa cuñi xaan ndi tsi ndo.

²⁰ Tsicá ifi yu coto ña cua tahan ifi yu cuhva yucú ndo quivi tsa yu. Tan ndi maa ndo tan ña cua tahan ifi ndo cuhva cua cahan yu tsihin ndo. Yuuhvi yu coto coo tsihi, tan nyiyo ifi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo

cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsaá yu nu yucú ndo tan ña cuiñi ña ndaa yucú ndo.

²¹ Tan yuuhví yu quítsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quítsahá javahá ndo nu quítsi ca tsi tyin rayihí ndi tsicá nuu ra tsihin ñaha tan ñaha ndi tsicá nuu ña tsihin rayihí tan náa ndihí ca maa tsa ña vaha.

13

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

¹ Tsinu uñi tsaha cuví tsi tsa cua quítsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuiñi tsi uvi o uñi taahan ra cua cuví tsandaa.

² Tyin quivi quítsi yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quítsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo.

³ Tacan tan cua coto ndo tsa cuiñi xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo.

⁴ Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandotó ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyinyee ndi tsi nyooho.

⁵ Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra?

⁶ Maa tyin cuiñi yu tsa coto ndo tyin nyuhu ña vatya ndi.

⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuiñi ndi catyí nyivi tyin vaha ndi. Caahán ndi tyehen tyin cuiñi ndi tsa javaha ndo maa ñi maa tsa vaha. Nduve cuenda ndi tun catyí nyivi tyin vaha ndi o ña vaha ndi.

⁸ Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa.

⁹ Yacan cuenda sii cuiñi ndi tsa nduve tunyee iñi iyó tsi ndi, tan nyee cuiñi nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo.

¹⁰ Jaquítsi yu carta ihya tsi ndo tsa ndi cumañi ca quítsi yu nu yucú ndo tyin janduvaha ndo tsi ndo. Tyin tacan tan ña cua cuiñi tsi cuxaan yu tsi ndo quivi tsaá yu nu yucú ndo. Tyin nditsa tsa tsahá Nyoo ndatu tsi yu tsa quihí ndaha yu tsi ndo. Maa tyin ña tsahá ra ndatu can tsi yu tsa janducuiiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

¹¹ Yañi, nu ndihí caahán yu ihya, catyí yu tsihin ndo, nducu ndo cuhva ña cumañi tsa cumañi tsi ndo nuu Nyoo. Sii cuiñi ndo. Jandu iin ndo iñi ndo. Coo mañi tahan ndo. Tan Nyoo, ra cuiñi xaan tsi ndo tan tsahá tsa taxin coo añima yo, na cunyaa ra tsihin ndo.

¹² Cuhva tahan ndo nacumi tsi ndo tsihin tsa sii cuiñi ndo nyehé ndo tsi ndo.

¹³ Tan jaquitsí tandihí nyiví yihí cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuñí xaan ra tsi ndo. Tan nacoto tucu ndo tyin iyó Tatyí li ra tsihin ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

¹ Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsahá ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra.

² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia.

³ Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo.

⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya.

⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga cuhva cuví cacu yo

⁶ Iyo xaan cuñi yu tyin nyooho numi xaan nacoq ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin sin tuhun tsinú iñi ndo. Cuñi maa ndo tyin cua jacacu yacan tsi ndo.

⁷ Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñi ra naha jativi ra naha tuhun Nyoo tsa jacacú ra Cristo tsi yo.

⁸ Tun iyó yóo caahán tuhun ra Cristo tsihin ndo tan ña nacatsí tahan can tsihin tuhun tsa cahan ndi tsihin ndo, na cuhun ñi anyaya. Yoñi jaha, vasu maa ndi cuví, o iin ángel quee andivi cuví.

⁹ Tsa yaha cahan yu tuhun ihya tsihin ndo, maa tyin cuñi yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan sin cuhva caahán ñi, na jacuhun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñi yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñi yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsicá ra Pablo tyiñu Nyoo

¹¹ Cuñi yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi.

¹² Ñavin nyivi tsaha tuhun ihya tsi yu. Tyin juvin ñi maa ra Cristo jacotó itsi tsi yu.

¹³ Nyooho tsiñi ndo nácaa javaha yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyij yu cuenda ñi Israel ñuu yu. Tan nducú yu cuhva jandu uvi yu iñi ñi tsinú iñi tsi ra Cristo.

14 Tan tsicoꝝ yu cuhva iyó ñi Israel, tan yuhu cuvɪ ra cuahán ityi nuu ca tan ñavin ca juhva ra yihí tahan tshin yu tsa iin ñi cuiya ndi. Tyin yuhu cuñi xaan ca yu javaha yu cuhva javaha tsi tsaahnu ndi.

15 Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaꝝ maa quivi tsa tyaꝝ ra cuhva, tan nacanaꝝ ra tsi yu.

16 Tacan tan janahaꝝ ra tsi Sehe ra tsi yu tan nacotoꝝ yu tsi ra, tyin tacan tan cuvɪ cahan yu tuhun ra nácaa jacacú ra tsi yo tshin nyivi tsa ñavin nyivi Israel cuvɪ. Tan quivi can ña nducú yu nyivi jacuaha tsi yu nácaa taahán tsi javaha yu.

17 Tan ndi ña tsahan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhú nyico yu inga tsaha nda ñuu Damasco.

18 Tsa yahaꝝ uñi cuiya tan tsahan yu nda Jerusalén, tan nacotoꝝ yu tsi ra Pedro. Tan ndooꝝ yu tshin ra tsahun quivi.

19 Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu.

20 Tan nda nuu Nyoo tan caahán yu tshin ndo tyin tuhun tsa tyaꝝ yu nu tutu ihya, tsa nditsa cuvɪ tsi.

21 Tsa yahaꝝ tsa tsahan yu ñuu Jerusalén tan tsahan yu nda Siria tan nda Cilicia.

22 Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacotoꝝ ra naha tsi yu.

23 Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaꝝ ndaha tsi yo quivi can, vityin caahán ndihi ra tshin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyí ñi, ñihí tuhun ra naha.

24 Tan jacahnú ra naha tsi Nyoo tsa cuenda tsa javaha Nyoo tshin yu.

2

Ra cuvɪ ityi nuu tshin nyivi vehe ñuhu ñuu Jerusalén, ndooꝝ ra naha vaha cuhva jahá tyiñu ra Pablo

1 Tsa yahaꝝ utsi cumi cuiya, tan tsahan yu ñuu Jerusalén inga tsaha tshin ra Bernabé. Tan tsahan ndihi tucu ra Tito tshin ndi.

2 Tsahan yu ndacan tyin maa Nyoo janahaꝝ tsi yu tyin taahán tsi tsa cuhun yu. Tan ndacan quitá siin yu tshin ra cuvɪ ityi nuu tshin nyivi vehe ñuhu naha ra. Tan tsahaꝝ cuenda yu tsi ra naha nácaa tuhvá yu caahán tuhun ra Cristo tshin nyivi tsa ñavin ñi Israel cuvɪ. Tyin tacan tan coto yu tun ndoo ra naha vaha tshin cuhva jacuaha yu. Tyin tun ña ndoo ra naha vaha, cuatu xaan jahá tyiñu yu.

3 Maa tyin ndooꝝ ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuvɪ ra.

4 Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihvi xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuvɪ ra naha. Tan cuñi ra naha tyin taahán tsi tsa cundaca ñaha ley tsahnu tsi yo.

5 Maa tyin ndi luxu tan ña tsahaꝝ ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶ Maa tyin ra cuví ityi nuu tsihin nyívi vehe ñuhu, nduve tuhun tsaahá ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo.

⁷ Ra cuví ityi nuu vehe ñuhu naha ra, nduve inga tuhun tsaahá cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahan yu tuhun ra Cristo tsihin nyívi tsa ñavin nyívi Israel cuví. Tumaa tsa jaquitsi ra tsi ra Pedro tyin cahan ra tsihin nyívi Israel.

⁸ Tyin juvin ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyívi Israel. Tan tava tyiñu tucu ra tsi yuhu tyin cahan yu tuhun ra tsihin nyívi tsa ñavin nyívi Israel cuví.

⁹ Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsaahá ra tunyee iñi tsi yu tsa cahan yu tuhun ra Cristo tsihin nyívi. Tan tsaahá ra naha ndaha ra naha tiin ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyívi tsa ñavin nyívi Israel cuví, tan maa ra naha cahan tucu ra naha tsihin nyívi Israel.

¹⁰ Tan cahan ra naha iin tuhun tsihin ndi, na nducuhun iñi ndi tsi nyívi ndaahvi tan na jatinyee ndi tsi ñi. Tan yacan cuví tsa nducú xaan yu cuhva javahá yu tandihi ñi quivi.

Nu nduxaqa ra Pablo tsi ra Pedro tyin ña vaha tsa javahá ra

¹¹ Maa tyin quivi tsaahan ra Pedro ñuu Antioquia, nuu nuu ra tan cuxaqa yu tsi ra tyin ña vaha tsa javahá ra.

¹² Tyin tsa jihna ñi vaha javahá ra tyin tsatsi ra tsihin ñi tsa ñavin nyívi Israel cuví. Maa tyin tsa tsaá juhva ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñi ca ra catsi ra tsihin ñi ican. Javahá ra tacan tyin yuuhvi ra coto cuxaan ra tsa tsaá can naha ra tsi ra tyin ndi nyitá iñi ra can naha ra tuñi Nyoo.

¹³ Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihi ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuanda ra Bernabé tan ndu iin ra tsihin ra naha.

¹⁴ Tan nyehe yu tyin ña vaha javahá ra naha. Ñavin tumaa cuhva catyi tuhun ra Cristo. Yacan cuenda cahan yu tsihin ra Pedro nuu tandihi ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Naca tsa cuñi un jañiñi un tsi nyívi tsa ñavin nyívi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

¹⁵ Maa yu nda ndi cacú yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyívi Israel cuví.

¹⁶ Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyi ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyi ley tsahnu can.

¹⁷ Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñi tsi catyi tyin nacoto yo tyin iyó tucu cuatyí yo tumaa iyó cuatyí

ñi tsa ñavin nyivi Israel cuví. Tatun tacan, ¿a cuñí tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan.

¹⁸ Maa tyin tun cua cuita nyico iñi yo ley tsa tsa yahá nacoo yo, yacan nditsa cua coo cuatyí yo.

¹⁹ Tyin ley can janahá tsi tsi yu tyin taahán tsi cúu yu tsa catyi cuatyí yu, tan yacan cuenda ña nducu ca yu cuhva cacu yu tsihin ley can, tyin tacan tan cuví coo yu tsa cuenda Nyoo.

²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añima yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñí ra tsi yu, tan tsihi ra tsacatyí cuatyí yu.

²¹ Ña cuñí yuhu tyaa tsiyo yu tunyee iñi tsa tsahá Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

3

Naquihín yo Tatyí Ii Nyoo tsa cuenda tsa tsinú iñi yo tsi ra Cristo

¹ ¡Náa tsa soho iyó nyooho, nyivi Galacia! ¿Yóo tsa jativí tsi ndo tan ña tyaa yahvi ca ndo tsa nditsa? Catsi xaan tsahá cuenda ndi tuhun ra Jesucristo tsi ndo. Tan cutuñi vaha iñi ndo nacuenta tsihi ra nu cruu.

² Intuhun ñi tsa cuñí yu nducu tuhun yu tsi ndo. ¿A naquihín ndo Tatyí Ii Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra?

³ ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyí Ii ra. Tan vityin, ¿nacaa cuñí ndo coo ndo tsihin tunyee iñi maa ndo?

⁴ ¿A tsa cuatu ñi nyehé ndo nácaa jatyinyee Tatyí Ii Nyoo tsi ndo nu nyehé ndo tundoho? Ñavin tsa cuatu ñi cuví yacan, cuñí yuhu.

⁵ ¿Nacaa tsahá Nyoo Tatyí Ii ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahan ra.

⁶ Ra Abraham, tsinu iñi ra tsa cahan Nyoo tsihin ra, yacan cuenda Nyoo naquihín tsi ra tumaa tsatyin vaha ra.

⁷ Yacan cuenda taahán tsi coto ndo tyin nyivi tsa nditsa cuví tata ra Abraham, juven ñi cuví ñi tsa tsinú iñi tsi Nyoo.

⁸ Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra.

⁹ Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinu iñi tucu maa ra.

¹⁰ Nyivi tsa nyitá iñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaa yahvi tandihí ley tsa nyaá nu libru ley Nyoo, cua tatsi tuñi Nyoo tsi ñi.”

¹¹ Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juven ra cua coo ñayivi tsa ña ca naa maa”, catyí tuhun Nyoo.

¹² Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³ Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsí tuñi Nyoo tsi ra.”

¹⁴ Tacan cuví tyin tsa cuenda ra Cristo Jesús tan nasocó Nyoo tsi nyívi tsa ñavin nyívi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí Ii tsa catyí Nyoo tyin cuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

¹⁵ Yañi, cua cahan yu iin cuhva tsihin ndo, cuhva iyó yo nu ñuhu ñayívi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaa can. Tan yoñi ca cuví natyiso juhva ca síqui can.

¹⁶ Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juvin ra can cuví ra Cristo.

¹⁷ Tsa caahán yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaa ra Moisés. Maa tyin ña cuví cani ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo.

¹⁸ Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsaá Nyoo tsa catyí ra tyin cuhva ra tsi ra.

¹⁹ Tatun tacan, ¿nacuenta vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsaá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsaá cuenda ley can tsi ra Moisés. Tan ra Moisés tsaá cuenda can tsi nyívi. Tan ndoo tsi nda cuanda quívi tsa quítsi ra Cristo, ra cuví tata ra Abraham. Juvín ra cuví ra tsa catyí Nyoo tyin cua cuhva tsa vaha tsi yo.

²⁰ Tan juvin ñi maa Nyoo cahan tsihin ra Abraham quívi can. Tan ña tsiní ñuhu tsa nducu siin ra iin ra nacatyí tuhun tsihin ra Abraham.

²¹ ¿A cuñi tsi catyí tyin ley tsa tyaa ra Moisés ña nacatsi tahan tsi tsihin tsa catyí Nyoo tyin cuhva ra tsi yo? Ñavin. Tun tsatyin cuví coo yo ñayívi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví.

²² Tyin catyí nu tutu Nyoo tyin iyó cuatyí tandihí nyívi. Tyin tacan tan nyívi tsa tsinú iñi tsi ra Jesucristo cuví ñihi ñi ñayívi nyito tsa catyí Nyoo tyin cuhva ra tsi yo.

²³ Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyí yo vehe caa. Tacan cuví nda cuanda janahá Nyoo tsi yo nácaa tan tsinu iñi yo tsi ra.

²⁴ Tan ley can cuví tsi tumaa iin nyívi jahá cuenda tsa nyihi. Tyin jahá cuenda tsi tsi yo nda cuanda quívi quítsi ra Cristo. Tan cuví tsinu iñi yo tsi ra tan nduvahá yo nuu Nyoo.

²⁵ Tan vityin tsa tsaá quívi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihí yo cuví yo sehe Nyoo tyin tsinú iñi yo tsi ra Cristo Jesús.

²⁷ Tan tandihí yo tsicoondutyá yo tan ndu iin yo tsihin ra Cristo, tan nanduví yo tumaa maa ra.

28 Ña ñiñi xaan ca tsa cuví yo nyívi Israel, a cuví yo nyívi Grecia; a cuví yo musu, a ñavin musu cuví yo; a cuví yo rayii, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyívi cuví yo tsihin ra.

29 Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4

1 Cua cahan yu iin cuhva tsihin ndo. Tatun iin ra luhlu tan tsihi jutu ra, tan nacoq jutu ra tandihí tsa cuca ra tsi ra, ra luhlu can cua tyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihí tsa cuca jutu ra.

2 Iyó ra jahá cuenda tsi ra nda cuanda tsaa cuiya ra tsa catyí jutu ra tyin cua naquihin ra ndaha tyiñu tsa nacoq ra tsi ra.

3 Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyívi iyó nu ñuhu ñayivi ihya.

4 Maa tyin quívi tahán tsi, Nyoo jaquítsi ra tsi Sehe ra. Tan jacacu iin ñaha tsi ra. Tan tsindacá ñaha ley tsahnu Nyoo tsi ra.

5 Jaquítsi Nyoo tsi ra tyin jacacu ra tsi yo tsa ña quíhi ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

6 Tan tsa cuenda tsa nanduví yo sehe ra, Nyoo jaquítsi ra Tatyí Ii ra Cristo cunyaa añima yo. Tan tsa cuenda Tatyí Ii ra caná tsaa yo tsi Nyoo tan catyí yo: “Tyatya”.

7 Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyívi yihí cuenda Nyoo

8 Tan quívi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví.

9 Maa tyin vityin tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¿Nacaa tsa cuñí ndo quihin nyico ndo tuhun ndaahvi tsa nduve tunyee iñi iyó tsi, tan cuví nyico ndo musu?

10 Nyooho ndi jacahnú ca ndo quívi vico, quívi nduyutyá yoo, tan vico tandihí ñi cuiya.

11 Yuuhvi xaan yu coto iin tsa cuatu ñi cuví tyiñu jahá yu tsihin ndo.

12 Yañi, caahán ndaahvi yu tsihin ndo çoq ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jatívi ndo tsi yu.

13 Tan tsa tsitó ndo tyin quívi quítsi jihna yu ñuu ndo iyó iin cuehe tsi yu, yacan cuenda ndoo yu juhva quívi tsihin ndo, tan cahan yu tuhun ra Cristo tsihin ndo.

14 Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaq tsiyo ndo tsi yu. Naquihin cuenda ndo tsi yu tumaa tun cuví yu iin ángel tan tumaa tun ra Cristo cuví yu.

15 Tan vityin ¿numaa cuahán tsa sñi xaan cuñi ndo tsihin yu quívi can? Tyin yuhu cuví yu tsandaa tyin quívi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan.

16 Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

17 Nyívi can, cuñí xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñí ñi tsa cunyicun ndo tsi ñi tan ña tsinu ca iñi ndo tuhun caahán yu.

18 Vaha tsa cuñi yo tsi nyívi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo.

19 Nyooho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo.

20 Vaha xaan tun tsatyin cuvi cunyi yu tsihin ndo vityin ihya. Tyin tacan tan cuvi nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

21 ¿A ñaha ca cahvi ndo tsa caahán ley tsa tsaḥa Nyoo tsi ra Moisés? tyin cuñí ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can.

22 Catyí tsi tyin ra Abraham tsicoḡ uvi taahan sehe ra. Tsicoḡ iin sehe ra tsihin ña Agar tsa cuví musu ñasihi ra. Tan tsicoḡ inga sehe ra tsihin ña Sara ñasihi vaha maa ra.

23 Cacú sehe ñaha tsa cuví musu can tumaa cacú tandihi ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuvi.

24 Tan tuhun can iyó tsa cuñí tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndoḡ Nyoo tuhun tsihin yo. Intuhun tuhun can cuví cuenda yucu Sinaí. Tan nyívi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña.

25 Tumaa ña Agar, tan tumaa yucu Sinaí tsa canyíi Arabia, tacan cuví ñuu Jerusalén nda quivi vityin. Tyin nyívi ñuu can yihí ndaha ley tsahnu tsi ñi. Tan cuví ñi tumaa musu ley can.

26 Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo.

27 Tan catyí tuhun Nyoo tyehen:

Cusi iñi yooho, ñaha tsa ña cuví coo sehe. Yooho tsa nduve sehe iyó.

Çana tsa tsihin tsa sii cuñí un, tyin ña tsitó un tsa uhvi cacú sehe un.

Cusi iñi tyin cua cuhva cuaha ca yu sehe un

tan ñavin ca ñaha iyó yi, catyí tuhun Nyoo.

28 Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra.

29 Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyívi cacú tsa tsihin Tatyí Ii Nyoo.

30 Tan ¿náa catyí tuhun Nyoo? Catyí tsi: “Ṭava tsiyo tsi ñaha tsa cuví musu can tsihin sehe ña, tyin ña cuvi naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo.

31 Yacan cuenda, yañi, ña cuvi yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihín cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaa yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yaha jacacu ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

² Tyaa soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuvi jatyinyee ra Cristo tsi ndo.

³ Cuñi yu cahan yu tsihin ndo inga tsaha tuhun ihya: Tandihí ra tsa cuñi cacu tsihin tsa cunyaa tuñi Nyoo tsi ra naha, cuñi tsi javaha ra naha tandihí maa tsa catyi ley ra Moisés.

⁴ Tandihí nyooho tsa nducú nduvaha nuu Nyoo tsihin tsa javaha ndo cuhva catyi ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo.

⁵ Maa tyin yoo tsihin tsa jatyinyeé Tatyí Ii Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo.

⁶ Tyin tatun iin ñi cuvi yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuvi tsa tsinú iñi yo tsi ra Cristo. Tan tsihin tsa tsinú iñi yo cuvi coo yo, tan cuñi tahan ca yo tsi yo.

⁷ Nyooho vaha xaan cuahán ndo quivi can. ¿Tan vityin yóo jandu uvi iñi ndo? Tan ña tyaá yahvi ca ndo tsa nditsa.

⁸ Tuhun tsa janahá ñi can, ñavin tuhun Nyoo, ra tsa cana tsi yo, cuvi can.

⁹ Tyin tumaa ndaá yutsan paan jahá luxu ñi yutsan iya, tacan cuvi iin nyivi caquiñi, cuaha ca nyivi cuvi jativi ñi.

¹⁰ Nyoo cua tatsi tuñi ra tsi nyivi jandu uvi iñi ndo. Nduve cuenda ra yóo ñi cuvi ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaa iñi ndo inga cuhva tsa ña janahá yu tsi ndo.

¹¹ Tan tsa cuenda yuhu, yañi, tun tsatyin catyi yu tyin ra tsinú iñi tsi ra Cristo cuñi tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo.

¹² Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvi ca jandu uvi iñi ra naha tsi ndo.

¹³ Nyooho, yañi, cana Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuvi javaha ndo náa ndihí tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo.

¹⁴ Tyin iyó iin ley Nyoo, tan catyi tsi: “Cuñi tahan ndo tsi ndo tumaa cuñi ndo tsi maa ndo”, catyi tsi. Tan tatun nditsa tsa cuñi tahan yo tsi yo, tsa javahá ndihí yo tandihí ca tsa caahán ley tsahnu.

¹⁵ Jaha ndo cuenda tyin tatun caahán nyaa tahan ndo tsi ndo tan ndasi cuñi ndo nyehe tahan ndo tsi ndo, cua tiví nu yucú ndo.

Cuhva cuñi cuñu ñuhu yo tan cuhva iyó yo tsihin Tatyí Ii Nyoo

¹⁶ Tsa cuñi yu cahan yu tsihin ndo cuvi tuhun ihya: Coo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñi cuñu ñuhu ndo.

¹⁷ Tyin tsa javahá yo tsa ña vaha tsa cuñi cuñu ñuhu yo, ñavin cuhva cuñi Tatyí Ii Nyoo javahá yo. Tyin Tatyí Ii Nyoo cuñi tsi tsa javahá yo tsa vaha. Tan cuñu ñuhu yo ña cuñi tsi javahá tsi cuhva cuñi Tatyí Ii Nyoo. Tsa cuñi

Tatyí li Nyoo cañí tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo.

18 Maa tyin tatun tsahá yo tsi yo tsa jaquihin ityi Tatyí li Nyoo tsi yo, ña cua cundaca ñaha ca ley tsahnu tsi yo.

19 Ña yíi nacoto yo tsi nyívi javahá cuhva cuñí cuñu ñuhu ñi. Yihí rayíi, iyó ñasihi ra naha tan iyó inga ñaha tsi ra naha. Tan yihí ñiñaha iyó yíi ñi tan iyó inga rayíi tsi ñi. Tan yihí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha.

20 Yihí ñi jacahnú ñi tsitoho. Yihí ñi tasi ñi. Yihí ñi ndasi cuñí ñi nyehe ñi nyívi. Yihí ñi cañí tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucú ñi tyin cañí tahan ñi. Tan tacan tan quita sín ñi.

21 Tan yihí ñi nyiyó iñi ñi tsa iyó tsi inga nyívi. Tan yihí ñi tsahñí tahan ñi. Tan yihí ñi tuhva ñi tsiñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quívi can. Tyin tandihí ñi tsa javahá yacan, ña cua cuví naquihin cuenda ñi nu ndacá ñaha Nyoo.

22 Maa tyin tsa tsahá Tatyí li Nyoo tsi yo, cuví tsa cuñí yo tsi Nyoo tan tsi nyívi, tsa sii cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyívi cuví yo, tsa ña cundihi iñi yo javahá yo tsa vaha tsihin nyívi, tsa tsinú iñi yo tsi ra Cristo.

23 Tan inga tsa tsahá Tatyí li Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandihí tsa vaha ihya, ndi intuhun ley tan ña cua cuví catyi tsi tyin iyó cuatyí yo.

24 Tan yoo tsa yihí cuenda ra Cristo Jesús, tsa yaha jandihí yo tuhun tsa javahá yo tsa ña vaha tsa cuñí cuñu ñuhu yo.

25 Tan tumaa tsa iyó yo ñayívi nyito tsa cuenda Tatyí li Nyoo, tacan cuñí ndihí tucu tsi tsa tyaá yahvi yo tsa janahá ra tsi yo.

26 Na ña cahnu jaha yo tsi yo. Tan ña jacañi tahan yo tsi nyívi. Tan na ña nyiyó iñi yo tsa tsii inga nyívi.

6

Taahán tsi jatyinyee tahan yo tsi yo

1 Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí li Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihí nu ña vaha tsi ndo.

2 Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

3 Tatun ndáa yo cuñí maa yo tyin cahnu nyívi cuví yo, tan nduve náa cuví yo, juvin ñi tsi maa yo jandaví ñaha yo.

4 Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusii iñi yo. Tan ña taahán tsi nyehe yo náa javahá inga nyívi.

5 Tyin intuhun intuhun maa yo tan taahán tsi cunyeé iñi yo cuiso yo tsa taahán tsi tsi yo.

6 Tan cuñí tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñí ñuhu tsi ra.

⁷ Tan ña jandavi ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandihí tsa tatsí nyívi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi.

⁸ Tacan tucu tatun iin nyívi tan javahá ñi tsa ña vaha tsa cuñí cuñu ñuhu ñi, juvin ñi maa tsa javahá ñi cua jatívi tsi ñi. Maa tyin tatun javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayívi nyito tsa ña cua naa maa coo ñi.

⁹ Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quívi.

¹⁰ Yacan cuenda tandihí ñi tsaha tsa cuví javaha yo tsa vaha, na javaha yo tsi tsihin tandihí ñi nyívi. Tan tsa jihna ñi taahán tsi javaha yo tsa vaha tsihin nyívi yihí cuenda Nyoo.

S# xaan cuñí ra Pablo tyin nyehé ra tundoho tsa cuenda ra Cristo

¹¹ Nyehé ndo tsa nahnu letra tyaá yu tsihin ndaha yu nu tutu ihya vityin.

¹² Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyí nyívi tyin vaha xaan ra naha. Tan ña cuñí ra naha nyehé ra naha tundoho tsa cuenda ra Cristo, ra tsa tsihí nu cruu tsa cuenda yo.

¹³ Tyin ndi maa ra tsa nyisó tuñi Nyoo tan ña tyaá yahvi ra naha tandihí tsa caahán ley. Cuñí ra naha tsa cunyaa tuñi Nyoo tsi nyooho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha.

¹⁴ Maa tyin yuhu ña cuñí yu cu iyo iñi yu tsi yu tsa cuenda náa ndihí tuhun. Maa tyin cu iyo iñi yu tyin tsihí Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayívi ihya tyin ña ndaca ñaha ca yacan tsi yu.

¹⁵ Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyívi tsa tsa cuenda ra.

¹⁶ Tandihí nyooho tsa iyó tacan, naquihin ndo tsa taxin coo añima ndo. Tan na cundaahví iñi Nyoo nyehé ra tsi tandihí ndo, tyin nditsa tsa cuví ndo nyívi cuenda ra.

¹⁷ Vityin tan nu cuahán tsi ityí nuu, ndi intuhun ndo tan ña cua cuhva ca ndo tsihi tsi yu. Tyin tandihí paa tsa nyecú cuñu ñuhu yu, cuñí tsi catyí tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸ Yañi, na nasoco Jutu Mañi yo Jesucristo tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo.

⁴ Tsa ndi cumañi ca javaha ra ñuhu ñayivi tan nacatsj ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo.

⁵ Tsa cuenda tsa cuñí ra tsi yo, tyaa ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacu iñi maa ra.

⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra.

⁷ Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo.

⁸ Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo.

⁹ Tan tsahá ra tsa nacotó yo tuhun tsa tyihí ra cuhva tahañ tsanaha tyin javaha ra tsihin ra Cristo. Tan tandihí tuhun can tsicumí xeehe ra tan ña jacotó ra can tsi nyivi tahañ tsanaha.

¹⁰ Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsj ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha.

¹² Javahá ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra.

¹³ Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí Ii ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví ndo nyivi yihí cuenda ra.

¹⁴ Nyoo jihna ca Tatyí Ii ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsiñi tuñi tsi nyivi tsa tsinú iñi

¹⁵⁻¹⁶ Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi

nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo.

¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí Ii ra, tacan tan nacoto vaha ca ndo tsi ra.

¹⁸ Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda cana ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyívi cuenda ra, sii xaan caá can tan cuca xaan can.

¹⁹ Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juvin ñi maa tsihin tunyee iñi cahnu can

²⁰ Janandotó Nyoo tsi ra Cristo. Tan tyaá ra tsi ra xiin cuaha ra nda gloria.

²¹ Tan yacan cuví nu jacahnú xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayívi ihya tan nda andívi. Tyin yofí yóo ra cahnu ca cuví ñuu ñayívi ihya tan ndí ñayívi tsa cua coo, tyin intuhun ñi maa ra Cristo cuví ra cahnu ca cuví.

²² Tan tandihí cuíi maa tsa iyó tsaahá Nyoo tyin cundaca ñaha ra Cristo. Tan tsaahá Nyoo tsa cuví ra jíñi tsihin nyívi tsa yihí cuenda ra.

²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñí ra tsi yo

¹ Nyoo tsaahá ra ñayívi nyito coo ndo quívi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo.

² Tan quívi can ndi javahá ndo cuhva javahá nyívi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahvi tsi Nyoo.

³ Tan juvin ñi tacan tsicoo tucu yo quívi can, tyin javahá yo tsa ña vaha tsa cuñí cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyívi tsa javahá tsa ña vaha.

⁴ Maa tyin Nyoo cundaahví xaan iñi ra nyehe ra tsi yo tsa cuenda tsa cuñí xaan ra tsi yo.

⁵ Tan vasu tsa tsihí añima yo jahá cuatyí yo, Nyoo janandotó ra añima yo tan tsaahá ra ñayívi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñí xaan Nyoo tsi yo.

⁶ Tan tsa janandotó ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria.

⁷ Tan javahá Nyoo tyehen tyin tacan tan nu cuahán ca tsi ityi nuu cua coto tandihí ca tsa cua coo tyin vaha xaan iñi ra tsihin yo tan cahnu xaan tumañi iñi tsaahá ra tsi yo tsa cuenda ra Cristo Jesús.

⁸ Tyin tsi cuenda tsa vaha tsa tsaahá Nyoo tsi yo tan cacú yo. Tan ñihí yo tumañi iñi ihya jahá tsa tsinú iñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsaahá can tsi yo.

⁹ Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo iñi yo tyin cacu yo tsihin tsa javahá yo tsa vaha.

¹⁰ Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javaha yo tsa vaha, tyin nda tsanaha tan tyaa ra cuhva tyin coo yo tacan.

Cuví yo nyívi Israel, a cuví yo nyívi inga ñuu, maa tyin tsa cuenda ra Cristo iin ñi nyívi cuví tandíhi yo

¹¹ Catyí ra Israel naha ra tyin ña vaha nyooho tsa ñavin nyívi Israel cuví, tyin ña tsinyaa tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo.

¹² Tan nducuhun tucu iñi ndo tyin nu quítsi tsi tahañ tsanaha, nduve ra Cristo iyó añima ndo. Tan ndi ña iin ñi cuví ndo tsihin nyívi Israel. Tan ña tsitó ndo tuhun tsa ndoq Nyoo tsihin ra Abraham tan tsihin nyívi tata ra. Tyin iyó soho ñi maa ndo quívi can, tan nduve Nyoo nyaá tsihin ndo. Yacan cuenda nduve náa cua ñihi ndo.

¹³ Tyin ndi luxu tuhun Nyoo tan ña tsitó ndo tahañ tsanaha, maa tyin vityin ndu iin ndo tsihin ra Cristo Jesús tyin quítsi ra tsatí ra niñi ra tsa cuenda ndo.

¹⁴ Tyin juvin ra Cristo tshahá tsa taxin coo yo tan jandu iin ra tsi nyooho tsa ñavin nyívi Israel cuví tsihin nyuhu tsa cuví nyívi Israel. Vityin iin ña nyívi cuví yo, tyin jandíhi ra tsa xaan cuñi yo nyehé tahan yo tsi yo.

¹⁵ Tan tsa quítsi ra Cristo tsihi ra nu cruu, tsindíhi tuhun tshahnu tsa iyó ndi tsa tyasí nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyívi cuví yo nuu ra, tan iyó yo tsihin tsa taxin.

¹⁶ Tan tsihin tsa tsihi ra nu cruu tsindíhi tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyívi cuví yo vityin.

¹⁷ Ra Cristo quítsi ra cahan ra tyin cuví coo vaha yo tsihin Nyoo tan tsihin tahan yo: Cahan ra tsihin ndi tsa cuví ndi nyívi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahañ tsanaha.

¹⁸ Tan tsa cuenda tsa quítsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí Ii ra iyó añima yo: a cuví yo nyívi Israel, o ñavin nyívi Israel cuví yo.

¹⁹ Yacan cuenda nyooho ñavin ca nyívi inga ñuu cuví ndo, tyin iin ña nyívi cuví ndo tsihin nyívi yíhi cuenda Nyoo. Tan cuví ndo nyívi maa ra.

²⁰ Tan cuví ndo tumaa iin vehe. Tan nyecú ndo nu samá ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús.

²¹ Tan tsata yuu tsa cuví ra Cristo, sñi xaan cua quita vehe tsa ndi cuahán tsinú, tyin tandíhi maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo.

²² Tan tacan tucu nyooho ndu iin ndo tsihin tandíhi nyívi yíhi cuenda ra Cristo jahá Tatyí Ii ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyívi tsa ñavin nyívi Israel cuví

¹ Yacan cuenda yuhu ra Pablo nyíi yu vehe caa ihya tyin jacotó yu tuhun ra Cristo Jesús tsi nyooho tsa ñavin nyívi Israel cuví.

² Taahán tsi coto ndo tyin cahnu xaan tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo.

³ Tan Nyoo janahá ra tuhun xeehe tsa tsicumj ra tsi yu, tan tyaá yu juhva tuhun can nu carta ihya tyin coto ndo.

⁴ Tan tsa cua cahvi ndo tuhun tsa tyaá yu ihya cua coto ndo nácaa tsahá Nyoo tyin cutuñi iñi yu tuhun ra Cristo tsa tsicumj xeehe ra.

⁵ Tyin nu quitsj tsi tahañ tsanaha, ña janahá Nyoo tuhun xeehe can tsi nyivi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuví ndusu yuhu Nyoo.

⁶ Tan tuhun xeehe can, cuñi tsi catyi tyehen: Nyivi tsa ñavin nyivi Israel cuví cua ñihi ndihi ñi tsa cua ñihi nyivi Israel tyin iin ña cuñu ñuhu cuví yo vityin tsa cuenda tsa jacacú ra Cristo tsi yo. Tan cua ñihi yo tsa catyi Nyoo tyin cuhva ra tsi yo tyin natsinú iñi yo tsi maa ra Cristo Jesús.

⁷ Nyoo tsahá ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyivi.

⁸ Yuhu luhlu xaan ra cuví yu tan ñavin ca tandihí nyivi tsa yihí cuenda Nyoo. Maa tyin Nyoo tsahá ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi.

⁹ Tava tyiñu Nyoo tsi yu na jacoto yu tsi tandihí nyivi nácaa tyaá ra cuhva tsa cua javaha ra tsa ndi cumañi ca javaha ra tandihí tsa iyó, tyin tsanaha ña jacotó ra tuhun tsa tsicumj xeehe ra tsi nyivi.

¹⁰ Tacan cuví tan vityin tandihí ra ndacá ñaha nda andivi cua nyehe tsa vaha tsa javahá Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiniñ tuñi tsi Nyoo.

¹¹ Tandihí tuhun ihya nacatsí tahan tsi tsihin tsa tyaá Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo.

¹² Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra.

¹³ Tan tsa cuenda tsa tsahá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyivi tsi ra Cristo

¹⁴ Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuiñi tsiti yu nuu ra.

¹⁵ Tyin juvin ra cuví Jutu tandihí nyivi: ñi tsa cuahán andivi, tan ñi tsa yucú nu ñuhu ñayivi ihya.

¹⁶ Tan tsicán yu tsi ra na jandunyeé xaan ra iñi ndo tsihin Tatyí li ra tsa iyó añañima ndo.

¹⁷ Tan na coo ra Cristo añañima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihí nyivi, tyin nyanaá vaha ndo tsi Nyoo.

¹⁸ Tacan tan cua cutuñi vaha iñi ndo tsihin tandihí ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñi ra tsi ndo.

¹⁹ Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a

cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihi.

²¹ Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

4

In ñi cuví tandihi yo tsa yihí yo cuenda ra Cristo jahá Tatyí Ii Nyoo

¹ Yacan cuenda yuhu, tsa nyíi yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacana Nyoo. Tyin nacana ra tsi ndo na cuví ndo nyivi ra.

² Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyixin ndo tsihin ñi, tan ña cundihi iñi ndo nyehé ndo tsi ñi tyin tacan tan coto ñi tyin cuñi ndo tsi ñi.

³ Tyin tsa taxin tsa tsahá Nyoo coo añima yo jandu iin tsi tsi yo tan yacan cuenda nducu vaha ndo cuhva tan iin ñi cuví ndo tsihin tsa jatyinyee Tatyí Ii Nyoo tsi ndo.

⁴ Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo.

⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutya yo.

⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñu ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñí maa ra.

⁸ Yacan cuenda catyí tsi nu tutu Nyoo tuhun ra Cristo tyehen: Cunyee ra jahá canaa ra tsi nu xaan iñi tsi ra, tan quihin nyaa ra tsi nyivi tsa yihí ndaha nu tan nandaq ra andivi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñí tsi catyí tsa “nandaq ra”? Cuñí tsi catyí tyin nuu jihna ra nu ñuhu ñayivi.

¹⁰ Ra tsa nuu can, juvin ñi ra cuví ra tsa nandaq nda gloria. Tyin tacan tan janduní ra tandihí maa tan cunyaa ra tsihin yo tandihí ñi ityi.

¹¹ Tan juvin ñi maa ra Cristo tsahá ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsahá ra tsa cuví yo ndusu yuhu ra. Tan tsi inga yo tsahá ra tyin jacoto yo tsi nyivi nácaa jacacú ra tsi yo. Tan tsi inga yo tsahá ra tsa jaha cuenda yo tsi ñi yihí cuenda ra, tan tsi inga yo tsahá ra tsa cuví jacuaaha yo tuhun ra tsi ñi.

¹² Tacan tsahá Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo.

¹³ Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuví yo tumaa cuví maa ra Cristo.

¹⁴ Tacan tan ña cua cuví ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñihi tuhun tsi. Tan na ña cuví yoo tacan tyin coto jandavi ñaha nyivi tsi yo.

¹⁵ Maa tyin tyehen cua javaha yo: cua cuñí yo tsi nyivi tan cua cahan yo tsa nditsa tsihin ñi. Tan ndunyee ca añima yo tsihin tandihí tsa vaha tsa iyó tsi Nyoo. Tan cuahnu yo tan cuví yo tumaa maa ra Cristo, ra cuví ityi nuu tsihin yo.

16 Tan tsa cuenda ra Cristo tandihi yo tsa cuví yo cuñu ñuhu ra, iin ñi cuví yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyeé tsi tsi nani cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tshin tsa cuñí tahan yo tsi yo tan jatyinyeé tahan yo tsi yo.

Tsahá ra Cristo ñayivi nyito coo yo

17 Tuhun ihya cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyeé tsi ñi tsicá iñi ñi.

18 Tan ña cutuñí iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi.

19 Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñí ñi javaha ñi.

20-21 Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo.

22 Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquiñi tsa cuñí cuñu ñuhu ndo, tyin tsanaha, jandavi ñaha xaan can tsi ndo.

23 Nacuhva cuenda ndo tsi ndo tsi Nyoo na nasama ra cuhva tsicá iñi ndo.

24 Tan coo ndo ñayivi nyito tyin vityin nyivi tsa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

25 Yacan cuenda ña cahán ca ndo cuendu. Cahán ndo maa ñi tsa nditsa tshin nyivi tyin iin ña cuñu ñuhu cuví tsa tandihi yo.

26 Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi.

27 Tan ña cuhva ndo ndatu tsi nu ña vaha tsa nducu cuhva nu tsi ndo.

28 Ra tsa tuhva suhu quivi can, na ña suhu ca ra vityin. Na jaha tyiñu ra tshin ndaha ra. Tacan tan coo tsa tsii ra, tan cuví jatyinyeé ra tsi nyivi tsa iyó tsa tsiñí ñuhu tsi ñi.

29 Ña cahán ndo tsa ndavaha ñi. Cahán ndo, maa ñi tsa vaha tsa cua jatyinyeé tsi nyivi tsa tsiñí tsa caahán ndo.

30 Tan ña cuhva ndo tucuihaya iñi tsi Tatyí Ii Nyoo tyin Tatyí Ii ra cuví tuñi tsa tyaá ra añima yo nda cuanda ndihi jacacu ra tsi yo quivi cua quitsi ra.

31 Ña cuhun iñi ndo tsihi. Tan ña cuxaan ndo. Tan ña cuví ndo nyivi tyixin. Tan ña cahán nyaa ndo tsi nyivi, tan ndi ña cahán ndo tsa ndavaha ñi.

32 Maa tyin cuví ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

5

Naca taahán tsi coo nyivi yihí cuenda Nyoo

1 Nducu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñí xaan ra tsi yo.

2 Cuñi yo tsi nyivi tumaa tsa cuñí maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan si xaan cuñí Nyoo tshin ra tsa cuenda tsa javaha ra tacan.

³ Vityin tsa cuví yo nyívi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya.

⁴ Ña çahan ndo tuhun tsa tsahá ticanuu tsi yo. Tan ndi ña çahan ndo tsa nduve yahvi nyaá. Tyin ña taahán tsi çahan yo tacan. Vaha ca çuhva ndo tyahvi nyoo tsi Nyoo.

⁵ Tyin tsa tsitó ndo tyin tandihí nyívi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayi tan ñavin yí ña cuví ra, tan nyívi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsi toho cuví can, tyin maa ñi yacan tsicá iñi ñi tan ña jacahnú ñi tsi maa Nyoo.

⁶ Ña çuhva ndo tsa jandavi ñaha nyívi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihí tsa ña vaha can cua tatsi tuñi Nyoo tsi nyívi tsa ña tyaá yahvi tsi ra.

⁷ Yacan cuenda ña çutahan ndo tsihin ñi.

⁸ Nyooho tsicoo ndo nu naa quívi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo.

⁹ Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan çahan ndo maa ñi maa tsa nditsa.

¹⁰ Jañiñi ndo cutuhva ndo çuhva taahán iñi Jutu Mañi yo.

¹¹ Ña javaha ndo çuhva javahá nyívi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi.

¹² Tyin çahán nuu yo çahan yo tsa javahá xeehe ñi.

¹³ Maa tyin quívi quita tsa yihí xeehe nu nditsin, tacan tan catsi xaan cua nyehé yo. Tyin tsa nditsin Nyoo cua tava tsi tandihí tsa yihí xeehe.

¹⁴ Yacan cuenda iyó nu catyí tsi:

Nduto yoocho tsa quixí un, ndúvita mahñu nu yucú ndívi.

Tan ra Cristo cua jandunditsin ra ñuhú nu cuahán un, catyí tsi.

¹⁵ Yacan cuenda jaha ndo cuenda çuhva iyó ndo. Tan ña çoo ndo tumaa iyó ra soho. Çoo ndo tumaa iyó ra tsitó.

¹⁶ Tan ndúcu ndo çuhva çahan ndo tuhun Nyoo tsihin nyívi tandihí ñi çuhva tsa nuña ndo, çahan ndo tyin vityin maa ñi maa tsa caquiñi javahá ñi.

¹⁷ Yacan cuenda ña soho çoo ndo. Ndúcu ndo çuhva cutuñi iñi ndo çuhva cuñi maa Jutu Mañi yo.

¹⁸ Ña çoho ndo nyixi tan cuví ndo ra tsiñi tyin cuví jatívi yacan tsi ndo. Maa tyin çuhva ndo tsi ndo cundaca ñaha Tatyí Ii Nyoo.

¹⁹ Çahan ndo tsihin tahan ndo maa ñi tsa vaha, tan jacahnu ndo tsi Nyoo. Çata ndo salmo cuenda ra; çata ndo yaa Nyoo; çata ndo tsa tsahá Tatyí Ii tsi ndo; jacahnu ndo tsi Jutu Mañi yo tsihin tandihí añima ndo.

²⁰ Tacan ñi naçuhva ndo tyahvi nyoo tsi Nyoo Jutu yo tsa cuenda tandihí maa, a sii cuñi ndo, o nyehé ndo tundoho. Naçuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

Nacaa taahán tsi coo yo tsihin nyívi yo

²¹ Tyaá yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

22 Nyooho tsa iyó yíi, tyaa yahvi ndo tsa caahán yíi ndo tumaa tsa tyaá yahvi ndo tsa caahán Jutu Mañi yo.

23 Tyin rayíi cuví ityi nuu tsihin ñasiíhi ra, tumaa cuví ra Cristo ityi nuu tsihin nyívi yíhi cuenda ra. Juvín ñi maa ra jacacú tsi yo tsa cuví yo cuñu ñuhu ra.

24 Yacan cuenda tumaa tsa cuví ra Cristo ityi nuu tsihin nyívi yíhi cuenda ra, tacan taahán tsi tyaá yahvi ñaha tsi yíi ña.

25 Tan nyooho rayíi, cuñi tsi tsa cuñi ndo tsi ñasiíhi ndo tumaa cuñi ra Cristo tsi yo tsa yíhi yo cuenda ra, tan tsaḥa ra ñayívi ra tsa cuenda yo.

26 Tacan javahá ra tan jandundíi ra añima yo tsihin tuhun caahán ra tsa cuví tumaa ndutya, tan nacatya ra tsi yo quívi tsa natsinu íni yo tsi ra.

27 Ndoó añima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundíi ra tsi yo tsa cuví yo nyívi yíhi cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo.

28 Tacan taahán tsi cuñi rayíi tsi ñasiíhi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasiíhi ra, cuñi ra tsi maa ra.

29 Tyin ndi intuhun yo tan ña cuví tsa ña cuñi yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvín ñi tacan javahá ra tsihin nyívi yíhi cuenda ra.

30 Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yíqui ra.

31 Catyí tuhun Nyoo: “Rayíi taahán tsi nacoo ra tsi jutu ra tan tsi sihi ra, tan ndu iin ra tsihin ñasiíhi ra. Tan intuhun ña cuñu ñuhu cua cuví tsa nduvi ñi.”

32 Xeehe xaan tan cahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyívi yíhi cuenda ra tumaa ndu iin iin rayíi tsihin ñasiíhi ra.

33 Tan inga tucuhun, cuñi tsi catyí tyin intuhun intuhun ndo taahán tsi tsa cuñi ndo ñasiíhi ndo, tumaa cuñi ndo tsi maa ndo. Tan nyooho ñiñaha, tyaa yahvi ndo tsi yíi ndo.

6

1 Nyooho tsa nyíhi, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo.

2-3 Tyin nu tutu Nyoo catyí tsi tyeheh: “Jaha tsa ñayívi tsi jutu un tan sihi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaa ra cuhva tyin tun javaha yo tacan, sii xaan cua coo yo tan cuaha xaan quívi cua coo yo nu ñuhu ñayívi ihya.

4 Tan nyooho tsa iyó sehe, ña javaha ndo tsa ña vaha tsi sehe ndo tan cuxaan íni tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

5 Tan nyooho tsa cuví musu, tyaa yahvi ndo tsi ra yíhi ndaha tsi ndo nu ñuhu ñayívi ihya. Jaha ndo tsa ñayívi tsi ra naha tsihin tsa ñi íni añima ndo. Tan nducu ndo cuhva tyaa yahvi ndo tsi ra naha tumaa tyaá yahvi ndo tsi ra Cristo.

6 Jaha tyíñu vaha ndo. Ñavin tsa nyehé ñi tsitoho ndo tan vaha jaha tyíñu ndo tan catyí tsitoho ndo tyin vaha xaan ndo. Jaha tyíñu vaha nyooho tumaa tsatyin tyíñu ra Cristo javahá ndo. Tacan tan cua javaha ndo cuhva cuñi Nyoo tsihin tsa ñi íni añima ndo.

7 Jaha tyíñu ndo tsihin tsa sii cuñi ndo tumaa tun jahá tyíñu ndo cuenda Jutu Mañi yo tan ñavin tsa cuenda nyívi.

⁸ Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

⁹ Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sñin caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

¹⁰ Tan vityin ço ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra.

¹¹ Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu.

¹² Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi.

¹³ Yacan cuenda jaha cuenda vaha ndo tsi ndo tsihin tandihí tsa jatinyee Nyoo tsi yo. Tyin tacan tan cunyeer iñi ndo quivi nducu cuhva nu ña vaha tsi ndo. Tan ña cua nduva ndo jaha nu.

¹⁴ Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caca vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra.

¹⁵ Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi.

¹⁶ Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo.

¹⁷ Ra andaru iyó iin caa ndasí jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo.

¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndú uvi iñi ndo tan ço nyito vaha ndo, ndaçan tahvi ndihí ndo tsi Nyoo tsa cuenda tandihí nyivi yihí cuenda ra.

¹⁹ Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhví yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi.

²⁰ Tan tsa cuenda tsa jacotó yu tuhun ra Cristo, nyí yu vehe caa ihya vityin. Ndaçan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyivi yihí cuenda ra Cristo

²¹ Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra.

²² Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

²³ Na cuhva Nyoo Jutu yo tan Jutu Mañi yo Jesucristo tsa taxin coo añima tandihi ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi.

²⁴ Tan na nasoco xaan Nyoo tsi tandihi nyooho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.
Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihi Cuenda Nyoo Ñuu Filipos,

*Nyii ra Pablo vehe caa, tan javaha ra iin carta tan jacuhun ra tsi nyivi yihi
cuenda Nyoo ñuu Filipos*

¹ Yuhu ra Pablo tan ra Timoteo, cuvi ndi musu ra Jesucristo. Tan javaha ndi carta ihya tsa cuenda tandihi ndo tsa yucu ndo ñuu Filipos tan cuvi ndo nyivi cuenda Nyoo tan iin ñi cuvi ndo tsihin ra Cristo. Tan yacan jaquitsi ndi carta ihya tsi tandihi ndo tsihin ra cuvi ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

Nu tsicán tahvi ra Pablo tsa cuenda ñi yihi cuenda Nyoo ñuu Filipos

³ Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo.

⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuñi añima yu.

⁵ Tyin nda quivi jihna tsa tsifñi ndo tuhun ra Cristo tan nda vityin tan ña jandihí ndo tsa jatyinyeé ndo tsi yu. Tyin iin caa ñi jacotó yo tuhun ra Jesucristo tsi nyivi.

⁶ Tsitó vaha yu tyin tumaa tsa quitsaha javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha.

⁷ Taahán tsi tsa cacá iñi yu tacan tsa cuenda ndo, tyin cuñi xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyii yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yo tuhun Nyoo tsi ra yucu vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo.

⁸ Nyoo tsitó ra tyin cuñi xaan yu tsi tandihí nyooho tumaa tsa cuñi maa ra Jesucristo tsi ndo.

⁹ Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan nacoó ca tsa nyityi Nyoo tsi ndo, tan cutuñi ca iñi ndo,

¹⁰ Tyin tacan tan cuvi ñihi ndo tsa vaha tsi Nyoo. Tan ña cua coo ca cuatyí ndo tan cuvi coo vaha ndo tsihin tuhun Nyoo nda cuanda quivi quitsi ra Cristo.

¹¹ Maa ra cua jatyinyeé tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuvi ra.

Maa ñi maa tyiñu Nyoo javahá ra Pablo tyin iyó ra Cristo añima ra

¹² Yañi, cuñi yu tsa coto ndo tyin tandihí tundoho taahán yu, jatyinyeé xaan tsi tyin nducuaaha ca nyivi tsinú iñi tuhun Nyoo.

¹³ Tan tandihí andaru tsa iyó vehe ra cuvi rey tan tandihí nyivi iyó ihya tsitó ñi tyin nyii yu vehe caa tsa cuenda tsa nyicún yu tsi ra Cristo.

¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyii yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

15 Tan nditsa tyin yihí ra naha, caahán ra naha tuhun ra Cristo tsa cuenda tyin cuñí ra cunyicun nyívi tsi maa ra naha. Tan yihí tucu ra naha caahán ra naha tuhun ra Cristo tsihin nyívi maa tyin tsihin tsa nñi iñi ra naha.

16-17 Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyívi tyin nditsa tsa jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa nñi iñi ra naha tan caahán ra naha tuhun ra Cristo, tyin cuñí ra naha na cunyicun cuaha nyívi tsi ra naha tan cuñí ra naha vacu nducu ra naha tsi yu nu nyii yu vehe caa ihya.

18 Tan ña ndihi iñi yuhu tatun juhva ra naha caahán ra naha tuhun ra Cristo tsihin tsa ña nñi iñi ra naha. Maa tyin yuhu sii xaan cuñí yu tyin tuhun ra Cristo caahán tandihi ra naha, cuví ñi tsa nñi iñi ra naha caahán ra naha o ñavin.

Tan ndusi ca cuñí yu

19 tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí li ra Cristo tsi yu.

20 Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa nñi iñi yu. Tan ña ndihi iñi yu, an coo ca yu ñayivi, o cúu yu, maa tyin cuñí yu cahan yu tuhun ra, tahan ñi cuhva tsa tuhvá yu caahán, na nyehe nyívi cuhva iyó yu tan coto ñi tyin ra Cristo cahnu xaan ra cuví ra.

21 Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sii caa tsa iyó gloria.

22 Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyívi, ña tsitó yu.

23 Yi xaan cuñí yu tan quihin yu ndáa ityi cahun yu tyin tsa cuñí yu cahun yu cunyaa yu tsihin ra Cristo. Tyin vaha ca yacan.

24 Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo.

25 Yacan cuenda tsitó yu tyin cua ndoo yu juhva ca quivi ihya. Tyin cuñí tsi tsa jatyinyeé ca yu tsi ndo tan cuví cahun ndo ityi nuu ca tan cusii ca iñi ndo tsihin tsa tsinú iñi ndo tsi Nyoo.

26 Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

27 Cuñí tsi tsa coo yo cuhva taahán tsi coo nyívi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñí yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyívi tuhun ra Cristo.

28 Maa tyin nyívi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacú nyooho jahá Nyoo.

29 Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo.

30 Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihí yu tsa

caahán yu tuhun Nyoo.

2

Cuca xaan ra Cristo, maa tyin quitsj cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuví yo tsihin ra. Tan vaha cuñí yo tsa cuenda tsa cuñí ra tsi yo. Tan nditsa tucu tyin iyó Tatyí ñi Nyoo tsihin yo. Tan nditsa tucu tsa ndaahvi cuñí yo nyehé yo tsi nyivi tahan yo. Tatun nditsa tandihí yacan,

² Cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñí ra Cristo tsi yo. Tan iin ñi kuhva çaca iñi ndo. Tan iin ñi tsa vaha javaha ndo.

³ Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyivi tan ñavin ca maa yo.

⁴ Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

⁵ Çaca iñi yo tumaa tsicá iñi maa ra Cristo Jesús.

⁶ Tyin nu quitsj tsi tsanaha tsa ndi cumañi ca quitsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan.

⁷ Tan tyaa tsiyo ra tandihí tunyee iñi ra tan tandihí tsa cuca ra. Tan quitsj ra nanduví ra iin nyivi ndaahvi nu ñuhu ñayivi ihya quivi tsa cacu ra.

⁸ Tan tsa nanduví ra iin rayii, tan ndaahvi jahá ra tsi ra tan tyaa yahvi vaha ra tsi Nyoo nda cuenda tsahá ra tsa cahñi nyivi tsi ra nu cruu. Tumaa iin ra caquiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu.

⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavin ca tandihí sivi.

¹⁰ Tyin tatun tsiñi yo sivi ra Jesucristo, tandihí yo tan cua cuiñi tsiti yo. Tan tandihí tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihí yacan cua jacahnu tsi ra.

¹¹ Tyin tandihí tsa iyó, cua nacoto tan cua cahan tyin ra Jesucristo cuví ra ndacá ñaha tsi tandihí maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

Nyivi yihí cuenda Nyoo cuví ñi tumaa iin ñuhu tsa jandunditsín nu ñuhu ñayivi ihya

¹² Yacan cuenda, yañi tsa cuñí xaan yu, tumaa tsa tyaa yahvi ndo tsi yu quivi tsa tsinyii yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Nducu ndo kuhva na nyehe nyivi tyin nditsa tsa jacacú Nyoo tsi yo. Tan jaha vaha ndo cuenda kuhva coo ndo tsihin ra.

¹³ Tyin maa Nyoo tyihí tsa vaha añima ndo. Tan jatyinyee ra tsi ndo tyin tacan tan cuví tyaa yahvi ca ndo tsa caahán ra tan javahá ndo kuhva cuñí ra.

¹⁴ Tatun cua javaha ndo náa tsa cua javaha ndo, nducu jihna ndo kuhva tsa ña cahan yuhu tahan ndo. Tan ña cañi tahan ndo.

¹⁵ Tacan tan ña cua coo cuatyí ndo. Taahán tsi cuví ndo nyivi cuiti iyó, taahán tsi cuví ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñí tsi tsa cuví ndo tumaa iin ñuhu tsa jandunditsín nu naa nu ñuhu ñayivi ihya.

16 Cahan yo tuhun Nyoo tshin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu nii vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo.

17 Tan vasu cahñi nyivi tsi yu tsa catyi tuhun Nyoo, maa tyin cua cuvi tsi iin tsa cua jamañi yu tsi Nyoo tan tshin tsa tsinú iñi ndo tsi ra. Tan iin caa ñi cusii iñi yo tshin ra.

18 Tan yacan cuenda taahán tsi tsa cusii iñi ndo tshin yu.

Nu jacuhun ra Pablo tsi ra Timoteo tan ra Epafrodito ñuu Filipos

19 Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsa ra inga tsaha nu nyii yu sii xaan cua cuñi yu. Tyin cua nacatyí tuhun ra tshin yu nácaa yucú ndo.

20 Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yofii inga ra tsa tsicá iñi tacan.

21 Tyin tandihí ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús.

22 Maa tyin tsitó ndo tyin ra Timoteo, vaha cuahán ra tshin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tshin nyivi.

23 Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumi tyiñu, tatun ña naha ca cunyi yu ihya.

24 Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

25 Tan ra Epafrodito, yañi yo tsa jaquitsi ndo tsa jatyinyeé tsi yu tshin tyiñu tsa javahá yu, iin caa ñi cuví ndi andaru ra Cristo tshin ra. Tan vityin cua jaquitsi nuhu yu tsi ra inga tsaha nu yucú ndo.

26 Cuñi xaan ra quitsi nuhu ra nu yucú ndo, tyin tsicá xaan iñi ra tsa tsito ndo tyin nacuhvi ra.

27 Nditsa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsii tucu yuhu tyin na ña nducuihya xaan ca iñi yu.

28 Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra.

29 Yacan cuenda, naquihin ndo tsi ra tshin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra.

30 Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuhvi xaan ra, maa tyin ña cuñi ra jandihí ra tsa jatyinyeé ra tsi yu. Tyin maa ndo ña cuví quitsi ndo tan jatyinyeé ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

1 Tan vityin yañi, cusii iñi ndo tshin Jutu Mañi yo. Tsa cuenda yuhu nduve tishi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi.

2 Jaha ndo cuenda tsi ndo tshin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo.

³ Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí lí ra tsa iyó añima yo. Tan cusí ñi yo tyin cuenda maa ra Cristo Jesús yihí yo. Tan ña nyitá ñi yo tyin cacu yo tsihin náa cunyaa cuñu ñuho yo.

⁴ Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yahá cacu tan ñavin ca tandihí ra tsa javahá yacan vityin.

⁵ Tyin una quivi yo tan tsinyaá tuñi Nyoo tsi yo. Tyin tata ra Israel cuví yo. Tan tata ra Benjamín sehe ra Israel cuví ndihí yo. Juvin ñi tata nyivi caahán yuhu hebreo cuví yo. Yacan cuenda nditsa tyin hebreo cuví yo. Tan inga tucu tuhun, tyaa yahvi xaan yo ley tsahnu quivi can, tyin ra fariseo cuví yo.

⁶ Tan tsa cuenda tsa cuñi yo tyaa yahvi yo ley, tan tsinyaá ndaha xaan yo tsi ñi yihí cuenda ra Cristo. Tan tyaa yahvi yo tandihí maa ley tsahnu, tyin nducú xaan yo cuhva tyaa yahvi yo tsa caahán ley can.

⁷ Maa tyin tandihí tsa cuñi maa yo tyin cahnú xaan cuví quivi can, vityin nduve ca yahvi nyaá yacan tsa cuenda yo. Tyin vityin maa ra Cristo cuví ra tsa nyitá ñi yo.

⁸ Tan inga tucu tuhun, tandihí tsa javahá yo, tsitó maa yo tyin nduve ca yahvi nyaá yacan tyin tsa nacotó yo tsi ra Cristo Jesús, Jutu Mañi yo. Tyin yacan cuví tsa cuca xaan ca. Tan tsa cuenda ra Cristo tandihí tsa javahá yo quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yo tandihí can. Tyin cuñi yo coto vaha ca yo tsi ra Cristo.

⁹ Tan cuñi yo ndu iin ca yo tsihin ra. Tsinú ñi yo tyin jacacú ra tsi yo, yacan cuenda nduvahá iyó yo nuu Nyoo. Ñavin tsa cuenda tsa tyaá yahvi yo ley Nyoo tan vaha iyó yo, maa tyin tsa cuenda tyin tsinú ñi yo tsa caahán ra, tyin jacacú ra tsi yo tan vaha iyó yo nuu ra. Tan tsa cuenda tsa tsinú ñi yo, ra Cristo naquihín cuenda ra tsi yo.

¹⁰ Tsa coto vaha ca yo tsi ra Cristo, yacan cuví tsa cuñi yo. Tyin Nyoo janandotó ra tsi ra Cristo tsihin tunyee ñi ra. Tan cuñi yo tyin coo ca tunyee ñi can tsi yo. Tan cuñi yo cunyeé ñi yo tundoho tsa taahán tsi nyehé yo tsa cuenda ra. Tan cuñi yo nacuhva cuenda yo tsi yo tumaa maa ra Cristo nacuhva cuenda ra tsi ra tan tsihí ra.

¹¹ Tyin nducú xaan yo cuhva nandoto yo tsa yaha cúu yo.

Naca cunyicun ñihi ca yo tsi Nyoo

¹² Ña catyi yo tyin nduve ca tsa cumañi tsi yo, tan vaha xaan yo. Maa tyin cuahán yo ityi nuu ca. Tyin cuñi yo naquihin yo tsa cahan ra Cristo tyin cuhva ra tsi yo. Tyin jihna ca maa ra cahan tsihin yo.

¹³ Yañi, ña catyi yo tsihin ndo tyin tsa ñihí yo tandihí tsa vaha can. Maa tyin iyó intuhun ñi tsa javahá yo; nacoó yo ityi tsata tandihí tsa javahá yo, tan jañiñi yo cuhun yo ityi nuu ca.

¹⁴ Tyin tacan tan tsaá yo nu nyaá tsa taahán tsi tsi yo. Tyin caná Nyoo tsi yo nda gloria. Tyin naquihin yo tsa catyi ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

¹⁵ Tacan taahán tsi caca ñi tandihí nyivi tsa ñihi nyaá tsihin Nyoo. Maa tyin tatun ñavin tacan tsicá ñi ndáa nyooho, Nyoo cua cuhva ra tsa cutuñi ñi ndo.

¹⁶ Maa tyin iyó ñi tsa cuñi tsi tsa tyaa yahvi vaha yo, tuhun tsa tsa yahá jacotó Nyoo tsi yo.

¹⁷ Yañi, javaha ndo cuhva iyó yo tan cuhva caahán yo. Tan nyehé vaha ndo cuhva iyó nyivi iyó cuhva janahá ndi tsi tandihí nyivi.

¹⁸ Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihiya cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihi ra Cristo nu cruu jahá ra naha.

¹⁹ Maa tyin quivi quitsi ra Cristo inga tsaha, ra ican naha ra cua cahun anyaya. Tyin javahá ra naha cuhva cuñi cuñi ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihya.

²⁰ Maa tyin yoo nda gloria cuví nu iyó ñuu yo. Tan ndatú yo quivi quitsi nyico Jutu Mañi yo Jesucristo, ra jacacú tsi yo.

²¹ Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

4

Tacan ñi maa na cusii iñi yo tsihin Jutu Mañi yo

¹ Yañi, cuñi yu tsi ndo. Tan cuñi xaan yu nyehe yu tsi ndo. Sii xaan cuñi yu tsihin ndo. Tan tsitó yu tyin ña cahán cuatu yu tuhun Nyoo tsihin ndo. Tyin ñii xaan iñi ndo nyicún ndo tsi ra. Tan jañihi ca ndo cunyicun ndo tsi ra.

² Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo.

³ Tan yooho, yañi, tsa iin caa ñi jahá tyiñu tsihin yu, cuñi yu tyin jatinyee un tsi ñi cuhva yo ihya. Tyin juvin ñi jatinyee xaan tsi yu nu cahán yu tuhun Nyoo, maa tyin ñavin intuhun ñi yu jatinyee ñi, tyin jatinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

⁴ Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra.

⁵ Coo vaha ndo tyin tacan tan nyehe tandihi nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatyn cua quitsi Jutu Mañi yo.

⁶ Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihi tundoho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña nacao ndo tsa tsahá ndo tyahvi nyoo tsi ra.

⁷ Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca iñi yo maa ñi maa tsa vaha

⁸ Nu cua ndihi tuhun, yañi, caca iñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca iñi ndo tsa caquiñi. Caca iñi ndo tsa sii caa, maa ñi tsa vaha, tan maa ñi cuhva cuví jacahnu ndo tsi Nyoo.

⁹ Javaha ndo tsa jacuahá yu tsi ndo. Tuhun tsa cahán yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

Nu jatinyee nyivi ñuu Filipos tsi ra Pablo tsihin tsa iyó tsi ñi

¹⁰ Sii xaan cuñi yu. Tan jacahnú yu tsi Jutu Mañi yo tsa cuenda tsa jatinyee xaan ndo tsi yu inga tsaha. Tan tsitó yu tyin ndihi ñi tsaha tan cuñi ndo

jatyinyee ndo tsi yu. Maa tyin tsicoq juhva quivi ña tsaha tsi cuhva tsa jatyinyee ndo tsi yu.

¹¹ Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhva maa yu tsa cusii ñi yu tsihin náa tsa iyó tsi yu.

¹² Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha.

¹³ Tandihí tan cuví jaha yu tsihin tunyee ñi tsa tsahá ra Cristo tsi yu.

¹⁴ Tan nyooho yañi, vaha xaan tsa javaha ndo tyin jatyinyee ndo tsi yu quivi tsa tsicoq yu tundocho.

¹⁵ Tsa tsitó nyooho nyivi Filipos nácaa cuvi quivi quitsaha caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuvi nyivi tsa jatyinyee tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo.

¹⁶ Tan tsitsi tsa nyii yu ñuu Tesalónica, ñavin intuhun ñi tsaha jatyinyee ndo tsi yu.

¹⁷ Ñavin tsa tsicá ñi yu tsa jatyinyee ndo tsi yu, tyin tsa cuñi yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo.

¹⁸ Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsaha ndo can cuví tsi tumaa xico tami, xico vaha tsa tsaá nuu Nyoo. Yacan cuví tsa taahán ñi ra.

¹⁹ Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo.

²⁰ Na jacahnu yo tsi Nyoo Jutu yo tacan ñi maa. Tan na cuvi tsi tacan ñi.

Nu jacuhún ra Pablo nacumi tsi nyivi ñuu Filipos

²¹ Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsi tucu ra yañi yo tsa yucú tsihin yu ihya nacumi tsi ndo.

²² Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsi ñi nacumi tsi ndo.

²³ Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo.

⁴ Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo.

⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo.

⁶ Tan juvin ñi maa tuhun ra Cristo tsa cahan ra Epafras tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhva cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo.

⁷ Yacan janaha ra Epafras tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo.

⁸ Tan juvin ra catyi tuhun tsihin ndi tyin cuñí xaan ndo tsi nyivi tahan ndo, tyin maa Tatyí Ii Nyoo tsahá tsa vaha can coo añima ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo.

¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra.

¹¹ Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusii iñi ndo.

¹² Tan na cuhva ndo tyahvi nyoo tsi Nyoo Jutu yo, tyin maa ra tsa janduvaha ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyi nyivi tsa cuiti iyó nuu ra.

¹³ Tyin Nyoo tava ra tsi yo nu naa tan nacuhva cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo.

¹⁴ Tan jatá ra tsi yo tsihin ñañi Sehe ra tan jahá ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvaha iyó yo tsihin Nyoo

15 Nyoo ña nyehé yo tsi ra. Maa tyin nanduvj ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinu ñuhu ñayivi tan tsa iyó maa ra Cristo.

16 Tan maa ra javahā tandihi tsa iyó andivi tan nu ñuhu ñayivi jahā Nyoo. Javahā ra tsa cuví nyehe yo tan tsa ña cuví nyehe yo. Javahā ra tandihi tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihi yacan javahā ra tyin cuatyíñu ra cuhva cuñí ra.

17 Tan tsa iyó maa ra tsa ndi cumañi ca coo tandihi maa tsa iyó. Tan tandihi tsi jahá tyiñu vaha tsi jahá ra.

18 Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quihí ndaha ra tandihi tsa iyó.

19 Tyin Nyoo cuñj ra tsa cuví ra Cristo tumaa cuví maa ra.

20 Tan tsahā ra tsi ra Cristo tsa cúu ra nu cruu tyin tacan tan cuví coo vaha tandihi tsa iyó tsihin ra, tahan ñi tsa iyó nu ñuhu ñayivi tan andivi.

21-22 Tahan tsanaha javahā ndo tsa ña vaha tan xaan cuñj ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsahā cuenda ra cuñu ñuhu ra tan tsihí ra nu cruu. Tan janacoo vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra.

23 Yacan cuenda jañihi ca ndo tsinú iñi ndo. Tan cūita iñi ndo tyin cua tsaa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñj ndo tyin cua jacacu ra tsi ndo. Tuhun ihya cuví tsa caahán ra naha tanñi cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

Nu catyí ra Pablo tyin nyaá siqui ra tsa janahá ra tuhun ra Cristo tsi tandihi nyivi tsicá vehe ñuhu

24 Vityin sii cuñí yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehe ra.

25 Yuhu cuví iin ra caahán tuhun ra Cristo tyin tacan jatyinyeé yu tsi tandihi nyivi yihí cuenda ra. Tyin maa ra Nyoo catyí tsa cahan yu tandihi tuhun ra tsa cuenda tsa vaha tsi ndo.

26 Jacuahá yu tuhun tsa tsicumj xeehe Nyoo tahan tsanaha, tsa ndi cumañi ca javahā ra ñuhu ñayivi. Tan vityin tsahá ra tsa nacoto nyivi yihí cuenda ra itsi.

27 Tan nyooho tsa ñavin nyivi Israel cuví cuñí ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añaima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

28 Tuhun maa ra Cristo caahán ndi. Tan tsahá cuenda ndi tuhun ihya tsi tandihi nyivi. Tan jacuahá ndi tsi tandihi ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo.

29 Tan tsa cuenda tsa cuñí yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹ Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihi ndo tan tsa cuenda nyivi ñuu Laodicea, tan tsa cuenda tandihi nyivi tsa ñaha ca nyehe tsi yo.

² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuvi tsa tsicumj xeehe Nyoo taħan tsanaha, tan vityin jacotó ra itsi tsi yo.

³ Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo.

⁴ Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sñi natuhún ñi.

⁵ Vasu nduve yu nyii tsihin ndo, maa tyin ñuhú xaan iñi yu tsi ndo. Tan sñi xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsinú iñi ndo tsi ra Cristo quivi nañihj ndo tsi ra, tacan cuñi tsi coo ndo tsihin ra.

⁷ Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvā ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

⁹ Yacan ña tsinu iñi ndo tsa caahán ñi tyin ra Cristo juvin ra cuvi Nyoo tan cuvi tucu ra nyivi.

¹⁰ Tan tsitú ndo tsihin Nyoo tyin iin ñi cuvi ndo tsihin ra Cristo. Tan maa ra ndacá ñaha tandihi tsa ndacá ñaha nu ñuhu ñayivi tan tandihi tatyí tsa ña nyehé yo.

¹¹ Tan tsa iin ñi cuvi ndo tsihin ra Cristo, nda quivi natsinú iñi ndo tsi ra, tan nanduvj ndo nyivi ra. Maa tyin ña nanduvj ndo nyivi ra tsa cuenda tsa tsinyaa tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuvi tuñi tsa tyaā ra Cristo tsi ndo:

¹² Quivi tsicoondutyā ndo tsitsi ndutya, tumaa tsa tsihj ndo tsihin ra Cristo tan quihvj ndo tsitsi ñuhu cuvi can. Tacan tan nandoto tucu ndo tsihin ra tyin tsinú iñi ndo tyin Nyoo janandoto tsi ra tsihin tunyee iñi ra.

¹³ Taħan tsanaha cuvi ndo tumaa nyivi tsihj jahā cuatyí ndo, tyin nduve Nyoo nyaá añima ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jahā ra tucahunu iñi tandihi cuatyí ndo. Tan tsahā ra tsa coo ndo ñayivi nyito tsihin ra Cristo.

¹⁴ Tyin ley tsahnu jaquitevuj tsi cuatyí yo. Tan catyí tsi tyin taahán tsi cahun yo anyaya tyin ña tyaā yahvi yo itsi. Maa tyin ra Cristo tsihj ra nu cruu jahā Nyoo tan tsindihj tsa cahun yo anyaya.

¹⁵ Tan tsa tsihj ra nu cruu jahā canaa ra tsi nu ña vaha tan tandihi ca tatyí ña vaha tsa ndacá ñaha. Tacan tan tsindacā ra tsi nu nuu tandihi nyivi tan nuu ángel tyin na nyehe ñi tyin cahnu ca cuvi maa ra, yacan cuenda jahā canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihí ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi.

¹⁷ Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahá quitsí ra, tan juvin ra jacacú tsi yo.

¹⁸ Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaa ñi tsihin can.

¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsihí cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu.

²¹ Tyin catyí ñi tsihin ndo tyehen: “Ña tñn un tsehe tsihin ndaha un, ña catsi un tsehe, coto ña cacu un”, catyí ñi tsihin ndo.

²² Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jativi can tsi ndo nuu Nyoo.

²³ Ñi tsa javahá tandihí can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsaḥa Nyoo ñayivi nyito coo yo tyin nandoto ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo.

² Çaca iñi ndo yacan, tan ña çaca xaan iñi ndo tuhun tsa iyó nu ñuhu ñayivi ihya.

³ Tyin vityin ña javahá ca ndo tsa javahá ndo tahan tsanaha, tyin tsa tsihí ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo.

⁴ Tan quivi cua quitsi nyico ra Cristo, ra tsa tsahá ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoo yo nu quitsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandihí ndo tandihí tsa ña vaha tan tsa caquiñi tsa cuñi cuñu ñuhu ndo. Tan ña cuñu ndo tsihin iin ñaha tun ñaha ca tindaha ndo, tahan ñi rayi tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan.

⁶ Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi.

7 Tan juvin ñi tacan javahã tucu maa yo quivi tsa ña nacotó yo tsi Nyoo.

8 Maa tyin vityin ña javaha ca ndo tandihi tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nyaa ndo tsi ñi, tan ña çahan ndo cuendu siqui ñi. Tan ña çahan ca ndo tsa ndavaha ñi.

9 Ña çahan tahan ca ndo cuendu siqui iin ndo tan inga ndo. Tyin tsa nacoç ndo tandihi tsa ña vaha tsa javahã ndo tahan tsanaha.

10 Tyin vityin tsa nanduvj yo nyivi tsa tan iyó yo ñayivi nyito. Tan ndutsaa ca yo tumaa caã Nyoo, ra javahã tsi yo, nda cuanda coto vaha ca yo tsi ra.

11 Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihi yo tsihin ra Cristo, tyin maa ra cuví tandihi tan iyó ra tsihin tandihi yo.

12 Nyoo cuñi ra tsi yo tan nacatsj vaha ra tsi yo tyin cuví yo nyivi ra. Yacan cuenda ço ndo ñayivi nyito tumaa taahán tsi coo nyivi yihí cuenda ra; cundaahvi iñi ndo nyehe ndo tsi nyivi tahan ndo; cuví ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyee iñi ndo nyehe ndo tandihi tsihi tan tundoho tsihin tsa si cuñi ndo.

13 Ña cundihi iñi ndo tsihin nyivi tahan ndo. Jaha ndo tucahnu iñi tsi ñi tatun náa javahã ñi tsi ndo. Tumaa ra Cristo jaha ra tucahnu iñi tsi maa ndo, tacan cuñi tsi javahã tucu maa ndo tsihin nyivi.

14 Tyin tsa cuñi tahan yo tsi yo, yacan cuví tsa ñiñi ca cuñi tsi. Tyin yacan cuví tsa jandu iin tsi yo.

15 Tan çuhva ndo tsa cundaca ñaha tsa taxin Nyoo añima ndo, tan na jacuñin ityi tsi tsi ndo. Tyin tsa cuenda yacan, canã Nyoo tsi ndo tan jandu iin ra tsi ndo tsihin ra Cristo. Tan çuhva ndo tyahvi nyoo tsi Nyoo.

16 Tan na cutu añima ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo iñi ndo tsihin tandihi tsa tsiñi tuñi tsa tsaha Nyoo tsi ndo. Çata ndo yaa tan salmo. Tan çata ndo yaa tsa tsahá Tatyí Ii Nyoo tsi ndo tsihin tsa ñi iñi añima ndo. Tan tacan ñi naçuhva ndo tyahvi nyoo tsi Nyoo.

17 Tatun náa tyiñu cua javaha ndo, o náa cua çahan ndo, javaha ndo can tsihin siivi Jutu Mañi yo Jesús. Tan juvin ñi çuhva can naçuhva ndo tyahvi nyoo tsi Nyoo tsa cuenda maa ra Cristo.

Nu tsahá cuenda ra Pablo nácaa nducú yo çuhva coo vaha yo tsihin nyivi

18 Nyooho tsa iyó yñi çuhva ndo tsa cundaca ñaha yñi ndo tsi ndo. Tacan taahán tsi coo ndo, tyin yihí ndo cuenda Jutu Mañi yo.

19 Tan nyooho rayñi, cuñi ndo tsi ñasihi ndo. Tan ña cundihi iñi ndo nyehé ndo tsi ñi.

20 Nyooho tsa nyihi tyaa yahvi ndo tsi jutu ndo tan tsi sihi ndo, tyin si xaan cuñi Jutu Mañi yo tun javahã ndo tacan.

21 Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi.

22 Tan nyooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyooho tsi ra naha tsihin tsa ñi iñi añima ndo vasu ña nyehé ra naha, tyin Nyoo nyehé ra.

23 Tandihi ñi tyiñu javahã ndo, javaha ndo can tsihin tsa si cuñi ndo tumaa tsa jahá tyiñu ndo cuenda Jutu Mañi yo tan ñavin cuenda nyivi.

²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa.

²⁵ Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihi yo tan inducu ñi caá yo.

4

¹ Nyooho tsa iyó musu, cuñi tsi cuví ndo nyivi vaha tsihin musu ndo. Nducuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Nḁacan tahvi ndo tsihin tsa ñi iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihi maa.

³ Nḁacan tahvi ndo tsa cuenda ndi, tyin na nuña Jutu Mañi yo añaima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyi tuhun ihya nyii yu vehe caa.

⁴ Nḁacan tahvi ndo tsa cuenda yu na cuví jacuaha yu tsi nyivi cuhva cuví cutuñi vaha iñi ñi tuhun ra Cristo, tumaa taahán maa tsi javahá yu.

⁵ Cuiti cōo ndo tsihin nyivi tsa ña yihí tuhun Nyoo, tyin tacan tan cuví cahan ndo tuhun Nyoo tsihin ñi.

⁶ Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyivi yihí cuenda Nyoo ñuu Colosas

⁷ Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu.

⁸ Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi.

⁹ Tan vatsí ndihi ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyi tuhun maa ra naha tsihin ndo tandihi tsa cuví nu nyii yu ihya.

¹⁰ Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun tsa ra Marcos nu yucú ndo, vaha cahan ndo tsihin ra.

¹¹ Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha iñi yu.

¹² Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñi ra.

¹³ Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis.

¹⁴ Vatsí tucu nacumi tsi ndo jahá ra Lucas, ra tsa cuví doctor tsa cuñi xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihi ndo nacumi tsi ña Ninfas tan tsi tandihi nyivi yihí cuenda Nyoo tsa ndu iin yuvehe ña.

¹⁶ Tatun ndihí cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo.

¹⁷ Cahan ndo tsihin ra Arquipo tan catyi ndo: “Javaha vaha tyiñu tsa tsaha Jutu Mañi yo tsi un tyin javaha un.”

¹⁸ Yuhu ra Pablo tyaá yu nacumi ihya tsi ndo. Na ña naa ifi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo

¹ Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

Vaha xaan tsinú iñi nyivi Tesalónica tsi Nyoo

² Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo.

³ Tan nducuhún iñi ndi tuhun ndo nuu Nyoo Jutu yo tyin nñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa nñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo.

⁴ Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsj vaha tsi ndo.

⁵ Tyin quivi cahan ndi tuhun Nyoo, nácaa jacacú ra tsi yo, tsihin ndo, cahan ndi tuhun tsihin tunyee iñi Tatyí Ii Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quivi tsiyucu ndi tsihin ndo. Tsicoo ndi tacan tsa cuenda tsa vaha tsi maa ndo.

⁶ Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sii xaan cuñí ndo tyin maa Tatyí Ii tsahá can tsi ndo.

⁷ Tan tsa tacan iyó ndo, jatynyeeé xaan ndo tsi tandihí nyivi yihí cuenda Nyoo tanñi cahnú Macedonia tan tanñi cahnú Acaya ihya, tyin nyehé ñi cuhva iyó ndo tsihin Nyoo.

⁸ Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñí tsi cahan ndi tuhun Nyoo tsihin ñi.

⁹ Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito.

¹⁰ Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹ Nyooho yañi, tsitó ndo tyin ñavin tsa cuatu quitsi ndi cahan ndi tuhun Nyoo ñuu ndo.

² Tyin tsitó ndo nácaa nyehe ndi tundoho jahá nyiví ñuu Filipo tsa ndi cumañi ca tsaá ndi ñuu ndo. Tan vasu nyehe xaan ndi tundoho ñuu can, maa tyin quiví tsaá ndi ñuu ndo cañan ndi tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyiví ñuu ndo, maa tyin jatyinyee xaan Nyoo tsi ndi tan ñi ñi ndi jacoto ndi tsi ndo cuhva jacacú ra tsi yo.

³ Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicá iñi ndi. Tan ndi ñavin tsa cuñi ndi jandavi ñaha ndi tsi ndo.

⁴ Nduve tsa ña vaha cañan ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cañan nyiví tuhun ndi, maa tyin cuñi ndi tsa vaha cañan Nyoo tuhun ndi, tyin maa ra nyehé ra cuhva iyó yo.

⁵ Tan tsitó ndo tyin ndi iin tsaha tan ña cañan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cañan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya.

⁶ Tan ndi iin tsaha ña nducu ndi cuhva jacahnu nyiví tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi.

⁷ Tan vita cañan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyee ndi tsi ndo.

⁸ Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuenda ñayiví iyó ndi tsa cuenda tsa cuñi ndi tsi ndo.

⁹ Nyooho yañi, nducuhún iñi ndo nácaa jahá tyiñu ndi tan tsatsi ndi quiví tsiyucu ndi tsihin ndo. Jahá tyiñu ndi tsinu cañi tan tsacuaa tyin ña cuñi ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰ Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quiví tsiyucu ndi tsihin ndo tsa cuví ndo nyiví tsinú ñi tsi ra Cristo. Maa tyin maa ñi maa cuhva cuñi Nyoo javahá ndi, tan yacan cuenda ña cuví cañan ndo tsi ndi.

¹¹ Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra.

¹² Tan catyi ndi tsihin ndo, catsi coo ndo tumaa taahán tsi coo nyiví yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehe ndo tsa cahnú cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quiví tsiñi ndo tuhun ra tsa cañan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayiví cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasamá cuhva iyó ndo.

¹⁴ Yahá can tan nyehe tucu maa ndo tundoho jahá nyiví ñuu ndo. Tumaa tsa nyehe nyiví yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyiví Israel.

¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahán tsanaha. Ñi Israel can tsinyaa ndaha ñi tsi ndi. Ñavin cuhva cuñi Nyoo iyó ñi. Tan xaan iñi ñi tsi tandihí maa nyiví.

¹⁶ Tatum cuñi ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahan ra Pablo tyin cuñi ra cunyehe ra nu yucú nyivi Tesalónica inga tsaha

¹⁷ Nyooho yañi, tsa yaha tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha.

¹⁸ Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihí ñi tsaha tsa cuñi ndi quitsi ndi, ña tsaha nu ña vaha.

¹⁹ Maa tyin ¿náa ndatú ndi? Tan ¿yoo cuenda cusí iñi ndi, tan vaha cuñi ndi? ¿A ñavin tsa cuenda maa ndo cua cusí xaan iñi ndi nuu Jutu Mañi yo Jesucristo quivi quitsi ra inga tsaha?

²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sí xaan cuñi ndi tsa cuenda yacan.

3

¹ Tan ña cunyeé ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Atenas.

² Tan jaquitsí yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsí ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo.

³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho.

⁴ Tyin nda ndi yucú ca maa ndi tsihin ndo, tan cahan ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví.

⁵ Ña cunyeé ca iñi yu tsa cuñi yu coto yu nácaa yucú ndo. Yacan cuenda jaquitsí yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tyiñu ndi nu yucú ndo.

⁶ Maa tyin vityin tsa tsaa nuhu ra Timoteo tsa quitsí ra nu yucú ndo. Tan nacatyí tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo.

⁷ Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitó ndi tyin nyooho vaha tsinú iñi ndo tsi Nyoo tan ña nacoó ndo tsi ra.

⁸ Tyin tumaa tsa ndutsaa ñayivi iyó ndi cuñi ndi tsa tsitó ndi tyin nyooho vaha tsinú iñi ndo tsi Nyoo.

⁹ Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sí xaan cuñi ndi nuu Nyoo tsa cuenda tyin vaha cuahán ndo tsihin ra.

¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuví jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

11 Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvi quitsi ndi nu yucú ndo.

12 Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihi ca nyivi tumaa tsa cuñi maa ndi tsi ndo.

13 Tyin tacan tan cuiti coo ndo tsihin ra tyin tsa yaha janduvaha ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihi nyivi yihí cuenda ra.

4

Nacaa taahán iñi Nyoo coo yo

1 Vityin nyooho yañi, tsihin sivi ra Jesús caahán ndaahvi xaan ndi tsihin ndo tan tsicán ndi tsi ndo tsa ña jandihi ndo tsa iyó ndo tumaa tsa janaha ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

2 Tyin nyooho tsa tsitó maa ndo nácaa tavá tyiñu ndi tsi ndo tumaa tavá tyiñu maa Jutu Mañi yo Jesús tsi ndi.

3 Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasiihi ndo cuví ña, tan ñiñaha na ña coo ñi tsihin rayii tun ñavin yii ñi cuvi ra.

4 Tan nyooho yañi, intuhun intuhun ndo cuñi tsi coto ndo nácaa coo vaha ndo tsihin ñasiihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha.

5 Ña caca caquiñi iñi ndo nyehe ndo tsi ñasiihi ndo, ña javaha ndo tumaa javahá nyivi ña yihí tuhun Nyoo.

6 Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasiihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahán ndi tsihin ndo.

7 Tyin Nyoo caná ra tsi yo tsa coo yo cuhva cuñi maa ra, tan ña javaha yo tsa caquiñi.

8 Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí lí ra tsi yo.

9 Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta ihya. Tyin tsa janaha maa Nyoo tsi yo nácaa taahán tsi cuñi tahan yo tsi yo.

10 Tan nyooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi.

11 Nducu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahán ndi tsihin ndo quivi can.

12 Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuvi quivi quitsi Jutu Mañi yo Jesús inga tsaha

13 Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñi nyivi ña cua nandoto tsa ña cua coo tsihin Nyoo.

14 Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

15 Yacan cuenda catyi ndi tsihin ndo tumaa jacuahá Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi.

16 Tyin juvin ñi maa Jutu Mañi yo cua nuu, tan cua cana tsa ra tyin maa ra ndaca ñaha. Tan cua cana tsa ra cuvi ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto.

17 Yahá can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuii yo tsihin ra.

18 Yacan cuenda jandu iin tahan ndo iñi ndo tsihin tuhun ihya.

5

1 Nyooho yañi, ña ñiñi cuñi tsi jacoto yu tsi ndo ama cua cuvi tandihi tsa tsa yaha cahān yu tuhun tsihin ndo.

2 Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuvi.

3 Tyin quivi tsa catyi nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhvi tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi.

4 Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihvi ñasuhu yuvehe ñi tyin nyooho ñavin ca nu naa iyó ndo.

5 Tyin tandihi yo tsitó yo nácaa taahán tsi coo yo tyin jandunditsin Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo.

6 Yacan cuenda catsi ço ndo çoonyito ndo tan ña cusu ndo tumaa iyó nyivi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha.

7 Tyin nyivi quixi, quixi ñi tsacuaa, tan nyivi tuhva tsihi nyixi, tsiñi ñi tsacuaa.

8 Maa tyin yoo tsa cuvi yo nyivi iyó tsinu cahñi, na catsi ço yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihi nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo.

9 Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jahā ra.

10 Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihi yo cua coo yo iin caa ñi tsihin ra.

11 Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahā cuenda ra Pablo tsi nyivi yihí cuenda Nyoo

¹² Nyooho yañi, caahán ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha.

¹³ Cuñí tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jachahan ndo tsi nyivi ña cuñí jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Nducu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

¹⁶ Cusi iñi ndo tandihi ñi quivi.

¹⁷ Tan ña jandihí ndo tsa tsicán tahvi ndo tsi Nyoo.

¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñí maa Nyoo javaha yo tsa cuví yo nyivi tsinú iñi tsi ra Cristo Jesús.

¹⁹ Ña ndahva ndo ñuhú Tatyí Ii Nyoo tsa iyó añima ndo.

²⁰ Ña vacu nducu ndo tsa caahán ra cuví ndusu yuhu Nyoo.

²¹ Nyehe jihna ndo tun tandihí tsa caahán ra tan vaha tsi tumaa tsa taahán tsi nyehe ndo tandihí inga ca tuhun. Tan naquihin ndo tsa vaha.

²² Ña tyihí ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha.

²⁴ Ra tsa cana tsi yo, cuví cuita iñi yo tsi ra, tyin maa ra cua javaha tandihí maa tsa caahán yu ihya.

Nu ndihí cahān ra Pablo tan tsahā ra nacumi tsi nyivi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandihí nyivi yihí cuenda Nyoo.

²⁷ Tavá tyiñu yu tsi ndo tsihin sivi Jutu Mañi yo na cahvi ndo carta ihya nuu tandihí nyivi tsa yihí cuenda Nyoo.

²⁸ Ran maa Jutu Mañi yo Jesucristo nasoco tsi ndo.

Tan na cuví tsi tacan ñi.

Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaq ra Pablo, tan ra cutahán tshin ra, tsa tsinu uvi carta tsa cuenda nyivi yihí tuhun Nyoo ñuu Tesalónica

¹Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tshin Nyoo Jutu yo tan Jutu Mañi yo Jesucristo.

²Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahān ra Pablo nácaa cua tatsi tuñi Nyoo tsi nyivi iyó cuatyí quivi quitsi ra Cristo

³Nyooho yañi, cuñi tsi tsa nacuhva ndi tyahvi nyoo tsi Nyoo tsa cuenda ndo tandihí ñi quivi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quivi, tan cuñi xaan ndo tsi nyivi yihí tuhun Nyoo tshin ndo.

⁴Yacan cuenda sii xaan cuñi ndi caahán ndi tuhun ndo tshin nyivi yihí cuenda Nyoo inga ca vehe ñuhu. Tyin nyooho cunye xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi.

⁵Tandihí yacan janahá tyin Nyoo cuiti xaan jacutuñi ra tyin cua catyi ra tyin taahán maa tsi cahun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶Tan tsa cuenda maa Nyoo, taahán tsi janyehe ra tundoho tsi nyivi tsa janyehe xaan tundoho tsi ndo.

⁷Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tshin ndi quivi cua quitsi nyico Jutu Mañi yo Jesucristo tsa quee ra andivi tshin ñuhu tan tshin ángel tsa iyó tunyee iñi maa ra.

⁸Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo.

⁹Ñi ican cua janyehe Nyoo tundoho tan ña cua cundihi maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tshin tunyee iñi tsa iyó tsi ra

¹⁰quivi cua quitsi ra. Tyin quivi can nyivi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyivi can, cua cuyucu tucu nyooho tyin tsinú iñi ndo tuhun tsa cahān ndi tshin ndo.

¹¹Yacan cuenda tsicán tahvi ndi tsi Nyoo tsa cuenda ndo tandihí ñi quivi, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyivi canā maa ra. Tan tsicán tahvi tucu ndi tsi ra na jatyinyee ra tsi ndo tan cuví javaha ndo tsa vaha tsa cuñi ndo javaha ndo. Tan na quita vaha tandihí tyiñu ra tsa javahá ndo tshin tunyee iñi tsahá ra tsi ndo tyin tsinú iñi ndo tsi ra.

¹²Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó ańima

¹ Nyooho yańi, vityin cuńi yu cahan yu tsihin ndo tsa cuenda quiví quítsi nyico Jutu Mańi yo Jesucristo tan ndu iin yo tsihin ra. Caahán ndaahvi xaan ndi tsihin ndo,

² ńa numi xaan sama ndo cuhva tsicá ińi ndo. Tan ńa nayuhvi ndo tatun quita tuhun jaha tatyí ńa vaha tyin tsa tahań tsi quiví quítsi Jutu Mańi yo; vasu ndi maa nyiví caahán can, a jaquítsi ńi carta tsi ndo tan catyí ńi tyin yuhu jaquítsi carta can tsi ndo. ńa tsinu ińi ndo tandihí yacan.

³ Ndi iin tsaha tan ńa cuhva ndo jandavi ńaha nyiví tsi ndo. Tyin tsa ndi cumańi ca tahan tsi quiví quítsi Jutu Mańi yo, cuaaha xaan nyiví, xaan cua cuńi ńi nyehe ńi tuhun Nyoo, tan cua quituvi rayí tsa nduve ley Nyoo iyó ańima, ra tsa nyaá maa cuhun anyaya.

⁴ Ra ican cuví ra xaan ińi tsi Nyoo. Cua cańi tahan ra tsihin tandihí tsa nyisó sivi Nyoo; tan cua cańi tahan ra tsihin tandihí tsa jacahnú tsi Nyoo. Tan nda cuanda tsitsi vehe ńuhu cahnu Nyoo tan cua cunyata ra tan cua cundaca ńaha ra, cua jaha ra tyin Nyoo cuví ra.

⁵ ¿A ńa nducuhún ińi ndo tyin nda ndi nyii ca yu tsihin ndo tan cahan yu tuhun ihya tsihin ndo?

⁶ Maa tyin nyooho tsitó ndo náa tsa tyasí tan ńaha ca quituvi ra. Nda tahan maa tsi quituvi ra tan cua quituvi ra.

⁷ Vityin tsa iyó tatyí tsa ńa tsahá tyaá yahvi nyiví tsi Nyoo, maa tyin ndi nyii xeehe nu, tyin iyó iin ra tsa ńa tsahá quituvi nu. Maa tyin quiví cua quita ra tan cundihí tsa tyasí ra, tacan tan cua quituvi nu.

⁸ Tacan tan cua quituvi ra tsa nduve ley Nyoo iyó ańima, maa tyin Jutu Mańi yo Jesús cua cahńi ra tsi ra tsihin tuhun quitá yuhu ra tan cua janaa ra tsi ra tsihin tsa xińu tsa cahnu cuví ra quiví quítsi ra inga tsaha.

⁹ Ra ńa vaha can, nu ńa vaha cua jaquítsi tsi ra. Tan cua cuhva nu tandihí tsa nyityi nu, coo tsi ra, tan tsihin seńa tan tsa iyo cua javaha ra cua jandavi ńaha ra tsi nyiví.

¹⁰ Cua cuatyíńu ra tandihí nuu tsa ńa vaha tan tsihin yacan cua jandavi ńaha ra tsi nyiví tsa ńa cua cacu. Tyin ńi can ńa cuńi ńi naquihin cuenda ńi tuhun Nyoo tsa nditsa tan cacu ńi.

¹¹ Tan yacan cuenda cua cuhva Nyoo ndatu tsa jandavi ńaha tatyí ńa vaha can tsi ńi. Tan cua tsinu ińi ńi tsa ńa nditsa.

¹² Tacan tan cua tatsi tuńi ra tsi tandihí ńi tyin ńa cuńi ńi tsinu ińi ńi tuhun nditsa. Tyin taahán ca ińi ńi javahá ńi tsa ńa vaha.

Nu cahan ra Pablo tuhun nyiví tsa nacatsi Nyoo tyin cacu ńi

¹³ Maa tyin tandihí quiví cuńi tsi cuhva ndi tyahvi nyoo tsi Nyoo tsa cuenda nyooho yańi. Tyin cuńi xaan Jutu Mańi yo tsi ndo. Tan nacatsi ra tsi ndo nda jhna, [nda ndi cumańi ca tsinu ńuhu ńayiví], tyin tsihin tsa janduvahá Tatyí Ii ra ańima ndo tan tsihin tsa tsinú ińi ndo tuhun nditsa cuví cacu ndo.

¹⁴ Yacan cuenda cana Nyoo tsi ndo quiví tsa cahan ndi tuhun ra tsihin ndo tyin tacan tan ńihi ndo tsa cahnu cuví Jutu Mańi yo Jesucristo coo tsi ndo.

¹⁵ Yacan cuenda nyooho yańi, jandu iin ndo ińi ndo. Tan ńa naa ińi ndo tandihí tsa tsaha cuenda ndi tsi ndo tan jacuaħa ndi tsi ndo nda ndi yucú ca maa ndi tsihin ndo. Tan ńa ńa ińi ndo tandihí tuhun tsa tyaq ndi nu carta tsa jaquítsi ndi tsi ndo.

16 Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihi tyembu, tan tsahá ra naha tsa cuita iñi yo coo yo tsihin ra. Tandihi yacan tsahá ra tsi yo quivi tsahá ra tsa vaha tsa iyó tsi ra tsi yo.

17 Na cuhva ra tsa sii cuñi aña ndo. Tan jandu iin ra iñi ndo, tacan tan cua cahan ndo tan javaha ndo tandihi tsa vaha.

3

Nu tsicán ra Pablo na ndacan tahvi nyivi tsi Nyoo tsa cuenda ra naha

1 Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsa tuhun Jutu Mañi yo tandihi ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi.

2 Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo.

3 Maa tyin Jutu Mañi yo javahá ra tsa catyi ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tñ n nu ña vaha tsi ndo.

4 Tan nditá xaan iñi ndi tsi Jutu Mañi yo tyin tsitó ndi tyin jatyinyee ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan.

5 Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyee ca iñi ndo nyehé ndo tundoho, tumaa tsa cunyege iñi maa ra Cristo nyehé ra tundoho.

Taahán tsi tsa jaha tyiñu yo

6 Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo.

7 Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucu ndi tsihin ndo. Tyin nyuhu ña tsicá nuu utsan ndi tyin jahá tyiñu ndi.

8 Tan tandihí tsa tsatsi ndi, maa ñi maa tyahvi ndi tsi ndo. Tyin jahá tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo.

9 Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahá tyiñu ndi tyin cuñi ndi janaha ndi nácaa taahán tsi coo ndo.

10 Tyin quivi tsiyucu ndi tsihin ndo, cahan ndi tsihin ndo tyin nyivi ña cuñi jaha tyiñu, na ña catsi ñi.

11 Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo.

12 Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahá tyiñu ndo, tan coo tsa catsi ndo.

13 Nyooho yañi, ña cundihí iñi ndo javaha ndo tsa vaha.

14 Tatun iyó iin ra ña cuñi tyaa yahvi tuhun caahán ndi nu carta ihya, jahá ndo cuenda ndáa ra cuví ra, tan ña cunyanaa ndo tsi ra na nducahan nuu ra.

15 Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihí cahan ra Pablo

¹⁶ Jutu Mañi yo ra iyó tsa vaha tsi, juvin ñi maa ra kuhva tsa vaha coo añima ndo tandihí ñi quiví tan tandihí ñi tsaha vasu ndi maa nyehé ndo tundofo. Tan Nyoo ndoo tsihin tandihí ndo.

¹⁷ Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihí carta yu. Tan tyehen tyaá yu.

¹⁸ Tan na nasoco Jutu Mañi yo Jesucristo tsi tandihí ndo. Tan na cuví tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaq ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo.

² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinü iñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsahq cuenda ra Pablo tyin jaha cuenda yo tsi yo tan ña cunycun yo tsa ña nditsa

³ Quiví quita yu ñuu Éfeso tan vatsi yu Macedonia nu nyíi yu ihya, tava tyiñu yu tsi un tsa ndoo un ñuu Éfeso tyin cahan un tsihin nyívi jacuahá inga ca tuhun. Catyí yu tsihin un tyin catyí un tsihin ñi na ña jacuaha ñi tsa ña nditsa. Tan vityin juven ñi tacan caahán nyico yu tsihin un.

⁴ Cahan tsihin ñi na ña tyaá iñi ñi cuendu, na ña tyaá iñi ñi tuhun nyívi tsicoq tahan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatynyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuví quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñi iñi añima yo tsa janduvahq Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo.

⁶ Maa tyin yihí nyívi nacoq ihñi ñi yacan, tan tsinaq ñi jahá tsa caahán yuhu tahan ñi.

⁷ Cuñi ñi cuví ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi.

⁹ Cuñi tsi coto yo tyin ndi intuhun ley tan ña iyó tsi tsa cuenda nyívi vaha. Tyin ley can iyó tsi tsa cuenda nyívi javahá tsa ña vaha, ñi ña tyaá soho tsa caahán Nyoo, nyívi iyó cuatyí, nyívi caquiñi, nyívi ña tyaá yahvi tsi Nyoo. Iyó tucu tsi tsa cuenda nyívi tsahñi tsi jutu ñi, tsi sihi ñi, tan tsa cuenda tandihí nyívi tsahñi nyívi.

¹⁰ Iyó ley can tsa cuenda nyívi iyó tsihin rayi a ñaha tan ñavin yñi ña a ñasihí ra cuví. Iyó tsi tsa cuenda ra ndusihi, tan tsa cuenda nyívi tyihí xeehe nyívi tan xicó ñi, tan iyó tsi tsa cuenda nyívi vatya, tan iyó tsi tsa cuenda nyívi tsa catyí: “Naha Nyoo”, tan ña nditsa tsa caahán ñi. Tan juven ñi iyó tucu ley can tsa cuenda nyívi caahán ndavaha ñi siqui tuhun Nyoo tsa cutuhvq yo.

¹¹ Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyívi. Tan intuhun ñi maa ra taahán tsi jacahnú yo.

Tsahá ra Pablo yahvi nyoo tsi Nyoo tyin nyehé ndaahvi ra tsi ra

¹² Tсахá xaan yu tyahvi nyoo tsi Jutu Mañi yo Jesucristo tyin tсахá ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

¹³ Tacan javahá ra tsihin yu, vasu ndi maa nu quitsj tsi quivi, yuhu cahán nyaa xaan yu tsi ra. Tan tsinyaá ndaha yu tsi nyivi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu.

¹⁴ Tacan tсахá Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsj ra nu ñuhu ñayivi ihya tyin jacacú ra tsi nyivi iyó cuatyi. Tan yuhu cuví iin ra caquiñi ca tan ñavin ca tandihi nyivi.

¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa.

¹⁷ Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuví tsi tacan.

¹⁸ Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tсахá cuenda ra yañi yo naha ra tsi un quivi cahán ra naha tuhun un jahá Nyoo.

¹⁹ Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoó ra naha tandihí yacan, yacan cuenda ña tsinú ca iñi ra naha tumaa taahán maa tsi.

²⁰ Tacan javahá ra Himeneo tan ra Alejandro. Yacan cuenda tсахá cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

2

Nu jacuahá ra Pablo nácaa taahán tsi ndacan tahvi yo tsi Nyoo

¹ Tсахá cuenda yu tsi tandihí nyivi yihí cuenda Nyoo tyin ñiñi xaan cuñi tsi ndacan tahvi yo tsi Nyoo tsa cuenda tandihí nyivi. Tan nacuhva yo tyahvi nyoo tsi Nyoo tsa cuenda ñi.

² Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo.

³ Tyin tacan taahán iñi Nyoo, ra tsa jacacú tsi yo.

⁴ Tyin cuñi ra tsa cacu tandihí nyivi. Tan cuñi ra tsa coto ñi tuhun nditsa.

⁵ Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyivi tumaa maa yo.

⁶ Juvin ra Jesucristo tsihi tsa cuenda tandihi nyivi. Tyahvi ra tsa cuenda cuaty tandihi yo tyin tacan tan cuvi cacu yo. Tan cundaꝓ can quivi tyaꝓ maa Nyoo cuhva.

⁷ Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuaha yu tsi nyivi tsa ñavin nyivi Israel cuvi nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñi yu tsa ndacan tahvi rayi naha ra tsi Nyoo tandihi ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo.

⁹ Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan.

¹⁰ Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhvꝓ cuenda tsi ñi tsi Nyoo.

¹¹ Tan cunyecu taxin ñi tyaa soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi.

¹² Tyin ña tsahá yu jacuaha ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi.

¹³ Tyin jihna ca ra Adán javahꝓ Nyoo, yahꝓ can tan javahꝓ ra tsi ña Eva.

¹⁴ Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoꝓ cuaty ña.

¹⁵ Maa tyin ñiñaha nduve tsa cua tahan ñi tsa cua cacu sehe ñi, tatun jacuhnú vaha ñi tsi sehe ñi, tan tsinú vaha iñi ñi tsi Nyoo tan cuñi ñi tsi ra tan tsi nyivi, tan catsi coo ñi nuu Nyoo tan nuu nyivi.

3

Nacaa taahán tsi coo ra cuvi ityi nuu tsihin nyivi vehe ñuhu

¹ Tuhun ihya tuhun nditsa cuvi tsi: Tatun iin ndo cuñi ndo cuvi ndo ityi nuu tsihin nyivi vehe ñuhu, vaha xaan tyiñu cuñi ndo javaha ndo.

² Maa tyin ñiñi cuñi tsi tyin ra cuvi ityi nuu tsihin nyivi vehe ñuhu cuñi tsi cuvi ra iin ra catsi iyó tyin tacan tan ña cuvi tyaa nyivi cuaty tsata ra. Tan cuñi tsi tsa coo intuhun ñi ñasihi ra. Tan cuñi tsi tsa cuvi ra iin ra tsitó vaha cuhva coo, iin ra vaha nuu nyivi. Tan cuñi tsi vaha cahan ra tsihin nyivi tsaá yuvehe ra, tan cuvi ra iin ra tsitó vaha jacuaha tsi nyivi.

³ Iin ra cuvi ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuvi ra iin ra nanducú tsihi. Tan ña taahán tsi cuvi ra iin ra nducú xuhun tsihin tsa ña taahán tsi. Cuñi tsi tsa cuvi ra iin ra vaha iñi, iin ra ña tuhvá cañi tahan. Tan cuvi ra iin ra ña nyiyo iñi xuhun.

⁴ Cuñi tsi tsa cuvi ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaá yahvi vaha sehe ra tsi ra, tan jahá ñi tsa ñayivi tsi ra.

⁵ Tyin tatun ña tsitó ra cundaca ñaha ra nyivi vehe ra, ¿nácaa cua quihí ndaha ra nyivi tsicá vehe ñuhu Nyoo?

⁶ Tan iin ra ndi tsaa xaan tsihin tuhun Nyoo ña taahán tsi cuvi ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu.

⁷ Tan cuñi tucu tsi tsa cuvi ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuatyi tyaa ñi tsata ra tan ña cuvi jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸ Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuvi ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi.

⁹ Cuñi tsi tsa cutuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo.

¹⁰ Tan cuñi tucu tsi tsa nyehe jihna yo tatun vaha cuahán ra naha tsihin Nyoo, tacan tan cuvi jaha tyiñi ra naha vehe ñuhu.

¹¹ Tan tacan tucu ñiñaha, cuñi tsi cuvi ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandihí tyiñu.

¹² Ra jahá tyiñu vehe ñuhu na coo intuhun ñi ñasiñi ra. Tan cuñi tsi tsa coto vaha ra cundaca ñaha ra tsi sehe ra tan nyivi vehe ra.

¹³ Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú iñi yo

¹⁴⁻¹⁵ Vasiqú numi ñi cua quitsi nyehe yu nu nyii un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuvi yo nyivi cuenda Nyoo. Tyin maa yo cuvi vehe ñuhu Nyoo nyito. Tan cuñi tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuvi tsi.

¹⁶ Tsa nditsa tyin yaha xaan cahnu cuvi tuhun xeehe tsa jaquituvj Nyoo, tyin coo yo tumaa iyó maa ra:

Nyoo nanduvj ra rayii tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyi cuvi ra.

Tan nyehe ra cuvi ángel naha ra tsi ra.

Tanii cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra tanii cahnu nu ñuhu ñayivi.

Tan cuanuhj ra nda gloria.

4

Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo

¹ Maa tyin caahán catsi Tatyí Ii tan catyí ra tyin nu cua ndihí tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunycun ñi ndusu yuhu nu ña vaha.

² Cua tyaa soho ñi tuhun caahán nyivi jandaví ñaha. Tan ñi can ña tuví iñi ñi náa javahá ñi tyin tsa ndundavá xaan añima ñi. Tumaa tsa cayú añima ñi jahá iin caa ihñi tan ndundavá tsi.

³ Cua casi ñi nu tindaha nyivi. Tan cua catyi ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan

tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra.

⁴Tyin tandihí tsa javahá Nyoo tan vaha tsi. Tan ña taahán tsi catyi yo tyin ña vaha tsi. Tan cuví catsi yo tandihí tsi tun tsahá yo tyahvi nyoo tsi Nyoo tsa cuenda tsi.

⁵Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

⁶Tatun jacuahá un tandihí tsa caahán yu ihya tsi tandihí nyivi yihí tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú iñi yo, tsihin tandihí tuhun ra Cristo tsa nycún yo, cua jatyinyee tsi tsi un tan cahnu ca un tsihin tuhun Nyoo.

⁷Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo.

⁸Tsa jañiñi yo coo tunyee iñi cuñu ñuhu yo, juhva ñi jatyinyeé tsi tsi yo. Maa tyin tsa jañiñi yo javahá yo tandihí cuhva cuñi Nyoo, jatyinyeé tsi tsi yo iin cahnu ñi, tyin jatyinyeé tsi tsi yo nu ñuhu ñayivi ihya. Tan jatyinyeé tucu tsi tsi yo tsa coo vaha yo nu cua tsaa yo nda gloria.

⁹Tan nditsa, tyin tsa nditsa cuví tsi tan tandihí yo taahán tsi tsa tsinú iñi yo itsi.

¹⁰Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihí nyivi, tan jihna ca yoo tsa tsinú iñi yo tsi ra jacacú ra.

¹¹Tuhun ihya jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi.

¹²Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñi un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha.

¹³Tan tsitsi tsa ndi cumañi ca tsaa yu nu nyii un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo.

¹⁴Jaha cuenda vaha tunyee iñi tsa tsahá Nyoo tsi un quivi tyiso ndaha ra nyiso tyiñu vehe ñuhu naha ra jiñi un tan cahan ra naha tsa tsahá cuenda Nyoo tsi ra naha.

¹⁵Tyaa vaha iñi tuhun can tan javaha cuhva catyi tsi. Tacan tan cua nyehe tandihí nyivi nácaa cuahán un ityi nuu ca tsihin Nyoo.

¹⁶Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaa soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha.

² Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihi tsa caahán yu ihya tsihin tsa vaha tsicá iñi un.

³ Jatyinyee tsi ñiñaha ndaahvi tsa tsihi yíi tatun nduve nyivi ñi cuví jatyinyee tsi ñi.

⁴ Maa tyin tatun iyó iin ñaha tsihi yíi tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo.

⁵ Tan ñaha tsa tsihi yíi tan ndoo ndaahvi intuhun ña maa ña, iin ña Nyoo tyaa iñi ña tan tsicán tahvi ña tsi ra tsinu cahñi tan tsacuaa.

⁶ Maa tyin ñaha tsihi yíi tsa cusí iñi tsihin tsa iyó nu ñuhu ñayivi ihya, vasu nyito ña maa tyin tsihi ña cuenda Nyoo.

⁷ Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi.

⁸ Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

⁹ Nu tutu tsa nyaá sivi ñi tsihi yíi, na cunyaa sivi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yíi ñi tsicoo.

¹⁰ Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihi tsa vaha, cuví cunyaa sivi ñi.

¹¹ Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yíi ñi tan cuñi ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo.

¹² Tan coo cuatyí ñi tyin ña javahá ñi cuhva cahan ñi tsa cua javaha ñi.

¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi.

¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nya nyivi xaan iñi tsi yo tsi yo.

¹⁵ Caahán yu tandihi tuhun ihya tsihin un tyin yihí ñi tsa nacoq ñi tsi Nyoo tan nyicún ñi tsi nu ña vaha.

¹⁶ Tatun ñi yihí cuenda Nyoo tan iyó iin nyivi ñi tsa tsihi yíi, cuñí tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihi yíi tsa nduve ca maa nyivi iyó.

¹⁷ Ra tsahnu ra nyisó tyiñu vehe ñuhu, cuñí tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi.

¹⁸ Tyin tuhun Nyoo catyí tsi tyehen: “Ña tyihí un yoho yuhu indiqui nu jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

¹⁹ Tatum tyaa nyivi cuaty tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi.

²⁰ Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha.

²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsj ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyivi.

²² Ña numi xaan cuhva un tyiñu tsi iin ra cuvi ra ityi nuu tsihin nyivi vehe ñuhu. Coto cahun cuatyí javaha ra siqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutya, cõho luxu vinu na nduvaha tsitsi un.

²⁴ Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi.

²⁵ Tan tacan tucu tatun javahá yo tsa vaha, ña cuxeehe tsi. Vasu ña quituvi tsi tsa numi ñi, maa tyin ña cuví ndoo xeehe tsi.

6

¹ Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihí nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo.

² Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuaha yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusñi iñi yo tsihin tsa tsaha ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo,

⁴ cuví ra iin ra nduyaa ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi.

⁵ Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can.

⁶ Nditsa tyin tsa javahá yo cuhva catyí Nyoo tan sñi cuñí yo tsihin tsa tsaha ra tsi yo, cuví tsi tumaa iin tsa cuca iyó tsi yo.

⁷ Tyin nduve náa tsaq tsihin yo quivi cacu yo nu ñuhu ñayivi ihya. Tan nduve náa cahun tsihin yo quivi cúu yo.

⁸ Maa tyin tatun iyó tsa catsi yo tan iyó jahma cunditsí yo, na cusñi iñi yo, tan na ndoo yo vaha tsihin yacan.

⁹ Maa tyin nyivi cuñi nducua, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñí ñi coo cuaha tsa coo tsi ñi. Tan jativí can tsi ñi. Tan nu ndihí tuhun cua tiví ndihí ñi tan cua cahun ñi anyaya.

¹⁰ Tyin tsa cuñi xaan yo xuhun, yacan cuví yoho tandihí ca nuu tsa ña vaha. Tan yihí nyívi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juven ñi maa ñi tsihin yacan.

Nacaa cañi tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yooho cuví un iin rayi cuenda Nyoo. Quita tsiyo nuu tandihí tsa caquiñi. Coo cuiti vaha nuu Nyoo. Cuanyicun tsi Nyoo tsihin tsa ñi iñi un. Cuñi tsi nyívi. Cunyee iñi tsihin tsa vita iñi un nyehe un tandihí tsa cua tahan un. Tan ña cahnu jaha un tsi un.

¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayívi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyí un quívi cahan catsi un nuu tandihí ra cuví tsandaa naha ra, catyí un tyin tsinú iñi un tsi Nyoo.

¹³ Tan vityin nuu Nyoo, ra tsa tsahá ñayívi coo tandihí tsa iyó, tan nuu ra Cristo Jesús ra tsa tsahá cuenda vaha tuhun nditsa nuu ra Poncio Pilato, caahán yu tsihin un,

¹⁴ javaha tandihí tsa catyí yu tsihin un tyin javaha un tyin tacan tan ña cuví cahan nya nyívi tsi un nda tahan tsi quívi quitsi Jutu Mañi yo Jesucristo.

¹⁵ Nda tsa maa quívi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihí ca ra cuví rey. Tan ra ndacá ñaha cahnu cuví ra nuu tandihí ca ra ndacá ñaha.

¹⁶ Intuhun ñi maa ra cuví ra tsa nduve tuhun tsihí iyó tsi. Tan iyó ra nu nditsin nu ña cuví cutuhva nyívi. Tan ndi intuhun nyívi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuví tsi tacan.

¹⁷ Tan cahan tsihin nyívi tsa iyó tsa cuca ñuu ñayívi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusí iñi yo tsihin tsi.

¹⁸ Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñi iñi ñi tan ñavin tsihin tsa cuihya cuñi ñi.

¹⁹ Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quívi ityi nuu. Tan coo ñi ñayívi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yooho Timoteo, jaha cuenda vaha tyiñu tsa tsahá Nyoo tsi un. Ña tyaa soho un tuhun nu ñuhu ñayívi ihya, tuhun nduve yahvi nyaá. Ña tyaa yahvi un tuhun tsa catyí nyívi tyin tsitó xaan ñi tan ña nditsa.

²¹ Tyin tsa cuenda yacan, yihí nyívi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.
Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo

¹ Yuhu ra Pablo cuvı̄ yu iin ra tavā tyiñu ra Jesucristo, tyin tacan cuñı̄ maa Nyoo. Tyin cuñı̄ ra tsa jacoto yu tsi nyı̄vi tyin tsahá ra ñayı̄vi nyito coo tandı̄hi ñı̄ tsa iin ñı̄ cuvı̄ tsihin ra Cristo Jesús.

² Jaquitsı̄ yu carta ihya tsi yooho Timoteo. Tan cuñı̄ xaan yu tsi un tyin tumaa cuvı̄ sehe yu cuvı̄ tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañı̄ yo Jesucristo coo añaı̄ma un. Tan na cundaahvi iñı̄ ra tsi un.

Nu caahán ra Pablo tsihin ra Timoteo na catyi tuhun ra tsihin nyı̄vi tyin cuenda ra Cristo yihi ra

³ Tandı̄hi ñı̄ quı̄vi nducuhún iñı̄ yu tsi un tan tsiacán tahvi yu tsi Nyoo tsinu cahñı̄ tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsiı̄ tsaahnu yu tyiñu Nyoo tsanaha. Tan vaha cuñı̄ añaı̄ma yu tyin vaha iyó yu nuu ra.

⁴ Nducuhún xaan iñı̄ yu nácaa tsacü un quı̄vi quitā yu nu nyı̄ı̄ un. Tan vityin cuñı̄ xaan yu nyehe yu tsi un inga tsaha tan cusı̄i iñı̄ yu.

⁵ Tan nducuhún xaan iñı̄ yu tyin tsinú ñı̄ vaha iñı̄ un tsi Nyoo. Tumaa tsa tsinü iñı̄ ña Loida tsitan un tan ña Eunice sı̄hi un. Ñı̄ ı̄can vaha xaan tsinü iñı̄ ñı̄ tsi Nyoo, tan tsıtó yu tyin tacan tsinú iñı̄ maa un tsi Nyoo vityin.

⁶ Yacan cuenda tsahá cuenda yu tsi un jandu iin ca iñı̄ un tan cı̄atyı̄ñu ndatu tsa tsahá Nyoo tsi un tsa cahan un tuhun ra. Yacan cuvı̄ ndatu tsa tsahá ra tsi un quı̄vi tyı̄sö ndaha yu jiñı̄ un.

⁷ Nyoo ña tsahá ra tatyı̄ ña vaha tsa jayuhvi tsi yo. Tsahá ra Tatyı̄ Iı̄ ra tsi yo tyin coo tunyee iñı̄ cahnu tsi yo, tan cuñı̄ tahan yo tsi yo. Tan tsahá ra tunyee iñı̄ tsi yo tyin tacan tan cundaca ñaha vaha yo tsi yo.

⁸ Yacan cuenda ña nducahan nuu un cahan un tuhun Jutu Mañı̄ yo. Tan ndı̄ ña nducahan nuu un tsa nyı̄ı̄ yu vehe caa tsa cuenda ra. Cı̄atyı̄ñu tunyee iñı̄ tsa tsahá Nyoo tsi un tan ndoo un vaha tsa nyehe un tundoho tsa vatsı̄ sı̄quı̄ yo tsa cuenda tuhun Nyoo.

⁹ Tyin juvin ra jacacü tsi yo. Tan canā ra tsi yo tyin coo yo ñayı̄vi ii. Ñavin tsa cuenda tsa vaha tsa javahá yo tan canā ra tsi yo. Canā ra tsi yo tyin tacan tyaq maa ra cuhva javaha ra nda ndı̄ cumañı̄ ca tsinü ñuhu ñayı̄vi. Tyin nda quı̄vi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús.

¹⁰ Tan vityin tsıtó yo tsa vaha can tyin tsa quı̄tsı̄ ra Jesucristo jacacü ra tsi yo. Tan quı̄hin nyaa ra tandı̄hi tunyee iñı̄ tuhun tsı̄hi. Cahan ra tuhun vaha, tan tavā ndı̄tsin ra tuhun tsa coo yo ñayı̄vi nyito tsa ña cua naa maa.

¹¹ Nyoo tavā tyiñu ra tsi yu tsa cahan yu tuhun can tsihin nyı̄vi. Tavā tyiñu ra tsi yu tsa caca yu tyiñu ra, tan jacuaha yu tuhun can tsi nyı̄vi tsa ñavin nyı̄vi Israel cuvı̄.

¹² Yacan cuenda nyehé yu tandı̄hi tundoho. Maa tyin ña nducahán nuu yu tsa tacan nyehé yu tundoho, tyin tsıtó yu yóo tsinú iñı̄ yu. Tyin nacuhva cuenda yu tsi yu tsi ra, tan tsıtó vaha yu tyin cuvı̄ jaha cuenda ra tsi yu nda cuanda quı̄vi quı̄tsı̄ ra inga tsaha.

¹³ Cũanyicun tuhun vaha tsa tsahã cuenda yu tsi un. Tan cõo tsihin tsa tsinú vaha iñi un tsi Nyoo. Cũñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús.

¹⁴ Tan na jatyinyee maa Tatyi Ii tsa iyó añima yo tsi un tan jaha cuenda vaha un tsa vaha tsa tsahã Nyoo tsi un.

¹⁵ Tsa tsitó un tyin nacoõ ihñi ra Figelo tan ra Hermogenes tsi yu tan tandihi ca maa ra iyó ityi Asia.

¹⁶ Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsj ra jatyinyee ra tsi yu. Tan ña cahán nuu ra tsa tyehen nyii yu vehe caa.

¹⁷ Tan quivi tsinyij ra ñuu Roma ihya, ña jandihij maa ra tsa nanducú ra tsi yu nda cuanda tsa nañihij ra tsi yu.

¹⁸ Maa Jutu Mañi yo na cundaahvi iñi ra nyehe ra tsi ra quivi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quivi tsiyucú yo ñuu Éfeso.

2

Iin andaru vaha ra Jesucristo

¹ Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra.

² Tuhun tsa tsiñj un cahán yu nuu nyivi cuaha, jacuaha yacan tsi nyivi tsa nñi iñi tsinú iñi tsi Nyoo, ñi tsa cuví jacuaha tsi inga nyivi.

³ Tan cunyeé iñi nyehe tundoho tumaa iin andaru vaha ra Jesucristo.

⁴ Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra.

⁵ Tan tacan tucu ra jasiquí tsihin balón, ña cuví jaha canaa ra tatun ña cunyeé iñi ra jasiquí ra tumaa taahán maa tsi.

⁶ Iin ra jahá tyiñu tsitsi huhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quitá nu jahá tyiñu ra.

⁷ Tyihi tuñi vaha iñi tsa caahán yu tsihin un ihya, tan maa Jutu Mañi yo cua huhva tsa cutuñi iñi un tandihi tsi.

⁸ Nducuhun iñi tsi ra Jesucristo, ra tsa nandotõ tsa yahã nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsahã cuenda ra tsi yu tyin cahán yu tsihin nyivi.

⁹ Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñi yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi.

¹⁰ Yacan cuenda cunyeé iñi yu nyehé yu tandihi tundoho tsa cuenda tsa vaha tsi tandihi ca nyivi tsa nacatsj maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu sii caá tsa ña cua ndihi maa coo yo.

¹¹ Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

¹² Tatun nyehé yo tundoho tsa cuenda ra, cua cundaca ñaha ndihi yo tsihin ra.

Tatun catyi yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

13 Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

14 Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jatívi ra naha tsi nyívi tyaá soho tsa caahán ra naha.

15 Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un.

16-17 Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyívi. Tyin cuví can tumaa cuehe xaan tsi ñi. Tan yaha ca cuhva cua tívi ñi jahá can. Yacan cuví tsa tahán ra Himeneo tan ra Fileto.

18 Tyin quita tsiyo ra naha ityi vaha tan catyí ra naha tyin tsa yahá nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyívi tsa tsinú iñi tsi Nyoo.

19 Vasu yihí juhva ñi tacan quita tsiyo ñi, maa tyin Nyoo tsaquín ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyívi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

20 Tsitsi iin vehe cahnu, ñavin maa ñi maa ndaha tyiñu tsinú tsihin xuhun cuaan tan xuhun cuitsin iyó tsatyíñu nyívi. Tyin tsatyíñu tucu ñi tsa tsinú tsihin vitu tan tsihin ñuhu quisi. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can.

21 Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñu Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñu ra tsi yo tsa cuenda tandihí tyiñu vaha.

22 Ña caca iñi un tumaa tsicá iñi ra cuatyí iyó nu ñuhu ñayívi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayívi cuíti. Tsínu vaha iñi tsi Nyoo. Cuñi tsi Nyoo tan tsi nyívi. Coo vaha tsihin tandihí nyívi yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó añima vaha.

23 Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducuaha ca tsihi.

24 Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandihí nyívi. Tan cuñi tsi tsa ñihi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeey iñi ra tsihi tsahá nyívi.

25 Tan tsihin tsa vita iñi ra cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa.

26 Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

3

Nacaa cua coo nyívi nu cua ndihí quívi

¹ Tan cuñí tucu tsi coto un tyin nu cua ndihí tyembu cua coo quivi tsa yíi xaan cua coo yo.

² Tyin cua coo nyivi nyiyo iñi, maa ñi tsa tsi maa ñi cua cuñí ñi coo. Tan cua cuñí xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyivi ñi. Ña cua tyaa yahvi ñi tsi Nyoo.

³ Ña cua cuñi ñi tsi nyivi ñi. Ña cua cuhva maa ñi coo taxin nyivi. Cua cahan ñi cuendu. Ña cua cuvi cundaca ñaha ñi cuñu ñuhu ñi. Xaan xaan ñi cua cuvi. Tan ña cua cuñi ñi nyehe ñi tsa vaha.

⁴ Cua xico ñi tsi nyivi ñi. Tan cua cana iñi ñi javaha ñi náa ndihí tsa cuñí maa ñi. Tan cahnu cua jaha ñi tsi ñi. Tan maa ñi maa tsa cuñí maa ñi cua nanducu ñi, tan ña cua nanducu ñi tsi Nyoo.

⁵ Cua cunycun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra. Ña cutahan un tsihin nyivi javahá tacan.

⁶ Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñí ñi.

⁷ Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa.

⁸ Tan nyivi cua coo, cua cuvi ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi.

⁹ Maa tyin tsa cua janaha ñi, ña cua cuvi nducuaha can tyin ña xeehe caa tyin iin tsa nduve yahvi nyaá cua cuvi can, tumaa tsa javahá tucu ra Janes tan ra Jambres.

Nu ndihí tavá tyiñu ra Pablo tsi ra Timoteo

¹⁰ Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñi yu tsi ñi.

¹¹ Tan tsitó un nácaa cunyeé iñi yu nyehé yu tundoho tsa tsinyaá ndaha nyivi tsi yu. Tsitó un tsa tahañ yu, tandihí tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can.

¹² Tsa nditsa tyin tandihí yoo tsa cuñí coo cuhva cuñí ra Cristo Jesús cua janyehe nyivi tundoho tsi yo.

¹³ Maa tyin nyivi caquiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

¹⁴ Maa tyin yooho jañiñi tsi un tan coo un tsihin tsa cutuhvá un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhvá un.

¹⁵ Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús.

¹⁶ Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyee xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin

iyó cuatyi yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo.

¹⁷ Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihí cuenda Nyoo tan javaha yo tandihí tsa vaha.

4

¹ Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyi nyivi nyito tan nyivi tsihi quivi cua quitsi ra cundaca ñaha ra tsihin tunyee iñi tsa iyó tsi ra.

² Çahan tuhun Nyoo tsihin nyivi. Tan ña jandihí un tsa jañiñi un javaha un tacan. Çahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, çahan tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuaha tsi ñi nácaa taahán tsi coo ñi.

³ Tyin coo quivi ña cua cunyee ca iñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi.

⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa.

⁵ Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehe tundoho. Çahan tuhun Nyoo tsihin nyivi. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu.

⁷ Tsa yaha cañi tahan yu tumaa taahán maa tsi, tan tsa ndihí javaha yu tyiñu tsa tsahá Nyoo tsi yu tumaa iin ra tsinú suuhva, tun tsa tsaá ra nu taahán tsi cucuiñi ra. Tan tacan ñi maa tsinú iñi yu tsi Nyoo.

⁸ Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoq yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tavá ra Pablo tsi ra Timoteo

⁹ Janumi tan quitsi ñi un, quitsi nyehe un nu nyi yu.

¹⁰ Tyin ra Demas nacoq ihñi ra tsi yu tyin cuñi ca ra tsa iyó ñuu ñayivi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia.

¹¹ Intuhun ña ra Lucas nyií tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuví jatyinyee ra tsi yu tsihin tyiñu Nyoo.

¹² Jacuhun yu tsi ra Tíquico ñuu éfeso.

¹³ Quivi quitsi un yaha un naquihin un jahma vixin yu tsa nacoq yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacan cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra.

¹⁵ Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

¹⁶ Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoq ihñi ra naha tsi yu. Na jaha Nyoo tucahnu iñi tsi ra naha tsa cuenda yacan.

¹⁷ Vasu ndi maa tandihí ra naha nacoḡ ihñi tsi yu, maa tyin Jutu Mañi yo jatyyinyee xaan ra tsi yu. Tan tsahaḡ ra tunyee iñi tsi yu tan cuvi cahan catsi yu tuhun ra nuu nyivi. Tan tsiñi tandihí nyivi tsa ñavin ñi Israel cuvi tsa cahan yu. Tan jacacu Nyoo tsi yu tan ña tsatsj ndicaha can tsi yu.

¹⁸ Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuvi tsi tacan.

Nu ndihí cahan ra Pablo tan tsahaḡ ra nacumi tsi nyivi

¹⁹ Cuhva nacumi tsi ña Prisca tan tsi ra Aquila tan tsi nyivi ra Onesíforo.

²⁰ Tan jacotó ndihí yu tsi un tyin ndoḡ ra Erasto ñuu Corinto. Tan ndoḡ ra Trófimo ñuu Mileto tyin cuuhví ra.

²¹ Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyivi yihí cuenda Nyoo tsihin yo.

²² Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Tito

Nu tyaq ra Pablo carta tsa cuenda ra Tito

¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo.

² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandavi ñaha ra.

³ Tan vityin tsa tahān tsi quivi tsa tyaq Nyoo cuhva tyin coto yo tuhun ra. Maa ra cuvī ra jacacú tsi yo, tan tava ra tyiñu tsi yu tsa cahan yu tuhun ra tshin nyivi.

⁴ Jaquitsi yu carta ihya tsi un, Tito, tyin nditsa tyin cuvī un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoo yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuvī ityi nuu tshin nyivi vehe ñuhu intuhun intuhun ñuu, tumaa tsa catyi maa yu tshin un.

⁶ Tyin ra tsahnu cuvī ityi nuu tshin nyivi vehe ñuhu, cuñi tsi cuvī ra iin ra iyó intuhun ñi ñasiihi, tan tsinú iñi tandihi sehe ra tsi Nyoo, tan catsi iyó sehe ra tshin ra, tan ña ndava iñi sehe ra, tan ña tuhvá nyivi tyaa cuatyī siqui sehe ra. Tun tacan iyó ra, cuvī cuvī ra ityi nuu tshin nyivi vehe ñuhu.

⁷ Tyin ra cuvī ityi nuu tshin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuvī ra iin ra cuiti iyó nuu Nyoo. Iin ra cahnu jahá tsi ña cuvī cuvī ra ityi nuu tshin nyivi vehe ñuhu, ndi iin ra ndihi iñi, ndi iin ra tuhvá tsihí, ndi iin ra nducú tsihi, ndi iin ra jaha canaa xuhun tshin iin cuhva ña vaha.

⁸ Maa tyin cuñi tsi cuvī ra iin ra sii cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuvī ra iin ra javahá tsa vaha, iin ra tsicá iñi tsa vaha, iin ra tsa nacuhvā cuenda vaha tsi ra tsi Nyoo, iin ra tsitó cundaca ñaha tsi maa ra.

⁹ Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tshin tuhun vaha ihya, tan ñihi ra cuhva jacuaaha ra tsi nyivi caahán tyin ña nditsa tuhun caahán yo.

¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandavi ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra.

¹¹ Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

¹² Tan juven ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuvī ñi tumaa cuvī quiti. Cuaha xaan tsatsi ñi tan jutsan xaan ñi”, catyi ra.

¹³ Tan nditsa tsa cahan ra. Yacan cuenda cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo.

¹⁴ Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñí coto tsa nditsa.

¹⁵ Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuanda cuhva tsicá iñi ñi tan tsa tsiñi tuñi iñi ñi tan ña vaha.

¹⁶ Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

2

Tuhun vaha tsa tsahq Nyoo tyin jacuaha yo

¹ Maa tyin yooho, jacuaha tsa vaha tsa nacatsí tahan tsihin tsa jacuahá Nyoo tsi yo.

² Jacuaha tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeet iñi ra naha tandihi náa tundoho nyehé ra naha.

³ Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi.

⁴ Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi.

⁵ Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

⁶ Tacan tucu ra cuatyí naha ra. Cuhva cuenda tsi ra naha na catsi coo ra naha.

⁷ Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha.

⁸ Maa ñi tuhun vaha cahan un tyin tacan tan yoñi cuví tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cu nducahan nuu ra naha.

⁹ Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihi tsa caahán tsitoho ra naha. Tan na ña nacahan ra naha nu caahán tsitoho ra naha.

¹⁰ Tan na ña suhu ra naha tsa tsii tsitoho ra naha. Na jaha vaha ra naha cuenda tandihi ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihi ñi.

¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayivi ihyá, na cundaca ñaha vaha yo tsi yo tumaa cuñí maa Nyoo.

¹³ Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuví Nyoo yo, ra cahnu cuví, ra jacacú tsi yo.

¹⁴ Tsaḥa ra ñayivi ra tsa cuenda yo tyin tacan tan jacacu ra tsi yo ndaha tandihi tsa caquiñi. Tan nacatyā ra tsi yo na cuvi yo nyivi vaha, tan cuvi yo tsi maa ra, tan javaha yo maa ñi maa tsa vaha.

¹⁵ Yacan cuñi tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

3

Cuhva taahán tsi javaha nyivi yihí cuenda Nyoo

¹ Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi.

² Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihi nyivi.

³ Tyin nda cuanda maa yo tan ña vaha javaha yo nu quitsj tsi. Soho xaan tsicoḡ yo. Ndava xaan iñi yo. Ña tsicā yo ityi vaha tyin jandavj ñaha xaan nu ña vaha tsi yo. Tan tsindacā ñaha tandihi tsa ña vaha tsa cuñi cuñu ñuhu yo tsi yo. Tan javaha yo tandihi cuhva cuñi maa yo. Tan cuñi yo coo tandihi tsa iyó tsi inga nyivi tsi yo. Ndasí tsicā iñi yo nyeheḡ yo tsi nyivi yo. Tan tacan tucu maa nyivi ndasí cuñi ñi nyeheḡ ñi tsi yo.

⁴ Maa tyin Nyoo vaha xaan iñi ra tan jacacú ra tsi yo. Tsihin yacan janahaḡ ra tsi yo tyin cuñi ra tsi tandihi nyivi.

⁵ Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahvj iñi ra nyeheḡ ra tsi yo. Tan tsihin niñi ra Jesús nacatyā ra cuatyí yo, tan nacacú tsaa yo jahā Tatyí Ii ra, tan tsahá ra ñayivi nyito coo yo.

⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añima yo.

⁷ Tsihin tsa vaha maa ra tan janduvahaḡ ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo.

⁸ Tandihi tuhun ihya tuhun nditsa cuví tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihi nyivi tatun tyaá yahvi ñi itsi.

⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyivi. Ña tyihí un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsifiñi tuñi tsahá can.

¹⁰ Tatun iyó nyivi cuñi natahvi sava tsi nyivi tsicá vehe ñuhu, cāna tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasi nu caca ñi vehe ñuhu.

¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoḡ cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavḡ ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyí un. Tan quivi tsaa ra, nducu cuhva tan cūhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin.

¹³ Ndũcu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cuhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha.

¹⁴ Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Ra Filemón

Nu quitsahq tyaá ra Pablo carta cuenda ra Filemón

¹ Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyi tucu ra Timoteo tyin jaquitsí ndihi ra nacumi tsi un. Cuñi xaan ndi tsi un tsa cuenda tsa iin ñi tyiñu ra Cristo jahá tyiñu yo.

Nu quitsahq tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatinyeeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihi nyivi ndu iin yuvehe un.

³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña nado.

Ra Filemón tsinú xaan iñi ra tsi ra Jesús tan cuñi xaan ra tsi nyivi

⁴ Tandihí ñi tsaha tsa tsicán tahvi yu tsi Nyoo tan nducuhún iñi yu tsi un,

⁵ tyin ñihí tuhun yu tyin tsinú xaan iñi un tsi ra Jesús tan cuñi xaan un tsi tandihí nyivi yihí cuenda ra.

⁶ Tan tsicán yu tsi Nyoo tsa cuenda tandihí nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo.

⁷ Tan sii xaan cuñi yu tan iin xaan cuñi yu tsa cuenda tsa cuñi xaan un tsi nyivi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu.

⁹ Maa tyin yuhu cuñi xaan yu tsi un, yacan cuenda ña cua tava tyiñu yu tsi un tyin cuñi yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo.

¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyíi yu vehe caa ihya.

¹¹ Tahan tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatinyeee ra tsi yo, tahan ñi tsi yooho tan yuhu.

¹² Yacan jaquitsí nyico yu tsi ra yuvehe un tan cuñi yu tsa naquihin cuenda un tsi ra tumaa tsa maa yu cuví ra.

¹³ Tsicá tucu iñi yu tsa ndoo ra nu nyíi yu vehe caa ihya tan jatinyeee ra tsi yu cahan yu tuhun Nyoo tsitsi tsa ndúve un.

¹⁴ Maa tyin ña cuñi yu jandoo yu tsi ra tyin ña tsitó yu nácaa cua cahan un. Tan ña cuñi yu jañiñi yu tsi un tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu.

¹⁵ Vasiqúi maa Nyoo cuñi tsa cunu ra nuu un juhva quivi tan vityin cua tsaa nyico ra yuvehe un tan coo cuñi ra tsihin un.

¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñi xaan yu tsi ra, yacan yooho taahán tsi tsa

cuñi ca un tsi ra tan ñavin ca yuhu, tyin vityin ñavin musu ñi un cua cuvi tsi ra tyin cuví tucu ra yañi un tsa cuenda ra Cristo.

¹⁷ Tun nditsa un tsa cuñi un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsaá yu yuvehe un.

¹⁸ Tatun javaha ra iin tsa ña vaha tsi un o nyaá cuenda ra tsi un, tyahvi maa yu can.

¹⁹ Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu.

²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi añima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un.

²² Tan cuñi tucu yu tyin janduvaha un nu cusu yu yuvehe un tyin nyitá iñi yu tyin Nyoo cua kuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaa ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafra tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un.

²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu.

²⁵ Na nasoco xaan Jutu Mañi yo Jesucristo tsi ndo.
Tan na cuvi tsi tacan ñi.

Carta Tsa Tsinyaa Tsa Cuenda Nyiví Israel, Ñi Caahán Yuhu Hebreo

Caahán Nyoo tshin yo tshin yuhu Sehe ra

¹ Tahan tsanaha cuaha xaan tsaha, tan cuaha xaan cuhva cahan Nyoo tshin tsií tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsaha cuenda tsi nyiví tuhun caahán Nyoo.

² Tan vityín, nu cua ndihí tyembu ihya tsatyíñú ra tsi Sehe ra tsa caahán ra tshin yo. Iin ñi cuví ra tshin Sehe ra tan javahá ra tandihí tsa iyó. Tan nacuhvá cuenda ra tandihí can tsi Sehe ra.

³ Tan maa Sehe ra janahá ra tsa sii caá ra, tyín juvín ra Sehe ra cuví tixahñu ra tyín juvín ñi cuhva caá maa ra caá ra Sehe ra. Tan tshin tunyee íñi tuhun caahán ra, yihí ndaha ra tandihí tsa iyó. Tsa yahá tsa nacatyá ra cuatyí yo, tan tsinyaa ra xiin cuaha Nyoo nda gloria.

Cahnu ca cuví Sehe Nyoo tan ñavin ca ángel

⁴ Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel.

⁵ Tyín Nyoo ña catyí ra ndi iin tsaha tshin ndi intuhun ángel tyehen: Yooho cuví Sehe yu.

Tan tsahá yu ñayiví coo un vityín.

Tan ndi ña cahan ra tuhun ndi intuhun ángel tyehen:

Yuhu cua cuví Jutu ra.

Tan maa ra cua cuví Sehe yu.

⁶ Maa tyín quiví jaquitsj Nyoo tsi Sehe mañi ra nu ñuhu ñayiví, catyí ra:

Tyín tandihí ángel ra taahán tsi jacahnu ra naha tsi Sehe ra.

⁷ Tan cahan tucu ra tuhun ángel tan catyí ra:

Ángel yu cuví ra naha tumaa iin tatyí jahá yu,

jahá tyiñu ra naha tyiñu yu, tan cuví tucu ra naha tumaa ñuhu, catyí Nyoo.

⁸ Maa tyín tuhun Sehe ra catyí ra tyehen:

Nyoo cuví un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sii cuñí un, tan ñavin ca tsi ra cutahán tshin un naha ra.

¹⁰ Tan catyí tucu Nyoo tshin Sehe ra tyehen:

Yooho cuví Jutu Mañi tandihí nyiví. Quiví jihna ñi juvín un javahá ñuhu ñayiví, tan tshin ndaha un javahá un andiví.

¹¹ Ñuhu ñayiví tan andiví tan tandihí maa tsa iyó cua cundihí tsi, maa tyín yooho, ña cua cundihí un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

¹² Tan cua quihí tahnu can tumaa tyihí tahnu yo iin jahma.

Tan cua nasama can tumaa nasamá nyiví jahma ñi.

Maa tyín yooho iin ñi maa ra cuví un tan ña cua nasama un.

Tan ña cua cundihí maa ñayiví un tyín tacan ñi iyó maa un, catyí Nyoo tshin Sehe ra.

13 Nyoo ndi iin tsaha ña caħan ra tsihin ndi intuhun ángel tumaa caħan ra tsihin Sehe ra tyehen:

Cunya xiin cuaha yu ihya

tsitsi tsa nacuhva cuenda yu tsi nu xaan iñi tsi un nahnu tsi un.

14 Tandihí ángel, tatyí cuví ra naha. Tava tyiñu Nyoo tsi ra naha tsa caca ra naha tyiñu ra tan jatyinyee ra naha tsi nyivi tsa cua cacu.

2

Cahnu xaan cuví tsa jacacú Nyoo tsi yo

¹ Yacan cuenda cuñí tsi tyaa yahvi xaan ca yo tuhun nditsa tsa tsiñi yo, coto nacoo ihñi yo itsi.

² Tahañ tsanaha tsaha cuenda ángel ley Nyoo tsi ra Moisés. Tan janaha Nyoo tyin nditsa tan taahán tsi tyaa yahvi nyivi itsi. Tan nyivi tsa tsicoo cuatyí tan ña tyaa yahvi ley can, tatsj tuñi ra tsi ñi tumaa catyí maa ley can.

³ Tun tacan tahañ ñi can quivi can znácaa cua javaha yoo vityin, tan cuví cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa caħan jihna tyin cuví cacu yo. Yaha can tan caħan nyivi tsa tsiñi tsa caħan ra. Nyehe ñi tyin nditsa tan nacatyí tuhun ñi itsi tsihin yo.

⁴ Tan siin tyin Nyoo janaha catsi ra tsi yo tyin nditsa tsa jacacú ra tsi yo. Janahá ra can tsi yo tsihin tsa javaha ra cuaha tsa iyo. Tan tsaha tucu ra Tatyí lí ra tsi yo tyin jatyinyee tsi tsi yo tsa javaha yo tyiñu tsa cuñí ra javaha yo. Tan tsihin tandihí yacan janahá ra tsi yo tyin nditsa tsa jacacú ra tsi yo.

Ra Jesucristo quitsi ra cuví ra rayi nu ñuhu ñayivi ihya

⁵ Nyoo ña tsaha ra tsa cundaca ñaha ángel ñuhu ñayivi tsa tsa cua coo tsa caahán yo tuhun vityin.

⁶ Tyin iyó iin nu tyaa iin ra nu tutu Nyoo tyehen:

Nyoo Jutu yu zyóo ra cuví rayi nu ñuhu ñayivi ihya tyin ñuhú iñi un tsi ra?

¿Tan yóo ra cuví ra tyin cutuñu iñi un tsa cuenda ra?

⁷ Tyin ndaahvi ca jaha un tsi ra juhva tyembu, tan ñavin ca ra ángel naha ra. Maa tyin jacahnú un tsi ra. Tan jaha un tsa ñayivi tsi ra.

Tan tsaha un tsa quihí ndaha ra tandihí tsa javaha un.

⁸ Tandihí can tyaa cuenda un ndaha ra.

Tan nduve maa náa ña tsaha cuenda Nyoo quihí ndaha ra. Tan ñaha ca nyehé yo tyaa yahvi tandihí yacan tsi ra.

⁹ Maa tyin nyehé yo tsi ra Jesús tyin nduluhlu ra jaha Nyoo juhva tyembu tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñí xaan ra tsi yo. Tan tsaha ra tsi ra Jesús quitsi ra quitsi cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundo ho tsa nyehé ra quivi can.

¹⁰ Tandihí maa tsa iyó, tsa cuenda maa Nyoo cuví tsi. Maa ra javaha itsi. Tan cuñí ra cuhva ra tandihí tsa si caá tsa iyó andivi tsi tandihí sehe ra. Yacan cuenda janyehé ra tundo ho tsi ra Jesucristo, ra tsa jacacú tsi yo, tan tsihin yacan janduvaha ra tsi ra.

¹¹ Ra Cristo tsa jacacú tsi yo, Sehe Nyoo tsi ra. Tan juvín ñi sehe Nyoo nanduví yoo tsa tsinú iñi tsi ra. Yacan cuenda ña caħán nuu ra Cristo tsa caahán ra tyin yañi ra tan cuhva ra cuví tsi yo, tyin iin ñi Jutu yo tsihin ra.

¹² Tyin catyí ra Cristo nu tutu Nyoo tyehen:
Cua cahan yu tuhun un tsihin yañi yu.

Tan cua jacahnu yu tsi un tsihin yaa nu ndu iin yo.

¹³ Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaḥa ra tsi yu, catyí ra.

¹⁴ Yoo tsa cuví yo nyivi ñuhu ñayivi, iyó cuñu ñuhu yo tan niñi yo. Tacan cuví ra Cristo, tyin tun tsa ña tsicoo cuñu ñuhu ra tan niñi ra, ña cua cuví cúu ra tan janaa ra tsi nu ña vaha, nu tsa tsañi tsi nyivi.

¹⁵ Tacan javaha ra tan jacacu ra tsi nyivi tsa tsicoo yuuhví jaha tuhun tsihi. Cuví ñi tumaa musu nu ña vaha tyin tandiñi ñi quivi tsicoo yuuhví ñi.

¹⁶ Tan tsa nditsa vaha tyin ña quitsi ra quitsi jatyinyee ra tsi ángel. Tyin quitsi ra quitsi jatyinyee ra tsi nyivi tata ra Abraham.

¹⁷ Yacan cuenda ñiñi cuñi tsi tsa cuví ra tumaa yoo tsa cuví yo yañi ra tan cuhva ra tyin tacan tan cuví ra iin ra cundaahvi iñi tsi yo, tan cuví ra jutu tsaahnu cuví ityi nuu tsa cuenda yo nuu Nyoo tyin jandaá ra tandiñi maa tan quihñi nyaá ra cuatyí yo tsihin tundoho tsa nyehe ra.

¹⁸ Tan tsa cuenda tsa nyehe ra tundoho quivi nducu cuhva nu ña vaha tsi ra, tsitó ra nácaa cuñi yo tun nyehe yo tundoho. Yacan vityin nyaá ra tsa jatyinyee ra tsi yo tun nyehe yo tundoho tsa nducu cuhva nu ña vaha tsi yo.

3

Cahnu ca cuví ra Jesús tan ñavin ca ra Moisés

¹ Nyooho, yañi, tsa jandu ii Nyoo, tan tsa nacatsi ra tyin coo ndo tsihin ra nda gloria, nyehe vaha ndo cuhva iyó ra Cristo Jesús, juvin ra jaquitsi Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra.

² Ra Cristo javaha ra tandiñi tsa cañan Nyoo tyin javaha ra, tumaa javaha tucu ra Moisés tyiñu tsa tsaḥa Nyoo tsi ra tsa jaha cuenda ra vehe Nyoo tsa cuví nyivi Israel.

³ Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra.

⁴ Tyin maa ñi iyó ra javahá intuhun intuhun vehe, maa tyin Nyoo cuví ra tsa javaha tandiñi maa tsa iyó.

⁵ Ra Moisés tyaa yahvi ra tsi Nyoo tan javaha ra tyiñu tsa tsaḥa Nyoo tsi ra tyin jaha cuenda vaha ra vehe Nyoo tsa cuví nyivi Israel, tan juvin ñi jacoto tucu ra tsi nyivi tsa cua javaha Nyoo nu cuahán ca tsi.

⁶ Maa tyin ra Cristo, Sehe Nyoo, tyaa yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñi yo nyicún yo tsi Nyoo tan nyitá vaha iñi yo tsi ra nda cuenda nu ndiñi, tan tacan ñi siñi cuñi yo ndatú yo tsa cua ñiñi yo.

Nyivi tsinú iñi tsi Nyoo, quitatú ñi tsihin ra

⁷ Yacan cuenda cuñi tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiñi ndo tsa caahán Nyoo tsihin ndo vityin,

⁸ ña jandava ndo añima ndo, tumaa javaha nyivi tsa ña tyaa yahvi tsi Nyoo quivi nducu cuhva ñi tsi ra nu tsica ñi nuu tsiqui.

⁹ Tyehen catyí Nyoo:

Tsii tsaahnu ndo nducu cuhva ñi tsi yu,

vasu ndi maa nyehe ñi tsa javaha yu tsitsi tsa uvi xico cuiya.

¹⁰ Yacan cuenda cuxaan yu tsihin nyivi can, tan catyi yu tyehen: “Ñã iin maa cuñi nyivi ihya tan ñã cuñi ñi cunyicun ñi ityi janahá yu tsi ñi.”

¹¹ Yacan cuenda cuxaan yu tsihin ñi, tan cahã catsi yu tsihin ñi, tyin ñã cua quitatu ñi tsihin yu, catyí Nyoo.

¹² Yacan cuenda yañi, jaha ndo cuenda tsi ndo tan ñã caca uvi iñi ndo tsitsi añima ndo coto jandihí ndo tsa tsinú iñi ndo tsi Nyoo nyito tan coto nacoo ndo tsi ra.

¹³ Maa tyin jandu iin tahan ndo iñi ndo tandihí ñi quivi, tsitsi tsa tshá tsi kuhva tsi ndo vityin. Tyin tacan tan ñã cua ndundava añima ndo, tan ndi intuhun ndo tan ñã cua jandavi ñaha tsa caquiñi tsi ndo.

¹⁴ Tyin tun ñã jandihí yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsahá yo, cua ñihí yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

¹⁵ Yacan tacan cuñi tsi jaha yo cuenda tsi yo tumaa catyí tutu Nyoo: Tatin tsiñi ndo tsa caahán Nyoo tsihin ndo vityin Ñã jandava ndo añima ndo, tumaa javaha nyivi tsa ñã tyaã yahvi tsi Nyoo —catyí tutu Nyoo.

¹⁶ ¿Yóo nyivi cuví ñi tsiñi tsa cahã Nyoo tan ñã tyaã soho ñi? Nyivi ihya cuví nyivi Israel tsa tava ra Moisés Egipto tahan tsanaha. Juvín ñi can ñã tyaã soho.

¹⁷ Tan ¿yóo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihí ñi nu tsiqui, juvín ñi maa nu tsica ñi.

¹⁸ ¿Tan yóo tsihin cahã catsi Nyoo tyehen?:

—Ñã cua quitatu ndo tsihin yu.

Juvín ñi tsihin ñi tsa ñã tyaã soho can.

¹⁹ Ihya nyehé yo tyin ñã cuví ñihí ñi quitatu ñi tsihin Nyoo tyin ñã tsinú iñi ñi tsi ra.

4

¹ Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ñã cua ndoo ihñi ndo.

² Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ñã tsinú iñi ñi itsi.

³ Yoo tsa tsinú iñi tsi Nyoo, quitatú yo tsihin ra. [Maa tyin ñã quitatu nyivi tsa ñã tsinú iñi tsi ra] tyin catyí ra:

Yuhu cuxaan yu tsihin ñi tan cahã catsi yu tsihin ñi tyin ñã cua quitatu ñi tsihin yu, catyí ra.

Vasu ndi maa [tacan cahã Nyoo tsihin ñi ican], maa tyin [tsa iyó tuhun tsa cuví quitatu yo tsihin Nyoo nda quivi] ndihí jaha tyiñu ra javaha ra ñuhu ñayivi.

⁴ Tyin yihí nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jaha tyiñu Nyoo, quitatú ra tsa tsinu utsa quivi.

⁵ Tan catyí tucu tsi tyehen:

Ñã cua quitatu ñi tsihin yu, catyí Nyoo.

6 Nyivi tsa tsiñi jihanna tuhun tsa jacacú Nyoo tsi yo ña cuvi quitatu ñi tsihin ra, tsa cuenda tsa ña tyaa yahvi ñi tsa cahan ra tsihin ñi. Maa tyin vityin ndi iyó ndatu tsa quitatu inga nyivi tsihin ra.

7 Tsa yaha tsa ña tyaa yahvi nyivi Israel tsa cahan Nyoo, tan tyaa ra inga quivi cuvi quitatu yo tsihin ra, tan quivi can cuvi tyembu vityin. Tacan caahán Nyoo nu tutu ra nu tyaa ra David tyehen:

Vityin tatun nyooho tan tsiñi ndo tsa caahán yu,

Ña jandava xaan ndo añima ndo, catyí Nyoo.

8 Tun tsatyin tsaha ra Josué nu quitatu nyivi Israel, ña cua cahan Nyoo tsa cuenda inga quivi.

9 Yacan cuenda cuvi quitatu nyivi yihí cuenda ra tsihin ra.

10 Tyin nyivi quitatú tsihin Nyoo, ña tsicá iñi ñi tsa cuenda tyiñu jahá ñi tyin quitatú añima ñi tumaa quitatu Nyoo quivi ndihí jahá tyiñu ra.

11 Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javaha nyivi tsicoo tsanaha tsa ña cuñi tsinu iñi tsi ra.

12 Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasín tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo.

13 Nduve maa tsa javaha Nyoo tan cuvi cunu xeehe can nuu ra, tyin tandihí maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuvi jutu tsaahnu cuvi ityi nuu tsa caahán ndaahvi tsihin Nyoo tsa cuenda yo

14 Ra Jesús Sehe Nyoo, juvin ra cuvi jutu tsaahnu cuvi ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinú iñi yo tsi ra.

15 Tyin ra tsa cuvi jutu tsa cuenda yo cuvi naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehe tucu maa ra tandihí nuu tundoho quivi nducu cuhva nu ña vaha tsi ra, maa tyin ña tsicoo cuatyí ra.

16 Yacan cuenda cuñi tsi nanducu yo tsi Nyoo tan ndacan yo tsi ra tsihin tsa ña yuuhvi yo na cundaahvi iñi ra nyehe ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

5

1 Tandihí ñi jutu tsaahnu tsa cuvi ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi.

2 Tan vatsi tsaha juvin ñi ndaahvi cuñi ra cuvi jutu quivi nducú cuhva nu ña vaha tsi ra, yacan cuenda cuvi cundaahvi iñi ra nyehé ra tsi nyivi ña cutuñi vaha iñi tuhun Nyoo tan nyivi ña nyicún vaha tsi Nyoo.

3 Tan yacan cuenda tsahñi ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

4 Ndi intuhun maa nyivi tan ña cuvi cuvi ñi jutu tun ñavin maa Nyoo nacatsi tsi ñi. Tyin maa Nyoo cuvi ra nacatsi tsi ra cua cuvi jutu, tan tsahá ra ndatu tsi ra tsa cuvi ra jutu, tumaa javaha ra tsihin ra Aarón tahan tsanaha.

⁵ Tan tacan tucu ra Cristo, ñavin maa ra tyaá tyiñu can tsi ra, tyin maa Nyoo tsahá tsa cuví ra jutu tsaahnu tsa cuví ityi nuu, tumaa catyí ra: Yooho cuví Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

⁶ Tumaa catyí tucu ra tsihin ra nu inga nu caahán tsi tyehen:

Ña cua cundihi maa tsa cuví yooho jutu, tumaa cuví ra Melquisedec.

⁷ Quiví tsicoo ra Cristo nu ñuhu ñayivi ihya, tsican tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihi tsa catyí Nyoo tyin javaha ra.

⁸ Yacan cuenda vasu ndi maa Sehe Nyoo tsi ra Cristo, cutuhva ra tyaá yahvi ra tsi Nyoo tsihin tsa nyehe ra tundoho.

⁹ Tsa yaha tsa javahá ra tandihi cuhva cuñi Nyoo tyin javaha ra, tacan tan tsahá Nyoo tsi ra tsa jacacú ra tsi tandihi nyivi tsa tyaá yahvi tsa caahán ra tyin tacan tan coo cuiñi ñi tsihin Nyoo.

¹⁰ Tyin maa Nyoo tava tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihí yo tsa tsinú iñi yo tsi Nyoo

¹¹ Cuví cahan cuaha yo siqui tuhun ihya, maa tyin yíi xaan nacatyí tuhun yu nácaa cuahán tsi, tyin nyooho ña cuñi ndo cutuñi iñi ndo.

¹² Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyooho cuví ndo tumaa cuví lee tsa tyaxín tsa ñaha ca cuví catsi tyin cuñi tsi tsa tyaá soho nyico ndo tuhun tsa tsiñi ndo tsa jihna ñi.

¹³ Tyin nyivi cuñi tyaá soho tuhun tsa ña yíi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo.

¹⁴ Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iñi nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra.

² Tan na ña ndoo yo vaha tsihin tuhun tsa cutuhva yo cuenda tsa tsicoon-dutyá yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyivi tsa yaha cúu ñi, tan tsa cuenda tucu tsa cua cutuñi tandihi nyivi nuu Nyoo tan yihí ñi cua cuhun cuiñi ñi anyaya. Na ña ndoo yo vaha tsihin yacan ñi.

³ Nacuhun ca yo ityi nuu tatun Nyoo tsaha ra ndatu.

⁴ Tyin nyivi tsa tsa yaha naquihñ cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi.

⁵ Tan tsitó ñi tyin vaha tuhun Nyoo. Tan tsa nyehe ñi juhva nácaa cua cuví tsa cua coo yo nu ñuhu ñayivi tsa, tyin ñihí ñi tunyee iñi tsa iyó tsi Nyoo.

⁶ Tatun tsa naquihñ cuenda ñi tandihi yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa

tyaa ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyívi.

⁷ Añima nyívi cuví tsi tumaa ñuhu nu jahá tyiñu nyívi, tyin tandihi ñi tsaha tsa cuún savi, nacohó ñuhu can ndutya savi can. Tatun vaha ñuhu can, vaha tsicoó tsa tatsí nyívi, tan nasocó Nyoo ñuhu can.

⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyívi tsa jandihí tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyooho nasocó Nyoo tsi ndo tyin jacacú ra Cristo tsi ndo.

¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyívi yihí cuenda ra, tan nyehé tucu ra tyin tsa yaha xaan jatyinyeé ndo tsi ñi, tan ndi jatyinyeé ca ndo tsi ñi vityin.

¹¹ Cuñi ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihi ndo tandihi tsa ndatú ndo.

¹² Ña cuñi ndi tsa jutsan xaan jaha ndo tsi ndo, maa tyin cuñi ndi tsa coo ndo tumaa iyó nyívi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyí Nyoo tyin cuhva ra tsi yo.

¹³ Tyin quívi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juven ñi sivi maa ra, tyin ña cuví cuatyíñu ra náa inga ca sivi tyin nduve nyívi cahnu ca cuví tan ñavin ca maa ra.

¹⁴ Tan catyí ra tsihin ra Abraham tyehen: “Tsa nditsa tyin cua nasoco xaan yu tsi un tan cuaaha xaan tata un cua cuví jaha yu”, catyí ra tsihin ra.

¹⁵ Ra Abraham ñihí ra tsa catyí Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can.

¹⁶ Iin nyívi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi sivi iin nyívi cahnu ca cuví tan ñavin ca maa ñi. Tsihin yacan ndoo ñi tuhun tsihin yo.

¹⁷ Nyoo tsatyíñu ra juven ñi sivi maa ra quívi catyí ra tyin cuhva ra tsa cuhva ra tsi nyívi ra. Javahá ra tacan tyin cuñi ra tsa coto ñi tyin cua jandaa ra tsa cahán ra tsihin ñi tan ña cua nasamá tuhun cahán ra.

¹⁸ Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyí ra tyin cuhva ra tsi yo, tan inga tsi cuví tsa tsatyíñu ra juven ñi sivi maa ra. Nyoo ña vatya ra. Yacan cuenda tandihi yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihi yo tsa catyí ra tyin cuhva ra tsi yo.

¹⁹ Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cahun tsi tsihin tyati, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahví sava jahá jahma.

²⁰ Ican quihví ra Jesús tyin tacan tan nuñá ra ityi cahun yo nu nyaá Nyoo. Tan ña cua cundihí maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

7

Ra Jesús cuví ra jutu tumaa cuví ra Melquisedec

¹ Ra Melquisedec tsa caahán yu tuhun ihya, juven ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihi tsa iyó. Quívi tsa vatsí nuhu ra Abraham naha ra tsa yahá tsahán ra naha

tsicañi tahan ra naha tsihin ra cuvi rey naha ra, tan jahā canaa ra naha, ra Melquisedec jatahan ra tsi ra naha tan nasoco ra tsi ra Abraham.

² Tan cuaha tsa ñihí ra Abraham nu tsañan ra tsicañi tahan ra. Tsitsi tsa utsi utsi nuu tsa ñihí ra, tsañā ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuvi tucu ra rey ñuu Salem, tan Salem cuñi tsi catyi “tsa taxin”. Yacan cuenda cuvi ra: “Rey tsañā tsa taxin.”

³ Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacu ra, tan ama tsihi ra. Yacan cuenda cuvi jandu inducu yo tsi ra tsihin Sehe Nyoo, tyin ña tsindihí maa tsa cuvi ra jutu.

⁴ Nyehé yo ihya vityin tyin cahnu xaan cuvi ra Melquisedec, tyin tsañā ra Abraham juhva tsa ñihí ra nu tsicañi tahan ra tsi ra.

⁵ Tun tsatyin tata ra Abraham cuvi ra Melquisedec, tan cuvi ra jutu, ña iyo cua cuñi yo tsa tsañā ra Abraham juhva tsa ñihí ra tsi ra, tyin tsa yahā cuaha cuiya tan tsañā Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuvi tata ra Leví naha ra, vasu ndi maa iin ñi nyivi cuvi ñi tsihin ra naha tyin juvin ñi tata ra Abraham cuvi ra naha.

⁶ Ra Melquisedec, vasu ndi maa ñavin tata ra Leví, tan tata ra Abraham cuvi ra, maa tyin naquihín cuenda ra juhva tsa ñihí ra Abraham. Tan nasoco ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra.

⁷ Tan tsitó catsi yo tyin cahnu ca cuvi ra tsa nasocó, tan ñavin ca ra tsa nasoco ra.

⁸ Nyehé yo tyin cahnu ca cuvi ra Melquisedec tan ñavin ca tandihí ra tsa quihín cuenda intuhun intuhun tsitsi tsa utsi utsi tsa ñihí nyivi, tyin rayñi ñuhu ñayivi ihya ñi cuvi ra naha, tan tuhvá ra naha tsihi. Maa tyin caahán tsi nu tutu Nyoo tan catyi tsi tyin ra Melquisedec nyito ra.

⁹ Ra Leví tsihin sehe ra, tata ra Abraham cuvi ra naha. Juvin ra naha cuvi jutu tsa naquihín tsa intuhun intuhun tsitsi tsa utsi utsi tsa ñihí nyivi. Cuví catyi yo tyin tandihí ra can naha ra tyahvi ndihí ra naha tsi ra Melquisedec quivi tyahvi ra Abraham tsi ra.

¹⁰ Cuví catyi yo tyin tyahvi ndihí tata ra Leví tsi ra Melquisedec quivi ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

¹¹ Ra jutu tata ra Leví tsa cuvi tucu tata ra Aarón, juvin ra naha jacuahá ley tsañu Nyoo tsi yo. Vaha vityin; tun tsatyin cuvi janduvahá ra jutu can naha ra tsi nyivi nyicún ley can, ña ñiñi cuñi tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec.

¹² Tyin tun nasamá Nyoo tsi ra cuvi jutu, nasamá tucu ra ley ra.

¹³ Jutu Mañi yo tsa caahán tutu Nyoo tuhun, tata inga ra sehe ra Israel cuvi ra. Tan ndi intuhun tata ra can tan ña cuvi ra naha jutu.

¹⁴ Tsitó vaha yo tyin Jutu Mañi yo tata ra Judá tsi ra, tan ra Moisés ña cañan ra tuhun tata ra Judá quivi cañan ra tuhun ra cuvi jutu naha ra.

¹⁵ Nditsa tsa nasamá Nyoo tsi ra jutu tyin jaquitsi ra iin jutu tumaa ra Melquisedec.

¹⁶ Ra jutu ihya ña quitsi ra tumaa catyi ley tsañu, tyin ley can catyi tsi tyin maa ñi tata ra Leví taahán tsi cuvi jutu, tan ra can ñavin tata ra Leví cuvi ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsi Nyoo.

¹⁷ Tyin tyehen caahán Nyoo tuhun ra: Yooho ña cua ndihi maa tsa cuví un jutu, tyin cuví un jutu tumaa ra Melquisedec.

¹⁸ Yacan cuenda nacoq Nyoo ley tsahnu can tyin ña cuví jatyinyeé tsi tsi nyivi, tan ña cuví cacu nyivi jahá tsi.

¹⁹ Ley can ña cuví janduvahá tsi tsi nyivi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

²⁰ Nyoo cahán catsi ra tyin tacan cua cuví, tan tacan cuví.

²¹ Tandihí ca maa ra jutu tsa iyó vityin naha ra nduve náa cahán Nyoo tuhun ra naha. Maa tyin quivi tsahá Nyoo tsi ra Cristo tsa cuví ra jutu, cahán catsi ra tsihin ra tumaa caahán nu tutu ra tyehen:

Cahán catsi Jutu Mañi yo, tan ña nasama ra tsa cahán ra nu catyi ra tyehen: “Yooho ña cua ndihi maa tsa cuví un jutu, tyin cuví un jutu tumaa ra Melquisedec”, catyi Nyoo.

²² Tsa cuenda tsa javahá ra Cristo, tan tsitó yo tyin vaha ca tyiñu ndoo Nyoo tsihin yo tan ñavin ca tsa jihna ñi can.

²³ Jutu tsa cuví tata ra Leví cuaha xaan ra naha tsa cuenda tyin tun tsihi iin ra, nacosó inga ra.

²⁴ Maa tyin ra Jesús nduve tuhun tsihi iyó tsi ra, yacan cuenda ña tsindihí tsa cuví ra jutu.

²⁵ Tan tsa cuenda yacan cuví jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitá tsiyo ra nu iyó nyivi iyó cuatyí tan nandaq ra ityi siqui andivi.

²⁷ Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñi tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo.

²⁸ Ley Nyoo tsa naquihin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsj ley can, cahán catsi Nyoo tan ndoo ra iin tuhun tsa tsihin yo. Tan tsahá ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

8

Quivi tsihi ra Jesús tsa cuenda yo tan ndoo Nyoo tuhun tsa tsihin yo

¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria.

² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahá tan ñavin vehe ñuhu tsa javahá nyivi. Tyin vehe ñuhu tsa javahá nyivi cuví tsi tixahñu tsa vaha tsa iyó nda gloria.

³ Tandihí ra jutu naha ra, cuñi tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo.

⁴ Tun tsatyin nyí ra nu ñuhu ñayívi ihya, ndi ña cuvi cuvi ra jutu. Tyin nu ñuhu ñayívi ihya, iyó ra jutu tsa jamañi nuu Nyoo tsa catyí ley tsa tyaa ra Moisés tyin jamañi ra naha.

⁵ Ra jutu tsa iyó nu ñuhu ñayívi ihya naha ra, jahá tyíñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahan tsanaha quívi tsa cua javaha ra Moisés vehe ñuhu jahma, catyí Nyoo tsihin ra tyehen: “Jaha cuenda vaha, tan javaha tandíhi tumaa janahá yu tsi un quívi tsahan un yucu Sinaí”, catyí Nyoo tsihin ra.

⁶ Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyíñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsa tsihin yo.

⁸ Maa tyin Nyoo nyehe ra tyin ña vaha javahá nyívi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsa quívi

cua ndoo yu tuhun tsa tsihin nyívi Israel tan nyívi Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi, quívi tñin yu ndaha ñi tan tava yu tsi ñi ñuhu Egipto.

Ña javahá ñi tuhun ndoo yu tsihin ñi,

yacan nacoó ihñi yu tsi ñi, catyí Nyoo Jutu yo.

¹⁰ Tuhun tsa tsa cua ndoo yu tsihin nyívi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi, tan cua tyaa tucu yu itsi añima ñi.

Tacan tan cua cuví yu Nyoo ñi,

tan maa ñi cua cuví nyívi yu.

¹¹ Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandíhi ñi tan cua nacoto ñi tsi yu,

ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

¹³ Quívi tsa cahán Nyoo tyin cua ndoo ra tuhun tsa tsihin yo, tsa jandut-sahnú ra tuhun tsa jihna ñi can. Tan tuhun tsa ndutsahnú tsa cua cundihi tsi.

9

Nu janahá tsi nácaa iyó vehe ñuhu tsa iyó nu ñuhu ñayívi tan vehe ñuhu nu cuví nda gloria

¹ Quívi ndoo Nyoo tuhun tsa jihna ñi tsihin nyívi, tsahá ra cuhva nácaa jacahnu ñi tsi ra, tsitsi vehe ñuhu tsa tsicoó nu ñuhu ñayívi ihya tahan tsanaha.

² Tyehen tsicoó vehe ñuhu can: Tsitsi vehe tsa jihna ñi nyaá candileru, tan nyaá mesa na yucu paan ii. Tan yacan tsinañi Vehe Ii.

³ Tan vehe tsa tsinu uvi tsinañi Vehe Ii Xaan.

⁴ Tsitsi vehe can tsinyaá altar xuhun cuaan nu tsahmí ra jutu cutu. Tan tsinyí tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyí yatsin xuhun cuaan nu yihí maná. Tan

tsinyij yutun tsa tsindahā ra Aarón tsa quitā ita nuu. Tan tsiyucū tucu yuu nu nyaá tsa utsi ley Nyoo.

⁵ Tan siqui tsatun can tsinyaā tsa caá tumaa caá ángel, tan cuñi tsi catyí tyin nyaá Nyoo ican. Nditin ángel can tyasi nu tuhvá Nyoo jahā tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoo vehe ñuhu can. Tandihí ñi quivi quihví ra jutu naha ra tsitsi Vehe Ii, tan jacahnú ra naha tsi Nyoo.

⁷ Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñi tsi cundaha ra niñi quiti tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahā soho ñi maa cuatyí.

⁸ Tan tsa tacan tsicoo yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñi tsi catyí tyin ñaha ca nuña ityi quihví ndáa nyivi tahan ñi maa tsi tsitsi Vehe nu Ii Xaan.

⁹ Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahan tsanaha jamañi nyivi tsa jamañi ñi nu Nyoo maa tyin ña jatinyee can tsi nyivi tsa jacahnú tsi Nyoo tsihin can, tsa caca vaha iñi ñi.

¹⁰ Tyin tandihí tsa javahá nyivi can caahán tsi maa ñi tsa cuenda tsa tsaha Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsaha ra tsa javahá ñi tacan tsa numi ñi, nda tahan maa tsi quivi cuhva ra tsa vaha ca.

¹¹ Vityin tsa yahā quiti ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñi tsi catyí tyin ñavin vehe ñuhu iyó nu ñuhu ñayivi ihya cuví nu quihví ra.

¹² Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra niñi mbee lee, o niñi indiqui lee. Quihví ra tsihin niñi maa ra, tan iin tsaha ñi quihví ra tan ña cuñi ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuí ra tsi yo.

¹³ Ra jutu naha ra tuhvá ra naha quití niñi toro, niñi mbee, tan nyaa nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi.

¹⁴ Tun tacan jatinyee niñi quití can tsi nyivi, cuñi tsi catyí tyin niñi ra Cristo cahnu ca tunyee iñi iyó itsi! Tyin nduve cuatyí ra tsicoo tan jamañi ra juvin ñi tsi maa ra nuu Nyoo jahā Tatyí Ii tsa ña cua cúu maa. Tan niñi ra quihin nyaá tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahā yo quivi yihí ndaha tuhun jihna ñi can tsi yo. Tyin tacan tan yoo, tsa canā Nyoo cuví naquihin cuenda yo ñayivi tsa ña cua naa coo yo, tsa catyí ra tyin cuhva ra tsi yo.

¹⁶ Tun iin nyivi tsihi tan nacoq ñi iin tutu nu tsahá cuenda ñi yoo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñi tsi janaha ñi iin tutu cuví tsandaa tyin nditsa tsa tsa tsihi ra tsa javahā tutu can.

¹⁷ Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra.

¹⁸ Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quití tan tsatí niñi ti naha ti.

¹⁹ Tsa ndihí tsahá cuenda ra Moisés ley Nyoo tsi tandihí nyívi, tan quihín ra jahma cuaaha tsa tsinú tshin íxi mbee ticatyí tan iin soco yutun luhlu tsa nañí hisopo, jatyií ra can tsitsi nu yihí niñi indiquí lee tan niñi mbee luhlu tsa sacá nuu tshin ndutya. Tacan tan quití ra niñi can nu libru nu nyaá ley Nyoo tan quití ndihí tucu ra can tsi nyívi.

²⁰ Tacan tan catyí ra tshin íxi tyehen: “Niñi ihya cuví tsandaa tsa cuenda tsa ndoq Nyoo tuhun tshin yo”, catyí ra.

²¹ Tan juvin ñi quití tucu ra Moisés niñi can vehe ñuhu jahma can tan tandihí ndaha tyiñu tsa tsatyíñu ra jutu naha ra tsa jacahnú ra naha tsi Nyoo.

²² Tacan javahá ra naha tyin catyí ley Nyoo tyin tsa yatyin tandihí tsa iyó tan cuñí tsi nduvaha can nuu Nyoo tshin niñi. Juvín ñi catyí tucu tsi tyin tun ña cati niñi ña cua jaha Nyoo tucahnu íñi tsi nyívi.

Niñi ra Cristo nacatyá cuatyí yo

²³ Javahá ra jutu naha ra tacan tyin cuñí tsi tsa nduvaha tandihí ndaha tyiñu tsa cuví tixahñu tsa iyó nda gloria tshin niñi quití. Maa tyin tandihí tsa iyó nda gloria, cuñí tsi nduvaha can tshin niñi vaha ca, ñavin tshin niñi quití ñi.

²⁴ Ra Cristo ña quihví ra tsitsi vehe ñuhu tsa javahá nyívi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tshin Nyoo tsa cuenda yo.

²⁵ Ra jutu tsaahnu cuví ityi nuu cuenda nyívi Israel quihví ra naha tsitsi Vehe Íi Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo.

²⁶ Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinú ñuhu ñayívi tan nda cuanda vityin. Maa tyin vityin tsa tsa cuyatyin cundihí ñuhu ñayívi ihya, iin tsaha ñi quitsí ra Cristo, tan jamañi ra tsi ra tyin tacan tan cuví quihin nyaa ra cuatyí yo.

²⁷ Tumaa cua tahan yo: iin tsaha ñi cua cúu yo. Yaha can tan cua cutuñi yo.

²⁸ Tacan iin tsaha ñi tshí ra Cristo, tan quihin nyaa ra cuatyí cuaha xaan nyívi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyívi ndatú tsi ra.

10

¹ Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyívi nanducú tsi Nyoo tyin maa ñi maa niñi quití jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tshin yacan.

² Tun tsatyin cuví janduvaha ley can tsi nyívi, cua cundihí tsa jamañi ra jutu naha ra niñi quití tandihí ñi cuiya. Tyin tun tsa nduvahá nyívi tsa tsahá quití can iin tsaha tsa cuenda tandihí maa, ña cua caca ca íñi ñi tun iyó cuatyí ñi tan ña cuñí ca tsi tsa jamañi ra jutu niñi quití tsa cuenda ñi inga tsaha.

³ Maa tyin tsa jamañi ra jutu naha ra niñi quití tan iin tan iin cuiya, janducuhún íñi tsi tsi nyívi tyin iyó cuatyí ñi.

⁴ Tyin niñi indiquí tan niñi mbee lee, ña cuví nacatya can cuatyí nyívi.

⁵ Yacan cuenda catyí tutu Nyoo tyin ra Cristo cahán ra tyehen tshin Nyoo: Ña cuñí un tsa jamañi nyívi quití nuu un, yacan cuenda tsahá un tsa coo cuñu ñuhu yu.

6 Tyin ña taahán iñi un tsa cahmi ñi quiiti tan jamañi ñi nuu cun tan quihin nyaa un cuatyí ñi.

7 Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un

tumaa nyaá tuhun yu nu libru ley maa un”, catyí ra Jesucristo.

8 Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyívi quiiti nuu ra. Ndi tsa cahmi ñi quiiti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyívi quiiti nuu ra, catyí ra.

9 Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quítsi ra jatsiyo cuii ra tsa jamañi nyívi tan jamañi ra tsa vaha ca.

10 Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuví tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyívi.

11 Tandihí ñi quiívi tan jamañi ra jutu cuenda nyívi Israel naha ra quiiti nuu Nyoo, tan cuaha xaan tsaha jamañi ra naha iin ñi maa nuu quiiti maa tyin ña cuví quihín nyaa can cuatyí nyívi.

12 Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaá ra nu tyayu nyaá xiin cuaha Nyoo.

13 Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu.

14 Tyin tsihin tsa jamañi ra tsi ra iin tsaha ñi tan janduvahá ra tsi nyívi yihí cuenda ra yoso cuahán quiívi.

15 Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

16 Tuhun tsa tsa cua ndoo yu tsihin nyívi quiívi can, tyehen cua cuví tsi, catyí Jutu Mañi yo:

Cua tyihí yu ley yu tsitsi añima ñi,
tan cua tyaa yu itsi tsitsi tsa tsíni tuñi iñi ñi, catyí ra.

17 Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

18 Yacan cuñí tsi catyí tyin tsa yahá jahá Nyoo tucahnu iñi tsi yo. Yacan cuenda ña cuñí ca tsi cahñi yo quiiti, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

19 Yacan cuenda yañi, vityin cuví quihví yo tsitsi Vehe Ii Xaan nu nyaá Nyoo, tsa cuenda ñiñi ra Jesucristo tsa tsatí. Tsihin ñiñi can nacatya ra cuatyí yo.

20 Tan nuñá ra ityi tsa, tan iin ityi cuhun yo nu coo nyito yo. Tyin cuhva tsa tsihí ra tan ndatá jahma tsa tyasí tsa ña cuví quihví yo nu nyaá Nyoo. Tsa ndatá jahma can, cuví tsa tsihí ra Cristo, tyin tacan tan cuví cuhun yo nu nyaá Nyoo.

21 Ra Jesús cuví jutu tsaahnu cuví ityi nuu tsa ndacá ñaha tsi nyívi yihí cuenda Nyoo.

22 Yacan cuenda cuñí tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvahá añima yo, yacan cuenda tsító yo tyin nduve ca cuenda yo nyaá tsi ra tsa cuenda cuatyí yo, tan

tumaa tsa nacatyā ra cuñu ñuhu yo tsihin ndutya cuii, tan nduvahā yo nuu Nyoo.

²³ Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo.

²⁴ Tan cuñi tsi nanducu yo cuhva jatyinyee tahan yo tsi yo, na cuñi tahan ca yo tsi yo tan javaha yo tsa vaha.

²⁵ Ña taahán tsi jandíhi ndo tsa tsicá ndo tuhun Nyoo tumaa javahá inga nyívi tsa ña tsicá vaha. Tyin cuñi tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandíhi nyívi, cuñi tsi tsa jatyinyee tahan ca yo tsi yo.

²⁶ Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuvi jaha Nyoo tucahnu iñi tsi yo.

²⁷ Cua tatsi tuñi Nyoo tsi yo. Tan cua tyihi ra tsi yo nu yucú nyívi xaan iñi tsi ra. Tan ican cua cayu yo iin caa ñi tsihin ñi.

²⁸ Tatun iin nyívi tsa nyitá iñi ley Nyoo tsa tyaā ra Moisés tan ña tyaá yahvi ñi tsa catyí ley can, tan tatun iyó uvi o uñi ra cuvi tsandaa tsa cuenda tsa javahā ñi, cua cúu ñi tsa cuenda cuatyí ñi, tan yoñi maa cua cundaahví iñi tsi ñi.

²⁹ Tan yaha ca cua tatsi tuñi Nyoo tsi nyívi caahán ndavaha ñi siqui Tatyi Ii ra tsa tsahá tsa vaha ra tsi yo, tan jandíhi ñi tsa tsinú iñi ñi tsi Sehe ra tan jahá ñi tyin nduve yahvi nyaá ñiñi Sehe ra tsa janduvahā añima ñi. Tan tsihin ñiñi can ndoq Nyoo tuhun tsihin yo.

³⁰ Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyívi; tan juvin yu cua cahan náa taahán tsi tahan ñi.” Juvín ñi catyí tucu ra tyin maa ra taahán tsi jacutuñi tsi nyívi ra.

³¹ ¡Cahnu xaan tundoho cua nyehe nyívi yosó ica tsi Nyoo nyito tsa cuenda cuatyí ñi!

³² Maa tyin nyooho nducuhun iñi ndo nácaa cunyeē xaan iñi ndo nyehe ndo tundoho tsa yahā naquihín cuenda ndo tsa nditsin Nyoo tsitsi añima ndo.

³³ Yihí nyooho cahan nyívi tsi ndo, tan janyehe ñi tundoho tsi ndo nu tuvi nyívi. Tan yihí ndo cundaahví iñi ndo nyehe ndo tsi nyívi vaha iñi tsi ndo tsa tahan juvin ñi tacan.

³⁴ Tan cundaahví iñi ndo nyehe ndo tsi nyívi tsiyucú vehe caa. Cunyeē iñi ndo nyehe ndo tundoho tsihin tsa siñi cuñi ndo quívi quihín nya nyívi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundíhi maa can.

³⁵ Yacan cuenda ña jandíhi ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra.

³⁶ Cuñi tsi coo tsa taxín añima ndo tsitsi tsa cunyeē iñi ndo tyin tacan tan cuvi javaha ndo cuhva cuñi Nyoo, tan naquihín ndo tsa catyí ra tyin cuhva ra tsi yo.

³⁷ Tyin nu tutu Nyoo catyí tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.

³⁸ Tan catyí Jutu Mañi yo tyehen: “Nyívi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatun jandíhi ñi tsa tsinú iñi ñi, ña siñi cua cuñi yu tsihin ñi”, catyí Nyoo.

³⁹ Maa tyin yoo ña javahá yo tumaa javahá nyívi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

11

Cuhva cuñí tsi tsa tsinu iñi yo tsi Nyoo

¹ Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo.

² Juhva nyívi yo tsa tsicoō tahañ tsanaha quitá vaha ñi nuu Nyoo tyin tsinu iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin javahá ra ñuhu ñayivi tshin tuhun caahán ra. Tan tsitó yo tyin tahañ tsanaha tsinu tandihí tsa nyehé yo vityin tshin tsa ña nyehé yo.

⁴ Tsa cuenda tsa tsinu iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihñin cuenda Nyoo tsi ra tumaa tsatyin vaha ra, tan naquihñin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu iñi ra.

⁵ Tsa cuenda tsa tsinu xaan iñi ra Enoc tsi Nyoo, tan naquihñin Nyoo tsi ra tyin tacan tan ña nyehe ra tuhun tsihi. Tan ña nañihí ca nyívi tsi ra, tyin cuanuhñ ra tshin Nyoo. Catyí tsi nu tutu Nyoo tyin tsa ndi cumañi ca naquihñin Nyoo tsi ra, maa ñi maa cuhva taahán iñi Nyoo javahá ra.

⁶ Maa tyin ña cuvi javaha yo tsa taahán iñi Nyoo tatun ña tsinú iñi yo tsi ra. Tyin tatun cuñí yo nanducu yo tsi ra, cuñí tsi tsinu jihna iñi yo tyin iyó ra, tan tsahá ra tsa vaha tsi nyívi nanducú tsi ra.

⁷ Tahañ tsanaha jacotō Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinu iñi ra tan javahá ra yutun ndoo tan ican cacu ra tshin nyívi vehe ra. Nyívi tsa ña tyaa yahvi tsa cahañ Nyoo, tatsj tuñi ra tsi ñi. Maa tyin jacacu ra tsi ra Noé tan nduvahá ra nuu ra tsa cuenda tsa tsinu iñi ra tsi ra.

⁸ Ra Abraham tsinu iñi ra tan tyaa yahvi ra tsi Nyoo quívi caná Nyoo tsi ra. Quitá ra nu ñuhu ra tan cuahán ra nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quitá ra nu ñuhu ra tan cuahán ra.

⁹ Tsa cuenda tsa tsinu iñi ra Abraham tsi Nyoo, tsicoō ra nu ñuhu tsa ñaha ca nacuhva cuenda Nyoo tsi ra. Tsicoō ra tsitsi vehe jahma ñi. Juvín ñi tacan tsicoō tucu ra Isaac, sehe ra, tan ra Jacob, sehe ra Isaac. Tyin juvín ñi catyí tucu Nyoo tshin nduvi taahan ra can naha ra tyin cua cuhva ra ñuhu can tsi ra naha.

¹⁰ Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquñin cuhva tsaha tsi tan samá itsi.

¹¹ Tan juvín ñi tsa cuenda tsa tsinu iñi ña Sara tsa cahañ Nyoo tshin ña, tsicoō iin sehe ña. Vasu ndi maa tsa tsahnu xaan ña, cuví tsicoō sehe ña tyin maa Nyoo tsahá tunyee iñi ra tsi ña. Tacan cuví tyin tsinu iñi ña tyin cua cundaa tsa cahañ Nyoo tshin ña.

¹² Yacan cuenda vasu ndi maa tsa cuñí cúu cuii ña ra Abraham, maa tyin tsicoō sehe ñasiñi ra. Yahá can tan tsicoō cuaha nyívi tata ra. Tan yofi maa cuví nacahvi tsi ñi tyin cuaha xaan ñi, tumaa cuaha tiñuu iyó andívi tan tumaa cuaha nyívi iyó yuhu ndutya ñuhu.

13 Tandihí nyívi can tan nyívi tata ñi tsihí ñi tsa ndi cumañi ca naquihín cuenda ñi tsa catyí Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinú iñi ñi tyin cua cuhva Nyoo can. Yacan cuenda sîi cuñí ñi tyin tsitó ñi tyin coo quívi cua nyehe ñi can. Tan sîi tucu cuñí ñi caahán ñi tyin yahá ñi maa ñi nu ñuhu ñayivi ihya.

14 Tan tsa caahán ñi tacan, cuñí tsi catyí tyin ndi tsicá ñi nanducú ñi iin nu vaha ca coo ñi.

15 Tun tsatyin ñuhú iñi ñi ñuu ñi nu quita ñi, cuví cunuhu nyico ñi iin yaha ñi.

16 Maa tyin ña tsinuhú ñi ñuu ñi tyin cuñí ñi coo ñi ñuu vaha ca, tuhun ihya cuñí tsi catyí tyin cuñí ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuví ra Nyoo ñi tyin tsa janduvahá ra iin ñuu nu coo ñi.

17 Tsa cuenda tsa tsinú iñi ra Abraham tsi Nyoo, tyaa yahvi ra tsa cahán Nyoo tsihin ra tan jamañi ra tsi ra Isaac, sehe mañi ra, quívi nducú cuhva Nyoo tsi ra tun nditsa tsa tsinú iñi ra tsi ra. Javahá ra tacan vasu ndi maa catyí Nyoo tyehen tsihin ra:

18 “Tsa cuenda ra Isaac tan cua coo nyívi tata un.”

19 Vasu ndi maa cahán ra tacan tsihin ra Abraham, ra Abraham ña nayuhví ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quívi can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhvá cuenda nyico ra tsi ra Isaac tsi ra. Tan cuví can tumaa tsa janandoto Nyoo tsi ra.

20 Juvín ñi tsa cuenda tsa tsinú tucu iñi ra Isaac tsi Nyoo, tan catyí ra tyin ra Jacob tan ra Esaú, sehe ra, cua ñihi ra naha tsa vaha nu cuahán ca tsi.

21 Tsa cuenda tsa tsinú iñi ra Jacob tsi Nyoo, tan catyí ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnú ra tsi Nyoo tyin tsa tsahnú xaan ra.

22 Juvín ñi tsa cuenda tsa tsinú iñi ra José tsi Nyoo, catyí ra tsa tsa cuñí cúu ra tyin cua quita nyívi ra, ñi Israel, ñuhu Egipto. Tan tsahá cuenda tucu ra tsi nyívi tyin quívi quita ñi na quihin ñi yiqui ra cuhun tsihin ñi.

23 Tsa cuenda tsa tsinú iñi jutu ra Moisés tan sihi ra tsi Nyoo, tyihí xeehe ñi tsi ra uñi yoo tyin nyehe ñi tyin sîi xaan caá ra. Ña nayuhví ñi tsa cahán ra rey tyin cuñí tsi cúu tandihí sehe yîi nyívi [tsa cuenda tyin tsitó ñi tyin cua jacacu Nyoo tsi ra].

24 Tsinú tucu iñi ra Moisés tsi Nyoo. Yacan cuenda quívi tsahnú ra, ña cuñí ca ra cuví ra sehe ñaha cuví sehe ra rey ñuhu Egipto.

25 Tan nacoó ra ñuhu Egipto can tyin ña cuñí ra cusîi iñi ra tsihin tsa javaha ra tsa caquiñi. Tan nacatsî ra tsa cua nyehe ra tundoho tsihin nyívi Nyoo tan ñavin ca tsa cusîi iñi ra tsihin tsa tsindahí ñi maa.

26 Tsa cuenda ra Moisés, vaha ca tsa cuca ra Cristo tan ñavin ca tandihí tsa cuca tsa iyó Egipto. Yacan cuenda sîi cuñí ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra.

27 Juvín ñi tsa cuenda tsa tsinú iñi ra Moisés tsi Nyoo, ña nayuhví ra quita ra ñuhu Egipto, vasu ndi maa cuxaan ra rey tsi ra. Tan cunyeé xaan iñi ra tyin tumaa tsatyin nyehe ra tsi Nyoo tsa ña nyehé yo.

28 Juvín ñi tsa cuenda tsa tsinú iñi ra tava tyiñu ra na jacahnú tandihí nyívi Israel vico tan cahñi ñi iin mbee ticatyí luhlu. Tan tava tyiñu tucu ra na cahyi ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyívi Egipto, ña cahñi ra ndi intuhun sehe nuu maa ñi.

²⁹ Tsa cuenda tsa tsinḡ iñi ñi Israel tsi Nyoo tan yaha sava ñi nu Nduya Ñuhu Cuaaha tumaa nu ñuhu ityi. Ra Egipto naha ra cuñi ndihi tucu ra naha yaha ra naha, maa tyin ña cuvḡ yaha ra naha tyin nacasi Nyoo ndutya ñuhu can siqui ra naha tan tsihiḡ ra naha jahḡ ndutya can.

³⁰ Juvín ñi tsa cuenda tsa tsinḡ iñi ñi tsicoḡ nduvi ñi utsa tsaha tsata ñuu Jericó, tan tandihi cuíi maa nu sama tsaha ñuu can tanḡ.

³¹ Juvín ñi tsa cuenda tsa tsinḡ iñi ña Rahab, ñaha sii iñi tsicaḡ nuu tsa tsicoḡ Jericó, tan ña tsihiḡ ña quiviḡ tsihiḡ tandihi nyiviḡ ñuu ña. Ña tsihiḡ ña tyin jatinyee ña tsi ra Israel ra tsa tsahan naha ra tsinyehe ñuu ña. Tandihí ca ñi tsihiḡ ñi tsa cuenda tsa ña tyaḡ yahvi ñi tsi Nyoo.

³² ¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuvḡ ndusu yuhu Nyoo naha ra taḡan tsanaha.

³³ Tsa cuenda tsa tsinḡ iñi ra naha tsi Nyoo, tan yihí ra naha jahḡ canaa ra naha tsi inga ñuu nahnu. Tan yihí ra naha vaha xaan tsindacḡ ñaha ra naha nyiviḡ cuenda Nyoo. Yihí ra naha ñihí ra naha tsa catyí Nyoo tyin cuhva ra tsi ra naha. Yihí ra naha jatinyee Nyoo tsi ra naha quiviḡ nducḡ cahñi ndicaha tsi ra naha.

³⁴ Yihí ra naha ña cayu ra naha jahḡ ñuhḡ tsitsi ono nu tyihí nyiviḡ tsi ra naha. Yihí ra naha cacḡ ra naha tan ña tsahñiḡ nyiviḡ tsi ra naha tsihin mityi. Yihí ra naha tsaha Nyoo tunyee iñi tsi ra naha quiviḡ nduve tunyee iñi tsicoḡ tsi ra naha, tan cuvḡ cañi tahan ra naha tsihin nyiviḡ xaan iñi tsi ra naha tan jahḡ canaa ra naha tsi ñi.

³⁵ Tsicoḡ juhva ñiñaha, tsa nandotoḡ nyiviḡ.

Juhva nyiviḡ tsinuhñiḡ ñi tan ndohoḡ ñi jahḡ nyiviḡ, maa tyin vasu ndi maa tacan taḡan ñi, cunyeḡ xaan iñi ñi tan ña cuñiḡ ñi ndoo nuña ñi. Nyiviḡ can catyí ñi tyin tun nacoḡ ñi tsi Nyoo ña cua nyehe ca ñi tundoho, maa tyin ñi ican ña cuñiḡ ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayiviḡ vaha ca.

³⁶ Inga ñi nyehe ñi tundoho jahḡ nyiviḡ tyin caahán nyaa nyiviḡ can tsi ñi tan cañiḡ ñi tsi ñi. Inga tucu ñi tsinuhñiḡ ñi tsihin cadena tan tsiyucḡ ñi vehe caa.

³⁷ Yihí ñi tsahñiḡ nyiviḡ tsi ñi tsihin yuu. Yihí ñi tsahnyḡ sava nyiviḡ tsi ñi tsihin cierra. Yihí ñi nducḡ cuhva nyiviḡ tsi ñi. Yihí ñi tsahñiḡ nyiviḡ tsi ñi tsihin mityi. Yihí ñi tsinditsḡ ñi ñi mbee ticatyí tan ñi mbee; nduve jahma vaha ñi tsicoḡ tan ndi nduve vehe ñi. Ndaahvi xaan tsicoḡ ñi, tan tsicoḡ xaan ñi tucuiihya iñi, tan nyehe ñi tundoho jahḡ nyiviḡ tsa ña tsitó tsi Nyoo.

³⁸ Tan nyiviḡ ndaahvi can vaha ca ñi nuu Nyoo tan ñavin ca inga ca nyivi. Tsicaḡ nuu ndaahvi ñi nu siquiḡ tan nu iyó yucu. Tsicoḡ ñi tsitsi cava tan tsitsi ñuhu.

³⁹ Tandihí maa nyiviḡ ndaahvi can vasu ndi maa vaha caḡan Nyoo tuhun ñi tsa cuenda tsa tsinḡ iñi ñi tsi ra, maa tyin ña ñihí ñi tsa catyí ra tyin cuhva ra.

⁴⁰ Tyin cuñiḡ ra tsa ñihi ndihi ñi tsa vaha ca tsa tyaḡ ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihí nyiviḡ can quitḡ vaha ñi nuu Nyoo tyin tsinḡ iñi ñi tsi ra. Tan vityin jandu iñi ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñiḡ tsi nacoḡ yo tandihí tsa jatyañú tsi yo, tan tandihí cuatyí tsa

tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó añaima yo.

² Na nyehe yo tsi intuhun ñi maa ra Jesús tyin juven ra jatyinyeé tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaá yahvi ra ticanuu tsa ca tahan ra tsa cúu ra nu cruu tumaa tsiihí iin nyívi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin si xaan cua cuñi ra tsa yaha cúu ra.

³ Jaha ndo cuenda cuhva tsicoo ra Jesús, tyin ra Jesús nyehe xaan ra tundoho jaha nyívi iyó cuatyí, maa tyin cunyeé iñi ra. Tacan tucu nyooho, ña cundihi iñi ndo tan ña ndú uvi iñi ndo tsa nyicún ndo tsi ra.

⁴ Tyin nyooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi.

⁵ ¿A tsa naq iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyeheh:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

⁶ Tyin yuhu jaquihín ityi yu tsi nyívi cuñi yu, tan tatsí tuñi yu tsi nyívi cuví sehe yu, catyí Nyoo.

⁷ Janyee ndo iñi ndo tan nducu ndo cuhva cutuhva ndo tun jaquihin ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyívi iyó sehe, jaquihín ityi ñi tsi sehe ñi.

⁸ Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juven sehe vaha ra cuví yo.

⁹ Tan inga tucu tuhun, tsa ndi nyihi yo, jutu yo nu ñuhu ñayívi ihya jaquihin ityi ra naha tsi yo, tan jaha yo tsa ñayívi tsi ra naha. Tan vihi ca cuñi tsi tyaá yahvi yo tsi Jutu yo Nyoo, tyin tacan tan cuví coo cuíi yo.

¹⁰ Jutu yo tsa iyó nu ñuhu ñayívi ihya, jaquihín ityi ra naha tsi yo tsa cuenda juhva ñi quívi, tan javahá ra naha can cuhva cuñi maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra.

¹¹ Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaá yahvi yo tsa caahán Nyoo tsihin yo

¹² Yacan cuenda ña ndu uvi iñi ndo tsa javaha ndo tsa cuñi Nyoo javaha ndo, tan ña nducuihya iñi ndo.

¹³ Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuíi ca cua cuñi ndo.

¹⁴ Jañiñi ndo tsi ndo tan coo vaha ndo tsihin tandihí nyívi. Nacoo ndo tandihí tsa ña vaha. Tyin nyívi tsa ña nacoo tsa ña vaha ña cuví nyehe ñi tsi Nyoo Jutu yo.

¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añaima ndo tan ña cua tiví ndo nuu Nyoo, tyin jahá cuenda vaha ndo tsi ndo.

16 Nyooho rayīi ndi intuhun ndo tan ña çaça nuu ndo tsihin ñaha. Tacan tucu nyooho ñaha, ña çaça nuu ndo tsihin rayīi. Tan ña çaça iñīi ndo tyin nduve yahvi nyaá tuhun Nyoo, tumaa tsicā iñīi ra Esaú, tyin ra Esaú xicō ra tsa cuv̄i ra ra tsitsa tsacatȳi tsa catsi ra.

17 Tsitó ndo tyin tsa yaha yacan tan cuñīi ra Esaú tsa nasoco jutu ra tsi ra, maa tyin ña cuv̄i. Tsaçȳi xaan ra, maa tyin ña ñih̄i ca ra cuhva nasamā ra tsa tsa yaha javahā ra.

18 Nyooho ña taahán tsi javaha ndo tacan tyin tsaq̄ ndo nuu Nyoo, maa tyin ñavin tumaa tsaq̄ nyivīi Israel nuu Nyoo quivīi tsaḥan̄ ñīi yucu Sinaí tsa cuv̄i nyehe yo. Nyehē ñīi cayȳi ñuh̄y, tan ñih̄i xaan yih̄i tatȳi xaan, tan naa xaan cuv̄i.

19 Tan tsiñīi ñīi ndusu trompeta tan caḥan̄ Nyoo tsihin ñīi. Tan caḥan̄ ndaahvi ñīi tsihin ra na ña cahan ca ra tsihin ñīi, tyin yuuhvīi xaan ñīi

20 tsa cuenda tyin ña cunyeē iñīi ñīi tsa tsaḥa cuenda ra tsi ñīi Tyin catȳi ra tyehen: “Nyivīi natuhva tan cuañīi tsaḥa yucu iḥya caḥñīi ndo tsi ñīi tsihin yuu o tsihin lanza, tahan ñīi nyivīi tan quitīi”, catȳi Nyoo tsihin ñīi.

21 Nayuhvīi xaan ñīi tsa nyehē ñīi yacan, nda cuanda ra Moisés tan catȳi ra: “Ñih̄i xaan ñih̄i yu jahá tsa yuuhvīi yu”, catȳi ra.

22 Maa tyin nyooho ña nyehē ndo tsa yuuhvīi can tyin tsaq̄ ndo yucu nañīi Sión tsa cuv̄i ñuu Nyoo nyito. Tuhun iḥya cuñīi tsi catȳi ñuu Jerusalén tsa canyīi nda gloria, nu iyó cuenda mil ángel.

23 Ndu iin̄i ndo ican tsihin tandih̄i sehe Nyoo tsa iyó sivīi nu libru nda gloria tan jacahnu ndo tsi ra. Natuhvā ndo nuu Nyoo, ra cuv̄i juee [tsa jandaa cuatȳi] tandih̄i nyivīi, tan natuhvā ndo nuu tandih̄i añima nyivīi vaha tsa janduvahā Nyoo.

24 Natuhvā tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoō Nyoo tuhun tsa tsihin yo. Tan niñīi ra Jesús tsa tsat̄i tsahá tsa vaha ca tsi yo tan ñavin ca niñīi ra Abel. [Tyin niñīi ra Abel tsican̄ tsi cuatȳi tsaḥa ra yañi ra. Maa tyin niñīi ra Jesús, jahá tucahnu iñīi cuatȳi yo.]

25 Yacan cuenda cuñīi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa taḥan̄ juhva nyivīi Israel tsa ña tyaa yahvi tsa caḥan̄ Nyoo quivīi caḥan̄ ra yucu Sinaí nu ñuhu ñayivīi iḥya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuv̄i maa cacu yo.

26 Taḥan̄ tsanaha jacand̄a Nyoo ñuhu ñayivīi tsihin ndusu ra. Tan catȳi ra tyehen vityin: “Cua jacanda yu iin̄i tsaḥa ca ñuhu ñayivīi, maa tyin ñavin ñuhu ñayivīi ñīi, tyin cua jacanda ndih̄i yu nda cuanda and̄ivīi.”

27 Tsa caahán ra tyin cua jacanda ra inga tsaḥa, cuv̄i cutuñīi iñīi yo tyin cua catsiyo tandih̄i tsa javahā ra tsa cuv̄i nacanda. Tan cua ndoō tsa ña cuv̄i nacanda.

28 Nu ndacá ñaha Nyoo nu tsahá ra cunyeçu yo tsihin ra, ña cuv̄i nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñīi iñīi añima yo, tan tyaa yahvi yo tsi ra, tyin yacan cuv̄i tsa taahán iñīi ra.

29 Tyin Nyoo yo cuv̄i ra tumaa ñuh̄y tsa tsahmí, tan cua janaa ra tandih̄i maa tsa ña vaha.

13

¹ Ña jandihí ndo tsa cuñí ndo tsi tandihí nyívi yihí cuenda Nyoo tyin cuví ñi tumaa nyívi ndo.

² Ña ñaa íñi ndo tyaa nuu vaha ndo tsi nyívi tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javahá juhva nyívi.

³ Ña ñaa íñi ndo tsi nyívi yucú vehe caa tumaa tsatyin yucú ndihí ndo tsihin ñi. Ndūcuhun íñi ndo tsi nyívi nyehé tundoho jahá nyívi. Cūndaahví íñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho.

⁴ Nyooho nyívi tsa tsa tindaha, jaha tahan ndo tsa ñayívi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayíi tsicá nuu tsihin naha tan rayíi iyó ñasihí tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayíi tan ñaha tsa iyó yíi tun coo ña tsihin inga rayíi.

⁵ Ña caça íñi ndo nácaa javaha ndo tan cuví coo cuaha ca xuhun tsi ndo. Ndoo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra.

⁶ Tsa cuenda yacan cuví caahán yo tyehen tsihin tsa ñi íñi añima yo:

Jutu Mañi yo juvin un jatyinyeé tsi yu,

Yacan cuenda ña yuuhví yu tun javahá nyívi náa javahá ñi tsi yu.

⁷ Ndūcuhun íñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cūanyicun ndo cuhva vaha tsinú íñi ra naha tsi Nyoo.

⁸ Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quívi.

⁹ Ña cūhva ndo jandavi ñaha nyívi tsi ndo tsihin tsa sñin sñin tsa jacuahá ñi. Vaha ca jandu iin ndo íñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsi yo. Tan ña jatyinyeé can ndi tsi maa ñi.

¹⁰ Tsatí ñiñi ra Cristo nu cruu tsa cuenda yo. Tan ra jutu tsa nyitá íñi ley tsahnu naha ra ña cuví jatyinyee ra Cristo tsi ra naha.

¹¹ Ra jutu tsahnu cuví ityi nuu cuenda nyívi Israel tsindacá ra naha ñiñi quiti tsitsi Vehe Ii Xaan tsa cuenda cuatyí nyívi, maa tyin cuñu ti tuhvá can cayú ityi tsata ñuu.

¹² Tacan tucu ra Jesús, tava tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin ñiñi ra.

¹³ Na cūnyicun yo tsi ra Cristo tan ña nducahan nuu yo vasu ndi maa vacu nducu nyívi tsi yo.

¹⁴ Tyin tsa cuenda yoo nduve ñuu tsa ña cua cundihí maa nu ñuhu ñayívi ihya. Yacan cuenda nanducú yo iin ñuu tsa cua quítsi, tsa yaha naa ñuhu ñayívi ihya.

¹⁵ Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo.

¹⁶ Ña naa íñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán íñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cūhva ndo tsi ndo cundaca ñaha ra naha tyin juvin ra naha jahá cuenda añima ndo. Tan coo quívi cua cūhva cuenda ra naha tyiñu jahá ra naha tsi Nyoo. Ndūcu ndo cuhva javaha ndo tsa vaha, tyin tacan tan sñi cua cuñi ra naha cūhva cuenda

ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuihya iñi, tan ña cua quita vaha ndo nuu ra.

¹⁸ Ndaçan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñí ndi javaha ndi.

¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyii yu tsihin ndo.

Nu ndihí cahan ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndoo Nyoo tuhun tsa tsa ña cua cundihi maa tsihin yo.

²¹ Tandihí tsa cuñí Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñí ra javaha ra. ¡Na jacahnu yo tsi ra Cristo yoso cuahán quivi! ¡Na cuvi tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo.

²³ Cuñí yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyii yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuvi tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

Nu tsahá ra Santiago nacumi tsi nyivi

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsi yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

Tsa tsiñi tuñi tsa tsahá Nyoo tsi yo

² Yañi, cusii iñi ndo tun cuaha tundoho nyehé ndo.

³ Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihí ca tundoho vatsi siqui ndo.

⁴ Jaña ndo na quitsi maa tundoho can siqui ndo, tyin tun tsa cunyeé iñi ndo yahá ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra.

⁶ Maa tyin cuñi tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can.

⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra.

⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñi ra. Vityin cuñi ra tsa cuñi ra, tan inga tsa cuñi tucu ra tyaan.

⁹ Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo.

¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi huhu, tyin ita can iin yaha ñi cucoyó can.

¹¹ Tyin ihñi xaan cuví tsitsi huhu jahá ñicanyii. Tacan tan na ityi ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsihi tsi ra tan cua cundihí tsa cuca ra.

Nacaa cunyeé iñi yo nyehé yo tundoho

¹² Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyi Nyoo tyin cuhva ra tsi ñi tsa cuñi tsi ra.

¹³ Tatun ndáa nyooho tsicá iñi ndo tsa javaha ndo tsa ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha.

¹⁴ Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo.

15 Tatum cua cuhva yo tsa caca iñi yo tuhun ña vaha, coo quiñi cua javaha yo cuhva tsicá iñi yo tan cua coo cuatyí yo. Tan tatum maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

16 Yañi, cuñi xaan yu tsi ndo. Ña jandavi ñaha ndo tsi ndo.

17 Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama.

18 Tan tsahá ra ñayivi tsaa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñi maa ra.

Ityi nditsa tsa taahán tsi cuhun yo

19 Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo.

20 Tyin nyivi tsa cuxaán, ña javahá ñi tsa taahán iñi Nyoo.

21 Yacan cuenda jaña ndo tsa ña vaha tan tsa caquiñi tsa iyó cua ha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo.

22 Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatum tyaá soho ñi maa ndo itsi juven ñi tsi maa ndo jandaví ñaha ndo.

23 Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu.

24 Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi.

25 Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sñi cua cuví tsi ñi ican tan cua quita vaha tandihí tsa javahá ñi.

26 Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juven ñi tsi maa ñi jandaví ñaha ñi.

27 Tyin tsa cuenda Nyoo, nyivi tsa nditsa tsinú iñi tsi ra juven ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yñi, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyivi tyin ña sñin caá intuhun ñi tan inga ñi

1 Yañi, nyoocho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi.

2-3 Tatum cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyí ndo, “Cunyaa nu tyayu vaha ihya”? Tan juven ñi cuhva can tan quihvi tucu iin ra ndaahvi nditsí ra jahma tyaahnyá, tan catyí ndo tsihin ra, “cunyaa nyityi juven o cunyaa nu ñuhu ihya”.

4 Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñí xaan yu, tyaá soho ndo tuhun ihya: Nyoo nacatsj ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyj ra tyin cuhva ra tsi nyivi tsa cuñí tsi ra.

⁶ Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juven nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu?

⁷ Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyí tsi: “Cuñi ndo tsi nyivi tumaa tsa cuñí ndo tsi maa ndo.” Tatun javahá ndo tsa catyí ley can, vaha javahá ndo.

⁹ Maa tyin tun intuhun ñi nyivi cuñí ndo, tan ña cuñí ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyivi javahá tacan.

¹⁰ Tyin tatun iin nyivi tsa tyaá yahvi tandihi ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihi ley.

¹¹ Tyin Nyoo catyj ra tyin ña coo inga ñaha tsi rayii, tun iyó ñasiihi ra. Tacan tucu ñiñaha, tsa iyó yii, ña cuví coo inga rayii tsi ñi. Tan juven ñi catyj tucu ra tyin ña cahñi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juven ñi ña tyaá yahvi ra tsa catyí ley.

¹² Maa tyin ley ra Cristo tsa jacacú tsi yo cua catyí tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.

¹³ Tyin nyivi tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo?

¹⁵ Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahān ra yuvehe un,

¹⁶ Maa tyin yooho ña tsahā un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahān un tacan tyin ña tsahā un tsa tsiñi ñuhu tsi ra.

¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyivi, nduve yahvi nyaá catyí yo tyin tsinú iñi yo.

¹⁸ Yihí ndo cua catyí ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yu tyin juven ñi cahnucuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha.

¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu.

²⁰ Ña soho xaan çaca iñi un. Çutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo.

²¹ Ra Abraham, tsi tsaahnu yo, cuvı ra iin ra vaha nuu Nyoo tyin jamañı ra tsi ra Isaac, sehe ra, tumaa catyı maa Nyoo tshin ra.

²² Ihya nyehé yo tyin tsa cuenda tsa tsinú iñi ra Abraham tsi Nyoo javaha ra tsa catyı ra tshin ra tyin javaha ra. Tan tsa javaha ra yacan, quituvı vaha tsa tsinú iñi ra tsi Nyoo.

²³ Tacan tan cundaq tsa catyı nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuvı ra ra vaha nuu Nyoo.” Tan iyó tucu inga nu catyı tsi: “Ra Abraham, cuvı ra ra vaha iñi tsi Nyoo.”

²⁴ Tan ihya cuvı nu cutuñı iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tshin tsa tsinú iñi ñi yo tsi ra.

²⁵ Tan tacan tucu ña Rahab tsa tsica nuu tshin rayıi. Yaha tsa javaha ña cuatyı, javaha ña tsa vaha quıvı tsaha ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cahun ra naha inga ityi. Tan tsa cuenda yacan, catyı Nyoo tyin vaha ña.

²⁶ Tan tacan tucu cuvı cuñu ñuhu nyıvi. Tatun nduve ca tsa nyıtó ñi iyó tsitsi cuñu ñuhu can, nduve ca yahvi nyaá can. Tan tacan cuvı tucu yoó, tatun ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyi xaan cuñi ndo cuvı ndo ra cahan tuhun Nyoo. Tyin tsıtó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyıvi tsa ña caahán tuhun Nyoo.

² Tyin tandihı maa yo tan tsicoó cuatyı yo, maa tyin ra tsa ña javahá cuatyı tshin tsa caahán ra, juvin ra cuvı ra vaha tyin cuvı ndaca ñaha ra nanı cahnu cuñu ñuhu ra.

³ Tumaa ra tsa tyihı yoho yuhu cuayu cuvı ndaca ñaha ra tsi ti, vasu ndi maa cahnu ti.

⁴ Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tshin vitu luhlu tsa nyaá ityi xuu tsi, cuvı jacuhun ra jacacá itsi ndáa ityi cuñı maa ra, vasu ñihi xaan yihı tatyı.

⁵ Tan tacan tucu yaa yo, luhlu xaan tsi. Maa tyin cuaha tsa caquiñi cuvı cahan yo tshin tsi. Tumaa nu natıjn iin ñuhı luhlu iin cuhu cahnu tan cayu tandihı maa yutun.

⁶ Tacan tucu yaa yo cuvı tsi tumaa iin ñuhı luhlu. Tan cuvı tucu tsi tumaa iin tsa quiñi cahnu tsa jatıvı tsi nanı cahnu cuñu ñuhu yo tan tandihı cuhva iyó yo ñayıvi ihya, tyin juvin ñi maa nu ña vaha natyuhı itsi.

⁷ Nyıvi cuvı jandumasu ñi tandihı maa nuu quitı tsa iyó: saa, coo, tan quitı tsa iyó tsitsi ndutya ñuhu.

⁸ Maa tyin yoñi cuvı jandumasu yaa yo tyin cuvı tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihı ti venenu ti tsi nyıvi, tan tsiihı ñi. Tacan cuvı yaa yo.

⁹ Tyin juvin ñi tshin yaa yo jacahnú yo tsi Nyoo Jutu yo. Tan juvin ñi tshin can caahán tucu yo ndavaha ñi siquı nyıvi tsa javaha Nyoo tumaa caá maa ra.

¹⁰ Juvın ñi tshin yuhu yo jacahnú yo tsi Nyoo. Tan juvin ñi tshin can caahán yo tsa caquiñi. Maa tyin yañi, ña taahán tsi tsa javahá ndo tacan.

¹¹ Tyin, ¿a cuvı quita ndutya cuii tan ndutya uva tsitsi iin ñi ndohyo? Ña cuvı.

¹²Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

¹³Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo.

¹⁴Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyívi, ña cahnu jahá ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can.

¹⁵Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyívi ña tsitó tsi Nyoo tan cuhva tsicá iñi nu ña vaha cuví can.

¹⁶Tyin tatun nyiyó iñi ndo tan cuñí ndo nduvaha ndo nu nyívi, ticaña xaan tsicá iñi ndo. Tan iyó tucu tandihí inga nuu tsa ña vaha nu yucú ndo.

¹⁷Maa tyin tatun iyó tsa tsiñi tuñi Nyoo tsi ndo, cuiti iyó ndo, catsi iyó ndo. Tan nducú ndo cuhva coo vaha ndo tsihin nyívi tsihin tsa víta iñi ndo, tan vaha nyívi cuví ndo. Tan catsi vaha tsicá iñi ndo, tan cundaahví iñi ndo tsi nyívi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo.

¹⁸Tatun iyó vaha yo tsihin nyívi, tan iyó taxin yo tsihin ñi, cua coo yo ñayívi cuiti.

4

Ña taahán tsi javaha yo cuhva cuñi cuñu ñuhu yo

¹¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha.

²Iyó tsaha nda cuanda tsahñi ndo nyívi tyin cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihí ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo.

³Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jatívi ndo can tsihin tsa taahán iñi ndo.

⁴¿Nacuenda javahá ndo cuhva cuñi nyívi, nyoocho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñi nyívi, ñi xaan iñi tsi Nyoo cuví yo?

⁵Tan yacan iyó cuenda catyi nu tutu Nyoo tyin Tatyí li tsa tsahá ra coo añima yo, cuñí xaan tsi tsi yo tan cuiñu xaan tsi tsi yo tyin cuñí tsi tsa jacahnu yo tsi intuhun ñi maa ra.

⁶Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyi ra tyin jatyinyeé ca ra tsi nyívi ndaahví tsa tsitó tyin tsiñi ñuhu ra tsi ñi. Tan ña cuñí ra nyehe ra tsi ra tsa cahnu jahá tsi.

⁷Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo.

⁸Nducú ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyoocho, nyívi iyó cuatyí, jandund# ndo tsi ndo. Tan nyoocho tsa tsicá iñi tyin cuví javaha ndo tsa iyó nu ñuhu ñayívi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndund# ndo nuu ra.

⁹ Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa siñ cuñi ndo, vacu ndo tsihin tsa cuiihya cuñi ndo. Tan tsa siñ cuñi ndo na nanduvi tsi tucuiihya iñi.

¹⁰ Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahan nyaa ndo tsi nyivi

¹¹ Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuvi can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can.

¹² Tyin intuhun ñi ra tsahá ley can. Tan juvin ñi ra cuvi Juez. Tan juvin ra cuvi ra jacacú tsi yo, o jacunaá tsi yo. Tan zyooho yóo ra cuvi un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuvi tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vityin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya:

¹⁴ Ñayivi tsa iyó yo cuvi tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuvi tyaan tan catyí ndo tyin cahun ndo.

¹⁵ Vaha ca cahan ndo tyehen: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.”

¹⁶ Maa tyin nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan.

¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyivi cuca

¹ Tyaa soho ndo tuhun caahán yu ihya, nyooho nyivi cuca! Vacu ndo tsihin tsa cuiihya cuñi ndo, çana tsa ndo tsa cuenda tundoho tsa cua nyehe ndo.

² Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsi tiquixin.

³ Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya?

⁴ Tan ña tyahvi ndo yahvi tsa taahán tsi tsi nyivi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihí ángel tsa cuvi andaru cuenda ra. Tan maa Jutu Mañi yo tsiñi ra tuhun caahán ñi ndaahvi can.

⁵ Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa saq quivi tsa cua cuu ndo.

⁶ Tyin tyaa ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeé iñi yo cuatyí tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jlhna tan nda ndihi cuun nyico tsi, tan naquihin ra tsa tatsj ra.

⁸ Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

⁹ Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra.

¹⁰ Yañi, quihin cuenda ndo cuhva tsicoo ra cuví ndusu yuhu Nyoo tahan tsanaha. Tyin ra ican naha ra cunyeé xaan iñi ra naha nyehé ra naha tundoho quívi tsaha cuenda ra naha tuhun Jutu Mañi yo.

¹¹ Tsitó yo tyin sii xaan cuñi ra tsa cunyeé iñi nyehé tandihi nuu tundoho, tumaa tsa cunyeé xaan iñi ra Job nyehé ra tundoho. Tan nu ndihi ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo.

¹² Maa tyin yañi, ña çahan ndo: “Naha Nyoo maa”. Tan ña çahan ndo: “Tsító vaha maa ra javaha ñuhu ñayivi”, tan ndi ña çahan ndo inga ca tuhun tahan can. Tatun nditsa tuhun caahán ndo, “nditsa” çatyí ndo. Maa tyin tatun tsító ndo tyin ña nditsa, çatyí ndo tyin “ña nditsa”, coto tatsi tuñi Nyoo tsi ndo.

¹³ Tun ndáa nyooho nyehé tundoho, ndaçan tahvi ndo tsi Nyoo. Tan nyooho tsa sii cuñi, çata ndo yaa Nyoo.

¹⁴ Tan nyooho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo.

¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyívi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi.

¹⁶ Yacan cuenda nahma ndo cuatyí ndo tsi iin ndo tan tsi inga ndo. Tan ndaçan tahvi ndo tsi Nyoo tsa cuenda inga ca nyívi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo.

¹⁷ Tumaa ra Elías ra cuví ndusu yuhu Nyoo tahan tsanaha. Cuví ra iin rayi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava.

¹⁸ Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsj nyívi.

¹⁹ Yañi, tatun iin nyívi tahan ndo nacoo ñi tuhun nditsa Jutu Mañi yo, tan cuanuhú ñi ñayivi inga tsaha, tan jatyinyeé ndo tsi ñi tsa nanducu nyico ñi ityi Nyoo,

²⁰ coto ndo tyin tsa javaha ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

Nu quitsahq tyaá ra Pedro carta tsa cuenda nyivi yihí cuenda Nyoo

¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví.

² Tyin nda tsanaha tan nacatsi vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsi ra tsi ndo, jatyinyee Tatyí li ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tshin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsaá coo yo

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñí ra nyehé ra tsi yo. Tan tsahá ra tsa nacacu tsaá yo inga tsaha tyin janandoto ra tsi ra Jesucristo. Yacan cuenda cuita iñi yo tyin cua ñihi yo ñayivi tsaá tsa ña cua naa maa.

⁴ Tan tsa cuenda tsa nacacu tsaá yo, Nyoo cua cuhva ra tandihi tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita.

⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tshin tunyee iñi ra nda cuanda ndihi cacu yo. Tan cua janaha ra tsi yo náa cuñí tsi catyí tsa cacu yo nu cua ndihi tyembu tyin tsa ndatú vaha can tsi yo.

⁶ Yacan cuenda sii cuñí ndo, vasu ndi maa nyehé ndo tandihi nuu tundoho juhva quivi vityin.

⁷ Tyin tandihi maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñí yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸ Nyooho cuñí ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii xaan sii xaan cuñí ndo nda cuanda ña cuví ñihi ndo cuhva catyí ndo najava cuhva tsa sii cuñí ndo,

⁹ tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoq tañan tsanaha nducu tuhun ra naha nácaa cua cacu yo. Tan nducu ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo.

¹¹ Tan Tatyí li ra Cristo tsa iyó tshin ra naha jacoto tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducu xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí li tshin ra naha.

12 Maa tyin jacoto Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihí tsa cahán ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahán tuhun ihya naha ra, maa Tatyí Ii Nyoo jacahan tsi ra naha. Tan ra ángel naha ra cuñí xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

13 Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra.

14 Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoo ndo quivi tsa ndi cumañi ca nacoto ndo tsi Nyoo tyin tsanaha tsindaca ñaha tsa ña vaha tsa cuñi cuñu ñuhu ndo tsi ndo.

15 Maa tyin vityin coo ndo ñayivi cuiti tyin maa Nyoo, ra tsa cana tsi ndo, cuiti iyó ra.

16 Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

17 Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cauca, an nyivi ndaahvi.

18 Nyoo nasama ra cuhva tsa ña vaha tsicoo ndo, cuhva tsa janaha tsi tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihi ñi maa tyahvi ra tan cacu yo,

19 tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra.

20 Tsa ndi cumañi ca tsinu ñuhu ñayivi tsinyaá cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuenda vityin nu cua ndihi quivi, cuví tandihí can tsa cuenda tsa vaha tsi maa yo.

21 Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yahá tsihi ra tan jacahnú ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

22 Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundi ndo jahá Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa niñi iñi ndo, tan tsihin tandihí tunyee iñi tsa iyó tsi ndo.

23 Tyin tsa nacacu tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacu ra naha jahá sihi ra naha tan tsihi ra naha. Tan nyooho vityin nacacu tsa ndo tsihin Nyoo tsa ña cua cundihi maa, tyin tacan ñi cua coo maa tsi.

24 Tyin catyí tuhun Nyoo tyehen:

Tandihí nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucuoyó ita can. [Tacan cuví nyivi, tyin iin yaha ñi tsihi ñi.]

25 Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda ñacoo ndo tandihi nuu tsa caquiñi. Ña jandavi ñaha ndo tsi nyivi, ña jaha ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña cahan ca ndo cuendo.

² Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndihi cacu ndo,

³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunya naa ndo tsi Jutu Mañi yo. Tyin juvin ra cuví yuu nyito tsa ña cuñí nyivi cuatyíñu ñi. Maa tyin Nyoo nacatsi ra tsi Jutu Mañi yo tyin juvin ra cuví yuu sii caá tsa yahvi nyaá tsa cuenda ra.

⁵ Tatun nya naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nya naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sii xaan cua cuñi ra.

⁶ Tyin catyí tucu nu tutu ra tyehen:

Yuhu nacatsi yu iin yuu tsa tsiñi ñuhu ca tan sii ca caá, tan tsaquin yu yuu can nu cua javaha yu vehe yu nda Sión.

Tan nyivi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyivi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyíñu ra, yacan cuví yuu tsa tsiñi ñuhu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyivi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

Nyivi yihí cuenda Nyoo

⁹ Maa tyin nyooho cuví ndo nyivi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyihí ra tsi yo nu nditsin tan nu sii caá.

¹⁰ Tsa ndi cumañi ca cuví ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yofi cundaahvi iñi tsi ndo, maa tyin vityin Nyoo cundaahvi iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

¹¹ Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví ñuu ndo. Yacan cuenda ña javaha ndo kuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo.

¹² Jaha cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin

quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

¹³ Tyaa yahvi ndo tsi ra cumi tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumi tyiñu, a cuvi ra rey cahnu ca,

¹⁴ a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha.

¹⁵ Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyivi soho tan nyivi ña tsitó náa cahan ñi siqui yo.

¹⁶ Coo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuvi ndo musu ra.

¹⁷ Jaha ndo tsa ñayivi tsi tandihi ñi nyivi. Cuñi ndo tsi ñi yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihi tsa javahá yo.

Uvi taahan cuhva nyehé yo tundoho

¹⁸ Nyooho tsa cuvi musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha.

¹⁹ Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsaa can nuu ra.

²⁰ Maa tyin tatun tatsi tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihí iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuvi tsa vaha nuu Nyoo.

²¹ Tumaa tsa nyehe maa ra Cristo tundoho tsa cuenda yo, tacan taahán tsi cunyeé iñi yo nyehe yo tundoho tyin tsa cuenda yacan cana Nyoo tsi yo.

²² Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyivi.

²³ Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuvi ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo.

²⁴ Tyin cuhva tsa ticaá ra Cristo nu cruu can, tsicoso tandihi cuvi maa cuatyí yo tsata ra. Tacan cuvi tyin tacan tan ña javaha ca yo cuatyí, tan coo yo ñayivi cuvi. Tyin tsihin tsa ñicueehé ra, tan nduvahá yo.

²⁵ Tyin quivi can tsicá nuu yo cuvi yo tumaa mbee tsa ndoo ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra aña yo. Cuví ra ityi nuu tsihin yo.

3

Naca taahán tsi coo nyivi tindaha

¹ Tacan tucu nyooho, ñiñaha tsa iyó yí. Tyaa yahvi ndo tsi yí ndo tyin tatun ña tsinú iñi ra tsi ra Cristo, cua tsinu ndihí iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quihí ndaha ra tsi ndo. Tan ña cuñi tsi cuaha xaan cahan ndo tsihin ra,

² tyin nyehé ra tyin catsi iyó ndo tan jahá ndo tsa ñayivi tsi ra.

³ Ña çaça xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñu ndo tsa cuvi xuhun cuan tan cunditsi ndo jahma xiñu xaan. Ña nducu ndo tandihi yacan.

⁴ Maa tyin jandutyaqui ndo tsi ndo tsihin tsa quitá añima ndo tyin tun cuiti iyó yo tan vita iñi yo, tan taxin iyó yo, yacan cuví tsa sii ca caá nuu Nyoo. Tan ña cua tiví maa can.

⁵ Tyin tsihin tsehe ndutyaqui ñiñaha tsa nacoto tsi Nyoo, ñi tsa tsicoq tahañ tsanaha. Nyita iñi ñi tsi Nyoo tan tyaq yahvi ñi tsi yii ñi.

⁶ Tumaa ña Sara, tyaq yahvi ña tsi ra Abraham yii ña. Tan catyí ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña.

⁷ Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayivi iyó ndo. Javaha ndo tyehen tyin tacan tan tiin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihi tuhun, iin ñi cuhva caça iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñi ndo tsi yañi ndo tsa cacu tsihin ndo. Vita cahan ndo tsihin tahan ndo, tan ña cahnu jaha ndo tsi ndo; cuví ndo nyivi vaha.

⁹ Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo.

¹⁰ Tyin tuhun Nyoo catyí tsi tyehen:

Nyivi tsa cuñi coo ñayivi tsihin tsa sii,
cuñi tsi jaha ñi cuenda yaa ñi, tan ña cahan ñi tsa ndavaha ñi,
tan ndi ña cahan ñi cuendu.

¹¹ Jandihi ndo tsa javahá ndo tsa ña vaha, tan javaha ndo tsa vaha. Nducú ndo cuhva coo taxin ndo, tan coo ndo tacan.

¹² Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

¹³ Ndi intuhun maa nyivi tan ña cuví javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

¹⁴ Cusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo.

¹⁵ Jacahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caça iñi ndo tuhun Nyoo tyin tatun ndaca tuhun nyivi tsi ndo nacuenda tsinú iñi ndo tsi ra, cuví cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi.

¹⁶ Catsi coo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahan ñi siqui ndo.

¹⁷ Vaha ca nyehé yo tundoho tsa cuenda tsa javahá yo tsa vaha tatun Nyoo cuñi, tan ñavin ca tsa nyehé yo tundoho cuenda tsa ña vaha.

¹⁸ Tyin ra Cristo nyehé ra tundoho tan tsihi ra iin tsaha ñi tsa cuenda cuatyin tandihi yo. Ra vaha cuví ra maa tyin nyehé ra tundoho tan tsihi ra tsa cuenda yo tsa cuví yo nyivi caquiñi, tyin tacan tan cuví tsaá yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí Ii ra.

¹⁹ Tacan tan tsihin Tatyí Ii ra tsahan ra tsicahan ra tsihin añima nyivi tsa yucú anyaya.

²⁰ Tan ñi ican cuví ñi tsa ña tyaq yahvi tsi Nyoo quivi tsicoq ra Noé tahañ tsanaha, tyin ñi tsinú yutun ndoo tacan tsa ndatu Nyoo tsa ndu uvi ñi ñi cuatyí ñi. Maa tyin ña cuaha ñi cacu quivi cuñ cuñ savi cahnu tsa tsahñi ndutyá ñuhu tsi ñi. Una taahan ñi ñi cacu tsitsi yutun ndoo tyin nandaq yutun ndoo can nu ndutyá ñuhu.

²¹ Tan tacan tucu maa yo tumaa tsa cacu ñi ican, tacan cacu yo quivi tsicoondutyá yo. Maa tyin ñavin nyahyu yo nacatyá ndutyá can tsa tsicoondutyá yo. Yacan cuñi tsi catyi tsa tsicán tahvi yo tsi Nyoo na nacatyá ra añima yo tan cacu yo jahá tsa nandotq ra Jesucristo.

²² Tan nandaq ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihí tatyí ña vaha tsa ndacá ñaha tsi nyivi.

4

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo ñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehe tundoho tsihin cuñu ñuhu ñi, ña javahá ca ñi tsa caquiñi tsa cuñi cuñu ñuhu ñi.

² Tyin tacan tan tandihí quivi coo ñi cua javaha ñi cuhva cuñi Nyoo, tan ñavin cuhva cuñi cuñu ñuhu ñi.

³ Vityin tsindihí tsa javahá ndo tsa caquiñi tsa taahán ñi nyivi tsa ña tsitó tsi Nyoo. Tsicoq ndo cuhva cuñi ndo, cuaha tsa caquiñi javaha ndo, tan javaha ndo tsa caquiñi tsa cuñi cuñu ñuhu ndo. Javaha ndo vico tan tsiñi ndo. Tan jachanu ndo tsitoho tsa ña taahán tsi jachanu ndo.

⁴ Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñi ñi. Tan caahán ñi ndavaha ñi siqui ndo.

⁵ Maa tyin tandihí tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi.

⁶ Yacan cuenda jacotq ra Cristo tuhun vaha tsi ndiyi. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihí tandihí ca nyivi.

⁷ Tsa yatyin cuí cundihí tandihí maa tsa iyó nu ñuhu ñayivi ihya. Yacan cuenda catsi coo ndo tan ña jandihí ndo tsa ndacan tahvi ndo tsi Nyoo.

⁸ Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu ñi tsi ñi.

⁹ Tatun tsaa iin nyivi vehe ndo, vaha tyanu ndo tsi ñi tan ña caca ñi ndo tyin jatyañu ñi tsi ndo.

¹⁰ Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin sñ sñ tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo.

¹¹ Tatun tsaha Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsaha ra tyin javaha un tyiñu nuu nyivi, javaha tsihin tunyee ñi tsa tsahá maa ra. Tandihí tsa catyi Nyoo tyin javaha ndo, javaha ndo can, tyin tacan tan jachanu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jachanu yo. Tan na cundaca ñaha ra tsihin tunyee ñi ra tacan ñi maa. Tan na cuvi tsi tacan.

Sñ cuñi ndo tun nyehe ndo tundoho tsa cuenda ra Cristo

¹² Yañi tsa cuñi xaan yu, ña iyo xaan cuñi ndo tatun vatsí tundoho ñihi siqui ndo. Ña cuñi ndo tyin ña taahán tsi nyehe ndo tundoho.

¹³ Cu sii iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuvi ra.

¹⁴ Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí li Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyooho jachnú ndo tsi ra.

¹⁵ Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javaha ndo tsa ña vaha, o tsa tyihí ndo tsi ndo nu ña taahán tsi.

¹⁶ Maa tyin tun nyehé ndo tundoho tsa cuenda tsa yihí ndo cuenda ra Cristo, ña nduçahan nuu ndo. Jachnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

¹⁷ Tyin tsa tsa quivi tsa quitsaha jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatun tyehen tatsí tuñi Nyoo luxu ñi tsi yoo, ¿náca ca tatsi tuñi ra tsi nyivi tsa ña tyaá yahvi tuhun caahán ra?

¹⁸ Tatun yii cacú añima nyivi vaha, ¿náca ca cacu añima ñi quiñi iyó, ñi ña vaha?

¹⁹ Yacan cuenda tatun nyehé ndo tundoho cuhva cuñi Nyoo, cuñi tsi tsa jañihi ca ndo javaha ndo tsa vaha. Tan tyaa cuenda ndo añima ndo ndaha ra tyin maa ra javaha tsi yo, tan cua javaha ra tumaa caahán ra.

5

Nu tsahá cuenda ra Pedro tsi yo náca coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuvi tucu maa yu. Tan cuvi yu tsandaa tyin nyehe yu tandihí tundoho tsa tahañ ra Cristo. Tan cua cutahan yu tsihin tandihí ca ra naha quivi quitsi ra Cristo inga tsaha tsihin tsa cahnu cuvi ra.

² Jaha cuenda ndo tsi nyivi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi iñi añima ndo tan ñavin tsihin tsa ñiñi, maa tyin cuhva cuñi Nyoo. Ña javaha ndo can tsa cuenda tsa cuñi ndo xuhun. Tandihí tyiñu javahá ndo, javaha ndo can tsihin tsa cacu iñi ndo.

³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihi ndo tsi ñi.

⁴ Tacan tan quivi cua quitsi ra cuvi itiyi nuu tsihin nyooho tsa jahá cuenda mbee jana Nyoo, cua cuhva ra tsa sii caá tsa ña cua tiví maa tsi ndo.

⁵ Tacan tucu nyooho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahañ ndo tsi ndo. Tyin catyí nu tutu Nyoo tyehen:

Nyoo ña cuñi ra nyehe ra tsi nyivi tsa yaa xaan,
Maa tyin jatyinyeé ra tsi ñi tsa ña yaa.

⁶ Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee iñi tsa iyó tsi ra, tyin tacan tan cuvi jachnu ra tsi ndo quivi cua tahañ tsi.

⁷ Tyaa cuenda ndo tandihí tsa tsicá xaan iñi ndo ndaha Nyoo tyin maa ra jahá cuenda tsi ndo.

⁸ Catsi cuhun iñi ndo tan jaha vaha ndo cuenda ndaa tsa vaha tan ndaa tsa ña vaha, tyin nu ña vaha, nu xaan iñi tsi yo, tsicá nuu nu nanducú nu yoo jaha canaa nu tumaa tsicá nuu ndicaha xaan nanducú ti tsa catsi ti.

⁹ Ñihi cunyecu ndo tsihin tsa tsinú iñi ndo tsi Nyoo tyin tacan tan cuvi jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihi ca nyivi yihí cuenda ra Cristo tani cahnu nu ñuhu ñayivi.

¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quivi, Nyoo cua jacutsa ca ra tsi ndo, ñihi cunyecu ndo tsihin tsa tsinú iñi ndo, tan cua cuhva ca ra tuneé iñi tsa iyó tsi ra tsi ndo. Tan juvin Nyoo cuví ra tsahá tandihi tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu si caá tsihin ra tacan ñi maa.

¹¹ Na jacahnu yo tsi ra tan na cundaca ñaha maa ra tacan ñi maa. Tan na cuvi tsi tacan.

Nu tsahá ra Pedro nacumi tsi nyivi nu ndihi ña

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ni xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihi ndo janahá tsi tyin nditsa tsa cuñi xaan Nyoo tsi yo. Yacan cuenda ña naco ndo itsi.

¹³ Nyivi yihí cuenda Nyoo ñuu Babilonia tsa nacatsi Nyoo tumaa nacatsi ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihi ra nacumi tsi ndo.

¹⁴ Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añima tandihi nyooho tsa iin ñi cuví tsihin ra Jesucristo. Tan na cuvi tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo.

² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxín ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Naca taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsahá ra tandihí tsa tsiñí ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra.

⁴ Tan tsihin tandihí tsa vaha can, tsahá tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoó yo tandihí tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya.

⁵ Yacan cuenda cuñi tsi tsinú ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuiti yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo.

⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihi iñi yo. Yaha can tan nducu yo cuhva coo yo ñayivi iyó Nyoo.

⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan.

⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahan tsanaha.

¹⁰ Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo.

¹¹ Tacan tan ña yí cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuí ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhva ndo.

¹³ Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu.

¹⁴ Tyin tsa jacoto Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya.

¹⁵ Tan cua jafiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

Nu nacatyí tuhun ra Pedro nácaa nyehe ra naha tsa cahnu cuví ra Cristo

¹⁶ Ñavin tsa nandacu iñi ñi maa ndi tan cahan ndi tsihin ndo quivi jacoto ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacoto ndi tsi ndo tyin iyó xaan tunyee iñi tsi ra tan ca quitsi ra inga tsaha.

¹⁷ Tyin nyehe ndi nu jachnu Nyoo Jutu yo tsi ra tan nyehe ndi nu janduxiñu ra cuhva caá ra. Tan sii xaan cuví nu cahan Nyoo tan catyí ra: “Ra ihya cuví Sehe yu, tan cuñi xaan yu tsi ra. Tan sii xaan cuñi yu tsihin ra”, catyí Nyoo tuhun ra Jesús quivi can.

¹⁸ Juvín nyuhu tsiñi ndusu Nyoo tsa quitsi ityi andivi quivi tsiyucu ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaa ra cuví ndusu yuhu Nyoo nu tutu tahan tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo.

²⁰ Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyí tsa tyaa ra ndusu yuhu Nyoo.

²¹ Tyin ra cuví ndusu yuhu Nyoo tahan tsanaha ña cahan ra naha cuhva cuñi maa ra naha. Maa tyin cahan ra naha cuhva cuñi Nyoo tyin maa Tatyí Ii Nyoo jaquihin ityi tsi ra naha.

2

*Ra jacuahá tsa ña nditsa
(Judas 4-13)*

¹ Maa tyin tsicoo tucu ra cahan cuendu naha ra nu tsicoo nyivi Israel tahan tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuahá ra naha tsa ña nditsa tsa cuví jativi tsi ndo. Tan cua catyí ra naha tyin ña nditsa tuhun Jutu Mañi yo tan juvín ra jatá tsi ra naha. Yacan cuenda numi ñi cua cunaa ra can naha ra.

² Tan cuaha xaan nyivi cua cunyicun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo.

³ Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuahá ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahá Nyoo tucahnu iñi tsi ángel tsa tsicoo cuatyí tahan tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoo ra tsi nahnu nu naa nda cuanda tahan tsi jacutuñi ra tsi nahnu.

⁵ Tan ndi ña jahá ra tucahnu iñi tsi nyivi ña vaha tsa tsicoo tsanaha. Jacuun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahan ra tsihin nyivi na nducu ñi cuhva coo vaha ñi tsihin Nyoo.

⁶ Tacan javahā tucu ra tsihin ñuu Sodoma tan ñuu Gomorra, janaā ra itsi. Tsahmī ra ñuu can tan nanduvī tsi nyaa, tyin coto nyivī caquiñi tsa iyó vityin tan nyivī tsa cua coo náa cua tahan ñi.

⁷ Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuhva iyó nyivī caquiñi can.

⁸ Tandihī quivī tsa tsicoq ra Lot ñuu can, cuihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuvī ra, tan ñi ican maa ñi tsa ña vaha javahá ñi.

⁹ Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivī caquiñi nda cuanda tahan tsí quivī cutuñi ñi.

¹⁰ Yaha ca cua tatsi tuñi Nyoo tsi nyivī tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha.

¹¹ Tan ángel, vasu ndi maa iyó ca tunyee iñi tsi ra naha tan ñavin ca nyivī, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuvī ra naha tumaa quitī tsa ña cutuñi iñi tan javahá ti naha ti tsa cuñi maa ti naha ti. Tyin quitī, ¿náa cuenda iyó ti? Iyó ti tyin tiñ yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihí quitī can naha ti.

¹³ Cua nyehe ra naha tundoho tsa cuenda tsa janyehé ra naha tundoho tsi inga nyivī. Si xaan cuñi ra naha tsihin tsa caquiñi javahá ra naha nu tuvi. Tsahá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusi iñi. Maa tyin juven ñi tsi maa ra naha jandaví ñaha ra naha.

¹⁴ Tandihī ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivī tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha.

¹⁵ Nacoq ra can naha ra ityi vaha tan naquihín ra naha ityi tsa cuahán nu cua cunaa ra naha tyin javahá ra naha tumaa javahā ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra.

¹⁶ Tacan tan nacahan burru jana ra tsihin ra, tumaa caahán nyivī, tan tsa nacahan ti ña tsahq ti cuhun ra javaha ra tsa ña vaha tsicá iñi ra.

¹⁷ Tan tacan tucu maa ra can naha ra. Cuví ra naha tumaa iin socio ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuii ra naha.

¹⁸ Yaa xaan caahán ra naha. Maa tyin tandihī tsa caahán ra naha nduve yahvi nyaá can. Tan tsihin tandihī tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandaví ñaha ra naha tsi nyivī tsa tsa yaha quitā mahñu nyivī tsa javahá tsa caquiñi.

¹⁹ Catyí ra naha tsihin ñi tyin cua coo nuña ñi. Maa tyin juven ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuví yo.

²⁰ Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yahā nacoḡ ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo.

²¹ Vaha ca tun tsatyin ña nacoto ñi ityi vaha, tan ñavin ca tsa nacoo ihñi ñi tsa tsahā Nyoo tsi ñi tsa tsa yahā nacoto ñi tsi ra.

²² Maa tyin cundaḡ tsa tuhva nyivi caahán: “Ina tsatsi nyico ti tsa ndutsan ti. Tan quini tucu, tun tsa yaha tsityí ti, quihvi nyico ti nu xahan nyahyu.” Tacan cuví ñi can tyin javahá nyico ñi tsa javahā ñi nda jihna.

3

Quivi cua quitsi nyico Jutu Mañi yo

¹ Yañi, cuñi xaan yu tsi ndo. Carta ihya cuví carta tsinu uvi tsa jaquitsi yu tsi ndo. Tan nu nduvi taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhvā ndo.

² Ndūcuhun iñi ndo tsa cahān ra cuví ndusu yuhu Nyoo tahañ tsanaha. Tan ndūcuhun tucu iñi ndo tsa jacuahā ndi tsi ndo. Tyin cuví ndi ra tavaḡ tyiñu Jutu Mañi yo Jesucristo, ra jacacú tsi yo.

³ Coto jihna ndo tyin nu cua ndihí quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi.

⁴ Tan cua catyí ñi: “¿Náa ra Jesucristo tsa catyí tyin cua quitsi ra inga tsaha? ¿Numaa nyii ra? Tyin nda quivi tsa tsihiḡ tsi tsaahnu yo tan nda cuenda tsa tsinū ñuhu ñayivi tan nda vityin caá ñi maa tahañ ñi caá”, cua catyí ñi.

⁵ Tyin maa ñi ña cuñi ñi coto ñi tyin nda tyembu tsahnu cahān Nyoo tan javahā ra andivi tan ñuhu ñayivi. Quita ñuhu ñayivi tsitsi ndutya, tan tsihin ndutya tsinū tsi.

⁶ Tsa yahā javahā Nyoo ñuhu ñayivi juvin ñi maa tsihin ndutya naḡ ñuhu ñayivi quivi cuḡn savi xaan.

⁷ Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyí maa Nyoo. Cua cayu andivi tan ñuhu ñayivi tsihin ñuhū quivi cua cutuñi nyivi tan cua naa nyivi caquiñi.

⁸ Maa tyin nyooho yañi yu tsa cuñi xaan yu, ña naḡ iñi ndo tyin tsa cuenda Jutu Mañi yo tsa iin quivi cuví tsi tumaa mil cuiya, tan tsa mil cuiya cuví tsi tumaa tsa iin quivi tsa cuenda ra.

⁹ Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uví iñi tandihí nyivi tan nasama ñi cuhva iyó ñi tyin ña cuñi ra tsa cunaa ndi intuhun yo.

¹⁰ Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhū tandihí tsa iyó ityi siqui. Tan ñuhu ñayivi cua cayu tsi tsihin ñuhū tsihin tandihí tsa iyó nuu tsi.

¹¹ Tacan cua naa tandihí tsa iyó. Yacan cuenda cuñi tsi cuiḡi coo yo tumaa iyó maa Nyoo.

¹² Cūatu ndo quivi quitsi Nyoo. Ndūcu ndo cuhva quitsi ñi ra tyin quivi tsa cua quitsi ra cua naa andivi jaha ñuhū. Tan tandihí tsa iyó cua naa tsi tsihin tsa ihñi ñuhū can.

¹³ Maa tyin yoo ndatú yo andivi tsa tan ñuhu ñayivi tsa tsa catyí Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴Yacan cuenda yañi, tsitsi tsa ndatú yo tsi Jutu Mañi yo, nducu ndo cuhva coo vaha ndo tsihin Nyoo, tyin tacan tan quivi quitsi ra, sii cua cuñi yo tan cua coo taxin añima yo tyin nduve ca cuatyí yo iyó.

¹⁵Coto ndo tyin Jutu Mañi yo ña cundihi iñi ra ndatú ra tsi yo tyin cuñi ra tsa cacu cuaha nyivi. Juvín ñi tyehen caahán tucu ra Pablo yañi yo nu carta tsa jaquitsj ra tsi ndo. Tyaq ra itsi tsihin tsa tsiñi tuñi tsa tsaha Nyoo tsi ra.

¹⁶Tandihi ñi nu carta ra tan caahán ra tuhun ihya. Vasu yihí tsa yii xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, sñn cuhva cutuñi iñi ñi itsi. Juvín ñi tacan javahá ñi tsihin tuhun Nyoo tsa tyaa inga ca ra naha. Tan tsa tacan javahá ñi, juvín ñi tsi maa ñi jacunaá ñi.

¹⁷Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihi ndo cuhva jandaví ñaha ra caquiñi can naha ra, tyin tacan tan ña nacoo ndo cuhva vaha tsa cuahán ndo.

¹⁸Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi ñi ndi yoo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaahá ra ñayivi nyito iyó yo.

² Tan quivi tsaá ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaá tsi nu iyó yo.

³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra.

⁴ Tan tyaá ndi tuhun ihya tsa cuenda ndo tyin tacan tan coto ndo tandihí tsa tsaahá Nyoo tsi ndo tan sñi xaan cua cuví tsi ndo.

Nyoo, ñuhú cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyi ra tsihin ndi tyin Nyoo ñuhú cuví ra. Tan nduve tsa naa tsi ra, [nduve tsa ña vaha tsicá ñi ra cuví can].

⁶ Tun catyi yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa.

⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin ñiñi ra.

⁸ Tatun catyi yo tyin nduve cuatyí yo, juvin ñi maa yo jandaví ñaha yo, tan nduve tsa nditsa iyó añima yo.

⁹ Maa tyin tatun noahmá yo cuatyí yo nuu Nyoo, cuví cuita ñi yo tsi ra tyin cua jaha ra tucahnu ñi tsi yo tsa cuenda cuatyí yo tan cua nacatya ra tandihí cuatyí yo tyin maa ra vaha ra tan javahá ra cuhva catyi ra tyin ña vatya ra.

¹⁰ [Nyoo catyi ra tyin iyó cuatyí yo], tan tatun catyi yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó.

² Juvín ra jahá tucahnu ñi tsi yo tyin tsihí ra nu cruu tsa cuenda cuatyí yo. Tan ñavin tsa cuenda maa ñi maa yo tsihí ra, tyin tsihí ra tsa cuenda tandihí cuii nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra.

⁴ Maa tyin tatun iin ra tsa catyi tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra.

⁵ Nyívi javahá tsa caahán Nyoo, ñi ican cuví ñi cuñí tsi ra tsihin tsa ñi iñi añima ñi. Tan tsihin yacan tsitó yo tyin iin ñi cuví ñi tsihin ra.

⁶ Nyívi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quívi quítsi ra nu ñuhu ñayívi ihya.

Taahán tsi tsa cuñí tahan yo tsi yo

⁷ Yañi, ñavin tuhun tsa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quítsi ca tsi. Tan juvin tsi cuví tsa tsa yahá tsiñi ndo.

⁸ Maa tyin ña tsindihí tsa tsa tsi tyin tyaá yahvi yo itsi tan tsa tyaá yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsin ñuhu tsa nditsa.

⁹ Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyívi yihí tuhun Nyoo tsihin ndo, ndi iyó ndo nu naa.

¹⁰ Maa tyin nyívi tsa cuñí tsi nyívi yihí tuhun Nyoo tsihin ñi, iyó ñi nu nditsin. Tan nduve maa cuatyí cuví janduva tsi ñi.

¹¹ Maa tyin nyívi ndasi cuñí nyehe tsi nyívi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaá ñi jahá tsa naa can.

¹² Jaquitsi yu tandihí tuhun ihya tsi nyooho tsa ndi nacuhva cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo.

¹³ Nyooho tsa tsa tsahnú tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayívi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo.

¹⁴ Jaquitsi yu carta ihya tsi nyooho tsa tsa tsahnú tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayívi. Tan jaquitsi yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayívi ihya. Tyin nyívi cuñí tandihí yacan, ña cuñí ñi tsi Nyoo Jutu yo.

¹⁶ Tyin tandihí tsa ña vaha tsa iyó nu ñuhu ñayívi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihí yacan tsahá ñuhu ñayívi ihya tsi yo, tan ñavin Nyoo Jutu yo tsahá can.

¹⁷ Ñuhu ñayívi ihya cua cundihí can, tan cua cundihí ndihí tucu tandihí tsa caquiñi tsa cuñí nyívi javaha ñi. Maa tyin nyívi tsa javahá cuhva cuñí Nyoo, cua coo cuii ñi tsihin ra.

Nu tsa ndasi cuñi nyehe tsi ra Cristo

¹⁸ Nyooho, tsa cuví ndo tumaa sehe yu, coto ndo tyin tsa cua ndihí quívi. Tan nyooho tsiñi ndo tyin vatsi nyívi tsa ña cuñí nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihí quívi.

¹⁹ Nyívi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa

tyin tacan cuvī tyin tacan tan coto yo tyin ñavin nyivi yihí tuhun Nyoo tsihin yo cuvī ñi.

²⁰ Maa tyin nyooho tsa tsitó ndo tsa caahán Nyoo tyin tsaḥa ra Cristo Tatyí Ii Nyoo iyó añima ndo tan jacotó tsi tandihí tsi ndo.

²¹ Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuvī quita tuhun vatya tsihin tuhun nditsa.

²² ¿Yóo cuvī nyivi vatya? Nyivi vatya cuvī ñi catyí tyin ra Jesús ñavin ra Cristo cuvī ra. Tan juvin ñi ican cuvī ñi ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra.

²³ Tan tandihí nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi añima ñi tsihin nyivi tyin ra Jesucristo cuvī Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsitsi añima ndo tandihí tsa tsiñi ndo nda quivi jihna ñi. Tyin tun naquihin vaha ndo itsi tsitsi añima ndo, cua coo ndo iin caa ñi tsihin Nyoo Jutu yo tan tsihin Sehe ra.

²⁵ Tan ñayivi nyito can cuvī tsa catyí ra Jesucristo tyin cuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo.

²⁷ Maa tyin ra Jesucristo tsaḥa ra Tatyí Ii Nyoo iyó añima ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihí maa tyiñu tsi ndo. Tan tsa nditsa cuvī tsi, ñavin cuendu cuvī tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

²⁸ Tan vityin nyooho, tsa cuvī tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsaa ra.

²⁹ Vityin tsa tsa tsitó ndo tyin vaha ra Cristo, cuñi tsi coto ndihí ndo tyin tandihí nyivi javahá tsa vaha, sehe Nyoo tsi ñi.

3

Nyivi cuvī sehe Nyoo

¹ Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuvī yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra.

² Nyooho yañi, tsa cuvī yo sehe ra vityin, maa tyin ñaha ca coto yo náa cua cuvī yo. Maa tyin tsitó yo tyin quivi quitsi ra Jesucristo, cua cuvī yo tumaa cuvī maa ra, tyin cua nyehe vaha yo tsi ra tan cua nyehe tucu yo nácaa caá ra.

³ Tandihí yoo tsa ndatú tsa cua cuvī tacan, nducú yo cuhva janduvaha yo tsi yo, tan cuvī yo tumaa maa Jutu Mañi yo Jesucristo, tyin maa ra cuiti iyó ra.

⁴ Tandihí nyivi tsa tsicoó cuatyí, ñi ican cuvī ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyí tyin ña tyaá yahvi yo ley Nyoo.

⁵ Nyooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra.

⁶ Tandihí yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyívi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra.

⁷ Nyooho, tsa cuví tumaa sehe yu, coto jandavi ñaha nyívi tsi ndo. Tyin nyívi javahá tsa vaha, cuví ñi nyívi vaha, tumaa vaha maa ra Cristo.

⁸ Tyin nyívi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quívi jihna ñi. Yacan cuenda quítsi ra Jesucristo, Sehe Nyoo, tyin janaa ra tandihí tsa javahá nu.

⁹ Tandihí yoo tsa tsa yahá nacacú tsaahá Nyoo, ña taahán ca iñi yo javahá yo tsa ña vaha, tyin iyó yo ñayívi tsaahá Nyoo tsi yo. Yacan cuenda ña javahá ca yo tsa ña vaha, tyin tsa yahá nacacú tsaahá yo tan vityin cuví yo sehe Nyoo.

¹⁰ Cuví nacotó yo ndáa nyívi cuví sehe Nyoo, tan ndáa nyívi cuví sehe nu ña vaha, tyin tandihí nyívi tsa ña javahá tsa vaha tan ña cuñí tsi nyívi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

¹¹ Tyin tsa tsiñi ndo nda quívi jihna ñi cuví: Tsa cuñi tahan yo tsi yo.

¹² Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³ Nyooho yañi, ña iyo cuñi ndo tun ndasi cuñi nyívi ña yihí tuhun Nyoo nyehé ñi tsi ndo.

¹⁴ Yoo tsa cuñí tsi nyívi yihí tuhun Nyoo tsitó yo tyin iyó yo ñayívi nyito, tyin juvin tsi janahá tsi yo tyin ña cuví ca yo nyívi tsihi. Maa tyin nyívi ña cuñí tsi nyívi yihí tuhun Nyoo, cuví ñi tumaa nyívi tsihi.

¹⁵ Nyívi ndasi cuñi nyehé tsi nyívi, cuví ñi tumaa nyívi tsahñi nyívi. Tan tsitó ndo tyin ndi intuhun ñi tsahñi nyívi, tan ña cua cuhva Nyoo ñayívi nyito coo ñi.

¹⁶ Tsitó yo náa cuví tsa cuñi tahan yo tsi yo tyin tsa yahá janahá ra Jesucristo tsi yo náca taahán tsi cuñi tahan yo tsi yo. Tyin maa ra nda cuanda tsaahá ra ñayívi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñí tsi cuhva yo nda cuanda ñayívi iyó yo tsa cuenda nyívi yihí tuhun Nyoo.

¹⁷ Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyívi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra.

¹⁸ Nyooho tsa cuví ndo tumaa sehe yu, na ña cuñi yo tsi nyívi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

Naca javaha yo tan coo vaha yo tsihin Nyoo

¹⁹ Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo.

²⁰ Tatun tuví iñi tsitsi añima yo tyin iyó cuatyi yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandihí tsa iyó añima yo tan cahnu ca cuví ra tan ñavin ca añima yo.

²¹ Yañi, tatun tuví iñi yo tyin nduve cuatyi yo, na ña nayuhvi yo nyehe yo tsi Nyoo.

²² Tan tandihí tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra.

²³ Tyin tyiñu tsa tsaha ra tsi yo yacan cuví tsa tsjnu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo.

²⁴ Nyivi tyaá yahvi tyiñu tsaha ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsaha ra tsi yo.

4

Tatyí Ii Nyoo tan tatyí nu ña vaha

¹ Nyooho yañi tsa cuñi xaan yu, ña tsjnu iñi ndo tsa caahán nyivi catyí tyin tuhun Nyoo caahán ñi. Nyehe jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi.

² Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsj ra nu ñuhu ñayivi ihya, tan cuví ra iin rayi tumaa maa yo.

³ Maa tyin tandihí nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya.

⁵ Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican.

⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndaa nyivi iyó Tatyí Ii Nyoo tsihin, tan caahán ñi tsa nditsa tan ndaa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihí nyivi

⁷ Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihí yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo.

⁸ Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihí nyivi.

⁹ Nyoo janahá ra tsi yo tsa cuñi ra tsi yo tsihin tsa tsaha ra Sehe mañi ra quitsj nu ñuhu ñayivi ihya, tyin cuhva ra ñayivi nyito coo yo.

¹⁰ Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsj ra Sehe ra tyin tacan tan cúu ra tsa cuenda yo tan quinyaa ra cuatyl yo.

¹¹ Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo.

¹² Ndi intuhun maa nyivi, tan ñaha ca maa nyehé ñi tsi Nyoo, maa tyin tatun cuñi tahan yo tsi yo, iyó Nyoo añima yo. Tan ñi vaha iñi yo cuñi yo tsi ra tan tsi nyivi.

¹³ Tan tsitó yo tyin iyó vaha yo tsihin ra tan maa ra iyó ra añima yo, tyin tsaha ra Tatyí Ii ra iyó añima yo.

¹⁴ Nyuhu nyehe vaha ndi tan cuví ndi tsandaa tyin jaquitsí Nyoo Jutu yo tsi Sehe ra tyin jacacu ra tsi yo tsa cuví yo nyívi iyó nu ñuhu ñayívi ihya.

¹⁵ Tandihí nyívi tsa tsinú iñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

¹⁶ Yoo tsitó yo tan tsinú iñi yo tyin Nyoo cuñí ra tsi yo, tan cuñí ra tsi tandihí nyívi. Tan tandihí yoo tsa cuñí tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo.

¹⁷ Tyin tatun cuñí yo tsi Nyoo tsihin tsa ñi iñi añima yo, ña cua nayuhvi yo nyehe yo tsi ra na tahan tsi quívi cutuñi tandihí nyívi nuu ra. Tyin tumaa iyó ra Jesucristo, tacan iyó yo nu ñuhu ñayívi ihya.

¹⁸ Nyoo cuñí ra tsi yo, tan tatun cuñí yo tsi ra, nduve tsa nayuhvi yo. Tatun ñi iñi yo cuñí yo tsi Nyoo ña nuña ca nu quihvi tuhun yuuhví can añima yo, tyin Nyoo jatsiyó ra tandihí maa yacan. Tyin tatun yuuhví yo, yihí can tyin tuví iñi yo tyin iyó cuatyi yo. Tan yuuhví yo tsa cua tatsi tuñi Nyoo tsi yo. Tyin tatun yuuhví cuñí yo, yuuhví yo tyin ñaha ca cuñí yo tsi Nyoo tumaa taahán maa tsi cuñí yo tsi ra.

¹⁹ Yoo cuñí yo tsi Nyoo tyin jihna ca maa ra cuñí tsi yo.

²⁰ Tatun iin nyívi tan catyí ñi: “Yuhu cuñí yu tsi Nyoo”, tan ndasi cuñí ñi nyehé ñi tsi nyívi tahan ñi, nyívi vatya cuví ñi. Tyin tatun ndasi cuñí yo nyehé yo tsi nyívi tahan yo tsa tuhvá yo nyehé, ¿nácaa cua cuñí yo tsi Nyoo tsa ña cuví nyehe yo? Ña cua cuví.

²¹ Tava tyiñu Nyoo tsi yo tyin tun cuñí yo tsi ra, tacan cuñí tsi tsa cuñí tahan yo tsi yo.

5

Tatun ñi iñi yo tsinú iñi yo tsi Nyoo cuví jaha canaa yo tsi tsa ña vaha

¹ Tandihí nyívi tsa tsinú iñi tyin ra Jesús cuví ra Cristo ra quee nda gloria jaha Nyoo, juvin ñi cuví sehe Nyoo. Tyin tatun cuñí yo tsi iin ra iyó sehe, cuñí ndihí yo tsi sehe ra.

² Tatun cuñí yo tsi Nyoo tan javahá yo tsa caahán ra, cua cuñí ndihí yo tsi nyívi cuví sehe ra.

³ Tyin tsa cuñí yo tsi Nyoo yacan cuví tsa tyaá yahvi yo tsa tsaha cuenda ra tsi yo. Tan tandihí tsa tsaha cuenda ra tsi yo, ña yí javaha yo can.

⁴ Tyin tandihí yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayívi ñayívi ihya. Cuví jaha canaa yo can tyin tsinú iñi yo tsi Nyoo.

⁵ Maa ñi maa nyívi tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayívi ihya.

Tatyí Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quitsí ra nu ñuhu ñayívi ihya. Tan tsa tsicoondutyá ra tsihin ndutyá tan tsa tsatí ñiñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuanda tsa tsatí ñiñi ra. Tan juvin ñi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ña jandaví ñaha tsi.

⁷ Nda andívi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha.

⁸ Tan nu ñuhu ñayivi ihya iyó tucu uñi tsandaa: Tatyí li Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyí Nyoo tyin juvin ra Jesús cuví Sehe ra. Tan tsa tsinu uñi cuví nu tsatí ñiñi ra Jesús. Tan tsa nduñi taahan yacan nacatsí tahan caahán can.

⁹ Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnú ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juvin ñi maa ra catyí tyin Sehe ra cuví tsi ra Jesús.

¹⁰ Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra.

¹¹ Tan tyehen caahán Nyoo tsihin yo: Catyí ra tyin tsahá ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra.

¹² Nyivi iyó Sehe Nyoo añima, iyó ñi ñayivi nyito. Tan nyivi nduve Sehe Nyoo iyó añima, ña iyó ñi ñayivi nyito.

Nu ndihí cahan ra Juan tan nu tsahá ra tyiñu tsi nyivi

¹³ Tyaá yu tuhun ihya tsa cuenda nyoocho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

¹⁴ Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñi maa ra tsicán yo, tsitó yo tyin maa ra tsiñi ra tsa caahán yo.

¹⁵ Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihí yo tsa tsicán yo tsi ra.

¹⁶ Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi.

¹⁷ Tandihí tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

¹⁸ Tsitó yo tyin nyivi tsa nacacú tsaahá jahá Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

¹⁹ Yoo tsa tsitó yo tyin cuenda Nyoo yihí yo. Tan tandihí nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

²⁰ Tan tsitó tucu yo tyin quitsí Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa.

²¹ Nyoocho tsa cuví tumaa sehe yu, jahá cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuví tsi tacan ñi.

Carta Tsinu Uvi Tsa Tyaa Ra Juan

Nu caahán ra Juan tyin cuñi xaan ra tsi nyivi yihí cuenda Nyoo

¹ Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñi xaan yu tsi ndo tsihin tsa ñi ñi añima yu. Tan cuñi ndihí tucu tandihí nyivi tsa tsitó tsa nditsa tsi ndo, yacan ñavin yuhu ñi cuñi tsi ndo.

² Cuñi ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo.

³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñi xaan ra tsi yo.

⁴ Si xaan cuñi yu tyin tsitó yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo.

⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñi yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsaha Nyoo tsi yo cuví tsi. Tyin tsa iyó maa tsi nda nu quitsaha.

⁶ Tsa cuñi yo tsi Nyoo, yacan cuví tsa javahá yo tandihí tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñi ndo tsi Nyoo tan tsi nyivi.

Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

⁷ Caahán yu tyehen tsihin un tyin cuaha xaan nyivi jandavi ñaha iyó nani cahn nu ñuhu ñayivi. Catyí ñi tyin ña nditsa tsa quitsí ra Jesucristo cacu ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasi cuñi nyehé tsi ra Cristo cuví ñi.

⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihí ca ndo tandihí tsa cua cuhva Nyoo tsi ndo.

⁹ Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaa yahvi ñi itsi, iyó Jutu yo Nyoo tan ra Jesucristo Sehe ra tsihin ñi.

¹⁰ Tatun tsaá nyivi yuvehe ndo, tan cuñi ñi jacuaha ñi tsi ndo tsa ña jacuaha ra Jesucristo, ña cuhva ndo cunyecú ñi yuvehe ndo tan ndi ña cuhva ndo nacumi tsi ñi.

¹¹ Tyin tun cuhva yo nacumi tsi ñi, cuñi tsi catyi tyin javahá ndihí yo tsa ña vaha tsa javahá ñi.

Nu ndihí cahan ra Juan

¹² Iyó cuaha ca tuhun cuñi yu cahan yu tsihin ndo. Maa tyin ña cuñi yu cahan yu can tsihin carta. Tyin tyaa yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusí ca ñi yo.

¹³ Ihya vatsí nacumi tsi un jahá sehe ña tahan un tsa nacatsí ndihí maa Nyoo.

Tan na cuví tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tshin Nyoo

¹ Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñi xaan yu tsi un tyin iin caa ñi nyicún yo tsa nditsa.

² Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tshin Nyoo, na nasoco ra tsi un tacan tan coo vaha un tan ña cuhvi un.

³ Yuhu sii xaan cuñi yu quivi quitsi juhva ra yañi yo naha ra nu nyii yu. Tan nacatyí tuhun ra naha tshin yu tyin nditsa tsa iyó un cuhva jacuahá ra Cristo, tan nyicún un tsa nditsa.

⁴ Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

⁵ Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra.

⁶ Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi maa Nyoo. Tyin tacan tan jañihí ca ra naha cuhun ra naha cahan ra naha tuhun Nyoo.

⁷ Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha.

⁸ Yacan cuenda maa yo taahán tsi jatyinyee tsi ra naha tshin tsa tsiñi ñuhu tsi ra naha. Tan tacan tan cutahan yo tshin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótfrefes

⁹ Yuhu jacuhun yu iin carta tsi nyivi tsicá vehe ñuhu, maa tyin ra Diótfrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tshin nyivi.

¹⁰ Yacan cuenda tatun quitsi yu nu yucú ndo cua jandaa yu tyiñu tshin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfrefes tsi ñi, tan tavá ra tsi ñi vehe ñuhu.

¹¹ Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹² Tandihí nyivi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahán ra Juan

¹³ Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tshin carta.

¹⁴ Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo.

¹⁵ Na coo tsa taxin añima un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñí yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaá ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñi xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo.

² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñi ra tsi yo. Tan na naquihin ca ndo tsa taxin tsahá ra tsi yo coo añima ndo.

Nu caahán ra Judas tuhun nyivi tsa jacuahá tsa ña nditsa (2 Pedro 2.1-17)

³ Tyihí yu kuhva tyaá yu iin carta tsa cuenda ndo yañi, tyin cuñi yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsaha Nyoo tsi yo tsa cuví yo nyivi yihí cuenda ra. Tyin iin tsaha ñi janaha ra nácaa tsinu iñi yo tsi ra tan ña cua nasama ra itsi.

⁴ Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yaha jaha Nyoo tucahnu iñi tsi yo, tan yacan cuenda cuví ñi javaha maa yo tsa cuñi yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñi yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacu ra tsi ñi ndaha nyivi Egipto can. Maa tyin tsa yaha can janaa ra tsi tandihí maa ñi tsa ña tsinú iñi tsi ra.

⁶ Tan juven ñi tacan javaha tucu Nyoo tsihin ángel tsa ña tyaá yahvi tsi ra. Tsaha ra tyiñu tsi nahnu, maa tyin nacoq nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahañ tsi quivi cutuñi nyivi.

⁷ Tacan tucu nyivi ñuu Sodoma tan ñuu Gomorra, tan nyivi ñuu nyihi tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javaha ñi. Tyin rayi can naha ra tsicoq ra naha tsihin ñaha. Tan ñiñaha tsicoq ñi tsihin iin rayi tan inga ra. Tan cuaha ca tsa caquiñi javaha ñi tyin rayi tsicoq ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhq tsa ña cua ndahva maa.

⁸ Vasu ndi maa tacan cuví, vityin ndi iyó ra jandaví ñaha naha ra. Cuñi ra naha tyin vaha javahá ra naha. Maa tyin jatívi ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha.

⁹ Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahañ ra tsihin nu ña vaha tsa cuenda cuñu ñuhu ra Moisés, ña cana iñi ra cahan ra ndavaha ñi siqui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha.

10 Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quití, tyin quití ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatívi ra naha juvin ñi tsi maa ra naha.

11 ¡Ndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoo ra naha ityi Nyoo tumaa javahá ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaa yahvi ra tsa cahán ra cuví ityi nuu tsihin ra.

12 Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsí ra naha tan tsihi ra naha tsihin tsa sii cuñi ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi siqui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuíi yoho tun.

13 Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andívi tsa tsinaa. Tsa nyaá maa tsa cua ndoo cuíi ra naha nu naa. Tacan ñi maa tsa cua tahan ra naha.

14 Tuhun ra can naha ra cahán ra Enoc tahan tsanaha. Ra Enoc tsa tsinu utsa tsa cuví tata ra Adán. Cahán ra tuhun tsa tsahá maa Nyoo tsi ra, tan catyi ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra”

15 tyin vatsí ra vatsí tatsí tuñi ra tsi nyivi caquiñi tsa cuenda tandíhi tsa ña vaha tsa javahá ñi, tan nyivi caahán ndavaha ñi siqui ra”, catyi ra Enoc tahan tsanaha.

16 Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyi ra naha: “Yii xaan, cahnu xaan tundoho nyehé yo.” Javahá ra naha tsa cuñi cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñi ra naha tsa cahan nyivi tyin vaha xaan iñi ra naha.

Nu tsahá cuenda ra Judas tsi nyivi yihí cuenda Nyoo

17 Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahán ra tsa tava tyiñu Jutu Mañi yo Jesucristo,

18 tyin catyi ra naha tyehen: “Nu cua ndíhi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.”

19 Ra tsa cahán ra naha tuhun cuví ra cuñi jasiin tsi yo. Tyin tyaa yahvi ra naha cuhva cuñi cuñu ñuhu ra naha tan nduve Tatyí Ii Nyoo iyó tsihin ra naha.

20 Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Nďacan tahvi ndo tsi ra tsihin tunyee iñi Tatyí Ii maa ra.

21 Nďucu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñi xaan ra tsi yo. Tan cūatu ndo quivi cuhun yo coo cuíi yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahví iñi ra tsi yo.

22 Cahán yuhu ndo tsihin nyivi tsa ña tsinú iñi, na tsinu iñi ñi.

²³ Nducu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

Nu ndihi cahān ra Judas tan jacahnu ra tsi Nyoo

²⁴⁻²⁵ Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cuhun yo tsihin ra nu cahnu cuví nu nyaá ra. Tan sii xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsj tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuví tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuví musu ra.

² Tan caahán yu tandihi tsa nyehe yu. Tan cuví yu tsandaa tsa cuenda tuhun Nyoo tsa jacoto ra Jesucristo tsi yu.

³ Sii xaan cuví tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsi yu tutu ihya tsi nyooho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí li tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juven ra cuví Nyoo nda tsanaha, tan vityin, tan juven ra cua quitsi.

⁵ Tan naquihin tucu ndo tsa vaha jahá ra Jesucristo. Tyin ra ican cuví ra tsandaa tan tsa nditsa. Juvín ra cuví ra tsa nandoto tsa jihna ñi. Tan ndacá ñaha ra tsi ra cuví rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatya ra tsi yo tshihín niñi ra.

⁶ Tan tsaha ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andivi! Tandihí nyivi cua nyehe ñi tsi ra nda cuenda nyivi tsa jañicueehé tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juven ñi maa ra cuví. Nditsa, tacan cua cuví, tan na cuví tsi tacan ñi.

⁸ Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: juven ra cuví Nyoo nda tsanaha, tan vityin, tan juven ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuví yu yañi ndo. Tan iin caa ñi nyehé yu tundoho tshihín ndo, tan ndacá ñaha Nyoo tsi yo, tan iin caa ñi cunyeé xaan iñi yo náa cuví tsi yo tyin jatyinyeé ra Jesucristo tsi yo. Nyíi yu vehe caa ñuhu Patmos tsa canyíi mahñu ndutya ñuhu. Nyíi yu vehe caa tsa cuenda tsa caahán yu tuhun Nyoo tsa jacuahá ra Jesucristo.

¹⁰ Tan iin tumingu quivi jacahnú yo tsi Jutu Mañi yo, tuví iñi yu tsa nyaá Tatyí li Nyoo tshihín yu. Tan tsifí yu iin ndusu ñihi xaan ityi tsata yu, tumaa ndusu trompeta.

¹¹ Tan catyí tsi tshihín yu tyehen:

—Yooho, Juan. Yuhu cuví ra jihna ñi, tan yuhu cua coo nu cua ndihí quivi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe

ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyico coo yu tyin cuñí yu nyehe yu yóo caahán tsihin yu. Tan nyehe yu utsa taahan candileru xuhun cuaan.

¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayiñ ñuhu ñayivi ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiqui nyica ra.

¹⁴ Tan ixí jiñi ra cuitsin tsi, tumaa cuitsin ixí mbee, tan tumaa cuitsin catyí. Tan tinuu ra caá tsi tumaa caá nu cayú ñuhu.

¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha.

¹⁶ Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehe ñicanyii.

¹⁷ Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihi quivi.

¹⁸ Yuhu nyito yu vasu tsihi yu, maa tyin vityin ña cua cundihi maa tsa iyó yu. Tan iyó ndatu tsi yu tsa catyí yu ama taahán tsi cúu nyivi, tan tatun cuhun ñi anyaya o ña cuhun ñi.

¹⁹ Tyaa nu libru tandihi tsa nyehe un, tan tsa iyó vityin, tan tsa cua coo nu cuahán ca tsi.

²⁰ Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñí tsi catyí tsa utsa vehe ñuhu.

2

Nu quitsahá tsahá cuenda ra Cristo tsi nyivi tsicá tsa utsa vehe ñuhu: Tsa tsahá cuenda ra tsi nyivi tsicá vehe ñuhu ñuu Éfeso

¹ Jachuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyí tsihin ra tyehen: “Tyehen catyí ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan:

² Yuhu tsitó yu tandihi tsa javahá ndo. Tan nyehe yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñí ndo nyehe ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyí tyin ra tsicá tyiñu Nyoo cuví ra naha, tan tsitó ndo tyin ña nditsa ra naha.

³ Cunyeé xaan iñi ndo. Tan nyehe xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo.

⁴ Maa tyin iyó iin tsa ña vaha javahá ndo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi.

⁵ Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javaha ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi.

⁶ Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan.

⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuví jaha canaa ndo tsi nu ña vaha, cuhva yu tsa catsi ndo tsi yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesucristo tsi nyivi tsicá vehe ñuhu ñuu Esmirna

⁸ Jacuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyí tsihin ra tyehen: “Tyehen catyí ra cuví tsa jihna ñi, ra cua coo nu cua ndihí quivi, ra tsa tsihí tan nandoto:

⁹ Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi.

¹⁰ Maa tyin ña nayuhvi ndo tsa nyehé ndo tundoho. Tyin nu ña vaha cua tyihí nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cüanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo.

¹¹ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuví jaha canaa ndo tsi nu ña vaha, ña cua cuhun ndo anyaya, quivi cúu nyivi tsa tsinu uvi tsaha.”

Tsa tsahá cuenda ra Jesucristo tsi nyivi tsicá vehe ñuhu ñuu Pérgamo

¹² Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyí tsihin ra tyehen: “Tyehen catyí ra tsa ndahá mityi tsa xaan nduvi tsiyo yuhu:

¹³ Yuhu nyehé yu tandihí tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuví tsandaa cuenda yu.

¹⁴ Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñí jandihí cuhva tsa javaha ra Balaam, ra tsicoo tsanaha. Tyin ra Balaam natyuhü ra tsi ra Balac, na jacatsi ra cuñi quiti tsa jamañi nyivi nu tsitoho tsi nyivi Israel. Tan natyuhü ra tsi ra na catyí ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindaha ñi, tan tacan tucu ñi rayi.

¹⁵ Tan juvin ñi iyó tucu juhva nyivi tsa ña cuñí nacoo tsa jacuahá ra yihí cuenda ra Nicolás. Tan yuhu ndasi cuñí yu nyehe yu tsa jacuahá ra can naha ra.

¹⁶ Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu.

¹⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuví jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyii xeehe. Tan cua cuhva yu iin yuu cuitsin

tsi ndo. Tan nu yuu can nyaá iin sivi tsaá tsa yoñi tsitó; intuhun ñi nyivi tsa cua naquihin yuu can cua coto sivi can.”

Tsa tsahq cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan çatyi tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronze tsa xiñu xaan.

¹⁹ Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsj tsi.

²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicoq tahañ tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayi tsihin ñaha o iin ñaha tsihin rayi tun ña tindahá ñi. Tan jacuahá ña tyin cuví catsi ñi nyayu tsa jamañi nyivi tsi tsitoho.

²¹ Yuhu tsa ndatu xaan yu tsa nasama ña cuhva iyó ña, maa tyin ña cuñi ña javaha ña can. Ña cuñi ña jandihí ña tsa tsicá nuu ña tsihin rayi.

²² Tan vityin cua quihin cuehe tsi ña tan ña cua cuví nduvita ña. Tan nyivi javahá tsa caquiñi tsihin ña, cua cuhva yu tundoho nyehé ñi tatun ña ndu uvi iñi ñi tsa javahá ñi.

²³ Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyoocho cua cuhva yu tsa taahán tsi tsi ndo tsa cuenda tsa javahá ndo.

²⁴ Maa tyin tandihí ca nyoocho tsa iyó ñuu Tiatira, nyoocho tsa ña naquihin cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yí siqui ndo.

²⁵ Maa tyin jañihi ndo javaha ndo tsa vaha nda cuanda quitsi nyico yu.

²⁶ Tan nyoocho tsa jaha canaa tsi nu ña vaha, tan javahá ndo cuhva cuñi yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya.

²⁷ Tumaa tsahq Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahvi cuatyí yo quisi.

²⁸ Tan cua cuhva yu tiñuu cahnu tsa caná tsa naa ca coo tsihin ndo.

²⁹ Nyoocho tsa iyó soho, tyqa soho ndo tsa caahán Tatyí Ii Nyoo tsihin nyivi tsicá vehe ñuhu.”

3

Tsa tsahq cuenda ra Jesucristo tsi nyivi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan çatyi tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo.

² Jaha cuenda vaha ndo tsa vaha tsa iyó luxu ca tsi ndo. Tyin coto ndihi ndihi tuhun yu nu yucú ndo. Nyehé yu tyin nuu Nyoo ña vaha maa tsa javahá ndo.

³ Nduçuhun iñi ndo tsa vaha tsa cutuhva ndo. Çuanyicun ndo can, tan naşama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu.

⁴ Maa tyin iyó juhva nyooho, nyiví Sardis, tsa ña janyahyú jahma; ña javahá ndo tsa caquiñi cuví can. Tan juvin nyooho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo.

⁵ Tan nyooho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu siví ndo nu libru nu nyecú siví tandihi nyiví cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo.

⁶ Nyooho tsa iyó soho, tyaa soho ndo tsa caahán Tatyí Ii Nyoo tsihin nyiví tsicá vehe ñuhu.”

Tsa tsaha cuenda ra Jesucristo tsi nyiví tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyiví tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyiví tan ña cuví nacasi. Tan tatun nacasi ra, ndi intuhun ñi tan ña cuví nuña ñi. Tyehen catyí ra:

⁸ Yuhu nyehé yu tandihi tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsaha yu tsa cahan ndo tuhun Nyoo tsihin nyiví, tan yoñi cuví casí tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu.

⁹ Tan nyiví yihí cuenda nu ña vaha, ñi vatya, ñi catyí tyin nyiví Israel cuví ñi, maa tyin ñavin nyiví Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo.

¹⁰ Tyin cunyeé xaan iñi ndo tumaa catyí yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quiví cua jaquitsi yu tundoho cahnu siqui tandihi nyiví, tyin cua nducu cuhva yu tsi tandihi ñi iyó nu ñuhu ñayiví.

¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyiví tsa vaha tsa cua ñihi ndo.

¹² Nyooho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu siví Nyoo yu tsi ndo, tan siví ñuu Nyoo yu, ñuu Jerusalén tsa tsa cua quee nda andiví, tan juvin ñi cua tyaa tucu yu siví tsa yu tsi ndo.

¹³ Nyooho tsa iyó soho, tyaa soho ndo tsa caahán Tatyí Ii Nyoo tsihin nyiví tsicá vehe ñuhu.”

Tsa tsaha cuenda ra Jesucristo tsi nyiví tsicá vehe ñuhu ñuu Laodicea

¹⁴ Jacuhun tucu tutu tsi ra caahán tuhun yu tsihin nyiví tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javaha Nyoo tandihi maa tsa iyó:

¹⁵ Yuhu nyehé yu tandihi tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihí

tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihi cuii ndo tsa tsinú iñi ndo tsi yu.

¹⁶ Maa tyin tsa cuenda tsa cuví ndo tumaa ndutyá vixin ñi ndi ña vitsin tan ndi ña ihñi ndo, cua ndutsan yu tsi ndo.

¹⁷ Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuiihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandiñi ndo tsitsi añima ndo?

¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naq tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandiñi ndo. Tan jata ndo numeri quihví tinuu ndo tyin tacan tan cuví nyehe ndo.

¹⁹ Yuhu tsahá cuenda yu tan tatsí tuñi yu tsi tandihi nyivi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha.

²⁰ ¡Nyehe jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuña ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu.

²¹ Cua cuhva yu tsa cunyecú ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra.

²² Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu” —catyí ra Jesucristo.

4

Tsa cuví nda gloria

¹ Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehe tan janaha yu tsi un tsa cua cuví nu cuahán ca tsi —catyí ndusu can tsihin yu.

² Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá.

³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan taniñi cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda.

⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinú nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha.

⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí ii Nyoo.

⁶ Tan ityi nuu tyayu can iyó tucu iin tsa caá tumaa caá ndutyá ñuhu, tan xiñu xaan can tumaa xiñu yutyí.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can.

⁷ Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayi caá nuu can. Tan tsa tsinu cumi tumaa caá tasu tsa cuahán ndavá.

⁸ Tan iyó iñu nditsin tsa intuhun intuhun tsa nyito can. Tan tani cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan,

¹⁰ tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquin ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuví un.

Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoq tandihí tsa iyó, catyí ra naha.

5

Nu nyehe ra Juan iin tutu tan Mbee Ticatyí Luhlu tsa cuví ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tshin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tshin utsa sellu.

² Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi.

⁴ Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi.

⁵ Tacan tan catyí iin ra tsahnu tsa nyaá can tshin yu:

—Ña vacu ca un. Tyin ra cuví Ndicaha [o cuñi tsi catyi, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tani cahnu nu ñuhu ñayivi.

⁷ Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihñ ra tutu tsa ndahá ra can nu ndaha cuaha ra.

⁸ Cuhva tsa quihñ ra tutu can, tandihí tsa cumi tsa nyito can tan tandihí tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda

nuu guitarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihí tsa tsicán tahvi nyívi yihí cuenda Nyoo.

⁹ Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyívi tsi un. Tan tsihin ñiñi un jatá un tsi ndi tyin coo vaha ndi tsihin Nyoo.

Tan cuví ndi nyívi ñuu nyihi tan ñuu nahnu tsa iyó tanií cahnu nu ñuhu ñayívi, nyívi caahán siin siin yuhu, tan nyívi siin siin tata.

¹⁰ Tsaḥá un tsa cuví ndi rey tan jutú tsa cuenda Nyoo Jutu yo.

Tan cua cundaca ñaha ndi tsi nyívi iyó nu ñuhu ñayívi, catyí ra naha, tsitá ra naha.

¹¹ Yahá can tan tsiñi yu ndusu tan nyehe yu nyecú cuenda millón ángel tanií canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can.

¹² Tan ñihi caahán ángel can naha ra, tan catyí ra naha:

Ra Mbee Ticatyí Luhlu tsa tsahñi nyívi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihí tunyee iñi.

Na jacahnu yo tsi ra tan na jacahnu tandihí nyívi tan tandihí tsa iyó tsi ra, tyin cahnu xaan cuví ra, catyí ángel can naha ra.

¹³ Tan tsiñi tucu yu tsa caahán tandihí tsa javahá Nyoo; tandihí tsa iyó andívi, tan nu ñuhu ñayívi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyí Luhlu.

Tan tunyee iñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihí tsa javahá Nyoo.

¹⁴ Tan catyí tsa cumi tsa nyito can:

—¡Na cuví tsi tacan! —catyí tsi naha tsi.

Tan tsicuiñi tsi tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

6

Nu jocon ra Jesucristo tsa utsa sellu tsa ndasí tutu can

¹ Tacan tan nyehe yu nu jocon ra Mbee Ticatyí Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

² Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

³ Tan tsa jocon ra Mbee Ticatyí Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

⁴ Tan quita iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayiví, tyin tacan tan cahñi tahan nyiví tsi ñi. Tan ñihí ndihí ra iin mityi cahnu cundahá ra.

⁵ Tan tsa jocoñ ra Mbee Ticatyí Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—iÑaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya.

⁶ Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyiví tsi iin musu tsa iin quiví, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jatíví ndo acetye tan vinu —catyí ndusu can.

⁷ Tan tsa jocoñ ra Mbee Ticatyí Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—iÑaha, tan nyehe un! —catyí tsi tsihin yu.

⁸ Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihi. Tan tsata ra can vatsí inga ra tsa nañi Nu Yucú Añima Ndiyí. Tan ñihí ra naha tunyee iñi tsa cahñi ra naha tsa cuaha nyiví iyó nu ñuhu ñayiví. Tyin tsitsi tsa sava nyiví iyó nu ñuhu ñayiví, cua cahñi ra naha sava ñi. Tan cua cahñi ra naha tsi ñi tsihin tsa jacoó ra naha cuatyí, tan tsihin tama, tan tsihin cuehe, tan tsihin quiti xaan iyó nu ñuhu ñayiví.

⁹ Tan tsa jocoñ ra Mbee Ticatyí Luhlu can tsa tsinu uhun sellu can, nyehe yu xuu altar. Tan ican yucú añima nyiví tsa tsihi tsa cuenda tsa jacotó ñi tuhun Nyoo.

¹⁰ Tan caná tsaá ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyiví tsa tsañi tsi ndi tsa cuenda un? —catyí ñi.

¹¹ Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quiví, nda cuanda cahñi nyiví tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

¹² Tan tsa jocoñ ra Mbee Ticatyí Luhlu can tsa tsinu iñu sellu can, nyehe yu tyin ñihí xaan taán. Tan ndutuñ ñicanyii tumaa tuun jahma nyiví iyó tucuihya iñi. Tan yoo nducuaaha tsi tumaa cuaaha niñi.

¹³ Tan tiñu cucoyó tsi nu ñuhu ñayiví tumaa cucoyó tsi yutya yutun tatun ñihí yahá tatyí.

¹⁴ Tan andiví tsiquihí tsi tsi tumaa tyihí tsi yu iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasama nu cayucú tsi.

¹⁵ Tan tandihí rey tsa iyó nu ñuhu ñayiví tsihin ra nahnu naha ra, tan ra cuca naha ra, tan ra cuví ityí nuu tsihin andaru naha ra, tan ra iyó xaan tunyee iñi tsi naha ra, tan tandihí nyiví tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu.

¹⁶ Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyí Luhlu can tsi ndi.

¹⁷ Tyin tsa tsaá quiví cahnu tsa cua tatsi tuñi ra tsi ndi, tan yoñi cunyee iñi can —catyí ñi.

7

Nu ñihí nyívi Israel tuñi cunyaq nutyaan ñi

¹ Tsa yaha can tan nyehe yu nyecú cumi ángel tsa ndihi tsa cumi tutun ñuhu ñayívi ityi nu tuhvá tatyí queé tyin tacan tan ña yaha tatyí nu ñuhu ñayívi tan nu ndutya ñuhu tan nu yutun.

² Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan caná tsa ra tsi tsa cumi ángel tsa ñihí ndatu tsa jatívi nu ñuhu ñayívi tan nu ndutya ñuhu. Tan catyí ra tsihin ra naha:

³ —Ña jatívi naha ndo nu ñuhu ñayívi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyívi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsiñi yu tyin cientu uvi xico cumi mil cuví nyívi Israel tsa tsinyaq tuñi can.

⁵ Utsi uvi mil nyívi tata ra Judá tsinyaq tuñi, tan utsi uvi mil nyívi tata ra Rubén, tan utsi uvi mil nyívi tata ra Gad,

⁶ tan utsi uvi mil nyívi tata ra Aser, tan utsi uvi mil nyívi tata ra Neftalí, tan utsi uvi mil nyívi tata ra Manasés,

⁷ tan utsi uvi mil nyívi tata ra Simeón, tan utsi uvi mil nyívi tata ra Leví, tan utsi uvi mil nyívi tata ra Isacar,

⁸ tan utsi uvi mil nyívi tata ra Zabulón, tan utsi uvi mil nyívi tata ra José, tan utsi uvi mil nyívi tata ra Benjamín. Tandihí ñi can tan tsinyaq tuñi Nyoo tsi ñi.

Nu nyehe ra Juan tsi nyívi nditsí jahma cuitsin

⁹ Tsa yaha can tan nyehe yu yucú cuaha nyívi. Tan yoñi maa cuví nacahvi tsi ñi, tyin cuaha xaan ñi. Yucú nyívi quee tandihí ñuu nyihí tan ñuu nahnu tsa iyó tanií cahnu nu ñuhu ñayívi. Tan yucú nyívi caahán siin siin yuhu. Tan yucú nyívi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyi Luhlu. Nditsí ñi jahma cuitsin. Tan ndahá ñi ndaha ndicaha.

¹⁰ Tan tandihí ñi caná tsa ñi tan catyí ñi:
Nyoo Jutu yo, ra nyaá nu tyayu, tan ra Mbee Ticatyi Luhlu,
juvin ra naha jacacu tsi yo —catyí ñi caná tsa ñi.

¹¹ Tan tandihí ángel naha ra nyecú ra naha tanií canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiiti ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo.

¹² Tan catyí ra naha:
Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihí tyembu, catyí ra naha.

¹³ Tacan tan tsicá tuhun iin ra tsahnu can tsi yu tan catyí ra:
—¿Yóo nyívi cuví ñi nditsí jahma cuitsin ihya? ¿Tan ndáa ityi quee ñi?
—catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyívi ihya cuví ñi nyehe tundoho cahnu. Maa tyin nacatya ñi jahma ñi tsihin niñi ra Mbee Ticatyi Luhlu tan nducuitsin tsi.

¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi.

¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi.

¹⁷ Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

8

Nu joçon ra Jesucristo tsa tsinu utsa sellu tan nu quitq iin ángel tsihin iin cuu xuhun cuaan

¹ Tan tsa joçon ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andivi tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quihñin cuenda ra naha iin trompeta.

³ Yahá can tan tsaá inga ángel tsa ndahá iin cuu xuhun cuaan. Tan tsinyaa nyityi ra ityi nuu altar can. Tan quihñin cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo.

⁴ Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo.

⁵ Tacan tan ángel can quihñin ra cuu can tan jacutu ra can tsihin tuun ñuhu tsa quitq nu altar can. Tan tyoso ra can nu ñuhu ñayivi. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsahá cuún savi tan cucoyó yuu savi, ñihi cayú ñuhu tan sacá nuu niñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacavá can mahñu ndutya ñuhu. Tan tsa yatyin sava ndutya ñuhu can nanduví tsi niñi.

⁹ Tan tsa tandihí quití iyó tsitsi ndutya ñuhu can tsihi tsa yatyin sava ti naha ti. Tan tahví cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacavá iin tiñuu cahnu. Cayú tsi tumaa cayú yiti. Tan nacavá tsi siqui tsa yatyin ña sava yutya nahnu tan tsa yatyin ña sava nu ndohyo.

¹¹ Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvá tsi tumaa tsa uva xaan ajenjo can. Tan cuaha xaan nyivi tsihi tyin tsihi ñi ndutya tsa ndu uvá can.

¹² Tan tsa tiví tsa tsinu cumi ángel can trompeta tsa ndahá ra, ndu naq tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaq tsi naha tsí. Tan tsa cuenda tsa ndunaq juhva ñicanyii, ndunaq nu

ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

¹³ Yahā can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

—¡Ndahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9

¹ Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacava can nu ñuhu ñayivi. Tan quihin cuenda can ndaha tucu tsa cuenda yavi cunu tsa nduve maa nuu tsindihi.

² Tacan tan nuñā can yuhu yavi can. Tan quita cuaha yuhma tumaa quitá yuhma tsitsi iin ono cahnu. Tan tyasi yuhma can nuu ñicanyii tan nasaca nuu can tsihin tatyí. Tan ndunaā nu ñuhu ñayivi.

³ Tan tsitsi yuhma can quita tica xama. Tan ndava ti naha ti nu ñuhu ñayivi. Tan ñihj ti naha ti ndatu tsa tyaa ti naha ti tsi nyivi tumaa tyaá tujuhma tsa iyó nu ñuhu ñayivi.

⁴ Quihin ti naha ti tuhun tyin na ña jativi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan.

⁵ Ña ñihj ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaá tujuhma.

⁶ Quivi can nyivi cua nanducu ñi tuhun tsiihí. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsiihí cua cunu tsi nuu ñi tyin ña cua cúu ñi.

⁷ Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi.

⁸ Tan ixí jiñi ti naha ti caá tumaa caá ixí jiñi ñaha. Tan nuhu ti naha ti caá can tumaa caá nuhu ndicaha.

⁹ Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí.

¹⁰ Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo.

¹¹ Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyí: Nu Janaá.

¹² Tsa yahā iin tundoho, tan cumañi uvi taahan ca.

¹³ Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quita tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo.

¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyí ndusu can.

¹⁵ Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi.

¹⁶ Tan tsiñi yu tyin uvi cientu millón andaru tsa yosó cuayu.

¹⁷ Tacan nyehe yu cuayu jahā Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre.

¹⁸ Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre.

¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nu juhma ti naha ti caá tumaa caá jiñi coo. Tan tsihin yacan jañicuehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuvi nyehe, ndi ña tsiñi, ndi ña cuví caca.

²¹ Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú.

² Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi.

³ Tacan tan canā tsa ra, tumaa taná ndicaha tsa cuxaán ti. Tan cuhva tsa canā tsa ra, tsiñi yu utsa ndusu tumaa cuvi nu caahán savi, tan intuhun intuhun tsi caahán tsihin ndusu maa tsi.

⁴ Tsa yahā tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyí tsi tsihin yu:

—Naquihin xeehe tuhun tsa cahān tsa utsa ndusu can. Tan ña tyaa un can nu tutu —catyí ndusu can.

⁵ Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaā ra ndaha cuaha ra ityi andivi.

⁶ Tan ángel can catyí ra:

—Na nyehe maa Nyoo ra ña cua cundihí maa, ra tsa javahā andivi tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee.

⁷ Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyí Nyoo tyin javaha ra, tumaa cahān ra tsihin ra jahā tyiñu tyiñu ra, ra cuvi ndusu yuhu ra —catyí ángel can.

⁸ Tan ndusu tsa quitá andivi, tsa cahān jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandicā tsa ndahá ra ángel tsa tsañi nu ndutya ñuhu tan nu ñuhu ñayivi —catyí tsi.

⁹ Tacan tan tsahan yu nu nyaá ángel can tan tsicān yu libru luhlu can tsi ra, tan catyí ra tsihin yu:

—Juhun, çatsi itsi. Vixi xaan tsi cua cuví tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

¹⁰ Tacan tan quihñ yu libru luhlu tsa ndahá ra, tsatsi yu. Tsa ndi nyí tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uva tsi tsitsi yu.

¹¹ Tacan tan catyí ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuví rey naha ra —catyí ra tsihin yu.

11

Nduvi ra tsa cuví tsandaa naha ra

¹ Tacan tan tsahā ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Nduvita tan tyihñ cuhva un vehe ñuhu Nyoo tan altar ra, tan çahvi najava taahan nyivi jacahnú tsi ra tsitsi vehe can.

² Maa tyin ña tyihi cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava.

³ Tan yuhu cua jacuhun yu uvi ra tsa cua cuví tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴ Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi.

⁵ Tan nyivi tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihñ nyivi xaan iñi tsi ra naha.

⁶ Tan iyó ndatu tsi ra naha tsa casi ra naha nu cuun savi tandihñ quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha niñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tsihin tandihñ nuu cuehe. Tan cuví javaha ra naha yacan najava tsaha cuñi maa ra naha.

⁷ Maa tyin tsa cua ndihñ cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tsihin tsa nduvi taahan ra cuví tsandaa can. Tan cua jaha canaa ti tsi ra naha. Tan cua cahñi ti tsi ra naha.

⁸ Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuví ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can].

⁹ Tan tsitsi tsa uñi quivi sasava, cua nyehe tandihñ nyivi cuñu ñuhu ra naha; nyivi iyó tandihñ ñuu nyihi, nyivi tandihñ ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihñ xeehe cuñu ñuhu ra naha tsitsi ñuhu.

¹⁰ Tan siñ xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa siñ cuñi ñi tsa cua cúu nduvi taahan rayñi tsa cahan tuhun Nyoo tsihin ñi. Tyin cuñi maa ñi tyin tsahā xaan ra naha tundoho tsi ñi.

11 Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi.

12 Tan tsa yaha tsa tsihi ra naha tan nyehe yu nandoto ra naha, tan catyi iin ndusu ityi andivi tsihin ra naha:

—Naha ndo nyehe

Tacan tan nandaa ra naha ityi andivi tsitsi vico. Tan nyehe nyivi xaan ifi tsi ra naha nu nandaa ra naha.

13 Tan ñihi xaan taan cuhva can. Tan tsitsi ñuu can tani cuaha xaan vehe. Tsitsi tsa utsi utsi vehe, tani intuhun intuhun tsi. Tan tsihi utsa mil nyivi jahā tsa taan can. Tan nyivi tsa ña tsihi, jacahnū ñi tsi Nyoo, ra nyaá andivi, tsa cuenda tsa yuuhvi ñi.

14 Yacan cuvī tundoho tsa tsinu uvi tsa nyehe nyivi, maa tyin tsa vatsi tsa tsinu uñi.

Nu tiví tsa tsinu utsa ángel trompeta tsa ndahá ra

15 Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyi tsi:

Tandihí nu ndacá ñaha rey nu ñuhu ñayivi, tsa yahā nanduví tsi tsa tsii Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyi ndusu can.

16 Tacan tan tsa oco cumi ra tsahnu tsa nyecú nu nyaá Nyoo, tsicuiñi tsi ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo.

17 Tan catyi ra naha:

Jutu Mañi ndi Nyoo ndi. Ra iyó tandihí tunyee ifi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvin un cua quiti.

Tsahá xaan ndi tyahvi nyoo tsi un,
Tyin tsa naquihín cuenda un tunyee ifi un.

Tan tsa quitsahā ndacá ñaha un.

18 Tan vasu ndi maa cuxaán nyivi iyó tandihí ñuu nahnu.

Maa tyin tsa tsaā quivi tatsi tuñi un tsi ñi.

Tan tsa tsaā quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jahā tyiñu tyiñu un, ñi tsahā cuenda tuhun caahán un,

ñi tsa nacuhvā cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaā cuhva tsa janaa un tsi nyivi jativi tsi nyivi iyó nu ñuhu ñayivi, catyi ra naha.

19 Tacan tan nuñā yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoō ra tyiñu tsihin yo. Tan quihvi tatsa. Tan ñihí cuvaá tan caahán saví. Tan taan. Tan ñihi xaan cucoyo yuu saví.

12

Nu nducú coo xaan tsa iyó ndaha tsi ñaha

1 Tacan tan quituví tsa iyo cahnu ityi andivi. Quitā iin ñaha tan nditsí ña ñicanyii tumaa nditsí yo jahma. Tan tsañi ña nu yoo. Tan yihí iin corona tsa utsi uvi tiñuu jifñi ña.

2 Tan ñaha ihya ñuhú sehe ña. Tan tsacú xaan ña tsihin tsa cuuhvi tsitsi ña, tyin nyehe xaan ña tundoho.

³ Tacan tan quita inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti.

⁴ Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi.

⁵ Tan ñaha can jacacu ña iin rayi. Tan juvin ra cua cundaca ñaha tandihi nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yaha cacu ra, naquihin Nyoo tsi ra cuahán ra nu nyaá ra nu tyayu ra.

⁶ Tan cuahán ñaha can tsinú xeehe ña ñuhu ityi, nu janduvaha Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

⁷ Yaha can tan tsicoo cuatyí nda andivi, cañi tahan ángel Miguel tan tandihi ángel tsa cutahán tsihin ra tsihin coo xaan can. Tan coo can tsihin tandihi tatyí ña vaha tsa cutahán tsihin ti, cañi tahan ti tsihin ángel Miguel.

⁸ Maa tyin ña cuví jaha canaa ti tsa cañi tahan ti. Tan ña ñihí ca ti nu ndoo ti nda andivi tsihin tatyí ña vaha tsa cutahán tsihin ti.

⁹ Tacan tan tava Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihi nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

¹⁰ Tacan tan tsíñi yu iin ndusu ñihi xaan ityi andivi, tan catyí tsi:

—Vityin tsa tsaá quivi tsa jacacú Nyoo tsi nyivi. Tsa jaha canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tava ra naha tsi nu tsa tyaá xaan cuatyí siqui ñi nuu ra naha nduvi tan ñiñu.

¹¹ Tan jaha canaa ñi tsi nu tsihin ñiñi ra cuví Mbee Ticatyi Luhlu, tan tsihin tuhun Nyoo tsa cahan ñi tsihin nyivi. Ña nayuhvi ñi cúu ñi tan tsaaha cuenda ñi ñayivi ñi.

¹² Yacan cuenda cusii iñi nyooho tsa iyó andivi. Maa tyin jandavi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacava nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quivi tan cundihi tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacava nu nu ñuhu ñayivi, quitsaha nyaá ndaha nu tsi ñaha tsa tsicoo sehe yii can.

¹⁴ Maa tyin tsicoo uvi nditsin nahnu ñaha can tan caá can tumaa caá nditsin tasu. Tsicoo can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihi coo can tsi ña. Ican cuví nu cua ñihi ña tsa catsi ña tsitsi tsa uñi cuiya sasava.

¹⁵ Tan nu coo can tava nu ndutya tsihin yuhu nu, tyin coo yutya cahnu, tan tañi ñaha can tsitsi yutya can.

¹⁶ Maa tyin ñuhu ñayivi jatinyee tsi tsi ña, tyin ndata tsi tan nanyee yutya tsa javaha nu coo tsihin ndutya tsa quita yuhu nu.

¹⁷ Tan tsa ña cuví jaha canaa nu tsi ña, quitsaha cañi tahan nu tsihin nyivi cuví tata ña, ñi tsa tyaá yahvi tuhun caahán Nyoo, tan nyicún ñi tsihin tsa ñi iñi añima ñi tsa nditsa tsa caahán ra Jesucristo.

13

Nu nyehé ra Juan uvi quiti caquiñi

¹ Tan tsinyaa nyityi yu nu nyiti yuhu ndutya ñuhu, nyehe yu quita iin quiti caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo.

² Quiti caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quiti caquiñi can tsa cunyaa ti nu tyayu nu. Tan tsaha nu ndatu tsi ti tsa cundaca ñaha ti.

³ Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehe nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti.

⁴ Tan jacahnú ñi tsi nu coo xaan can, tyin tsaha nu ndatu tsi quiti can. Tan jacahnú tucu ñi tsi quiti can, tan catyí ñi:

—¿Yoñi maa cuví tumaa cuví quiti ihya? ¿Tan yoñi cuví cañi tahan tsihin ti? —catyí ñi.

⁵ Tan ñihj tucu quiti can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo.

⁶ Tacan javaha ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi.

⁷ Tan tsicoo tucu ndatu tsi ti tsa cañi tahan ti tsihin nyivi yihí cuenda Nyoo nda cuanda cuví jaha canaa ti tsi ñi. Tan ñihj ndatu tucu ti tsa quihj ndaha ti tsi nyivi ndihj ñi tata, nyivi caahán siin siin yuhu, nyivi iyó tandihj ñi ñuu nyihj, tan ñuu nahnu.

⁸ Tan nyivi tsa ña cua coo ñayivi tsa tsihin ra cuví Mbee Ticatyi Luhlu, ra tsa tsihj, ña cua coo ñi ñayivi tsa can tsa cuenda tyin ña tsinyaa sivi ñi nu libru ra tsa ndi cumañi ca tsinu ñuhu ñayivi. Tandihj maa ñi can cua jacahnú ñi tsi quiti caquiñi can.

⁹ Tatun yihj ndo iyó soho ndo, tyaa soho ndo tuhun ihya:

¹⁰ Nyivi tyihj tsi inga nyivi vehe caa, cua cuhun tucu maa ñi vehe caa. Tan nyivi tsa tsahnj tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihj cuenda Nyoo cuñi tsi cunyeet iñi ndo tan tsinu iñi ndo tsi ra.

¹¹ Yahá can tan nyehe yu quita inga quiti caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can.

¹² Tan ndacá ñaha ti tumaa ndacá ñaha inga quiti caquiñi can. Tan nyehe inga quiti can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnú ñi tsi inga quiti caquiñi tsa cuñi cúu jahá tsa caahvi tsa tsinyaa tsi ti.

¹³ Tan cuaha xaan tsa iyo javaha ti nda cuanda quita ñuhu andivi tan janacava ti can nu ñuhu ñayivi tyin nyehe nyivi.

¹⁴ Tan jandavj ñaha ti tsi nyivi iyó nu ñuhu ñayivi tsihin tsa iyo tsa cuví javaha ti nuu quiti caquiñi tsa jihna ñi. Tava tyiñu ti na javaha ñi iin tsitoho quiti caquiñi tsa tyahnya caahvi tsihin mityi, tan ña tsihj ti.

¹⁵ Tan quiti caquiñi tsa tsinu uvi can tsicoo ndatu tsi ti tsa cuhva ti tsa coo nyito tsitoho quiti caquiñi tsa jihna can tyin tacan tan cuví cahan tsi tan cahñi tsi tsi tandihj nyivi tsa ña cua jacahnú itsi.

¹⁶ Tan siin tyin catyí tsi tyin cunyaa tuñi tsi tandihj nyivi; nyivi nyihj, nyivi tsahnú, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi.

¹⁷ Tan yoñi maa cuví jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi.

¹⁸ Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quití caquiñi can. Tyin número rayií cuví can. Tan número can cuví iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacahnú ñi tsi Nyoo

¹ Yaha can tan nyehe yu tsi ra cuví Mbee Ticatyi Luhlu, nyaá nyityi ra jiñi yucu Sión. Tan yucú cientu uvi xico cumi mil rayií tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan.

² Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha.

³ Tan tsitá ra naha iin yaa tsa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayií tsa cacú nu ñuhu ñayivi cuví tsitá can.

⁴ Ra ihya naha ra cuví ra tsa ña tsicá nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyi Luhlu tandihi ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyi Luhlu tsa jihna ñi.

⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andivi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán siin siin yuhu.

⁷ Tan ñihi xaan cahan ra tan catyi ra:

—Nayuhvi ndo tsi Nyoo, tan jachahnu ndo tsi ra. Tyin tsa tahañ tsi cuhva tsa cua cutuñi nyivi. Jachahnu ndo tsi ra javaha andivi tan ñuhu ñayivi, tan ndutya ñuhu tan ndohyo —catyi ángel can.

⁸ Tan catyi inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa tani tsi. Tyin nyivi iyó ñuu can jacuaha ñi tsa caquiñi tsa javaha ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jaha ñi Babilonia cuví can —catyi ángel can.

⁹ Tacan tan vatsí tsa tsinu uñi ángel, tan ñihi cahan ra tan catyi ra:

—Tatun ndáa nyivi jachahnu tsi quití caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi,

¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jachaho ra vinu xaan tsi ñi nuu ángel tan nuu ra cuví Mbee Ticatyi Luhlu cuvi can.

¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsitoho ti, tan tsaha ñi tsi ñi cunyaa tuñi sivi ti.

¹² Yacan cuenda nyivi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeé iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andivi, tan catyí tsi tsihin yu: —Tyaá tuhun ihya: “Vityin tan ityí nuu, sñi xaan cua cuvi tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Lí Nyoo:

Nditsa, sñi xaan cua cuvi tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quitá inga ángel tsitsi vehe ñuhu tan ñihi xaan cana tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaá cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayivi, tan naquihñin ra tsa iyó nuu tsi.

¹⁷ Tacan tan quitá inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan.

¹⁸ Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan cana tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnya ra uvas can. Tan tyihñi ra itsi iin nu tyihñi ra tyin cua cuhñi ra itsi tan quita ndutya tsi. Tan yacan cuñi tsi catyí tsa cua tatsi tuñi Nyoo tsi nyivi.

²⁰ Tan nacuhñi ra uvas can ityí tsata ñuu, tan cuñi tsi catyí tyin cuaha xaan nyivi tsihñi, tan nu cuvñi can, cuaha xaan cuaha xaan niñi ñi tsati. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsí ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehé ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasaca ñuhu tsihin tsi. Tan nyivi tsa cunyeé jaha canaa tsi quiti caquiñi can tan tsi tsitoho ti, tan ña tsinyaá número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsaá Nyoo tsi ñi.

³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuvñi Mbee Ticatyí Luhlu. Tan catyí yaa can tyehen: Cahnu tan iyo xaan caá tandihi maa tsa javahá un,

Nyoo, Jutu ndi, iyó tandihi tunyee iñi tsi un.
 Ndoo xaan tan nditsa xaan ityi un,
 Yooho Rey cuenda tandihi nyivi iyó nu ñuhu ñayivi.
 4 ¿Yóo ña cua nayuhvi tsi un, yooho Jutu Mañi ndi?
 ¿Yóo ña cua jacahnu tsi un?

Tan intuhun ñi maa un cuví ra ii.
 Tan cua quitsi nyivi quee tandihi maa ñuu, tan cua jacahnu ñi tsi un,
 tyin nyehe ñi tsa vaha tsa javaha un, catyí yaa tsitá ñi.

5 Tacan tan nyehe yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu.

6 Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha.

7 Tacan tan iin tsa nyito can, tsaha can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitú maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihí maa tsa iyó ra.

8 Tan tsitú maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihí tsa utsa tundoho tsa vatsí ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

1 Tacan tan tsiñi yu iin ndusu ñihí xaan tsa quitá tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

2 Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá tuñi quitá caquiñi can tan jacahnú ñi tsitoho ti. Tan quitá nu caahvi xaan tan uhvi xaan tsi ñi.

3 Tacan tan coyo tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyi, tan tandihí tsa nyito tsa iyó tsitsi ndutya ñuhu can tsihi tsi.

4 Tacan tan coyo tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi.

5 Tacan tan tsiñi yu tsa caahán ángel cuenda ndutya tan catyí ra:
 —Jutu Mañi yu, yooho vaha xaan un tyin tatsí tuñi un tsi nyivi tyehen. Jutu Mañi yu, Nyoo ii cuví un tyin nda nu quitsaha tandihí tan nda cuenda vityin tacan ñi iyó maa un.

6 Tatsí tuñi un tsi ñi tyin maa ñi tsatí ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi tyin tacan taahán maa tsi tsi ñi —catyí ángel can.

7 Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandihí tunyee iñi tsi, vityin tsa tatsí tuñi un tsi nyivi tsihin tsa nditsa tan tsihin tsandaa —catyí ndusu can.

8 Tan coyo tsa tsinu cumi ángel can tsa yihí tsitsi coho ra nu ñicanyii. Tacan tan tsicoo ndatu tsi ñicanyii can tsa cahmí tsi tsi nyivi tsihin ñuhu tsi.

⁹ Tan tandihí nyívi ndasi xaan cayu ñi jahá ñicanyii can. Maa tyin vasu ndi maa tacan tahan ñi, ña nasama ñi cuhva tsicoo ñi, tan ndi ña jacahnú ñi tsi Nyoo. Tan cahán ñi ndavaha ñi siqui Nyoo, ra tsa jaquitsj tundocho can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quiti caquiñi can. Tan ndunaq nu ndacá ñaha ti. Tan nyívi cuenda ti, nda cuenda tsatsj yihí ñi yaa ñi tsa cuenda tsa nyehé xaan ñi tsa uhvi.

¹¹ Maa tyin vasu ndi maa tacan cuví, ña jandihí ñi tsa javahá ñi tsa ña vaha. Tan cahán ñi ndavaha ñi siqui Nyoo, ra nyaá andívi, tsa cuenda tsa uhvi nu caahvi ñi.

¹² Tan coyó tsa tsinu iñu ángel can tsa yihí tsitsi coho ra nu yutya Eufraates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra.

¹³ Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quiti. Iin can quitá yuhu quiti caquiñi, inga can quitá yuhu coo xaan tsa iyó ndaha inga can quitá yuhu tsa cuví ndusu yuhu vatya.

¹⁴ Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihí rey tsa iyó nu ñuhu ñayívi, tyin cañi tahan ra naha quívi tsa quívi janaha Nyoo tyin iyó tandihí tunyee iñi tsi ra.

¹⁵ Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sii xaan cua cuví tsi nyívi ndatú quívi quitsi yu tan tsa iyó vaha jahma ñi tyin quívi cua tsa yu ña cua nducahan nuu ñi tyin ña tandií ñi —catyí ra Cristo.

¹⁶ Tan cua ndu iin ra cuví rey naha ra nu nañi Armagedón tshin yuhu hebreo.

¹⁷ Tan coyó tsa tsinu utsa ángel can tsa yihí tsitsi coho ra nu tatyí, tacan tan quitá iin ndusu nu nyaá tyayu Nyoo tsitsi vehe ñuhu tsa nyaá nda andívi. Cana tsa tsi tan catyí tsi:

—Tsa iyó vaha vityin.

¹⁸ Tacan tan vaa ña maa cuví tan caahán savi tan cañi tatsa. Tan ñihi xaan taan nu ñuhu ñayívi. Tan ña tuhvá maa taán tacan tsa ndi quitsahá iyó nyívi nu ñuhu ñayívi.

¹⁹ Tan uñi nu ndata ñuu cahnu Babilonia can, jahá tsa taan. Tan tandihí ca ñuu tsa cayucu nu ñuhu ñayívi taní tsi. Nyoo ña naq maa iñi ra tsa javahá nyívi Babilonia. Yacan cuenda janyehé xaan ra tundocho tsi ñi.

²⁰ Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaa.

²¹ Tan cocoyo cuaha yuu savi nahnu xaan tsa quee andívi siqui nyívi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyívi cahán ñi ndavaha ñi siqui Nyoo tsa cuenda tundocho yuu savi can, tyin cuví tsi iin tundocho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacan tan quitá iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tshin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tshin rayí, ña tsa nyaá nu ndutya cuaha.

² Tyin ra cuví rey nu ñuhu ñayivi tsicoo ra naha tsihin ña, tan tsa cuenda ña tiví tandihi nyivi iyó nu ñuhu ñayivi —catyí ra tsihin yu.

³ Tacan tan nyehe yu iin tsa janaha Tatyí li Nyoo tsi yu, tan tsindaca ángel can tsi yu nu tsiquí nu nduve maa nyivi iyó, tan juven ñi ican nyehe yu iin ñaha yosó iin quití cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiquí ti.

⁴ Tan ñaha can nditsí ña jahma tijinda tan cuaaha. Tan cuaaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña.

⁵ Tan nyaá iin sivi tsa cuví iin tuhun xeehe tsa ña cutuñí iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihi ñiñaha tsa tsicá nuu tsihin rayi tan sihi tandihi tsa ña vaha tsa iyó nu ñuhu ñayivi.”

⁶ Tacan tan nyehe yu tyin tsiñí ñaha can jahá tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahan ñi tuhun ra Jesús. Tsa nyehe yu tsi ña, iyo xaan cuñi yu.

⁷ Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñí tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiquí.

⁸ Quití caquiñi tsa nyehe un can, juven ti cuví quití tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihí. Ican nyií ti tsa ndi cumañi ca cuhun ti nu cua cundihí cuií ti. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yóo nyivi cua coo cuií.

⁹ Tuhun ihya cuñí tsi tsa cutuñi iñi yo itsi: Tsa utsa jiñi quití can cuñí tsi catyí tsa utsa yucu tsa nyaá ñaha can nuu.

¹⁰ Tan juven ñi cuñí tucu tsi catyí can utsa rey. Uhun ra naha tsa yaha tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra.

¹¹ Tan quití caquiñi tsa tsicoo tan vityin nduve ca ti iyó, juven ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihí cuií ti.

¹² Tan tsa utsi ndiquí tsa nyehe un can, cuñí tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can.

¹³ Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihi ndatu tsa iyó tsi ra naha cua nacuhva ra naha tsi ti.

¹⁴ Tan cua cañi tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juven ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyivi yihí cuenda ra, maa Nyoo caná tsi ñi tan nacatsi ra tsi ñi. Tan n# xaan cuñí ñi nyicún ñi tsi ra.

¹⁵ Tan catyí tucu ángel can tsihin yu:

—Ndutya cuaaha tsa nyehe un can, nu nyaá ñaha tsicá nuu can, yacan cuví nyivi iyó tandihi ñuu nyihí tan ñuu nahnu, ñi caahán siin siin yuhu.

¹⁶ Rey tsa cuví tsa utsi ndiqui quiti caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoó ihñi ra naha tsi ña. Tan cua jatandii ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña.

¹⁷ Tyin Nyoo tsahá ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quiti caquiñi can tsa cundaca ñaha ti tumaa rey nda cuanda cundaa tuhun caahán maa Nyoo.

¹⁸ Ñaha tsa nyehe un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayivi.

18

Nu naá ñuu Babilonia

¹ Tsa yahá yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jahá tsa nditsin ra.

² Tan caná tsa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduví tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyivi.

³ Tyin tandihí nyivi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayivi naha ra tumaa tsa tsicoo ra naha tsihin ñaha tsa cuví ñuu Babilonia can. Javahá ra naha cuatyí tsihin ña. Tan nyivi ñuhu ñayivi nducuca ñi tsihin tsa cuaha xaan tsa yahvi tsa jatá nyivi ñuu can.

⁴ Tacan tan tsiñi yu ndusu Nyoo ityi andivi, tan catyí tsi:

—Quita ndo ñuu ihya, nyooho tsa cuví nyivi yu, ña cutahan ndo tsihin nyivi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehe maa ñi.

⁵ Tyin tsa canyí tucuti cuatyí nyivi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi.

⁶ Cuhva ndo juvin ñi maa tsa tsahá ñi tsi inga nyivi tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyivi.

⁷ Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jachnu xaan ñi tsi ñi tan cusii xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñi ñi, tsicá iñi ñi.

⁸ Yacan cuenda iin quivi ñi cua quitsi tundoho siqui ñuu can, cua quitsi tuhun tsihi, tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyivi ñuu can —catyí Nyoo.

⁹ Ra cuví rey nu ñuhu ñayivi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can.

¹⁰ Tan tsa cuenda tsa yuuhvi ra naha tundoho can, nda sava ñi cua cunyecu ra naha. Tan cua catyí ra naha:

—iNdahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaá tundoho nyehe un —cua catyí ra naha.

11 Tan ra tsa xicó ndaha tyiñu naha ra, juvin ñi cua vacu xaan ra naha tan cuihya cua cuñi ra naha tsa cuenda ñuu can. Tyin yoñi ca cua jata tsa xico ra naha.

12 Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihi nuu vitu tami tan náa ndihi tsa tsinu tsihin yiqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol.

13 Tan xicó tucu ra naha canela, náa ndihi ca yucu tsa quihví tsihin tsa tsatsi yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyi paan vaha, tan trigo. Tan juvin ñi xicó tucu ra naha quiti cuenda carga, tan mbee, cuayu, carreta, tan nda cuanda nyivi tsa cuví musu tan xicó ra naha.

14 Tan catyi ra naha tsihin nyivi ñuu can tyehen:

—Nduve ca tsa sii caá tsa tsicoq tsi un, tsa taahán xaan iñi un. Tan tsa tsindihi tandihi tsa cuca un. Tan ña cua ñihi ca maa un tandihi yacan —catyi ra naha.

15 Ra tsa xicó tandihi can, nducuca ra naha tsa cuenda tsa jata nyivi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuhví ra naha tsa cua nyehe nyivi can tundoho. Tan cua vacu xaan ra naha tan cuihya cua cuñi ra naha.

16 Tan cua catyi ra naha:

—¡Ndahví ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla.

17 ¡Tan iin yaha ñi ndihi tsa cuca xaan can! —cua catyi ra xicó can naha ra.

Tan tandihi ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandihi ra jahá tyiñu nu ndutya ñuhu naha ra, nda sava cua ndoo ñi.

18 Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoq tumaa ñuu cahnu ihya? Nduve —cua catyi ñi.

19 Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahví ñuu cahnu can! Tyin tsihin tsa cuca tsi tan nducuca tandihi yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naq tsi! —cua catyi ñi.

20 Maa tyin nyooho cusii iñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihi ca nyooho tsa yihí cuenda Nyoo. Cusii iñi ndo tyin tsa cuenda tsa javaha ñi tsa ña vaha tsihin ndo tan tatsí tuñi Nyoo tsi ñi.

21 Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyi ra:

—Tyehen cua cundihi nuu ñuu Babilonia cahnu. Tan ndi iin tsaha ca tan ña cua nyehe ca ndo itsi.

22 Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihi ca tyiñu. Tan ndi ña cua cucayu ca molino.

23 Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuví vasu ndi maa ra xico tsa tsicoq ñuu can naha ra, cahnu xaan tunyee iñi tsicoq tsi ra naha, tan jandavi

ñaha xaan nyivi iyó ñuu can tsi tandihi nyivi iyó nu ñuhu ñayivi tsihin tuhun tasi.

²⁴ Tyin cuaha xaan niñi ra cuvi ndusu yuhu Nyoo canyií tsitsi ñuu can tyin tsahñi ñi tsi ra naha. Tan canyií tucu niñi inga ca nyivi yihí cuenda Nyoo, tan niñi tandihi nyivi tsa tsahñi nyivi nan# cahnu nu ñuhu ñayivi.

19

¹ Tsa yaha yacan, tan tsiñi yu ndusu nyivi cuaha ityi andivi. Tan catyi ñi: ¡Cahnu xaan cuvi Nyoo! Jutu Mañi yo, Nyoo cuvi ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

² Tyin tsihin tsa vaha tan tsandaa tan tsa nditsa jacutuñi ra. Tatsj tuñi ra tsi ñaha tsicá nuu tsa cuvi ñuu Babilonia tsa jativi xaan tsi nyivi iyó nu ñuhu ñayivi tsihin tsa caquiñi tsa javaha ña tsihin ñi.

Tan tatsj tuñi ra tsi ña tsa cuenda tsa tsahñi ña tsi nyivi jahá tyiñu tyiñu ra.

³ Tan catyi ñi inga tsaha:

—¡Cahnu xaan cuvi Nyoo! Yuhma tsa cayú ña, ña cua cundihí maa tsa ndaa tsi ityi siqui —catyi ñi.

⁴ Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyi ra naha:

—¡Cahnu xaan cuvi Nyoo! ¡Na cuvi tsi tacan! —catyi ra naha.

⁵ Tan nu nyaá tyayu Nyoo, nacahan iin ndusu, tan catyi tsi: Jachanu ndo tsi Nyoo Jutu yo tandihi nyoocho tsa jahá tyiñu tyiñu ra, tan tyaá yahvi ndo tsi ra, nyoocho nyivi nyihi tan nyivi tsahnu.

Nu iyó vico tindaha ra Mbee Ticatyi Luhlu tan nyivi tsinú iñi tsi ra

⁶ Tan tsiñi tucu yu ndusu tumaa cuvi nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyi tsi: ¡Cahnu xaan cuvi Nyoo Jutu yo, ra iyó tandihi tunyee iñi tsi! Tyin tsa quitsaha ndacá ñaha ra.

⁷ Na cusii iñi yo tan na cutu yo tsihin tsa sii. Na jacahnu yo tsi ra, Tyin tsa tsaq cuhva tsa coo yo vico tindaha ra Mbee Ticatyi Luhlu. Tan yoo cua cuvi yo tumaa ñasiihi ra, tan ndatú yo quivi tindaha yo tsihin ra.

⁸ Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuvi jahma linu.

Tyin jahma linu can cuñi tsi catyi tsa vaha tsa javahá nyivi yihí cuenda ra.

⁹ Tacan tan quitsaha catyi ángel can tsihin yu:

—Tyaá tyehen nu tutu: “¡Sii xaan cuvi tsi nyivi tsa cua cuhun nu tindaha ra Mbee Ticatyi Luhlu!”

Tan catyi tucu ra tyehen:

—Tuhun ihya cuvi tuhun nditsa Nyoo —catyi ra tsihin yu.

¹⁰ Tacan tan tsicuiñi tsiti yu nuu ángel Nyoo can tsa cua jacahnu yo tsi ra. Maa tyin catyi ra tsihin yu:

—Ña jachanu un tsi yuhu, tyin yuhu musu Nyoo ñi cuvi tucu yu tumaa yoocho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyi ra tsihin yu.

Tyin tsa cahan ra Jesús, yacan cuvi tsa jandu iin iñi tsi ra cuvi ndusu yuhu ra, ra tsahá cuenda tuhun caahán Nyoo tsihin yo.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu ticohó andívi. Tacan tan quituvj iin cuayu cuitsin. Tan ra yosó tsi ti nañi ra Ra Nditza Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyívi, tan ndaa javahá ra tsa cañi tahan ra.

¹² Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra.

¹³ Tan nditsí ra jahma cahyi tsihin niñi. Tan nañi ra Tuhun Nyoo.

¹⁴ Tan nyicún andaru andívi tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin.

¹⁵ Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyívi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yacu vixi tsa cuví uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñi tsi catyi tyin cuxaán Nyoo tsihin ñi tan tsa tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tunyee iñi tsi.

¹⁶ Nu jahma ra tan nu sihin ra can nyaá letra tsa catyí tyehen: “Ra ihya cuví ityi nuu tsihin tandihi rey. Tan juvin ñi ra cuví ityi nuu tsihin tandihi ra ndacá ñaha naha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihi xaan cana tsa ra tsi tandihi saa tsa ndavá ityi andívi, tan catyí ra tsihin ti naha ti:

—Nuu ndo tan ndu iin ndo tan cuxiñi ndo tsa tsaha Nyoo catsi ndo.

¹⁸ Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihi ra naha, ra iyó tsitoho tan ra nduve tsitoho, tahan ñi nyívi nyihi tan nyívi tsahnu —catyí ra tsihin saa can naha ti.

¹⁹ Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra.

²⁰ Tiñ ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahá ra vatya can tsa nyityi, tan tsihin yacan jandavj ñaha ra tsi nyívi tsa tsahá cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre.

²¹ Tan tandihi ca ñi tshj ñi tsihin mityi xaan tsa quitá yuhu ra yosó cuayu cuitsin can. Tan tandihi maa saa, tsatsj xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yahá can tan nyehe yu quee iin ángel ityi andívi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu.

² Tiñ ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya.

³ Tan jacuhun ra tsi nu tsitsi yavi cunu xaan can. Nacasj ra yuhu yavi can, tan tyaá ra iin sellu yuhu can tyin tacan tan ña jandavi ñaha ca nu tsi nyívi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

⁴ Yahā can tan nyehē yu nyecú cuaha tyayu. Tan nuu can nyecú nyivi tsa ñihj ndatu tyin tatsi tuñi ñi tsi nyivi. Tan nyehē tucu yu añima nyivi tsahnya nyivi jiñi tsa cuenda tsa cahān ñi tuhun Nyoo tsa tsahā cuenda ra Jesús tsi ñi. Nyivi ihya ña jacahnu ñi tsi quit̄i caquiñi can, ndi tsi tsitoho ti, tan ndi ña tsahā ñi cunyaa tuñi ti nutyaan ñi, tan ndaha ñi. Nyehē yu nandotō ñi can tan tsindacā ñaha ñi tsihin ra Cristo tsitsi tsa mil cuiya can.

⁵ Ñi ihya cuví ñi tsa nandotō tsa jihna ñi. Maa tyin inga ndiyī ña nandotō ñi tyin cua nandotō ñi nda yaha mil cuiya can.

⁶ Siī xaan cuví tsi ñi tsa nandotō jihna tyin nacatsī Nyoo tsi ñi! Tan ña cua cahun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundacā ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Satanás nu nyiī nu nuuhñī nu.

⁸ Cua quita nu, jandavi ñaha nu tsi nyivi Gog tan Magog, ñi xaan iñi tsi Nyoo tsa iyó naniī cahnu nu ñuhu ñayivī. Cua jandu iin nu tsi andaru ñi can tyin cahun ra naha cuatyí. Cuaha xaan ra naha, tumaa cuaha nyiti yuhu ndutya ñuhu.

⁹ Tacan tan nyehē yu queē ra naha naniī cahnu nu ñuhu ñayivī. Tan tyasī nduvi ra naha nu iyó nyivī yihí cuenda Nyoo ñuu Jerusalén tsa cuñí xaan Nyoo. Maa tyin Nyoo januū ra ñuhū tsa queē andivī tan tsahmj̄ tsi tsi tandihī ra naha.

¹⁰ Tan nu ña vaha tsa jandavī ñaha tsi ñi, jacuhun Nyoo tsi nu anyaya nu cayú ñuhū tsihin azufre, nu jacuhun ra tsi quit̄i caquiñi can tan ndusu yuhu vatya can. Ican cua nyehē nahnu tundoho tacan ñi maa, nduvi tan ñiñu.

Nu cutuñī nyivī ityī nu nyaá tyayu cuitsin nu nyaá Nyoo

¹¹ Tacan tan nyehē yu iin tyayu cuitsin cahnu. Tan nyehē yu tsi ra nyaá nuu can. Tan nyehē ra nu naq̄ ñuhu ñayivī tan andivī. Tan ña ñihj̄ tsi numaa cava tsi.

¹² Tan nyehē yu tandihī añima nyivī tsihj̄, tahan ñi nyivī tsahnu tan nyivī nyihi, nyecú nyityī ñi ityī nuu Nyoo. Tacan tan nuñā libru tsa nyaá tandihī tsa javahā ñi quivī tsicoō ñi. Tan nuñā tucu inga libru nu nyecú sivī nyivī tsa cua coo nyito tsihin Nyoo. Ndiyí can cua cutuñī ñi tsa cuenda náa ndihī ca tsa javahā ñi tsa nyaá nu libru can.

¹³ Tan ndutya ñuhu nacuhvā cuenda tsi añima nyivī tsa tsihj̄ tsa cumí tsi. Tan nu yucú añima nyivī tsihj̄ tan Tuhun Tsiihí, nacuhvā cuenda nahnu añima nyivī tsa yihí ndaha nahnu. Tan tandihī ñi cua tahan ñi nácaa javahā maa ñi.

¹⁴ Tacan tan Tuhun Tsiihí can tan nu yucú añima nyivī tsihj̄ can cua jacuhun ndihī Nyoo nduvi taahan can anyaya cahnu nu cayú ñuhū. Tan tsehē cuví tuhun tsihí tsa tsinu uvi.

¹⁵ Juvín ñi ican jacuhun ra tsi nyivī tsa nduve sivī nyaá nu libru nu nyecú sivī nyivī cua coo nyito tsihin Nyoo tacan ñi maa.

21

Nu nyehē ra Juan andivī tsa tan ñuhu ñayivī tsa

¹ Yahā can tan nyehē yu iin andivī tsa tan iin ñuhu ñayivī tsa, tyin andivī tan ñuhu ñayivī tsa tsicoō jihna naq̄ tsi. Tan tacan tucu ndutya ñuhu naq̄ tsi.

² Yuhu ra Juan nyehē yu ñuu ii tsa cuví Jerusalén tsa tsa queē nda nu nyaá Nyoo andivī, nyehē yu nuū tsi. Tan siī xaan caá cucutū tsi tumaa cucutū iin ñaha cua tindaha.

³ Tan tsiñj̄ yu iin ndusu ñihī tsa quit̄a nda andivī, tan catyí tsi:

—Nyēhe jihna! Iyó Nyoo mahñu nyivi. Cua coo ra tsihin ñi. Maa ñi cua cuvi ñi nyivi ra. Tan cua cunyaa ra tsihin ñi, tan cua cuvi ra Nyoo cuenda ñi.

⁴ Juvín ñi maa ra cua nacuhva ndutya nuu ñi. Ña cua coo ca tuhun tsihi tan ndi tucuihya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihi tsa tsicoo, tsa tsindihi tsi —catyí ndusu can.

⁵ Tacan tan ra nyaá nu tyayu cahnu can, catyí ra:

—Nyēhe jihna. Jandutsaa yu tandihi maa tsa tsicoo.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cujita iñi tuhun ihya tyin cua cundaa tsi —catyí ra tsihin yu.

⁶ Tsa yaha cahán ra yacan tan catyí tucu ra:

—Tsa iyó vaha tandihi vityin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua cuhva yu ndutya coho ñi; tuhun ihya cuñi tsi catyí: Ñi cuñi tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo.

⁷ Nyivi jahá canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu.

⁸ Maa tyin nyivi yuuhvi xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayi, tan rayi tsicá nuu tsihin ñaha, ñi tasi, ñi jacahnú tsitoho, ñi vatya; tandihi maa nyivi ihya taahán tsi cuhun ñi anyaya cahnu nu cayú ñuhú tsihin azufre, nu cuví tsa tsinu uvi tuhun tsihi, nu tatsi tuñi Nyoo añima ña vaha.

Nu nyehé ra Juan nácaa cua cuví ñuu Jerusalén tsaa

⁹ Tacan tan tsitsi tsa utsa ángel tsa ndahá coho tsitú tsihin tundoho, quita iin ra tan natuhva ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticyi Luhlu —catyí ra tsihin yu.

¹⁰ Tan janaha Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janaha ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andivi nu nyaá Nyoo.

¹¹ Xiñu xaan ñuu can tsihin tsa sñ caá Nyoo. Xiñu xaan tumaa iin yuu vaha tan sñ caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi.

¹² Nñ canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsi saahnu yo naha ra.

¹³ Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii.

¹⁴ Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tava tyiñu ra Mbee Ticyi Luhlu.

¹⁵ Tan ángel tsa cahán tsihin yu, ndahá ra iin metru tsa tsinu tsihin xuhun cuaan, tsihin yacan tyihí cuhva ra ñuu can, tan yuhu cora can tan nanñ canduvi cora ñuu can.

¹⁶ Iyó cumi taahan tutun ñuu can. Tan inducu ñi tsa quihin tan tsa cañi tsi. Tan tyihí cuhva ángel can ñuu can tsihin metru xuhun cuaan can. Tan

quita uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin.

¹⁷ Tacan tan tyihj cuhva ra cora ñuu can. Tan quita uñi xico cumi metru tsa quiihin, tyihj cuhva ra tumaa tyihí cuhva nyivi.

¹⁸ Tsihin yuu jaspe samá cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoo vaha tsi.

¹⁹ Tan tsaha cora can samá tsi tsihin tandihí ñi nuu yuu si caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda;

²⁰ tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu in cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihi ña cuví amatista.

²¹ Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

²² Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyi Luhlu cuví vehe ñuhu ñuu can.

²³ Ña tsiñi ñuhu tsa jandunditsín ñicanyii ñuu can tan ndi tsa jandunditsín yoo. Tyin juven ñi maa tsa nditsin Nyoo tan tsa nditsin ra Mbee Ticatyi Luhlu jandunditsín tsitsi ñuu can.

²⁴ Tandihí nyivi tsa cacu añima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can.

²⁵ Ña cua cundasi yuhu cora tsa tsinu cahñi, tan ña cua coo tsacuaa ñuu can.

²⁶ Tan tandihí tsa cuca, tan tsa cahnu, tsa iyó nu ñuhu ñayivi cua tsa tsi ñuu can.

²⁷ Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyi Luhlu cua cuví quihvi, tan cua coo nyifo tsihin ra tacan ñi maa.

22

¹ Tacan tan janahá ángel can iin yutya cuui xaan tsi yu. Nduya tsa tsahá tsa coo nyito yo cuví. Cuii xaan tsi tumaa cuui iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyi Luhlu.

² Mahñu tsitsi ityi cahnu ñuu can tan nduvei tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi.

³ Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyi Luhlu. Tan cua jahnu nyivi yihí cuenda ra tsi ra.

⁴ Tan cua nyehe tsihin nuu ñi tsi ra. Tan cua cunyaa sivi ra nutyaan ñi.

⁵ Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyin quitsi ra Cristo

⁶ Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita ifni un itsi tyin cua cundaa tsi. Maa Nyoo Jutu yo ra cahān tsihin ra cuví ndusu yuhu ra tahān tsanaha, juvin ra jacuhun ángel ra, tyin janaha ra tsi nyívi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

7 —¡Tsa cuyatyin quitsi yu! —catyí ra.

¡Sii xaan cuví tsi nyívi tsa javahá cuhva caahán tuhun Nyoo tsa nyaá nu libru ihya!

8 Yuhu ra Juan, tsiñi yu tan nyehe yu tandihi tuhun ihya. Tsa yaha nyehe yu tan tsiñi yu itsi, tsicuiñi tsiti yu tsaha ángel tsa janaha itsi tsi yu, tyin jacahnu yu tsi ra.

9 Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihi ca ra yañi un tsa cuví ndusu yuhu Nyoo, tan tumaa tandihi ca nyívi tyaá yahvi tuhun nyaá nu libru ihya. Intuhun ñi Nyoo taahán tsi jacahnu yo —catyí ra tsihin yu.

10 Tan catyí tucu ra tsihin yu:

—Ña tyihi xeehe un tuhun Nyoo tsa nyaá nu libru ihya, tyin tsa yatyin cuii cundaa tsi.

11 Maa tyin jaña ndaha tsi nyívi caquiñi, na javaha maa ñi cuhva cuñí maa ñi. Tan nyívi iyó cuatyí, na coo ca cuatyí ñi. Maa tyin nyívi javahá tsa vaha, na jañihi ca ñi javaha ñi tsa vaha. Tan nyívi tsa jandu í Nyoo, na cunyicun vaha ca ñi tsi ra —catyí ra tsihin yu.

12 Tan Jutu Mañi yo catyí ra:

—Nyehe ndo. Tsa cuyatyin quitsi yu. Tan tyahvi yu tsi intuhun intuhun nyívi tsa cuenda tsa javahá ñi, a javahá ñi tsa vaha o tsa ña vaha.

13 Yuhu cuví ra jihna ñi, tan yuhu cuví ra cua coo nu cua ndihi quívi, tsa iyó maa yu nda nu quitsaha tandihi tan tacan ñi maa cua coo yu nu cua ndihi tumaa letra A cuví tsi letra jihna ñi tan letra Z cuví tsi letra nu ndihi ña —catyí Jutu Mañi yo.

14 Sii xaan cuví tsi nyívi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can.

15 Maa tyin nyívi javahá tsa caquiñi, tumaa ñi tasi, rayii tsa tsicá nuu tsihin ñaha tan ñiñaha tsa tsicá nuu tsihin rayii, tan ñi tsahñí, tan ñi jacahnú tsitoho, tan tandihi ñi vatya, tan ñi jandaví ñaha; tandihi maa ñi can, ña cua quihvi ñi tsitsi ñuu can.

16 Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihi tuhun ihya tsi nyívi tsicá vehe ñuhu. Yuhu cuví nyívi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

17 Tatyí Ii Nyoo tan nyívi yihí cuenda ra, ñi tsa cuví tumaa ñasihi ra Mbee Ticatyí Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyívi tsa tsiñí tuhun ihya, na catyí ndihi ñi:

—Ñaha.

Tan nyívi na ityi ifni tan tandihi nyívi cuñí quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

¹⁸ Tan tandihí nyooho tsa tsiñí tuhun Nyoo tsa nyaá nu libru ihya, cuñí yu catyí yu tsehe tsihin ndo: Nyiví tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqúí ñi.

¹⁹ Tan nyiví tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yóo nyiví cua coo nyíto, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuví tsi tacan. Naha ñi, Jutu Mañi yu, Jesús —catyí yu.

²¹ Na naquihin tandihí ndo tsa vaha tsa tsahá Jutu Mañi yo Jesucristo tsi yo. Tan na cuví tsi tacan ñi.